

ГЕННАДИЙ ЮШКОВ

Öтүвтöм гижöдьяс

Медводдза небöг

**БИВА
ЧУГРА**

БИВА

роман

МЕДВОДДЗА ЮКӨН

1

Татчө, Овкөджас, Бияр овмөдчис Югдін¹ усьөм бөрын.

Пуктис вита пыжө² медся коланасө, пуасө и көртасө, пуксьөдіс воддза пуклөс вылас Унаөс, и тойыштчис бөжалан пельснас як бадьсьыс, кытөн дзебсясис бурдөдчигас; кывтыдө нырөн петкөдіс пыжсө Сукөн³ ю шөрас, муртса лөзалан войся пемыдас. Мамыс бөрдан и коли: ловъя синмөн пө, гашкө, ог нин и аддзыв.

Шуйга пельпом вылыс, быгльөс яяиныс, доякыліс на Биярлөн быд курьштөмысь, весиг сой чөнөрөдзыс юковтліс дойыс чорыдджыка элөдчөмсьыс. Но ю кывтыдтө, визув нылыдыд, эз на ковмы помала да вынысьбөн сыныштгавнытө, сөмын өдйө могось, и пыжыслөн быд тювыштгкості позис ыджыдджыка лольштны да личөдчывны здук кежлө.

Уна эськө тшөтш көсьыліс сыннысө, шысө нин вөчліс сынан пельсыяссө корсигөн, да Бияр өти кывйөн и өлөдіс сійөс:

— Пукав!

Югдінас кольччынысө да кодсянькө йөзасьнысө Биярлы эз нин позь: юрсө эськө и тшөтшөдісны Мөскуасаыс, а то и лёксө на песісны водзпөрсө, водзөс косөдісны на пөвстысь унаөс жө кералөмысь. Вермисны и айыс весьтө на лөг пиньнысө йирны таөдз инө вольтөм уськөдчылөмсьыс. Сэки комиыс өтвылысь

¹ Югдін — Устюг.

² Вита пыж — вит мегыра.

³ Сукөн — Сухона ю.

ошкуйяскөд¹ водзсасисны, да Югдіныс эз на усь Мёскуаыслы кок улө. Айыс тай Биярлөн юрсө пуктіс-а. А тайö пöрийö паськыд вомас нин Мёскуаыслы веськаліс Югдіныс, да нинөмөн нин сійöс он бергөд. Кыгысь сы мында вынсö босьтан?

Öткөннас вөрзынысö сьёлөмыс на муткыртліс Биярлөн. Кодкө эськө вом ёртыд коліс жö. А мамыс ачыс эз вөрзвөдчы, татөн пö нин кула, дай сійöс на ымзалөмөн ыстіс-тэрмөдліс, ну пö тась юртö, ну. Дількъялөмысла и ыштис сэсса Бияр, чуйдіс мамыслы, мед каймөстлас кык нывлы, Маюрлы да Уналы, оз-ö кодныскө мунны ськөд кытчөкө выльлаө, гөзийөн олөм вылө. И шыасьлөма мамыс да висьталіс, Маюрыд пö сөмын пгыткыртчыліс да кутшөмкө сьөд кышана роч дінө и лывксьөдіс, өні пö и сыысь нин тшөтш колө повны, оз-ö удты, а Унаыд пö чегсьыліс шогысла да көсийысис, тавой и локтас.

Тадзи, Унакөд кыкөн, и лои Биярлөн чужанінсьыс вөрзөмыс. Гашкө, некөр вольтөм вылө нин.

Асьывнас, югдандорыс, найö петісны Пырас² весьтө. Йидж улысь мыччьсьөм асья кыаыс гөрда-вижа орьясян лёддзөн өшаліс вөр-пу йылас, зэра-төлаөс висьталіс пуксьысь лунсө. Да и каляыс гежөд чивьяліс; тшыгысла нин, тыдалө, кыйөдісны овтөм ва веркөссө, көні весиг посни чериыс эз яькмунылы ёкышлөн ли сирлөн усьласьөмысь. Унджык каляыс йөжгыляысисны öзын выліас, сунтолөн кырөма бужөд дорышас.

Öзынас, корас лэпталөм да кымынтьөм пыжъяс дорас, ветлөдлісны ыжъяс, а морт эз тыдав. Но кор Бияр кежөдіс асьыс пыжсө öзынланыс, моргыд пыр и тыдовтчис, котөрөн лэччис вөра нөрыссьыс вадор бужөд йылас. Веськыд киняулас топөдөмөн, сійö кутіс табья көрт пома шы. Кыйөдчысьөн, буракө, коллялөма войсө.

— Мунан он!— горөдіс Биярлы, мед оз сибөдчы пыжнас косөдзыс да чеччы.

— Эштан на вөтлынытө!— воча горөдіс Бияр, но кутыштіс пыжсө ляпкыд ваас лыбан выйын.

— Яй ковмис?

— Кутшөм яй?

— Со тай ыжъясыс!

— Шыш, чайтан?

— Код төдас!

— Ачыд он и петавлы туйө ни йөзө?

¹ *Ошкуй* — ушкуйник.

² *Пырас* — Котлас.

— Кыгысь нө? Кодлөн?
 — Югдінысь. Арийёлөн.
 — А-а,— нюркнитіс Пырасса да лэдзис шысö муланьыс, но бужöд йивсьыс эз лэччы.— Арийötö кывлі. Зэв пö тай ыкша вöлöма, некодлы кывійö сетчытöм.
 — Гашкö.
 — Мöскуаыдлы на паныд сувтлöма.
 — Коліс нö бауасьны?²— вомаліс Бияр.
 — Ассьыс тай босьтöмаöсь жö ловсö.
 — Сы вылö и ожманьыс¹.
 — А сэся и энөвтчис Мöскуаыд? Бара тай со! Аслыд нин лоö пышійыны гортсьыд. Он нö пышійы?
 — Ваыс на кылöдö.
 — Татчö он лысьт сувтны-а,— водзвыв öлöдіс Пырасса.
 — Татчö öд воасны жö.
 — Мед. Оз пö тай виавны, коді оз водзась.
 — Сöзтö öд пычкасны жö. Шедлы Мöскура улад!
 — Мый сэся вöчан?³
 — Эн тай и волöй отсөг вылад,— дөжньштис Бияр.
 — Сэтшöм отсөгыд уна юр дон на сувтö. Водзасьыс на кыз синваён бöрдöны. Мун, эн повзбöдчы! Ен югыдсö некод на оз мырдды!
 — Кодлысь нö татшöм мывсö² новлөдлан? Асланыд öксы-ыдалысь?
 — Сылысь и.
 — Но, инö. А ошкуйыс көнкö кывсьö оз?
 — Таво эз на кывсьывны,— дузъялөмөн, но веськыда вись-таліс Пырасса.
 Бияр ышловзис ныр пырыс да йötкыштчис джуджыдланьыс, бара кывтыдö нырөн веськөдіс пыжсö. Эжва вомыс эз нин ылын вöв, да сэтчö вотöдз коліс бөръяысь шуны аслыс, кодарö сетчыны. Тасянь, Эжваыскöд öтлаасьöм бöрын, юыс син водзад ыдждаммис, да сы вöсна, буракö, и нимтывлöмаöсь Вынваён³. Кывтны кö водзö сэті рыгтыв-войланьыс, Карö⁴ волан, сэся Кардорö⁵, и саридзö петан. Вит во сайын, кор Биярлы дас нель арöс на

¹ *Ожман* — война. *Ож* — войска.

² *Мыв* — сознание.

³ *Вынва* — Войвыв Двина.

⁴ *Кар* — Холмогоры.

⁵ *Кардор* — Архангельск.

тырис, сійӧ пойгӧмӧн вӧзйысис айыслы да кывтліс нин саридзӧ-
дзыс нюусис¹ кыйны. Сӧмын тай кыйсьынысӧ ӧтчдысь сійӧс
и босьтліс айыс, вадорсянныс тыдалан матыс йиас вылас, а кыз
кадсӧ пес вӧчис да би видзис лыс чомгяс ӧти ойӧстӧм нин
пӧльӧкӧд, кеслач туйӧ пӧльӧыслы. Вынваӧдыс кывтігас сэки и
бӧрсӧ гортас катігас видзӧдлывлытӧг эз ов ӧтар-мӧдар пӧлӧнас,
но юсянныс неылісӧ кузяла лажмыдінгяс ножалісны, сора вӧраӧсь
да ойдланабсь, а пожӧма нӧрысыс да джуджыдджык керӧсыс
гежӧда и сибавліс ю дінас, и быдлаын нин керкаяс ли ӧтка кола
мыччысьлісны. А коді нӧ лэдзас тӧдтӧмтӧ да пайкысьтӧ, мы-
етшкӧ и бурӧн да висьтасьӧмӧн? Да и йӧзыс эз комияс вӧвны;
ыштӧкӧ и матынокдӧ сӧрниныс комиыслӧн дінӧ, а «куим» пыд-
диыд «кольме» шуӧны, весигтӧ ас карнысӧ Кольмегортӧн ним-
тӧны, куим олысь, тыдалӧ, водзпӧрсӧ сэтчӧ овмӧдчылӧмаӧсь, да
сы вӧсна. Айыс Биярлӧн кывтігас и катігас бытӧн тшӧктыліс
сувтлыны Кольмегортас; кывтігас дӧра пома да кузь чуткӧм гоз
нуис кодлыкӧ, а катігас — нюусись кусӧ ыджыд гӧрддзым да
пельсаын госсӧ: мед пӧ оз лӧгасыны, быд пӧрйӧ лэдзасны.

Бияр падгьяліс на, кодарӧ сылы сетчынысӧ, а Эжва вомыс
матысмис нин. Дерт, кывтнытӧ кык кокныыд, кык ӧдий ва туйыд
пыж улад кольӧ, дай сувтлыны жӧ поэбӧ Карас да висьтасыны,
кыгысь да кодлӧн, и айыс кузя оз на, гашкӧ, букушӧн видзӧдлы-
ны, индасыны на, гашкӧ, кытчӧ поэбӧ овмӧдчыны, но сьӧлӧм лич-
данасӧ эз жӧ кысыс водзӧ кывтыдсӧ. И Эжва катыдсӧ пырӧ-
мысь сьӧлӧмыс топавліс. Сэні эськӧ и комияс олӧны, оз нин ков
йӧз сӧрниӧ велавны, да оз жӧ ӧд кӧнкӧ сійӧс водзасысьсӧс² моз
виччысьны. Быдӧн на ас котырнас кутчысьӧны, да выльӧн лок-
тысьыд быдӧнлысь на синсӧ вежӧ. Катша-ракаыс и то оз тӧрны
поздысиганыс ӧти пуӧ ни орчӧнас, а кысь нин йӧзыдлы, абу кӧ
ӧти вужйысьсӧсь. Эсійӧ Пырасса мозыс и вӧтласны, да сійӧс и
тӧдлан. Нывтӧ ли анытӧ, кыськӧ усьӧны кӧ, гашкӧ, босьтасыны ас
котыраныс кодлыкӧ гӧтыр вылӧ, а зонтӧ ли вертӧ³ ӧдий на тод-
мышкаласны, оз кӧ нин кодкӧ меда туйӧ кольӧд. А вермасыны и
вар⁴ туйӧ на кӧртӧн чотӧдны, нинӧм он тӧд. Абу эськӧ мыжа, да
шедлы лӧк мортыдлы киад.

А Эжва вомас, лыа бӧж саяс, дзодзӧг позтыр вӧлӧм уялӧны,

¹ *Нюусись* — тюлень.

² *Водзасысьсӧ* — гӧсть, водзасыӧм — гӧснеч.

³ *Вер* — мужичӧй.

⁴ *Вар* — раб.

да мам-дзодзёгыс водэджык казялёма пыжатё, готйёдлыны кутіс да швачёдны бордьяснас, доймёмаён этшаника лэбзьыштавны Эжва катыдыс. Сы бёрся и пьяныс ризёдісны ва веркёсёдыс пыйысыгтыр, видзёднысё мамныс гырсяёсь нин, но резь бордьяёсь на.

Вётчылан руыс и кежодіс Биярёс Эжваас, тшөктіс Уналы тшөтш сынны тыр пелысён. Век нин пуантор, вермас кё лыйны ньёввужсьыс кодёскё дзодзёгпиянсьыс. Сёмын коліс суёдны позтырсё ю шёрланьыс петалёмён да топёдны вочасён ва дорёсас, кыті кыркётшаджык, сувтёдлыны здук-мёд кежлё ньёвнас судзана да инмана выйёдз.

Көнкё вёрса ю вылын кё татшём позтырыд веськаліс, казъыд¹ на эськё и тырмис: нюзёдін ю вомёныс ёсьяс йылё, а сэся пановтін подён ю чукыльсё да бёр вётлаін дай, став позтырыс эськё и шедіс, мамыс, гашкё, лэбзис-а. А эта пасьта ютё он вомёнав мыйёнкё.

Эжва шёрлань пыжалён петёмыс да сэті катёмыс регыд и лёньодіс дзодзёг позтырсё, кутісны сувтавлыны да өтчукөрөн гёгравны, сёмын тай дзодзёг мамыс эз на эскы, мый пыжаыс эновтіс нин найёс, да дугдывтёг готйёдліс Абу нин, тыдалё, вёйшөдлытём позтыр вёлёма. И кыркётшланьыс эз ылыстчыны нанань матыстчёмысь, а сибёдыштісны мыйдакё и водзёдджык пышйём пыдди уськөдчисны бёр кывтыд. Тадзикён и пёрйөдлісны Биярёс, скөрмёмысла сійё весиг косён сьольштіс.

Пырыштёма нин лои Эжваас, мудзём вылас на мудзтысьёма, да косёмсьыс Биярёс дзугыль жё босьтіс. Эз жё усь лыйны ньёввужсьыс ньёти дзодзёгпийёс, а мед и вештёма лоё вётлысьёмсё мыетшкё. Сэтчө и рытыв тёлыс ньылыда ыркнитавліс, Эжва катыдыс буретш. И сувтёдіс шолга² да зэвтіс төвдөра³.

Катісны кык көдж на, кытчөдз Бияр эз лешмы, руав сылы ывла гөгөрыс, ыштөкө орис син вейыс⁴. Тёлыс эськё ыргёмөдз ыджыдаліс да шлопйөдліс төвдөрасё, но и визувыс ассьыс на босьтіс, табанитіс вёйыштём ныра пыжсё. Ковмыліс бытёён на сыныштавны да и бергөдөмысь на видзчысьны, мед оз путкылытчыны.

¹ *Казь* — ён шёртысь везёт, сеть.

² *Шолга* — мачта.

³ *Төвдөра* — парус.

⁴ *Вей* — нерв.

Уналы, төдөмьсү, мөрччис жө нин узьтөм войыс да нурьясьтөм
вылас сынөмыс, но шы эз сетлы нярганаос, сөмын ымөставліс руж-
тыштөмсьыс. Бур, мый сійө ыштис шуштөм туяс петнысө, юрнас
пудьясьнысө. Асланьыс вома Маюрыд, мед и мичаджык чужөм
вылас, зыкө нин эськө сойсис да килькулөмө уськөдіс, сьөд шоғө.
А, майбыр, оз нин ков ыдьясьны өні Уна вөснаыс, ачыс на сійө
вөлөма югыд вира да кыскан сьөлөма Бияр дінө, и асьсө таыс
водзөс колө жө мусаавны, синватөм оландыр сылы лөсьөдны.
Но югдылас-ө кыклы налы кытөнкө олөмыс?

Сувтисны яг бөжө, кытөн ёль на усис Эжваас да позис са-
йөдлыны пыжсө ёль чукуляс, медым оз йөз син водзын ло. Код
төдас коді вермас лоны кывтысьыд ли катысьыд, гашкө, кутшөмкө
урма¹ на, да видлы наыс дорйысьнытө. А он кө шедөдчы, пыш-
йылан кытчөкө вөрас, бөрыннас кушө жө локтан: пыжыд ни кө-
луйыд.

Сирөд кондаыс Бияр кераліс ломзөдчыны чаг да би пер-
йис; өтчид и гольскис тывкөртнас биа изьяс, чеччыштөм кинь-
сьыс пыр и трунтитны күтіс небыд да пушыд тшакыс, кытчө
сэсса инмөдліс вөсныдик чаг чикыль да пөльыштөмөн ловзөдіс
би кывсө. Мед оз уна сотчы тшакыс, пев помнас личкалыштөмөн
бөр пөдтіс трунтитанінсө.

Тайө биваыс сылы айыссянь колис. Кор шойсө айыслыс
гуас лэдзтөдзыс тубралісны сямөдөн да черсө и пуртсө тшөтш
пуктісны, бивасө Бияр эз сет пуктынысө, аслым пө кольөда, шуис.
Дөзмөдіс и пөвзөдіс на йөзсө татшөма садь төдтөмнас, гу-
асьбөмсө дзүгөмнас. Мамыс и то сыркунліс:

— А лөгасяс кө Енмыс да асьтө айыд бөрся нуас?

— Оз!— вочааліс Бияр.— Эг на ме синкымувтө корсьылы²
сыыс.

— А өні нө он корсь? Пукты бивасө!

— Ог! Мед меным вуджө. Айөсянь бурсианөн.

Мамыс шөйөвошліс, өвтчышталіс кусыня кияснас, а сэсса
чатөртчис да лөвтыштис:

— Мылыштны³, Мезөсөй⁴, айыс вирасө тайөс, мылышты!

И йөзыс та бөрын мыжапырысь моз ланьталісны, весиг тыр

¹ Урма — шайка.

² Синкымув корсьны — гусьөнасьны.

³ Мылыштны — прөститны, помилуйтны.

⁴ Мезөс — господь.

вомён сёрнитомсьыс дугдалісны. Ас кежаныс, колөкө, мөвпыштисны, мый оз өд на вылө таысь мыжыс усь.

А биваыс айыслөн и збыльысь веж петана вөлі Биярлы. Абу на став биа изйыс өткөдь, оз на быдөн чеччөд өздана киньтө тывкөртнад гольскыштөмысь, да и тывкөртгьд на чорыд колө, емдона¹ дорыша, мед эз рабсьы; и тшактө на колө кужөмөн кунваад пуны, мед майкыд лои косьтөм бөрад, чунь костад лямавлан, да пыр и кыйис чеччыштөм виж дон киньтө. Но сөмын кө тайон и чуксасис айыслөн биваыс, вөзйысис Биярлы кольөднысө! Кык пөвста кучикысь на вөлі сійө: пытшкөсыс — уськөдөм гөна да сирваын видзөм мөс кучикысь, а ортсыыс — йөра кысысь, дженьыд да топыд гөнаысь, ва оз йиджтысь, вөйлан ли зэрсьыс на суликөдз көтасян кө. И еджыд гөна кыс вылас на гөрдөн мичөдөм нойысь ас пас пуктөма, куйм пиня азьлас кодьөс, сөмын виджадөн да вывлань пиньясөн. Тайө эськө мамыслөн нин уджыс, серсө вөчөмыс, да мамыс өд абу жө мөдарө синма, ас котырө жө босьтөма. Та вөсна, ставыс вөсна, и нөняліс Биярөс колан дойыс, мед сылы вуджас айыслөн биваыс.

Бипур весьтас, мөтыр йылө өшөдөм ыргөн пөртгьяс, дзулкыны-пуны кутіс ваыс, и сэтчө Бияр лэдзис кык китыр сюра². Рок нисьө шыд кодь артмөм ныаснас и нурьясисны сэсся найө Унакөд. Кынөмпөтгыс некоднаныслөн на эз веськав, да косьтөм кельчи няклялыштисны содтөд вылас. Шупөдөм яй тшөтш пуктыліс Биярлы мамыс, позис и яйсө на вөлаыштны, но каймөстөм вылас и нурбыльгис Уна, мед пө на овлас.

Узвөма кө вөлі войсө, сідзи на позис бипур дорас кокнысө ножөдлыны, а сөйыштөм да личөдчөм бөрад и унзільыс сибаліс да лючки водлыны и тшөктөдіс. Ковмис Биярлы катөдны пыжсьыс кыкнан йөра вольсө: өтисө улысаныс вольсавлыны, а мөднас шебрасьны. Ывлаыс эськө төлаліс, но зэрсө эз на вай, да вонсө эз и вөрзвөдлы. А ваймөм бипурсө чукөртиштис да тыртыштис лыа сорыс, мед эськө оз на кус да тшын көрсө ылө оз разөд. Кодкө лоө кө узигкостаныс Эжваөдыс кывтысь-катысь, мед эськө нинөм оз и казьялы.

Син уланыс өта-мөдныслы усьөмысь өтдор нинөм на эз вөвлы ныла-зонма костын, а со и өти шебрас улө веськалісны. Кималаснас весиг Бияр эз инмөдчыв Уна дінө: орччөн и орччөн, а кыгчө да мыйла на маласьнысө, кор олөмсьыс на асьнысө шөгөдө?

¹ Емдон — сталь.

² Сюра — косьтөм рок.

Дай абу өд ичөт Унаыс, мед өввөдны сийөс, лөнһөдны мыйысҡо полысь кагаөс моз. Тадзтө өд и аслыс Биярлы ковны кутас, мед кодкө быд пөрийө такөдс сийөс, мамыс на, гашкө, вөтөн кутас уськөдчывны, пойгыны юр весьтас, конһөрөй пө дай пийө. Мый пө тай аслыд колө, сийөс и вөталан. А колө нө конһөрад пуктөмыд, мый эськө и мамыдлөн?

Но Унаыслөн, буракө, тийысьсөма на сьөлөмыс, абу инасьөма тадзтө кодзыхдасьөмысь, ыштөкө аснырнас сийө вөтчис, да та вөсна и нөбти оз матыст сийөс Биярыс. А нылыдлы, гашкө, бөрдмөныс на колө эскынытө, мый абу жө сийө веськодь зонмыдлы да коркө кадө эновтана. Шлюпкыштис и, кылө тай, Унаыс да ачыс водзджык и лысьтөдчис, малыштис Биярөс юрөдыс да пельпомөдыс. Сэки и Биярлөн кыис лыбис, кыскыштис асланыс Унаөс да малыштис юрсяныс да коскөдзых. Гашкө, эз на и дугды, да Унаыс вашмунлис сьөлөмыс бурмана: “Эн сэссия!” Та бөрын өдийө и локтис налы унмыс.

Садьмисны коркө лун шөр бөрас нин. Вылын на эськө, но Эжва кывтыдсянныс нин видзөдсис шондыс нивөю кымөрассьөм руд енэжсьыс. Кадсө коллялөм дорысь дась югыднас кытчөдзкө лөсялис на катнысө, и Бияр падъялыштис да шуис Уналы:

— Вөрзьялам. Гашкө, Совдорөдзых¹ абу нин ылын.

— А сов вавыд миян эм? — асьсө пөлө нин пуктөмөн, төждысыяна юалис Уна.

— Туис пыдөсын.

— Сетасны кө сідзтө?

— Ме ог төд.

— Огө сувтлөй?

— Сыысь и шогыс, — дольыштис Бияр.— Колө да.

Айыслөн и мукөд верстьөыслөн сөрниысь сийө ичөтсянныс нин төдс, мый Совдорас, сикт сайланыс, гөп эм и сэтчө му пытшысь лольшталөмөн ва петө, загөр сола. Да и асьныс Совдорсаыс вольвлісны Югдінас, вөлөн и пыжөн, төв ли гожөм кө, вайльвлісны сов васө вежас вылө. И эз на зэв и лышкыдасьны, медсясө нянь вылө да нывъяслы мичмөдчан вылө и чинтасьлісны. А няньсысь Югдінас асьныс дзескыда олісны, Ветйөддз² сы понда петавлісны, быдсяма кусө нулісны вежас вылас. И мичмөдчансө вөчөм вылас

¹ Совдор — Сольвычегодск.

² Ветйө — Вятка.

эзысьсö да мукöдторсö кыськö Коммуысь¹ судзöдлісны. Коді кызди кужис, сідзи и вермөдчис. Эз и чайт Бияр, мый кыв оз шулыны сылы Совдорас, сідзи и сетасны гумовтны туйс тырыс сов васö. Медтыкö оз зорьявны-а, шоймөдны сэтчö, оз кö вештысь мыйöнкö! А мыйöн öнi сійö вештысяс? Ачыс зэв коланатöг коляс? Оз öд дась вылас кытчöкö синсö кут.

Но шогтö пöжмөнад, айыс на шульвліс, ылö ни матö он волы, и Бияр тубраліс йöра воляссö да лэччөдіс пыжас, тшöктіс Уналы мукöдторсö сьöрсыйс лэччөдны. Петісны сэсса Эжва вылас да катісны водзö. Рөмдан веркыднас воисны Совдорö. Öзынас сэнi, пыжъяс дінас, морт вит-ö-квайт тыдалісны: кодi мышкырасис ректысигас, кодi сідзи сулаліс. Öти морт, видзөднысьö пöльö нин, дзоньталіс ветки пыж, сюяліс тэльöбөн сира торк бөж потасас. Сыланьö и веськөдіс Бияр ассыйс пыжсö: олöма мортыд озджык ыкша овлы да, гашкö, пырас сёрниö. Но косөдзыс эз на тшукөдчы и төвдöрасö эз на лэдз, сөмын стюркнялыштiс шолга гөгöрыс.

— Лун да вой!— юрсö копыртлөмөн шыасис Бияр.

— Аслыд!— вочавидзис пöльö.— Кодi нö, кытысь?

— Югдінысь. Арийöлөн.

— Арийöдылысь эськö ме коркö ытшкысян² вежлі да. Сов сук ылö. Öнi на ловья.

— Кодi?— вежöртанасö юаліс Бияр. Мукöдыс, кодъяс вöліны öзынас матыстчавны кутісны, да коліс пановтны найöс, асланьыс пöльöсö кыскöдны.

— Ытшкысяныс. Таво на мездыліс. Муртса лэчтыштан, и вольсьштö турунтö.

— Куим пöвста, сідзкö. Шöрыс емдонысь, а баньяйыс небыд көртгысь.

— Сэтшөм и эм. Вөчлөма тай, ачыс-ö-кодi.

— Ачыс. Он кö лөкөн казътыв Арийсö.

— Ог, кывийö бырö. Усьлөма пö тай, кывсьыліс.

— Усьліс.

— А сэсса нö.,— падмыліс пöльö юавнысьö,— Мöскуалы нин и веськаліс Югдіныд?

— Веськаліс.

— Коркö и миянös босътасны. Ошкуйсьыд мынлан на вöлі, а Мöскуасьыд... Енмыс кö оз дорйы... А тэ нö юртö сайöдан?

— Он öд керавны пукты.

¹ *Комму* — Перымса комилөн муыс.

² *Ытшкысян* — коса.

— Ме ог төд, лэдзасны оз татчө.

— Ме вылө на ката. Сов ваным тай этша да,— норасис Бияр.— Мися, туисö кө?

— Сюсь тай кылан!— вомалис кодкө матыстчөмъяс пи-
сьыс.— А водзөсыд?

— Тян өд му пытшсьыс петө, помыс оз воны.

— Мед. Гамса тай оз жө сетны көрта изсö¹ перйыны, он кө
водзөстө мыйкө вай.

— Вая на коркө, олөм кө лоө. Ог вунөд.

— Сэки кывйö воам.

— Мый нө мортсö певъяланнды?²— өлөдис пөльө.

— Абу на Емдінысь, Памалөн кеслач. Мед пуктө водзөссö и
ветлө да гумовтө, мыйда төрө.

— Черөс али мый пукта?²— ыстысис Бияр.— Сэсся ачым
ошкө пөра? Сылы пө тай оз ков черыд.

— Со тай пыжад вожаыс! Кольөд татчө дай!— гөрөктис
этшсьыс петөм ыкпашыс.

Уна быдөн сырмыліс таысь, лапъялан синмөн видзөдліс Бияр
вылө. Гашкө, инө нин и пуктис кывлөмсö. Сьысь аслас Биярлөн
дількунліс сьолөмыс да чепөсийс синваыс, сутшиктөдліс пыкө-
са курыдөн, и ыштгөкө кокньөдіс сэсся морөс тырнас лольштө-
мысь да гөгөр зэлаліс өддзан вирнас. Эз и мөвпыштлы лючки,
мыйла и кыкис пыжсьыс, көлуй увсьыс, шыпуртсö², да чеч-
чыштис ляпкыдас, уськөдчис ыкпашыс вылө:

— Асьтө кольөда пон сөйтөмөс! Вадорас татчө!

Повзбөмысла мөдыслы эз и воны мывкыдыс, мый колө эськө
пышйыны. Тасма козьянас чер ошаліс, и сійөс перйынысö кыис
усис.

— Эң! Мед олө!— вевъяліс өлөднысö пөльө.— Вөтлысьны
кутас морт вирыд!

— А менам нө көч вир?²— ырыштчөма нин вөлі шыпуртнас
да лыаас сөтыштис Бияр, а шуйга кигугнас косьыштис куткыр-
мунөм ыкпашлы сьыл тшуптас, сангысьөдіс сійөс. Көсйыліс на
чужйыны, да асьсө муртса эз ойөстөд висян пельпомас кучкөм
дойыс. Вөлісь сайкаліс лөкалөмсьыс. Но пырнысö пыжас ньөти
могмытөгыс эз на вермы.— Сов васьыд нин тан оромыдөсь! Он
кө вайыштөй бурөн!

¹ *Көрта из* — көрт руда.

² *Шыпурт* — меч.

— Кайлы, кокыд тай перыд,— кывбертіс кодкө вушгьялөм дукөса.

— А ті лөсьөдчанныд¹ Мед ог и нулы кокөс?

Чөв усьөмас кыліс ыкпашлөн киргөмыс. Көсйыліс нин чечыны сійө, но Бияр тувччис мыш вылас, сідзикөн виччысьны кутіс, коді мый шуас. Коліс эськө, мед кодкө тасянь ветліс сов ваысла да йөзсө на эз шызьбөд сиктсьыс. И кодөскө, төдөмысь, сідзи на ыстылісны эськө, кок улас куйлысь ыкпашыс на и кесйөдліс, гашкө, эз кө Уна шыась сэтчө:

— Со сета водзөстө!²— горөдіс сійө да кыскис шуйга кысьыс, лабур¹ сос увсьыс, ыргөн сойпоссө².

— Водзөстөгыс оласны!³— вомаліс сійөс Бияр.

— Пемдам татчө!³— эз кывзысь Уна.

Донатгор вылад сов ватө вежны пыр и ыштисны. Но ставнысө пановтіс ыкпашыс, лыбөдліс юрсө да висьталіс:

— Улыс кумын менам, ватланын³. Вежөй.

Кыркөтшас тыдалісны улыс кумъясыс, нель-ө-вит кер судтаөсь. Вушгьялөм дукөсаыс и кайліс сэсся сэтчө, восьтыліс вывсяньыс өти кум да лэччөдіс тыра ватлансө, пуктіс Бияр дінө. Сов сукуыс сэтөн пуксьөма нин вөлі, еджыдвидзис лөза-вижа ва пырыс.

Бияр тшөктіс Уналы шыбитны сойпоссө, а ачыс босьтіс ватлансө да пырис пыжас, йөткыштчис ляпкыдінсьыс, но эз на ылө.

— Сыныштав!³— кайтіс Уналы, мед оз кылөд пыжсө.

Ватланнас и коліс эськө босьтны сов васө, да морттуйыс на эз лэпты Биярөс тадзтө вөчны. Мед сукджыкыс и төрас аслас туйсө, кисьтіс ватлансьыс джынсө кымын Эжваас, гудраліс кинас колөмсө да бузгис лөсьөдөм туисас. Тыртөм ватлансө чөвтис ляпкыдінас: кутасны, колөкө. И кисө на пожъяліс өдийөджык мунөм пыдди.

— Коркө өд паныдасьлан на!³— кырыштліс пиньсө ыкпашыс.

— Ог и вунөд буртө!³— косөдіс Бияр.

Вой улас төлыс лөнис, а куш сынөм помсьыд катнытө да нөшта ва туйтө лючки аддзытөгыд, муткыртан визув нырсьыс кежавлытөгыд, дыр оз на тырмы эбөсыд, сөмын и атшвайөдан асьтө дай аскисө на воштан лөкысь мудзөмыдла. Сэтчө и омөлыс-ө-коді тшыкөдіс ывласө, сувтса зэр вайис, сапкысян

¹ *Лабур* — вылыс паськөм аньяслөн.

² *Сойпос* — браслет.

³ *Ватлан* — ведро.

посни тусьяса. Совдор катыдсьыс кӱджсӱ эз и ло венӱма дзонь-нас, вомынас петтӱдз на сувтисны кутшӱмкӱ ляпкыд кыркӱтша козьяинӱ.

Уна колис на пыжас, а Бияр кайис кыркӱтшас би перйыны. Дзурс пемыдас сӱтӱн, нюр турунӱс пуйас улас, мустӱм и вӱлӱ узьмӱдчынысӱ, но он ӱд кок йылад югдӱмсӱ виччысь, турдӱдчы кӱтасьӱмвывьсыд. Биваас Биярлӱн сюмӱд киль ӱкмьыл на вӱлӱ, да шыр битӱ шедӱдӱмысь сийӱ эз дзуглясь, но ӱд и тыр бисӱ на колис мыйӱнкӱ босьтӱдны. Кималаснас сийӱ чуктӱдалис матӱ коз пучерысь, кырсь костсьыс, чорзыйтӱм сир тусьяссӱ да нетшкалис кос ройсӱ, чуньяс костас лямӱдалӱмӱн сорлалис ӱтлаӱ, сяр кодбӱ, а сӱсся и вӱсни резувсӱ на посниа чегьялис да содтис сӱтчӱ. Артмӱм сярис и отсалис сылы ломзбӱдны бисӱ да кызджык резувсӱ нин пуктавны. А мыйӱн югыдджык лои кымынкӱ воськолӱн, шун кодь понӱльыс сӱсь и тась усис син улас, оз и ков керавны, сӱдзи шедӱны сюра-пеля вужнас, дзав косӱс вӱжӱн нин кулӱмысла.

Кор водисны нурьясьӱм да косьтысьӱм бӱрас узьнысӱ, Уна ӱдийӱ и ланьтӱдчис, кузя нин пондӱс лольштавны, а Биярлы сӱки и кучкис юрас, мыйла эськӱ и сетисны сой поссӱ, оз-ӱ кутшӱмкӱ лекторйӱн на бергӱдчы тайӱ налы водзӱ выланыс.

— Эз ков сетны сойпостӱ, — намыштит сийӱ.

— А мынӱм тай... ловйӱн на, вӱрзьилис Уна да весиг зур-гыштит гырджанас Биярӱс. — Солаӱс и. А код тӱдас на эськӱ...

— Сов ватӱ эськӱ ме налысь сӱдзи на пычки. Кок улын нин вӱлӱ пинь кырлысьыс.

— А вӱтчисны кӱ сӱсся?

— Нинӱм он тӱд.

— Он кӱ, и чӱв ов.

— А оз нӱ шуд вылӱ сойпостӱ новлыны?

— Шуд вылӱ и сетис мамӱ ассъыс.

— А сӱтшӱма и видзин. Ме тӱныд шулӱ!

— Кучкы!

— От! — ичӱт моз няргана вочавидзис Бияр.

— Он кӱ, и чӱв ов! — дӱзмӱмӱн нин ӱлӱдис Уна. — Шудыд выльысь на усьлӱ, а олӱмыд ӱтчид.

Нускыштит Бияр да эз сӱсся шыасьлы. Зумыд мортӱ нин асьсӱ сийӱ пуктит, коньбӱр ни шогӱ сетчытӱмӱ, ӱткодбӱн аскӱдыс Унасӱ эз и сувтӱд сьӱлӱм сертиыс ни вежӱр сертиыс, сӱмын мый нуӱдис сьӱрсъыс гӱтырпу туйӱ да видзана и доньялис, а вӱлӱмкӱ Унаыс зӱв на и олӱм кутысь, сы серти на, гашкӱ.

Аски асывнас, водзёсö катигөн, Бияр ёна на видзёдаліс шуйга кивывсьыс вадорсö, кузяла нёджйöдліс юрсö төвдöрасьыс пöлынён, кытчöдз эз помась кöджыс да петны ылодз восьса вомынас. Мед и вештысьöма лои сов васьыс, а эз на, төдöмысь, парскытөг ов совдорсаыслы төрытъя дільöдöмыс, да вермисны пановтны кöджсö весьтасалöмөн, дзебсьыны кытчöкө югдигкеж-лас да нёввужъясөн и виччысьны, коръя сйö матöджык си-бöдчас пыжнас ю чукыльсö дженьдöдöм могысь. Но, тыдалö, абу нин ыззёмаось вöтöдлынысö.

А туйыс нюжаліс и нюжаліс, ыштöкө. Эжваыс кысянькө му помсяньыс васö вайис; векняммыштöмыс на сьлөн эз казявсьы, сöмын вадоръясыс джуджыдджык нöрысаось лoisны да вөр-пу йывнас пыр ылодджык лэптисны енэжтассö. Куим лун да вой на босьтис туйыс Емдінас вотöдз. Мукöдлаас овнысö вöзыйсь-ны Бияр эз нин сувтлы, дай эз и кут лачасö, мый нимкодьюсь лооны ыль олысьыдлы, төран пö, шуасны. Пыралісны эськö синмас и ыльён на пуксьöмаыс, öтка ли кыка-куима керкаа, да сэн ли тан на коліс кодкө водзын омöльджыкө уськөдчыны. Позис и аслыс кутшöмкө нöрыс бöрийыны, гажаос да луна банаос, поздысьны сэтчö, дыр-ö нö воча чомтö¹ вöчны, но йöзыс öд абу жö синтöмось, регыд юаласны, коді пö татчö лэдзис. Бурджык нин шöйтöм дорсьыс Емдінас, Пама ордас, веськавлыны, öз-ö сйö шу мыйкө, югдöд туй помсö.

Коркө айыс дырйи на воліс на ордö Югдінас Памаыслөн кеслачыс, Камар нима, сераку² петкöдліс айыслы да тшöктöдіс көрт сайöдыас³ дорны, водзвыв и вештысис низь куясөн, дзонь көртöд коліс дісек⁴ ылас. Вежон чöж сэсся мыркис айыс колаас⁵, йöзс на отсөг ылас чукöстліс, сы вöсна мый Биярысь сэки некытчö на нинөм вöлі, сöмын на бергаліс сйö да юнысö кодлыкө ва мыччыліс, а коліс öд сывдыны на көрт изсö да луясö⁶ кисьтавны, сы бöрын нин вöлись дорччынысö. Но эз ло Камарсö ылодлöма, вашгяліс на сйö, кор вöла-доддьөн нин воліс вöчöмысла.

Эз на лысьт гырысьяс костад да эз и сюйсьыв сэки Бияр Камарыскöд сёрниö, но öд син улас сылы усьліс жö, да ньöти

¹ *Воча чом* — шöри поткöдлөм кражйысь, воча помөн сувтöдлөмөн.

² *Сераку* — шыпаса гижöд, юөр, эскöданпас.

³ *Көрт сайöд* — латы, рочөн кө.

⁴ *Дісек* — лабич.

⁵ *Кола* — абу олан керка, кузнеча.

⁶ *Лу* — форма.

төдтөмө өнi, мед и уна во мысти нин, оз на, гашкө, пукты, уськөдас на төд вылас, мый Арийөслөн пи вөлі быдмө, сөмын казътыштлы. А ош өд эз на сөй Камарсө, ловъя на, төдөмысь, да Памаыслы и кипөлалө, и адздөдлас кө Емдінсьыс сийөс Бияр, то и Памаыслы сийө вермас кыв шуны, югдінса пө тэ дінө вөзйысьсө, Арийөлөн пиыс. Колөкө, и ачыс на Памаыс ыштас, пыртөдлыны и тшөктас Биярөс сы дінө, мед синмысь синмө юасьны: Югдіныс усьбөм бөрүн, төдөмысь, асьыс на сылысь сьбөлөмсө нюкыртлө. И матө, колөкө, и пуктас Биярлысь лов-вир шедтөмсө да индас кытчөкө овнысө, некод нин сэк оз лысьт чиркны сылысь шуөмсө. Абу өд Памаыс сөмын вежайка, коми Енъяссө медыджыд видзысьыс, став өксысьыс на сийө вылын тани, Эжва вожас. Сы вөсна и Пама¹ артыс² серти, а абу нимысла.

Тадзикөн Бияр лыбзьөдіс асьсө Емдінас зілигтыр.

И воисны со Унаыскөд сэтчө, лун шөрөс на эз вөв. Шондыс эз на веськыда кучкы мылькъясөн орласян нөрысас, көні позтыръясөн пукалісны керкаясыс. Öти мыльк, шөракостас кымын, джуджыд тымөдөн³ на кыпаліс, изйысь да муысь лэптөмөн, и помся кер пом на тымөдсьыс сувтса чурвидзис. Та вөсна нинөм эз и тыдав сайсьыс пу йывъясысь өтдор.

Эжваас усигас Емваыс бура кузь изъя бөж пуктөма да лөнь кулига артмөдөма, öзын вылө и быттьө. Пыжыс сөмын этша тыдаліс вадорас: муналөмаось, буракө, йөзыс коді кытчө шондіа мича луннад. Öтнас кутшөмкө ичмонь, яя гөгрөс пидзөсьяса, пожъясыс ваас келөмөн. Ньөти эз и повзвы сийө төдтөмъясыдлөн воөмысь, казяліс тай Биярлысь видзөдлассө да личөдліс кок вожсө, лэдзис көтасьөм бөждорсө.

— Оланныд-выланныд! — чолөмасис Бияр.

— Олам! А кытысь нө, кодъяс?

— Ылысь.

— Ылысь, а гөтыртө кыскалан?³ — чуймис ичмонь. — Абу өмөй горт олысь сийө.

— Миян абу на гортыс.

— Пышйөдін али мый?³

— Пышйөді.

— Сэсья Пама дінө?³ Мед мыльштөм корас Енмыслысь да гозйөдас?³

¹ Пама — елин (греческой) кывйысь, став вылас веськөдлысьыс.

² Арт — чин, рочөн кө.

³ Тымөд — дорйысян потшас, лэптөд; вал, рочөн кө.

— Гашкө,— сідзи на вочавидзис Бияр и лигышмунлі ним-кодъысла ичмоньыслөн чуйдөмысь: гашкө, збыльысь мед и гоз-йодас Памаыс сійос Унаыскөд?

— Со өд кутшөмөсь!— дольыштіс ичмонь, но эз дойдана, а нюмсермунлөмөн, ыштөкө аслас на вежыс петалис.

Бияр шуис Уналы, мый оз, гашкө, дыр ветлы да мед овлас сійө вадорас, со тай ичмоньыс сёрни вылас, а ачыс кышаліс вылысас көрт сайөдьяссө да ошөдіс шыпуртсө. Эз вөв лөсьыд дай муссө на зыртіс сылысь горттөм коньөрнад, бөж легө-дысьнад, кодкө водзын петкөдчылөмсьыд, тшөтш и Пама водзас.

— А Камарсө тэ төдан татысь?— юалис Бияр ичмоньылысь, көсьыліс нин вөрзыны да.

— Коді нө сійос оз төд, мын¹кутысьтө!— дузьялөмөн вись-таліс ичмонь да веськөдчис пыдзыртны пожьялөм ки чышкөдсө. И повзьөмөдз чуймис Бияр вылө:— Ошкуй нө тэ?

— Абу.

— А кодөс нө повзьөдлан?

— Некодөс ог.

— А Камарөс юалін да?

— Ме өд бур кузя. Эз на кө вунөд менө.

— Со тай лэччө.

Тымөда мыльк вывсынь зөм кырийөдыс лэччисны куимөн. Кыйөдөмаөсь, буракө, кысянькө да адзвьялөмаөсь Биярлысь лөсьөдчөмсө, паныд и петөмаөсь сылы, лысерсө жуглыны дасьөсь. Шөракостсаыс шыпурта жө вөлі да көрт сайөдьяса, а кыкө-ныс — кипеляөсь².

Бияр вөрзис налы воча, да кыр джынъяс кымын и матыс-мисны син на син. Шыпуртаыс Камарыс и вөлөма, сөмын тай пөрысьмыштөма чужөм вылас, усьөмаөсь банъясыс да йөгөн төдчөдөмаөсь черлыяссө.

Бияр копыртчыліс сылы да вөзийсыян нюмысла калькөдліс вомсө.

— Коді нө, кытысь?— юалигмозыс бөрвыв доровтчыліс Камарыс. Тешкодъ сылы лон төдтөмыдлөн нюмыд.

— Югдінысь, Арийөлөн. Волін тай миянө.

— Мыйла волі?

— Көрт сайөдьястө вөчөдны. Вөла доддьөн сэсса нуин,—

¹ Мын — дон босьтөм, пошлина; мын — мынтысьны.

² Кипель — оружие, кузь воропа чер важөнсө.

висьтасис Бияр. Эз и гөгөрволы, мый Камарыс кывсө сылысь кыйис.

— Өтпертаса и эм. Кузь ныра. Син аканьясыд вежось и. А пыжад нө коді?

— Гөтырпуй.

— Му корсянныд?

— Корсям.

— Сідзкө, эн на Мөсқауыслы пидзөсчаньясылы?

— Эг на. Сійөн и каті татчө. Мед шуө Памайд, мый шуас.

— Мый ме шуа, — лэптысьыштис Камарыс.

— А мый нө тэ шуан? Оз мед сибөд некытчө?

— Ог. Овкөджө чуйда. Сэтчө колө мортыс. Пыкөд олысьыс. Гашкө, ачым тшөтш катла.

— Инө! — шешмунліс Бияр. Нинөм сэсса эз и юав водзвыв ошкыштөм бөрад: ылын-ө на Овкөджөдзыс да абу али мый сэтөн пыр олысьыс. Дай эз и кивыв вөв өні сылы ыдъясьнысө, Камарсө дөзмөдны. — А кор нө Пама дінад?

— Өні и кайлам. Сераку вөлі гижө, да помалис нин, гашкө.

Камар бөрся Бияр кайис тымөда мылык вылас, морт төрмөна векныдик өдзөсөд пырис пытшкас, керкаяс паныдводзас. Кыкөныс, кипеляыс, өдзөс дорас и колысны.

Камар тшөктис Биярлы сулавлыны, а ачыс пырис содъя лэбулөд джуджыда сигөртөм да вылі өшиньяса пасыкыд керкаө. Өшиньясыс рудова лөзалисны сылан йи рөмөн, сы вөсна мый вөліны эз өш гаддысь, а мисаысь¹. Керкаяссыс шуйгавылын, гөгөрыс таялөм эжа шөрын, тыдалис и вежа кыддзыс, потласьөм кыз сьөд парчөсь нин пөрысьысла, сөмын вывланьсө вочасөн шыялан да едждан сямөда пучера. Но некутшөм куяс сэн эз өшавны; гашкө, төвнас өшөдлывлісны, кор кевмысьнысө йөзыс волісны, а гожөмнад кысь босьтан дона кутө дай мыйла и өшөдан гагыйды сейнытө?² А вот ермөгысь² вундасьясөн³ вежа кызсө мичмөдөма вөлі, көртавлөма уліджык вожъясас.

Дырсө Камар эз и вошлы, петалис содъя лэбулас да чукөстис Биярөс, нуөдіс өти посводзөд да мөдө на катөдіс, пыртөдіс ыджыдкөдь вежөсө да тшөктис колыны сэтчө шыпуртсө, и вөлісь восьтіс өдзөссө орчча вежөсас да кежыштис, тапкыштис Биярлы мышкас, ачыс эз нин пыр.

¹ Миса — слюда.

² Ермөг — шөвк.

³ Вундас — лента.

Джын югидас велавтӧм на синмысла Бияр лючкисӧ эз и аддзы. Кутшӧмкӧ тай морт сулаліс сылань чужӧмӧн да бовйӧдліс веськыд киас зиялыкыштысь йитӧс¹. Кык ӧшинь костас, пызан вылас, ӧзйис эськӧ гас², но морт мыгӧрыс сайӧдіс сійӧс.

— Югдінысь, шуан, лоан, Арийӧлӧн?³— ньӧжмыда шыасис Памаыс.

— Сылӧн.

— Кывлі айыд йывсьыд. Усьлӧмсӧ и. Мед лолыс сылӧн лым еджыд лӧбачӧн пуксьылӧ Енмыслӧн сойыс вылӧ!

— Медъя!

— А ӧні тӧнсьыд кокув мутӧ мырддисны. Сідзи кӧ быттьӧ?

— Сідзи,— кайтіс Бияр.

— Юӧр воліс, сей пӧ нин тальӧдӧны комисӧ, киӧ шедӧмсӧ. Сей из³ вӧчӧдӧны.

— Да, вичко лӧптыны. Мед Мӧскуаыслӧн и лӧӧ гӧгӧр.

— Мӧскуаыд абу ошкуйыд: воліс и муніс. Кытчӧ локтас, сэтчӧ и пукяс.

— Сыысь ӧд и сукмӧ вирыд. Оз нӧ?

— А ме инӧ и пукта татшӧм мывкыдтӧ,— сюртчис Пама.— Сӧмын тай абу став комиыс татшӧмӧсь. Пырасын, кывсьӧ, вожалӧма нин квийыс ӧксыыслӧн.

— Йӧзыслӧн и ... Ме тай сӧрнитлі ӧтикӧд да...

— А тайӧ и медся полӧгаыс⁴. Кор асьсӧ войтырыд вузалӧ да бырӧ му вывсьыс.

— И комиыд бырӧ, воштас кӧ ас шодсӧ⁵.

— Енмыс мед менӧ лыйӧ сэтчӧдз биа ньӧвнас!

Ёна и парскис, тыдалӧ, Памалы комиыдлы татшӧм помтӧ туналӧмыд, но и вомавны Биярӧс, лӧгӧдчыны сы вылӧ эз жӧ вермы. Ветлӧдлыны кутіс вежӧсӧдыс.

Вӧлись Бияр бурджыка видзӧдаліс Памасӧ. Вӧлӧмкӧ, абу на и пӧрысь сійӧ, ар комына кымын, багыля нигӧн тошка да пыртсима⁶, потӧм кор кодъ лӧсталан том синъяса, джуджыд шыльыд кымӧса. Юр вылас сылӧн вӧлі ки вомлӧс судта гӧгыля юртыр⁷,

¹ Йитӧс — чеп.

² Гас — дозйын ӧзъян би, лампа.

³ Сей из — кирпич.

⁴ Полӧга — страшнӧй, страшилище, рочӧн кӧ.

⁵ Ас шод — вӧля.

⁶ Пыртсим — ус.

⁷ Юртыр — юрын новлан, тунс кодъ.

сюмөдысь-ө-мыйысь вөчөма, лөз нойөн кышөма да гөрдөн пернаалөма. Лөз нойсыс жө, немечысь-ө-кытысь вайөмысь, вөлі и кок улөдзыс йөрдөсыс¹, веськыдладорсяныс кизялөма ыргөнысь йитвежтясөн. Морөсас, эзысь йитас йылын, өшаліс зарни рубөж², чөж³ серпаса, а меж сюра⁴ тшалөка⁵ тасмаас чукри⁶ пуртөс.

Вежөсас, войладор берд⁷ дінас, сулалісны пуысь вөчөм ентяс, потласьөмаоь нин важысла, лясмунөм чужөмаоь, а на костын, джуджыд кока пызан кодь вылын, сулаліс ань чужөма енлөн выліыс, юрсяныс да нёнөдзыс сөмын и вөчөма, и абу ыджда сертиыс, а ичөтмөдөмөн, дай, гашкө, дзоньнас зарниысь кысьтөмөн. Висьталөны тай, уна сө во сайын на пө вөлөма Зарни Аньыс да коді сөмын абу көсийлөма шышкавны сійөс, весиг руочиыс⁸ Вынва вылас вольвлөмаоь, саридзсяныс пыравлөмаоь. Гашкө, сійө на Зарни Аньыс и вөлі тайө, кодөс Кольмегортсаыс өні на Ёмалаөн казэтылөны, а Ёмалаыс на ногөн Ен и лөө. Кыдзи нө эськө сійө татчөсө веськаліс? Но кывийыс эз бергөдчы Биярлөн юавнысө Памаыслысь, сідз нин со мортыслы дыгыд.

Памаыслөн гижан пызан вылас, көні өзйис гасыс, куйліс нель пелөса сераку, ыж ку джынийысь кымын, сирваөн гырыся шыпалөмыс абу на косьмөма, волялө би югөрсыйыс. Сераку вылас и чөвтис сэсса Бияр синсө да дыр эз вештив, ыштөкө зіліс лыддыны, а эськө ас вылас дөзмис сыысь, мый эз вермы вежөртны.

— Кужан нө лыддысьнысө? — юаліс Пама.

— Ог, — повзьыштөмөн висьтасис Бияр, мед оз чайт Памаыс гусьөнасбөмөн.

— Пырасса өксыөс өлөді, да ог төд, инлас оз сылы. Косьмас, да тшөкта кылөдны.

— Оз кө өд кывзысь, асьсө позьө жө топөдлыны.

— Топөдлынытө абу сьөкыд. Да йөзсө пурсьөдан, комиссө комиыскөд, — ышловзис Пама.

— Ме, колөкө, тшөтш ветла?

— Кытчө?

¹ Йөрдөс — кузь дөрөм, вылыс кышан.

² Рубөж — бляха, паса көрт.

³ Чөж — утка.

⁴ Меж сюр — свастика.

⁵ Тшалөк — тасма прага.

⁶ Чукри — чукля йыла пурт.

⁷ Берд — стен.

⁸ Руочи — викингтяс.

— Пырасас. Серакутö кылöдны. А, Ыджыд öксы?!
— Он. Тэ Овкөджö катан. Сэтчö колö меным пыкөд олы-
сьыс.

— Абу нö сэн йöзыс?

— Эм. Но асьныс полöны йöграссыс¹. Бара нин виж Сю-
дöйс усьласьö. А колö су² пуктыны сылы. Овмөдчан кö сэтчö,
и менам тан лов-вирыс шедö Эжва катыдыс вöсна.

— Овмөдча, — кöсийысис Бияр.

— Абу пö тай öтнад?

— Абу. Гөтырпукөд. Пыжö коли. Зэв сьөлöма.

— Гозйөдтөмөсь на, сідзкө?

— Гозйөдтөмөсь.

— Эн на жö öд вөрзьöдлы?

— Эг. Абу öд яйвыв ош. Дай горттөмөсь на, би ни ва.

— Абу на, буракö, лун шöрыс, — шпыньмунис Пама. — Пет
да чукöст, мед котөрөн татчö. Сэсся кытшовтöй вежа кызд гөгöрыс
да енколаас³ мунйö. Ме локта.

Чукöстны Унаöс Биярлы дыр эз ковмы. Сöмын тай Унаыс эз
на котөрнад уськөдчы да нöшта кыр паныдтö, кутшöмкö полöм
падмөдис на сийöс, табанитөмөн ыштöкö и тувчалис. И кинас
өвтöмыс Биярлөн эз öдийд сийöс, да скөрмөмвывсьыс паныд и
лои лэччывны.

— Тэрмась, шуöны!

— Кытчөккө?

— Гозйөдны кöсий миянöс Памаыс.

— А-а, — муртса вашмунли Уна.

— Лок öдий!

— Ог.

— Мыйла он?

— Абу öд садьтөм.

— Он нö кöсий?

— Кöсья.

— А мый нö ыкшаасян?

— Абу öд ыж.

— Лун шöр со лö. Оз позь сы бöрын.

Вöлись мөрччис Унаыслы тэрмөдлөмыс, сетчис Биярлы ки
помсьыс кыскынысö. Кайисны мылык йылас да пырисны тымөд

¹ *Йöгра* — öнiя ханты-манси.

² *Су* — граница.

³ *Енкола* — кевмысян керка важöнсö, öнi — космос.

саяс, шондi сертиыс кытшовтiсны вежа кызд гөгöрыс. Неылын найöс виччысис нин Камар, да сийö и нуöдiс сэссия енколаас, тшöктiс сулавлыны пыранiн водзас. Öдзöсыс гурийыв восьса вöлi, да пытшкас тыдалiсны пу енъясыс, быгöдöм еджыд дöраысь юр кышöдъясаöсь. Мед оз воймыны ывла кодзидсьыс да улиссьыс, шабдi выйöн-ö-мыйöн найöс мавтöмаöсь, гождъя вижöн и рöмалiсны, ловъякодбöсь.

Локтiс Пама, абу нин тасмаа, а паськыд сера вöня, кыкнан пельпом вылас ки чышкöдъяс павкнитöма, веськыд киас эзысь лöдан¹. Сийö нинöм эз шу, сöмын синбöжалiс Унаöс да пырис енколаас, кымынкö здук мысти бөр петiс лöдан тырыс нин ваöн. Кötöдiс веськыд пельпом вывсьыс ки чышкöдсö да ниртыштiс Биярлысь чужöмсö, кымöссияныс увлань, тшöктiс лöсьöдны содзсö да солькнитыштiс васö, тшöктiс пожъявны киясö да чышкыны, та бöрын уськöдана шыбитiс ки чышкöдсö эжа вылас. Сэссия ставсö жö тадзи вöчис Унакöд, весиг бурджыка на, кыкнан бансö на сылысь ниртыштiс кötöдöм ки чышкöд шöрнас и вомсö öтарö-мöдарö.

Вежа ванас сöстöммöдöм ныла-зонмаöс Пама корис пырны ас бöрсяыс енколаас, пуктiс лöдансö пос помас, кытöн сулалiсны енъясыс, да выльысь копытчылис налы улöдз, сэссия чатыра юрöн лыбöдiс киясö вывлань да шыасис:

— Синмөн судзтöм Ыджыд Енмöй, шондi югöрөн видзöдысьöй, му пуксöмсянысь миян Мезöсöй, мылышты аслад помасьлытöм бурнад став ловъясö и таянöс кыксö, шоныд да югыд вираяссö, сет налы овнысö да йылöмасьнысö! И тi, миян муывыс енъясöй, энö воштылöй найöс син увсьыныд да видзöй ваысь и биысь, вошöмысь и бырöмысь, гусяысь и пежысь! Енвевтсянысь и тасянь, му вывсянысь, локтан бурсиöмөн и гозийöда ме найöс нэмыс кежлö! Ина²!

Пама тшöктiс гозийöдчысьяслы киясьны да разис косьыс сера вөнсьö, гаровтiс сийöн да гөрöдалiс киясьöмсö, и ассъыс тшötш кисö пуктылис. Бöрыннас, кор личöдiс сера вөнсьö, эз и кöртав сийöс аслыс, а мыйлакö Уналы сетiс:

— Мед тiян и лöб,— шуис.

— А миян нинöм эз ло водзöсным! Нинöм эгö вайöй ни! Куш асьным!— родiс Уна.

— Водзöсыд коркö воас на, лэдзанныд кö вужтö Овкöджас.

¹ Лöдан — кöш.

² Ина — мед инö, мед тадзи и лöб.

— Лэдзам,— эскөдiс Бияр.— Дась öнi и катам.

— Пемданныд. Аски Камар нуодас.

— Ме шулi нин,— шыасис сийö ывласяньыс.

— Висьтав, мед узьтöдöны том гозьясö асыв керкаас да пывсьöдöны шондi лэччыгöдзыс,— тшöктiс Пама.— И аски туяныс мый колö пуктöны.

Артыштны öтпырийö ставсö, мый налы усис талун кежлö и водзö вылас, том гозья эз на вермыны. Личыд сьёлöмабсь и шойöвошöмабсь, петiсны енколасьыс, а на бöрся и Памаыс. Но сийö сэсся эз нин накöд сёрнит, такöдана лапкöдыштiс кияснас да мунiс. А Камарыс эз эновт найöс, пöдлалiс енколасö да вешнякалiс öдзöссö, и нуöдiс асыв керкаас. Бияр эськö вöзйысьыс сылысь лэччывны пыж дорас, идравны шолгасö да тöвдöрасö, сайöдны колуйнысö йöз синсьыс, но вочавидзём и кылiс, эштан на пö пывсянöдзыд, дай пызан сайö пуксьывлöны та кадас.

Вайöдiс Камар асыв керкаас да гөгöртiс синнас, ставыс-ö лючки, и бөр петiс, сöмын и удитiс шуны, виччысьлöй пö муртса, сёйны ваясны. Бияр да Уна кöтшасас на и колисны, эз лысьтны дзик пыртö ни пуксьыны, ни довьялыштны. Шуны кö, тöv йыв йöз¹ на и вöлины найö Памаыслы, и ыштöкö водзасьысьясö пöрисны. Недыр мысти и кылiс посводзсьыс кодкö локтысь да пырис эзв нин пöрысь пöчö, вешкырöсь чужöма, но вылö пуктана чим гөрд юрной². Веськыд киняулас сийö кутiс рузумөн вевттöм паськыд пöв, вывланьö ляпкыдик дорöсьяса.

— Ен бурөн. Локтöй, сёйыштöй!— вежавидзана небыда шуис пöчö да ректiс пызан вылас вайём сёянсö.— Бöрти пывсьыны чукöста, шондi лэччандорыс.

— Пуксям?³— юалiс Уна пöчö мунём бöрын.

— Ог öд видзöдны кутöй,— вочавидзис Бияр.— Йöйман сiдзтö. Оз нö сюмав кынöмыд?³

— Сюмалö.

— Мый сэсся юасян?³

— Тайöс öд он чайт.

— Со тай, син водзад. Сёй, пуксьы да.

— Ме ставсö шуа. Сэтшöм нин быттö коланаöсь Памаыс-лы.

— А коланаöсь и эм, гашкö.

¹ Тöv йыв морт, тöv йыв йöз — тöдтём, виччысьтём.

² Юрной — аньяслөн юрас новлан.

— Вештысьнытö өд ковмас жö. Юрнад на, гашкö,— нюкырт-чыліс Уна.

— Эн курксы,— вомаліс Бияр.

Азя шыд, зөр шыдöса рок да чöдъя йöв вайöма вöлі пöчöыс. И нöшта кык ид нянь пöтöс вылас. Сьöлөм бурмытöдз и лои сөйöма. Уналөн весиг мыдсаліс на ид няньыс, да Бияр нин ко-ляссö помаліс, чöдъя йöвнас кылöдіс. Сöмын тай водзисьыд видзчысьöмысь эз бурмыны сьöлөмнаныс. Чеччөм ли вешйыштөм пыдди гыравыласисны пызан вылас да ышлолалісны чöv усьöм-сьыс, бергöдчылісны воча синсьыныс. Ыштöкө сöмын на вöта-сис да садьмис, Бияр ыдъясис ловсö кутышгалөмөн, эз сяммы вежөртгысö помöдз Памаыслысь татшөм лышкыдсö. И Унаыс вежсьыліс öти пöрйöысь мөдö: нюмсермунліс долыдысла да тірмунліс йирмөгысь моз.

Дай асьв керкаыс тайö, кытчö найöс лэдзисны войковтнысö, эз и пыр олана вöv видзöднысö: гор да кык сёр, да узьлан вылыс джодж, вольпаса и быдөн. Тöдöмысь, эз на быд вольысьöс татөн узьтöдлыны, сöмын нимаджыксö. А мыйөн нö Бияр нималіс на, мыетшкö и Арйöлөн пиыс? Эз öд öксыөн вöv айыс Югдінас, весиг баярнас¹ эз вöv, сы понда кө нин лэптыны. Сідзкö, водзö на видзöдö Памаыс, Камарыслысь кывсö öктö, мед пиньөн и гыжйөн сулаліс Бияр Пама дорыс, быд чукöстөм вылö уськөд-чыс да му сюръяөн и вöлі Памаыслы кытөн ковмас. А мый нö таыс лёкыс? Абу öд тайö кедзөвтөм ли увтыртөм. Став комиыс вöсна шогалö Памаыс, да оз нö ков сылы дорйысьыс, пыкөд олысьыс?

Та йылысь и висьталіс Бияр Унаыслы, весигтö ошыы-сьыштөмөн на, чайтіс, мый инасяс сійö да оз нин кут абутөм полөмас сетчыны. Но эскөм вывтійыс на Унаыс ассьыс до-льыштіс, водзөсыд пö кык водзөса на, он нин лысьтылы öні огтö некытчö шуны.

— А тэ нö көсьян, мед овны лэдзисны да со на кызди ыдждөдлісны, да эз сэсса и могмөдчывны? — дузгысьліс Бияр. — Сюсь абу!

— Узьнысö татчö эз ков кывйö сетчыны,— вочааліс Уна.

— Ывлаын бара?

— Нира ордын позис.

— Кутшөм Нира ордын?

¹ *Баяр* — бо + яр (ен — югыд), елин (греческөй) кыв, важкысянь тöдса комиыслы; лöсьялö рочас пырөм «баяринлы».

— Қоді тай пожъясис вадорас. Ме сыкөд төдмаси нин. Корис и. Отнам жө пө керкаын-а.

— Мыйла отнас?

— Вөйлөма верөсыс.

— Сэки мед и шуин, енкола дорас. Сөйөм бөрад өні... Пывсян на лоө и.

— Ог ме отлаад пывсыс.

— Эн йөйтав.

— А юр яндзимыс?

— Мыйыс?

— Пасьтөмсьыс и ставсьыс. Он нө... мыйкөкер?

— А сытөг нө? — дзерөдана ышмунліс Бияр.

Уна кыскышталіс нырнас да синвасө на лэдзліс, но Бияр эз нин пыдди пукты сылыс татшөм пыксьөмсө. Дай абу и мича, йөзыслы на шемөс том гозъяйдлөн торйөн пывсьөмыд. Сы вылө и найө, мед кага лөсьөдны.

Пывсянөдзыс лун сьөмөсыс Уналөн няргөмөн и коли. Кор лэччылісны вадорас, мед идравны вой улас пыжсө да вежан улыс паськөмнысө босьтны, сэки тай сійө вунөдчыліс, а воисны керкаас, и бара никсыштавны пондіс, скөрмөдліс весиг Биярөс, дась вөтлыны понйөс моз ывлаө. И вөтліс, гашкө, да синваыс на Унаыслөн бөр небзьөдіс, мывкыдсө сетіс: абу өд зон сійө, надз¹ синва войта, сылы бордыштөмыс и ас кокньөдыс, бур водзас на лөсялө; овлө тай нывъясыдлөн, нюмыскөд тшөтш синваныс петалө.

Локтіс сэсся пөчөыс нуөдны пывсянас да кутыштлөмөн такөдіс Унаөс:

— Бөрдөмыд тай!

— Бөрді.

— А сідзи и колө. Ныв синваыд верөс сайө петігад сөдз мөс² кодь. Енмыслы муса и. Сөмын эн вунөд-а пывсян бөрад...

— Мый ог вунөд?

— Юрситө шөри сынавны, кык чикысь³ кыны.

— Ог, төда өд, — висьтасис Уна.

Пывсян өдзөс водзас, вөсньыдик зіб вылын, өшалісны куим корөсь. Отиөс, шөрсасө, пөчөыс пуктіс вольөс вылө, тшөктіс чышкыны кокнысө коджас пыртөдзныс, а кык кольөмасө сетіс Биярлы да Уналы кианыс, да шуис, көтөданныд пө пөсь ванас да

¹ *Надз* — скуп.

² *Мөс* — ключ, ва босьтанін, ва вож.

³ *Чикысь* — көса.

вочаодлөй вывлань йылөн. И содтөд на висьталіс, куимнан коросьсө пө перйөма торъя кызьясысь, ас костаныс ылысаясысь, синмөн тыдавтөмьясысь. Тадзи пө колө, мед том гозьяйд вөлись адзылісны өта-мөднысө, кутшөмөсь вывтырнаныс.

Пывсян бөрас, сөйштісны рыгтясө да узьны нин водісны да, Уна вель дыр на дзугласис, ывлаын кынмысь пон моз гөгыльөн сюркясис, и вом дорнас костөн-костөн тяпкөдчис, нывсьыс усьөмсө, тыдалө, шогаліс, курыд дульвасө бор кылөдіс. Эськө быд нылөс коркө татшөмторйыд суө и оз на быдөн, төдөмысь, вывтітө дзуглясьны, төдөмөн виччысьөны да инө пуктөны, но абу өд быдөн өткөдьөсь, кодлыкө и юрыс усьөм кодь водзпөрсө дзонвтө жугөдөмыд. Гашкө, тайө и медся бурьыс да ас мывкыда нывъясыдлөн? Эз и лысьт Бияр выльысь пондывны Уна дінас, маласьөмысь на асьсө кутөдіс да мышкөн бергөдчис, сідзикөн и личөдчис ышкөпошкө лолышталөмөн.

Керкаас пөттөдзыс узьөмыс веськөдіс ывлаас уна вой нетшкысяна узьөмсө. Татшөм лигышнас, ыштөкө гөгөр разьсьөманас, кор синнад лапйөдлөмтө сөмын и кылан, Бияр важөн нин эз садьмыв. И Унаыс, регыд жө сы бөрын и садьмис да, ружтыштіс сьөлөмыс бурмана да ачыс нюжөдіс кисө, суюис Биярлы сой улас. Дырөкө чөв олөмөн и куйлісны, лөсьыдасисны сыысь, кор кывтө шуны дышыд босьтө.

— А ме вөтаси,— шуис сэсся Уна ошйысьөмөн.

— Мый?

— Быгтөкө лыйин тэ өти дзөдзөгөс. Адзылім тай позтырсө.

— Эг вермы да,— вочааліс Бияр.

— Вөтнас өд вермин. Пуны тшөктін. И ме куштыны куті. А төла вөлі, да гөныс ки улысь и лэбө.

— Но и мый сэсся?

— А гөныд бур водзын!— эскөдіс Уна.— Мамө на висьтавліс.

— Мед, сідзи кө,— сюртчис Бияр.

Унаыслөн тайө вөтыс и лои налы бурсийөм кодьөн водзө туяныс. И мыетшкө весиг иніс нин. Воліс пөчө да висьталіс, мый асья сөйтөгыс оз на лэдз найөс, мед оз на и лысьтны тшыгывывсьыныс вөрзыны, лөкнысө сы вылө тадзикөн кольны. Сэсся пыраліс Камар да висьталіс, мый ывла вылас налы лөсьөдөма өттор-мөдтор да мед лэччөдасны сьөрсьыныс пыжас, и ёнасө оз нюжмасьны, рыгтя шондінас колө нин воөдчыны Овкөджас.

Кык ыджыд туис да кык кучик сепыс¹, лэпгыштныгө сьöкыдöсь, лöсьöдöма вöли лэчöднысö. И чайтныгө он куж дай донтö на полан сетныгө ставсьыс, мый вöли пуктöма: туисъясас пызь да шыдöс, китырöн видзöмөн кө, йи сувттöдзыс тырмас, а сепысъясас — рудзөг койдыс да ид койдыс. Тöдöмысь, эз на сöмын козин туйö вичмөд ставсö тайöс Памаыс, тшöтш и ас дорыс сулавнысö медалöмысь.

Уна бара шöрöвыйöасьліс, нимкодъыслы и полöмыслы сетчыліс татшöм коланатö да та мындатö сетöмысь, но Бияр кызöктöмөн вöтліс ассьыс дыгыдсö да вомаліс сійöс:

— Дыр-ö лөвтан-а? Тыр югыдсö тан виччысян?

— Ог.

— Он кө, и отсав.

Öти сепыссö Бияр ачыс лэпгис веськыд пельпом вылас, а мөдсö, отсөгнас, шуйга вылас, и мөдöдчис. Уналы сэсся кык туиснас нин и ковмис вöтöдны сійöс.

Чайгисны, мый Камарыс көнкö вадорас нин и виччысьö найöс, но сійö некөн на эз тыдав. Сөвтчисны пыжас да петісны кулигасьыс, ньöжйөнник сынышталöмөн катісны изъя бöж полöныс. Тöлыс муртса и ыркнитавліс да пугрöдліс на сэтчö, да нинöмла и вöли сувтöдны шолгасö тöвдöранас.

А Камарыслы, эз кө кытчökö ылав, коліс нин кыськö петкöдчыны, и сійö сэсся тювис-мыгчысис Емвасьыс аслас векни да кузь пыжнас. Сэтшöм лöсьыда, бөрвывсö муртса вöйыштöмөн, ва веркөсöдыс шлывгана пукаліс пыжыс, мый эз и воштыв öдöбсö зібнас йөткасьöмысь. Биярлөн пыр и петіс вежыс да мөвпыштгис, мый татшöм пыжтö лöсьöдас жö аслыс. И кор орччаасисны Камарыскöд, öти здукөн и синмаліс сувтлöмөн, кызди-мый вöчöма: йитвежалöм кык коз пу кокоравысь вöли сурсаыс, дор пөвъяссö швачкöма-топöдöма тувъялöмөн көкъямыс джөм мегырö, пасьтаыс пыжыслөн öти дор шатьсянныс мөдöдзыс нель весьт и лоö.

— На, ме тиянлы босьтi жö, — мыгчис Камар кык зіб.

— Миян öд пайгöс пыж. Дай сьöкыд нин, шöрнас пукалö. Пышйöдлыны кутас зібъясьöмнад, — шуис Бияр.

— Пышйöдлöмсьыс кыкөнöсь. Öтарсянныс и мөдарсянныс йөткасянныд. А куш пельыс помсьыд атшвайöданныд асьныгö. Кыстөм лызбөн кыр кайөм кодь лоö.

Зэв на и кивевйöсөн шогмисны Камарыслөн сетөм зібъясыс.

¹ Сепыс — мешök.

Эжвасо вомоналігөн сөмын, өти лыа бөжсянь мөдө, босьтлісны пельсыяснысө, сы вөсна мый джуджыдысла эз и сулав зібъясь-нысө.

Коркө лун шөр бөрас нин сувтлісны шойччыны, и сэки, биपुर дорас нуръясигөн, Камар шмонитана юалис:

— Но, кутшөма узьсис?

— Бура,— родыштіс Уна.

— А гозъя көрсө?

— Мый?

— Видлінныд?

— Видлім,— Биярлы ковмис вочавидзны.

— Сідзкө, маті гозъя нин. Сэссия дыр эн муръяв-а,— шеш-мунліс Камар Уналы.

— Ен сайын,— кывберитіс сійө.

— Ставыс эськө Ен сайын, да лоө на юрад овны, ставсө төд вылад кутны. Овомдчанныд Овкөджас да лэдзанныд йылөмтө, да бион ни ваон мед эз вөрзөд сэтысь. Сы понда и сувтіс Памаыд тиян вылө.

— А мыйла буретш миян вылө?— юалис Бияр.

— Ме чуйді. Шулі тай. Абу на уськөдчөмыд Мөскуаыслы кок улас да,— ыстысис Камар.

— Эг эськө да... Пышыйны жө тай лои Югдінсьыс,— мыжмөдчис Бияр.

— Мед, ловтө өд эн на пежав. Комиыслы вира.

— Комиыслы.

— А татшөмыс и му кутысьыс!— кайтіс Камар.

Рыгтя шондіыс Эжва катыдыс нин кучкис, вадор вөрвысө вежа-гөрдөн ырнөдіс, кор воисны кутшөмкө паськыд вис вомө, зөридзөн да лапкорйөн ёна нин дзескөдөмө, восьса ваыс визув джуджыдас и кольөма. Войладорсяньыс петіс вискыс, да сәті катігас веськыдвылыс воссявліс вомлөс сөнъясөн, кытөн тыда-лісны сабрис. Найө сөмын и висьталісны, мый көнкө йөз олоны.

Биярөс дзугыльтөдіс сыысь, мый век на оз помась вискыс да ыштөкө кытчөкө дзебасө и пыртөдө Камарыс. Но катісны нөшта өти чукыль, и виччысьтөг чашкаліс вөрыс да ылөбтіс восьса югыдыс, а сэссия и кусыня кузь тылөн веркөсыс шылькмуніс. Йылыс тыыслөн эз на и тыдав, кытөнкө ылі кытшов саяс ве-жөртсис, асыввывланяя. Эжваыслөн ва туйыс коркө, буракө, таті вөлөма да сылөн вешиөм бөрын и кольөма ва джуджыда сьөртис. И ю на, тыдалө, усис тыас, сы вөсна мый гыбалысь чериыслөн гыа гөгыльясыс өдйө кылалісны пыжаяслы воча.

Тыыслөн аддзана шөр кусыняс кымын сора вөра нөрысыс быгттьөкө орис, дженьыдик венөрөн сәті векняммыліс весиг тыыс, а водзөсө, войладорас нин, кыпаліс еджыд лыа бужода пожома яг. Шуны кө, зэв на и оланін вөлі видзөднысө, ставыс матын, сөмын тай Эжвасьыс ылынджык, ковмас кө йөзад петавныгтө.

Вөлөмкө, сора вөра нөрыс помас, медся джуджыдінас, и поздысьөма сиктыс, йөрмөдчөма пельөсөн тыланьыс и венөрас петан юланьыс. Сы вөсна и эз тыдовтчыв весьтасас вотөдз. Олан керкасө дасөс кымын и уськөдіс Бияр син улас. Дай найө на вөліны ляпкыдикөсь, джынвийөсө мукуа¹ кодьөсь, ли ньөти тшуптөм-бердтөмөсь, сідз, воча чомйөн и вөчыштөмаөсь. Сөмын өти керка, гаддя өшина, кер дас судтаа кымын, эз сэтшөм ойөс-төма видзөдсьы. Неважөн на, буракө, пуксьөмаөсь татчө овнысө да абу на эштылөмаөсь юр сюянінсьыс вывгтисө лөсьөдны.

Гаддя өшина керка дінас и катөдіс Камар. А вьлө локтысьтө мед сөмын кодкө аддзылас, өдийө кывсяс керкаыс керкаө. Став йөзыс, гашкө, чукөртчисны, морт нелямын посни сорнас.

Гырысь черлыяса да ляс ныра айка, йөгралань чужөмыс кыс-кыштө, «видза, видза» кывъясөн копыртчыліс Камарлы.

— Аслыд, Кекуры!— водзөс копыртчыліс Камар.— Ку-тшөма нин овсө?

— Со тай, век на кок йылө сувтам.

— Сюдөбыд оз дөзмөдчы?

— Таво эз на. Код төдас кытөн гожиө.

— Нуис сэки коксө, эськө...

— А тайө нө кодъяс?— чеврасьліс Кекур. Мышкыртчөмөн сийө асьсө кутіс, да зэв на и лөсяліс нимыс.

— Овны вайөді. Памалөн индөмөн.

— Татчө?

— А мый нө, эн кут төрны?

— Мед олөны. Асьнысө кө вердасны.

— Огө нө вермөй?— дузгысьліс Бияр.

— Сийөс и шуа.

— А меным мый шуан?— пысасис Камар.— Мыйла сы дыра эн волы Емдінас? Төвсянньыс нин?

— Кушөн өд он лок. Көні шуан, мыныд?

— А шутөг нө? Ассьыд горштө мед сөмын и тыртін? А ми сэн руөн пөтім?

— Мыйөнкө он мынтысь өні. Энлы, вөравны петалам да.

¹ *Мукуа* — землянка.

— Ме ог и нянь пычкы.
 — А мый нө пуктам?¹ — няргыштіс Кекур. — Чери кө огөй?
 — Мөстө өд видзанныд. Вый туисыд тырө на. Тувийон¹ кер-
 каысь кө. Одай!
 — Он өмөй узь?
 — Некор.
 — А кутшөм вый?² Ниртөмөс?²
 — Ниранад асьтө ылөдлы, — вомалис Камар.
 Коді ойзыштіс, коді тоткыштіс, а шуөма да быть кывзысь, и
 йөзыс разөдчалісны гортаныс. Кекур эз жө кольчы, туисөн кияс
 кутіс ветлөдлыны керкаысь керкаө, чукөртны вийсө.
 — Ставныс нө мөскаөсь?² — юалис Бияр Камарлысь.
 — Ме төда?! — чуймыліс сийө.
 — А кызди нө мөстөмысь?
 — Мед водзөсалө. Черийон ли мыйон вештө. Тырмас, ёна
 нин ме найөс кокньөді. Дась вылас на татчө пуксисны.
 — Кутшөм дась вылө?² Гөгөр вөр да?
 — Йөгра Сюдөыс тан ас котырнас сулаліс. Чайтан, бурөн и
 муніс?
 — Артмө, комиыс вөтлө жө, кодөс вермө?
 — А мый нө, мед огө и паськөдчөй?² Татшөм сёрнитө эн лэдз!
 — Ог, — көсийсис Бияр.
 Чукөртісны Камарлы вий туиссө, да шонді лэччандорыс сийө
 бөр кывтіс. А Бияр да Уна колисны Овкөджас. Колисны овны,
 а веськыд кузя кө, олөмсө на перйыны.

2

Позис вөзйысьны кодкө ордө узьнысө дай олыштнысө на
 мыйкө дыра, но Уна пыкис, кезмунліс быдөн чужөм вылас, нэмтө
 пө сэсса казьтыласны тайөс, а меным пө аслым би водзыс колө.
 Биярөс чуймөдліс сыысь, кутшөма нин сийө пуктө асьсө гөтырө
 да сэтысянь и ыджыдалысьсө, но зыксө эз нин вөч: абу на тай
 көдзыд ывлаыс, пужйыс на эз усьлы, и вонйыс да йөра вольясыс
 на мездыласны найөс, гозьяөс. Сэсса өд некод жө тай эз и ма-
 тыстчыв бур кузяон, локтөй пө, колөкө, узьныгтө. Оти сайын, гашкө,
 и на вылө тшөтш дөзмисны вийсө пычкөмысь, и лөгасисны на
 сыысь, мыйла вайөдіс татчө Камарыс.

¹ *Тув* — сьөкта муртөс, пунт.

² *Ниртөм вий* — сывдөм вий, нира вий — сливки сораыс на.

Медым эз нин ковмы юасыны, кытчө поэбө пуксынысө, Бияр эз и кытшовт сиктсө, а довгыліс кывтыд помыс да сэтысь, вөрсьыс, и нёджъяліс шогмананисө, дїон кыпалыштысь гырысь пожөма дзиб. Керкаон и овмөсөн төрөдіс дзибйыс, ялаув лыанас кыскис и, дай тысянныс эз вөв ылын, регыдик и лэччыштны горувсө. Мыйла некодлы абу мусмөма татшөм кос да зымакылан кок ула оланіныс, код төдас. Буракө, сыв кыза пучера пожөмъясыс на повзбөдөмабсь. Видлы пөрөдны да керйө чинтавны, өти пуыс лун джынтө сёяс, а то и лунтө на лёкиник чернад. Но өд, артыштны кө, өти пусьыс жө и шедас куим-нөль керйөд, и оз нин ков кыскавны кыскө, татөн и тшуп да лэпты керкатө. Оз, мөдлаө оз и пуксы, шуис аслыс Бияр да лөсышгис на маті пожөмө, эрдөдіс кырсь увсө видзөдлөм могысь. Ньөти лолөдтөм да литөм, гыжйыштнытө он вермы, сэтшөм топыд вөлі пучерыс, ассъыс сө ветымын восө мөд пөв на олас бур вевт улад.

Пожөма дзиб сибөдас, тысянныс кыройыс, пашкыр коз улө, и зэвтисны Бияр да Уна ассъыныс воннысө, катлісны сэтчө көлуйнысө. Нуръясисны да очсалісны нин бипур дорас, жугылясисны сукман пемыдсьыс да виччысисны, кор личкан унзільыс вөтлас найөс воньяс, и кодкө сэк локтысь лои на дінө. Мусянныс ляпкыдика и тэчыштөм морт да нөшта и коснөд, ёсь ныр-вома да рой шурыд тошка, мыччысис сэсся би югөр улас.

— Энө повзбөй, — намыштис сійө.

— Огөй, — вочавидзис Бияр. — Лок, шонтысь.

— Эг на өд кынмы. Муртса на гортысь. Татысь, пом керкасьыс. А нимөн кө, Борган дай.

— Мый нө, кутшөм могөн, Борганыс?

— Сідзи. Видзөдлыны.

— Оз өмөй узьсьыс? — юалис Уна.

— Гөтыр тай чушъялө.

— Мыйысскө?

— Гымга тай вөйтлі да, кытыр чери и пырөма да... Сыысь!

— Сылы өд пуны жө мыйкө колө. Дерт, чушъялас.

— А дона жө бөжулыс. Он кө тырыс мыйкө вай, оз и лэдзлы. А быд пөрийө өд оз шед чериыд да яйыд.

— Но и пыкыштан кослунъятө, — шешмунліс Бияр.

— Пыкан эськө да, песовтлө жө сёлөмтө, — дількмунліс Борган. — Дзерөдчө на и.

— Кыдзикө?

— Кодлы нө тай шедө, сылы и бөжув. Кытчө аски и ветлыны?! —

— Мекөд ветлам, — чуйдіс Бияр.

— Кытчö?

— Тыла вöчны. Кыськö пöрöмин кö тöдан?

— Тöда. Абу и ылын тасянь. А водзöстö?

— Чери вор. Мед оз чушъяв гöтырыд.

— Чериыд тэнад уялö на.

— Кыям. Менам везöt эм. Табъя и кебöда¹. Аски и петалам, югдас да. Локтан кö?

— Локта, — гогнитис Борган.

Жугыльбöсь да аскисъыс на польсыбöсь и водисны, гашкö, Уна да Бияр, и войыс на, гашкö, пессяна узьсис, эз кö волы Борганыс да висътась аслас шог йывсъыс, петкöдлы налысь серамсö. А волис мортыд да нюмыртöдлис найöс аслас кевгöмнас, и ыштöкö уськöдис сьöд сьöкыдсö сьölöм вывсъыныс. Öдийö сэссия и шымыртис унмыс.

Гожöм помад войыд тырмö нин мудзтö и унтö веськöдны, да мича югыдöдзыс на и садъмис Бияр. Петис вонсъыс да нюжмасыштис, зэлöдис лысерсö, и тöдлытöг пырквöчлис ыркыдсъыс. Повзис быдөн, абу-ö нин асыв төв петöма, чериыслы мустöмыс. Но, ен сыкöдөн, тöлыс эз и вöв, муртса тай вөр-пу йывсö рыгтывлунсяньыс вөрöдышталис.

Бипурсö выльысь ломзöдны и удитис Бияр, локтис Борган. Чужöмсö бытгьöкö лямöдлöмаöсь, сэтшöма чеврасьöма; кöнкö джоджас, тагöс² дорас, буракö, и узьтöдöма гöтырыс; но ньöти абу килькулöма, югнитлан синма. Чери шедöм вылас нин и кутис, тыдалö, став лачасö.

— Пыжыд эм? — юалис Бияр.

— Эм. Ветки.

— А бурсканыд?

— Абу.

— И менам абу. Он кö вöч öни?! А сэтчö и кольö асылыс.

— Позьö öд босътлыны кодлыськö. Кекурлөн, буракö, вöли.

— Огö йöзыдлысь. Сöмын вомдзалан асьтö.

— А кыззи нö сэссия? — нюкыртчылис Борган.

— Кызкö öд. Дыр-ö кык зибтö перйыны.

Кор Бияр кыскис кöлуй дзу³ увсъыс везötсö да мовкнитис пельпом вылас, Борган шемöс усьли аддзöмсъыс:

— А тэнад изйысь кебöдыд да?

¹ Кебöд — вöйтан из, груз.

² Тагöс — порог.

³ Дзу — чукöра кöлуй.

— Изыйсь.

— А кызди нө розьөдлин изсө?

— Дзуркйөн¹.

— А меным розьөдлы жө. Везөт вылө.

— Уджалан кө,— кыйис кывсө Бияр.

— Уджала.

Лэччисны ва дорас, и сэтөн Бияр перйис кык коз пу зіб, а Борганлы тшөктис кыськө сямөд кульны, дас кымын чикыль. Сэссия Бияр поткөдалис нель пельбөон зібьясыслысь кызладор помьяссө да потасьясас и сюялис зэлыдөдз сямөд чикыляссө. Эз эськө лючки бурсканьяс артмыны, ылогыс сөмын, но кутшөмакө войшөдласны черисө, кор ва пыдөсөдзыс дзумгылан.

Ты пасьталаыс оліс чериыс, полькмулөмөн гыбаліс, а мөдара, зөридз пиас, ызакыліс. Гоҗся сертиыс ёна нин көдзалөма ваыс, чуньтө кынтана лөөма, да вөрзөдөма, тыдалө, гагсьыс пожьясьнысө да вердчынысө. Видлөм могысь, мый петкөдлас вөйтлөмыс, ты мөдара, турун дорөсас, и мөвпыштис Бияр чөвтлыны везөтсө. Изъя кебөднад подъяна и сувтис везөтыс, эз сетчы лапкорыслы лыбөднысө, пышгян костсө чериыслы кольны. Оні өд сийө югыд синма жө да петанінтө и кыйөдө.

Бияр отар помсяныс, Борган мөдар помсяныс, пыжнаныс воча лөктөмөн и бурскисны сэссия везөтнас босьтөминсө. Ковмис на и зөридз пөвстас пыравлыны да сэтысь вөтлыны сирьяссө, сы вөсна мый бурөн найө эз на уйкнитавны ортсы ваад: тювмунөмөн уйыштасны мыйтакө, тірзөбөдасны зөридзсө, и сувтасны, он кө мөдысь вылысаныс дізгы, оз и вөрзывны.

Бура уна на и сетис Енмыс черисө: сирсө и, сынсө и, гырысь кельчисө и, ёкышсө и. Аслыс вылө кө, Бияр сэссия эз нин эськө и кый, а көсийсьөма лөи Борганлы чери вортө, да мөдысь на вөйтліс везөтсө, водзаинсьыс неуна и катыдөджык. Кулигаөн сэтчө пырыштис восьса ваыс зөридзас, да унджык на шедіс. Борганлы пыж нырас и шыблаліс черисө везөтсьыс перьялігмозыс.

— Но, тырмылас оз?— шуис Бияр.

— Тырмылас,— вом пасьтанас нюмдіс Борган.— Унджык на меным пуктін да. Катөдмөн.

— Висьталін тай пөрөминтө. Ветлыны колө да сотны. Тыла ректыны. Волан он?

— Вола. Менам кывйыд оз вожав.

Мый и пуан, татшөм юалөмыд нэмтө певйөдлө морттө. И

¹ Дзурк — сверлө.

Биярлысь эськө Унаыс юалис, эз кө вай черисö. А öнi вежон кымын оз орлыны пöтöса сорвасьыс¹ дай кос сёянсö на ассьыныс водзö кежлö видзасны. Но вывтi нимкодъсö таысь некоднанныс эз петкöдлыны, ыштöкö тöд вылö сöмын и босьтiсны.

Öшлис Бияр косътыны везöтсö да ачыс косътысьыштiс бипур водзас, и сэк костi Унаыс эштiс юква пуны и сук рок вöчны нянь вылас. Рок сорнас сэсся и юисны юквасö, а пу тасьтiö лэптöм черисö сёйисны чеплялöмөн.

Мун да уджав, сöмын и колис Биярлы сёйöм бöрас, а Борганыс некөн на эз тыдав, локтö ли оз ли. Нинöм вöчöмсьыс пуксис зудъявны лагыра ыджыд черсö, кодöс туй чöжыс на некытчö эз босьтлы. Быдлаöсö тасма козъянас сийö кыскалис мөдöс, векныидик дорышаöс да кокныыджыкöс. А тылатö ректигад сэтшöмнад ёна он керась. Со и воис луныс ыджыд черыслы.

Скөрмылис нин Бияр Борган вылас, дась öтнас мунны пöрöминсö корсьны, бөръяпомсö нин виччысис, кор тыдовтчис мöдыс. Шпыннялö да лашиктö, оз и тэрмась.

— Мый нö сы дыра?² — зумыша и юалис Бияр.

— Сёйыштi да мыйда.

— Сёйыштнытö кыкысь нин вермин.

— А исасьли, кайи вадорсьыс да.

— Кытчö исасьлин?³

— Намыр динö.

— Кутшöм намыр динö?⁴ Вотчин?⁵

— Йöйыд тай эм! — серöктiс Борган. — Гöтырыс нö менам абу Намыр?⁶ Нимнас?⁷

— А-а... Могмөдiс жö öд?⁸

— Сё майбыр, чери вылад!

Пöрöминыс, кытчö нуөдiс Борган, збылысь эз и ылын вöв сиктсаяныс. Абу на важөн, кымынкö во сайын на кучкылöма тöвнырыс, да абу на став пуыс ляскысьмөаось муас, зэв на уна сулалис джынвийö пöлыньөн бертовтöм вужля помас, но косьмөаось жö нин биыдлы азым вылас.

Медводз бисö и перйис Бияр, öзйөдiс ыджыда, мед сэсся вöчас кызвын уджсö, нивöю сотас пöрласьöм пусö да ош нитшсö. Сöмын мед сулалан вöрас оз вудж-а, куш пöрöминсö и босьтас пасьтанас. Но öд абу синтöмөсь, аддзасны.

¹ Сорва — вöлöга.

И аслыныслы, кык верлы, уджыс юр выв тырыс на колис: пөрөдны пöлынясьом пуяссö. Но босьтчисны сэссия, да öдйö и тыдовтчис, мый черыс Борганлөн некытчö туйтöм, дзык уль көртгыс да нырсьö и вежнясьö на дорышыс.

— Кутшöм нö чер тайö тэнад?¹— шуис Бияр, тышкыштіс аслас черөн да.— Оз весиг со тиньгы!

— Кекурлысь вежлі. Съöd бöж ку вылö. Дас кыкöс сетлі.

— А Кекурлыслы кыгысь?² Ачыс вöчалö?

— Оз. Вежöма жö вöлі Гамысь¹. Сэтөн көртсö сывдöны.

— Вай ылö шыбита. Мед оз сюрлы!

— Эн!— чегсьыліс Борган.— Ме сэссия нинöмтöг коля.

— А нинöм и эм таысь. Со кутшöмös черсö вöчöны. Куим пöвстаös!— печикталіс Бияр аслас черас да кывзыштіс тиньгöмсö.

— Көнi куим пöвстыс?³

— Оз и тыдав. Абу öд лемалöма. Шöрыс емдонысь, бура дзирöдöмысь², а бангьяйыс, öтар-мöдарыс, небыдджык көртгыс, пузьöдöмөн³ пунктöма.

— А тэ кужан сэтшöмсö дорны?

— Кужа. Айö на велöдіс. Тайö аслам нин киа-подйöй.

— А меным дор!— кевгыштіс Борган.

— Тэ черитö на эн вешты. И менам со öнi уджыс. Коркö мöдысь кө ог.

— Да ме эськö эг и ылöдчы да. Бур черөн кө.

— Но и ветлы мун да корлы гöтырлысь менсьым ичöt черсö. Сё пöв на кералас тэнад ногö.

Регыд и ветліс Борганыс. Сюсялыс кө асланысь, вермис на и нюзöдны кадсö, а ыштöкö вошліс Биярлөн син увсьыс да бөр югдіс. И дышсö эз кыскав, сувтіс пөрöдчыныс да, ловсö веськöдны сöмын и коставліс. Дерт, ичöt чернад да жебиник вывтыра ойöснад кос пуыд сылы мырдысьөн на сетчис керавнысьö, колöкö, быд сöтыштöмысь на дзеньгыліс водзöссö пельпомас, но эбöссö и пунктіс мортгыс, да таысь нин эскöдан руөн и такöдліс Биярös, матö сибöданаөн вöчис Боргансö.

Вит лун ставсö босьтіс тыласö ректöмыс. Эз на эськö му ло сэтгысь, сы вöсна мый вужляыс и мырйыс на гöгөр колисны, да рудзöг көдза улад öд осьсаиныс да пöймыс и колö. А пöймыс

¹ Гам — öнiя Гам сикт. Важөн сэн перйылöмаöсь көртсö.

² Дзирöдны — калитны.

³ Пузьöдöмөн — сваркаөн, роч ногөн кө.

кыза и усис, кок улад пуркъялана, мукӧдлаас ки вомлӧсысь на джуджыда. Медтыкӧ сӧмын зэр петалис да ульдӧдис пӧймсӧ, личкис му бердас, а эз нӧбӧд кытчӧкӧ лӧк кос тӧлӧн.

И зӧрис сӧсся лун кост мысти шливган сувтса зӧрӧн, да Унаыскӧд Бияр веталисны кӧдзны рудзӧгсӧ. Позис эськӧ и сидз коявны кӧйдыссӧ да сайӧдны бӧрсьыд понӧль кыскалӧмӧн, лыснас нылыдӧн. Но сидзтӧ ӧд оз и волы пыдӧджык кӧйдысыд, и чужӧмсӧ на кынтас арся пужыйс. Та вӧсна Бияр эз и кокньӧдчы, а кералис вужнас томиник коз да черкуш вӧчис: увйис коз пусӧ да колис чукля вылас ӧти вуж пом. Сӧсся черкушнас и паръялис визьӧн-визьӧн тыласӧ, а Уна вӧтлысис бӧрсянныс да уськӧдлис кӧйдыссӧ гурана визьӧбас. Та бӧрын вӧлись кыскалисны морт ӧти понӧльӧн, тырталисны кӧдзасӧ. И эштис уджыс, да эз на дзик пыр вӧрзъыны тыла вывсьыс, ышлолалӧмӧн долыдасъыштисны сыысь, мый мынисны медводдза ыджыд шогсьыныс.

Мӧд шогыс ӧшйис гозъя вылӧ тӧвйӧм пондаыс. Мойдын моз кӧ эськӧ ӧдйӧ и лыбис керкаыд, сы вылӧ и позис сӧсся уськӧдчыны, а во-мӧдтӧг керкатӧ он на лӧпты, и воча чомыйс на мездылас турдӧмсьыд, вуджӧдас кузь тӧвсӧ. Но ӧд сийӧс на, воча чомсӧ, колӧ сувтӧдны. И мед эськӧ эн жӧ сӧмын копырӧн сэтчӧ тӧр да войсӧ узьны, мед и бергӧдчынытӧ вӧли кытӧн, и пусьынытӧ, и, гашкӧ, весиг пывсьынытӧ. Дерт, олӧмтӧ кӧ овны, керкаыд и, картаыд и, пывсяныд и, кӧзӧдыд и — мыйыс сӧмын оз ковмы, да кытысь нӧ ставыс ӧтпырийӧсӧ?

Ыштӧкӧ выльысьӧн чужӧм гаг и йирыштис Биярлысь мӧрӧспань увсӧ, сэтшӧма нӧнъыштис воча чом колӧмыс. Шуис кӧ Унаыс, шойччы пӧ лун-мӧд, жугӧдан пӧ тадзтӧ асьтӧ, и то эськӧ вомалис. Но Унаыс кутис на асьыс мывкӧдсӧ, кывйӧн эз няргыштлы, вонийын пӧ и ковмас тӧвйыны, и эз торшӧдлы, сӧсся пӧ, чайтан, и быри нин уджыд, сӧмын и каймӧстис, кутшӧмкӧ пӧ воча чом тай вӧли гаралан, и ланьтис та вылӧ. А ланьтӧмыс сылӧн медся на инмис Биярлы.

Пу вит-ӧ-квайт и тырмис, гашкӧ, воча чом вылас, весигтӧ джоджавнысӧ на. Дерт, он кӧ повзъы кыз дӧна пожӧмсьыс да сэтшӧмсӧ и пӧрӧдан, кузьтаыс вылӧ ыштӧмӧн, мед дас кымын сӧсся петис сыв кык кузя чинтасыс. Но колис на и поткӧдлыны чинтасысӧ шӧриӧн да лӧсавны. И мусӧ на колис чом пасьта да кузьта сергийс босьтны нӧковӧн топыд лыаӧдз, медым кӧдзыдсӧ ни веркӧс улиссӧ эз кыскы. Со на мыйта паныдалис Биярӧс ӧтчуркӧра уджыс, и ӧтнаслӧн сылӧн кынмавтӧдзыс, тӧдӧмысь, оз и

эштыв. Ыкшаасынгтö өд кокни, нöшта нин ас водзад, мый абу и дыр воча чомтö вöчыштны, а збыль вылас орöдлас на ойöстö. Оз өд Унаыс вылö тшöтш вешты лешмöдан уджсö, сылөн мöд пöлөс лысьöмыс и вир-йяыс, да нэмыс кежлö и вермас пырны висьлөс тшыкöдыс.

Мустөм эськö и вöли Биярлы аслыс мунны да чукöстны кодöскö отсöг вылас, но тойлис нин воча чомйыс вöсна шогыс, да мырдөн сорөн и довгис Борган ордö. Сыысь öтдор некодös на эз тöд сиктсьыс, да эз и вельмöдчы мукöдас шыасьлынысö. Борган гөтырыс, Намырыс, йöрас вöли копрасьö, нярмөм коръя нин сугөн¹ нетшкö. Пев пом гырся и артмыштöма сугöныс, дай сэтшöмыс на кыка-куима позтырас. Абу и куйöдавломäось, буракö, мусö, и нявдаыс на сэтчö пöдтöма. Мамыс Биярлөн вöдитлис жö сугөнтö, гөрд вужтö² и, да тадзтö некор нинөм эз урсöдлы.

Борган сертиыс Намырыс кык ыджда вöли, турун юр моз увланысö кызана, а чужөм вылас зэв на и еджыд, да гөгрöсинак, нывланö мунысь. Чайтан да, мыйла и петöма Борган саяс, ас сертиыс кодöскö абу аддзöма³ Сийөн, көнкö, и ыдждалö öни верöсыс вылын, мый оз и инасьлы узьöмөн ни олөмөн.

— Ен бурөн!— видзöдыштис да горöдис Бияр.

— Енмыд öд со тай, — чатыртчылис Намыр. Эз и юав, мый нö пö ветлөдлан.

— Абу жö тай воöма, — тöдөмөн шуис сэсся Бияр.

— Мый абу воöма?

— Сугöныд.

— Воськодь!

— Колö жö öд курыдыд мортыды.

— Колантор татшöмыд!— лөкысь и чөвтис Намыр не-тшыштöм позтырсö.— Эстөн нюрас сярвидзö турипувйыс!

— Кытөн нö Борганыд?⁴— эз нин суйсьы Бияр венас.

— Видз вылö вуджис. Мөслы вольös вылö ытшкыны. Локны нин колö. А кытчö нö нуöдан?

— Воча чом вöчны. Ме ачым пöрөдча, а чинтасьяссö поткöдлыны.

— Оз эшты. Шабдіным на шырзьытöм. Йöзыслөн тыасьö нин-а.

— Позьö öд водзöсөн. Гөтыр волас шабдितö шырзьыны.

¹ Сугөн — лук.

² Гөрд вуж — морковь.

— Сюсь тай кылан? Өткодъ нӧ сувтӧ гачабыслӧн да гачтӧ-мыслӧн уджыс?

— Кыя на ӧд черитӧ. Содтӧдтӧ.

— Сідзкӧ, инӧ, — бурасис Намыр.

Бияр дӧзмис сълӧн асланыӧсӧ донъясьӧмысь да мӧвпыштӧс, мый коркӧ йӧрмӧдлас жӧ сійӧс, пычкас содтӧдтӧ, мед сӧмын сюрлас комыс¹. Эз нин вермы сӧсся жӧвъявныӧсӧ матӧас, мыетшкӧ Боргансӧ виччысьлӧм могысь, да бӧр и мӧдӧдчис вонийсылань. Ызъыліс на весиг здук-мӧд, мый некод оз и ков отсӧг вылас, ачыс на ставсӧ муркӧдас. Но кымынкӧ воськолӧн и руаліс ызъӧмыс, дількӧдліс сыысь, мый быдлаӧ ӧд ӧгнас оз жӧ тырмы. И ыштӧкӧ йӧткыштӧдіс вежӧрыс вунӧдлыны ыкшасӧ да ветлыны сиктас, корлыны кодӧскӧ уджалыштӧнысӧ, таысь ӧд юрыс оз на усы. Эськӧ ылӧдлас кӧ мортсӧ, чиркас медавлӧмсӧ, сӧки лӧк сӧрныс бӧрсыс и кутас вӧтлысьны-а.

Волас ли оз ли Борганыс, и кор на видз вывсыс локтас, и нӧшта кӧ кодкӧ, эбӧсаджык сыысь, кӧсийсыс медасылынысӧ, ӧдйӧджык и сувтас воча чомийс да. Тайӧс тӧд вылас босьтӧмӧн и бергӧдчис Бияр да восьлаліс сиктас. Воис Кекур керка дорӧдз, а зонмӧс ни верӧс ывласыс эз аддзыв. Водзынджык, катыд помланыс, кыліс кычанъяслӧн тьявкӧдчӧмыс да кодлӧнкӧ серамыс, и сувтовкерліс да сэтчӧдз нин и шуис ветлыны. Сыкӧд тшӧтшъя кымын зон, ӧн, кузь мыгӧра да ывласыс воймыштӧмысла мугов топыд чужӧма, вӧлӧмкӧ, ышмӧ кычанъясыскӧд, дзерӧдӧ найӧс ош ку торйӧн.

— Лок, мый висъталан? — ачыс водзджык шыасис зонмыс.

— Нинӧм на ог, — вочавидзис Бияр. — Сідзи, кылі да. Мися, кодӧс нин сэтшӧмасӧ увтӧны.

— Увтасны на мыйкӧ таян. Вӧрӧ тай нуӧдлі да, кеня бӧрся и вӧтлысьӧны.

— Ӑні ӧд йӧйӧсь на. А мед быдмыласны!

— Быдтыны и кольӧдіс да. Мамыс ӧд быдтор вылӧ мунӧ. Оштӧ на пуксьӧдас.

— Сэтшӧм и колӧ понийд.

— А сета кодсӧкӧ, — виччысьтӧг вӧзйис зонмыс. — Со, колӧкӧ, кырсо² тайӧс. Он ворссыс. Со, аддзан, нырсыс на водзӧ петӧ пыртсимыс. Шошаыс джуджыд нин и. Понтӧг нӧ кольччан?

— Ме ог тӧд, мый коран?

¹ Ком — стрӧка, лӧсялӧм здук.

² Кыр пон — ай пон.

— Борган тай висьталө, чер и быдтор пö тэ кужан дорны.
Кум пöвстаос. Из розьöдлыны и.

— Кужа. Кöрт тув вöчны и,— содтис Бияр.

— Но и артмöдчам. Тайö öд, кычаныд, пурт дон на и сувтас.
А ме, гашкö, ачым на сёись могмöдчыла, мездыла жö водзöстö,
кытчö шуан.

— Меным эськö öнi колö да.

— Мый колö?

— Воча чом вöчны. Таялас тöлыс, он и тöдлы.

— А вола. Октысьны водз на жö-а. Гöнтöм кока на сёла-
тарьыс. Нуöдан тайос? Тутöсö?— тшапкылис зон кыр кычансö
мышкöдыс, и пыр и лявöстис сийö да пескыльтчылис курчы-
ны.— Аддзан, со, ньöти оз лэпты пондöмтö.

— Оз öд вöтчы тöдтöмыд бöрся.

— Кöрталан. Вая көвсö. Сöмын эн нöйт-а.

— Ог, абу öд лөк вира. А Тутöыс нö нимыс?

— Нимыс. Вöрад ылöджык кылö чуксалiгад.

— А аслад нö кызди?

— Менам? Ада! Тэнсьыд тай Борган Бияр висьталiс-а.

— Бияр. А гöтырлөн Уна,— варовмис долыдысла Бияр.

— Меным эськö колö жö нин гöтрасьны да.

— А мый нö он? Нылыс абу?

— Эм. Ниа нима. Ачыс мелань и.

— А мый нö сэсья?

— Мамыс тай падмöдö.

— Мыйлакö?

— Эсийö Кекурыс вежмасьö,— векыштчылис Адаc.

— Пöрысьыс?

— Шайыс понда. Тöдан кө писö?

— Ме ог на.

— Нейкöдöм синма жö. Век на йöграас кыскö.

— А мыйон нö эськö Кекурыс босьтö?

— Ыдждыд пыддиыс тани да. Озджык дойд нинöмөн. Кор
тай чукöртис выйтö, этшаник и пуктöдöма налысь. Ачыс на ва-
йышталö дай, мый кыясны ая-пия.

— А налөн нö абу кыйысьыс?

— Ош косявлiс. Сийон и каннялö öнi Ниаыслөн мамыс,
Кекурыслы и Шайыслы кургö.

— А ачыс Ниаыс, шуан, тэлань да?

— Мелань. Ог и ошйысь. Кодкö лунö на чöдлач вотны
нуöдлi.

— Но и шу, мед оз пудьясь юрнас. Тэ сайё и петё.

— Водзёстё од сэк босьтасны жё. Кекур ая-пиаыс. Сідз нин ме вылө лөгалёны-а.

— А ми асьнысё ланьтёдам!— чуйдіс Бияр.— Кутшөмкө йөгра тшыкөдлы ог на сетчөй! Сідз абу?

— Сідзи!— ыштөмөн вочавидзис Адас.

Моздорас ковмис босьтны Биярлы кычансө, Тутөсө, сы вёсна мый көв помсьыд малыштавлөмнас на сійё эз вөтчы, пыксяліс кыдзи вермис да лёкгоршөн вурзаліс. Моздорас сөмын и лөньыштис, и то на никсіс да пескыльтчыны кыйөдіс.

Эз и кыйкъяв Бияр, кодкө көнкө тыдалө оз йөзыс, шавксьөдіс сиктөдыс, и шыасём сәсся кыліс. Вөлөмкө, Кекур керка весьтасө нин восьөма, да Кекур ая-пиаыс и сулалёны керка водзаныс: локтөмаөсь кыськө да чөвтөмаөсь нин ногьяснысө, көмнысө пөрччөмаөсь и.

— Мый нө шөйтан?— водзвыв нарскана и шыасис Кекурыс, медтыкө лэптыны асьсө Бияр водзын.

— Шежлыся. Кодлөн кытөн мый.

— Код төдас тәнсьыд,— Шайыс, Кекурыслөн пиыс, тшөтш жергөдіс пиньсө.— Понсө тай кодлыськө шышкалөмыд нин-а.

—Ог од юась, сы вылө нин петөма да. А мый нө, муснытө зыртө?— дзерөдіс Бияр.

— Бур вылө од татчө эн жө лок,— шуис Кекурыс.— Пановтны и кутан йөзсө. Тыла тай ректөмыд нин-а.

— А мый нө, аслыд вылө видзин пөрөмсө?

— Гашкө и, видзи. Кынтылас мед да нинөм оз и воы!

— Эн урсась! Аслад сөптыд потө лёкыдла.

— А мяян шөрө эн лөсьөдчы-а. Овны кө тан көсьян.

— Пасьтала ли мый тиян? Вөрыс и ваыс?

— Шуөма тэныд, а сәсся адзылан.

— А ме кө шуа?— букыштчыліс Бияр.— Помала кө, шуа, йөгра вирнытө.

Код төдас коді, пөлыс-ө пөчыс на вөлөма Кекурыслөн йөгра-сьыс, а сэтчө кыскөмыс и Шайыслөн на со тыдаліс, да медся дойманаыс ая-пиалөн тайё, буракө, и вөлі. Абуөсь чиг комияс, чукчи бөж рөма юрсиаөсь да ва сім рөма кучикаөсь, да нинөм он и лысьт шуны паныдтө. Виньдылісны тай быгтьбөк да песовтчылісны, сәсся варкыштан ёсь синмөн и судзөдісны Биярөс. Но таысь сылы полөмыс матө эз воы, водзө вылө на верман руыс босьтис, да бөрнясьлыгтөг и муніс.

Сикт кывтыд помас на вотөдз казяліс Борганөс, коді сьөкыда-

пырысь катодіс рудодом эжор ноб и мыйкө чибльөг кодьос кутіс киас.

— Лольшт!— горөдіс сылы Бияр.

Борган лэдзис нөбсө, тільыштіс шуйга кинас ньылөдөм синсө, а веськыд кисьыс чибльөгсө саймовтіс мышку саяс. Бияр вись-таліс сылы, мый воліс нин чукөстны воча чомсө вөчны, гөтырыскөд, Намырыскөд, сёрнитчис и, ыстылас Унасө шабдісө тшөтш шырызъыны, дерт, оз кө ачыс сійө модарө шу.

— Ог,— вочавидзис Борган.— Нинөмысь на меным тэ вылө дөзмынысө. Уджавны тай и көсийсылі. А тайө нө кытысь, кычаныс?

— Адаc сетіс. Ме сійөс чукөсті жө.

— Но, куимнад мыркөдам.

— А мый нө чибльөгад дзеван?— юалис Бияр.

— Ог эськө дзев да... Сідз, керөмысь.

— Ме абу керысь. Петкөдлы!

— Да со лёгкаг куталі эстысь, видз вьвсьыс. Шақтар увсьыс.

— Мыйлакө? Абу өмөй зывөк? О-ой!

— Колө. Косьта ыркыдінын да.

— Шева али мый новлөдлан?

— Эй йөйтав! Ачыс абу, а ме и керысь лои?!— дөзмис

Борган.

— А мыйла нө эськө куталін?

— Колө, шуөны тэныд!

— Кытчө колө?

— Ачым төда.

— Он висьтав?

— Ог. Эн сэсся юась ни.

— А ме гөгөрвои нин,— шуис Бияр.— Сьөдбөжлы сам вылө. Сылы лёгкагыд и чөскыдыс. Кутан тай кульны, да ныртө и косялө вукөдан исыс.

— Но и чөв ов,— өлөдіс Борган.

Ставыс на лои сьөлөм сертиыс сиктас петалөмысь, да нимкодь и локтіс Бияр вонийс дінө. Чайтіс, Унаыслы нимкодь лоө и кычансө вайөмысь, орччөн олысьнад өд гажаджык жө видьштнытө и мальштныгтө поэбө. Но шай-паймунліс Унаыс да өдйө и тоткыштіс Бияр вылө сингугасьөмөн, асьным на пө кок йылө эгө сувтөй, өгө и төдөй, мый кутам сёйны төвнас, а тэ пө пон нин лөсьөдан, пуө зурасьлөмөй. Кыськө тай сюралісны сылы медся парсыштана кывьясыс?!

— Бөр нө нуа?

— Бөр и ну, кодлысь вайин.

— Ог,— нускыштіс Бияр.— Тадзтө некор нинөм оз өшйив миян, некутшөм ловъя лов.

— А мыйон нө вердны кутан? Көні нянь кумыд? Яй шо-мөсыд да?

— Мыйонкө өд... Мый аслыным вомө, сійөс и сылы. Сө пөв на вештас асьсө. Лымъянас, гашкө, увтны нин кутас уртө. Буг-жылясян сэтөн, он мелав-а. Гыжйышт кык пель костсө.

— Колөкө,— шуис Уна. Но сөмын на инмөдіс кисө, Тутөыс пыр и эрыштчис.— Да, мед пурьштас! Со нин кызди видзөдө-а.

— Кызди ачылд. Гыөрөсь жө тай синмыд. Сет мыйкө, мед йирө. Косьтөм яйыс көнкө вөлыштіс на.

— Мыдсалис али мый аслыд? Пөрөдчыны көсьян-а.

— Ичөтик торсьылд ог на орой. Сет!

— Эн эськө горзы! Юрөс ме тэныд киняулад эг на суйлы. Тэ мында ас руыд менам эм жө.

— Но и лючки шуа,— сетчис Бияр.— Мыччы кос яй торсө, да өдйөджык и мевъялас миян динө.

Тайө пөрийө Унаыс кывзысис нин, и Тутөыс кос яй тор бөрад ыштөкө эз и казавлы сылысь ки нюзөдөмсө, сөмын бөжнас легөдіс кык пелькостса гыжъялөмысь.

Со кызди лои кычансө вайөмысь, да Бияр дзугылясис на, висьтавыны абу Унаыслы, мый көсйысис сійөс ыстывны шабді шырыззыны. Колөкө, бара и лёкөдчас Унаыс, мыйла пө медалан менө, кытчө оз ков? Но и висьтавтөгыс овны, кадсө талавны, Бияр эз вермы сәсса.

— Мыйкө...

— Мый?— паныдаліс Унаыс.

— Сёрнитөма лои да...

— Кодкөд?

— Борганкөд да Намырыскөд. Борганыс меным волас от-сасьны, а тэ Намырыслы отсалан. Шабді шырыззыны. Ветлан кө быттө?

— Ветла. Тані бергалөм дорысь.

— Лунтыръя удж өд. Аски на, гашкө, дай. Шедлө мудзыд.

— Мудзнад тэ менө эн повзөдлы. Тэ ыджыдалөмсьылд өвсьы... керка шөрын ме вылө!

— Көні нө керкаылд?— кывберитіс Бияр.

— Со!— бергөдчыліс Уна понйыслань.— Ог төд, коркө кутшөм лолө-а.

Ачыс на гөтырыс водзын уськөдчөмөн и колис Бияр, сы

вѳсна мый Унаыс ѳдийпырысь и муніс сѳссия шабдісѳ шыръзыны, мынтѳдчис сълѳн вечмасьѳмысь. Шутѳм и лои, мый зымкнитас на керкасѳ, кызь кер судтааѳс на, гашкѳ, и тыр овмѳс на лѳсьѳдас, вѳлѳн и мѳскѳн, мед сѳмын регыдѳн вермылас-а. Шутѳмысь вѳсна и изьявліс Биярѳс вирыс, кісѳ ни коксѳ дыш вѳрзьѳднысѳ, но изьявлѳмысь вѳчасѳн сѳдзис скѳрман визулѳн да нѳйтчан ѳйѳсѳ пѳри, уджѳ и босьтѳданѳ. Домаліс Тутѳсѳ пышійѳмсьыс вон дорас, босьтїс ыджыд черсѳ да кайис пожѳма дзибъяс пѳрѳдчыны. Ѳти пу удитїс нин швачкѳбтыны, кор локтїсны Ада с да Борган. Чинтасъны сѳссия найѳс и сувтѳдіс.

Куимнад да, лунѳн и эштїс пѳрѳдчѳмысь да чинтасьѳмысь. Нѳшта кык лун муніс чинтасъяссѳ поткѳдлѳм вылѳ да кырся на кыз леканъяссѳ лѳсалѳм вылѳ. Тѳвнас кѳ эськѳ, кокнъыда и сетчис кын пуыд, колс потїс на, гашкѳ, тувъястѳ ѳти визьѳн нѳшалѳмысь, а гожся сѳнѳда на уль пуыд мырдысьтѳгыд эз на и кѳсьы чашкавныгѳ. Нѳльѳд луннас вѳлісь артмис вѳча чѳмйїс, весигтѳ сигѳралїсны на, но эз кузяла, вѳсьсаин колисны тшын кыскѳд вылас, биасълан весьтасас.

Позис нин овны вѳча чѳмъяс. И пыртлысисны сѳтчѳ Бияр Унаыскѳд да ѳти вѳй узисны нин. Но бур унмысь Биярлы эз и воы, гѳтырыс регыд и сывкмуніс-а. Эськѳ лаймалїс нин чѳм шѳрас, лыа куш вылас, пестылѳм бипурйїс, шоныдѳн ымралїс и, да вералан рѳмалѳмысь сълѳн да трачкѳдчѳмысь донзьѳдісны, эз лѳдзны унас вѳйтчынысѳ, торшѳдлїсны кывзысьны да лыбѳдчывны, эз-ѳ нин ѳзый кытчѳкѳ би киньсьыс. И Тутѳыс на чѳм ѳдзѳс дорас куйїс да никсалїс, гажтѳмтчис воддза гортсьыс.

Мѳд вѳйтѳ тадзтѳ Бияр эз нин энѳвтчы. Пыралїс пыжнас Чѳжмѳс юас, кодї усис Куа тыас, да чукѳртїс руд изсѳ, курыдтѳмсѳ, тшѳтш и некымын плавкѳсѳс, гор вѳмѳныс судзанаѳс да ѳта-мѳдныс дїнѳ лѳсяланаѳс. Сѳтысь жѳ, бужѳд улысь, и сѳйсѳ аддзис да перйїс, лемасяна нюдзѳс да чунь костад лямаланаѳс, латка вылѳ и вѳзыйсянаѳс. И вайис ставсѳ пыжнас да катлїс вадорсьыс, сѳссия Унаыскѳд ѳтвылысьсѳн и вартїс ломтысян горсѳ из сѳра сѳйсъыс. Пытшкас биасьѳмсьыс горйїс водзпѳрсѳ гѳгѳр руалїс улїсѳн, вѳчасѳн косьмис клѳнакылан чѳрыдѳдз да гырысь потасъяссѳ эз и петкѳдлы, сы вѳсна мый Унаыс коркѳ аддзылѳма мамысльысь латка вѳчѳм, да вывѳтїасьтѳг, аканьѳс тапкѳдлана видласьѳмѳн, гудралїс сѳйсѳ лыанас.

Артмис горйїс и шоныдсѳ дзонь вѳй кутїс, да ас вылас бурасьѳмѳн и узис сѳссия Бияр. И вѳтасис на коркѳ асьядорыс,

быттӧ лэбзис вылӧ-вылӧ да Енмыс дорӧ веськаліс, идӧгыс¹ костӧ, а Енмыслӧн сой вылас еджыд лэбач пуксис да морт чужӧма лои, айыслӧн чужӧма. Бияр вылӧ и чӧвтӧс айыс лапъявтӧм синсӧ да ыштӧкӧ ёрис мыйыськӧ. Гашкӧ, и сыысь мый эз вермыны дорйыны Югдінсӧ, сетчисны Мӧскуаыслы. Йӧжгыльмунліс таысь Бияр, и синваыс на петаліс лолыс сибдылӧмысла. Сэки и айыслӧн читкырмунлісны синъясыс нюмъёвтӧмысла. Но сӧмын на Бияр пондіс матыстчыны, мед инмӧдчыны ли малыштны лэбачсӧ, бӧр аслас юра и лои сійӧ да шыв лэбзис Енмыслӧн сой вылысь.

Тӧдӧмысь, Памалӧн на шуӧмыс, мед пӧ айылдӧн лолыс еджыд лэбачӧн пуксьылас Енмыслӧн сой вылас, петкӧдчыліс Биярлы татшӧм вӧтнас. Но и аслыс нин сылы ӧні коліс мӧвпыштлыны, мый водзын татшӧм вӧтыс усьліс. Висьталіс асывнас Унаыслы, да сійӧ ёна на ыдъясис, некодарӧ эз лысыт кежӧдны, лӧкӧ ни бурӧ. И кыкнаннысӧ таысь шуштӧм шымыртліс. Бӧръяпомыс нин Унаыс лигышмунліс да, гашкӧ, дасӧдысь юаліс:

— А нюмъёвтліс, шуан, айыд?

— Нюмъёвтліс. Синваӧй петаліс да. Сы бӧрын.

— Эз жӧ ӧд ас дінас чукӧст?

— Лэбзис да. Эськӧ малыштӧ кӧ-а?

— Но бур водзын на, гашкӧ. Дыр овны на кольӧдіс му вылас.

Ӧти удж ас бӧрсяыс мӧдӧс кыскӧ. Ветліс Уна отсавны Намырлы шабдісӧ шырызвыны и сёрнитчӧма сукӧд, мый тыӧднысӧ на отсалас да косътынысӧ, а сӧсса няръявнысӧ да ниравнысӧ, и сы весьтӧ Намырыс шабді кужсӧ² сетас дзонь моздор, кытысь, вӧснъыдджыка кӧ печкыны шӧртсӧ, нель-вит дӧра пома петас. И Биярлы эз ковмы корсьны, кытчӧ сӧсса пуктывны кисӧ, пытш моз и кутіс курччасьны, тӧркӧдлыны сійӧс быдсяма нокыс. Пӧрӧдӧм пожӧм пу йывъясыс некытчӧ эз и мунны да пескӧ вӧчӧмсьыс ыштӧкӧ асьныс на ӧлӧдісны, сы вӧсна мый зӧв на кузьбӧсь колисны, кызладорсянныс весьтыд оз судз вомӧныс, и чинтавны кӧ кер джын кузяӧн да кола тшупны, сӧні и лоӧ дорччаніныд, кӧрттӧ на сывдыны усьтӧмасӧ³ позьӧ сэтчӧ лӧсьӧдны и. Воча чом вылас поткӧдлӧм лекансьыс эз жӧ ставыс инасьны,

¹ *Идӧг* — ангел.

² *Куж* — кудель.

³ *Усьтӧма* — кӧрт сывдан гор.

да синмад и чуйдiсны юкавны радз вылö да гымга вылö, мед ар помнас, йи сувтöм бöрас, кор чериыс уськöдчылö ва дорöсас да гöгралö сэтi, воджөн¹ тупкывны ветланiнсö. И чом пытшкас горйiыс вылö изсö чукöртiгөн уна и сэтшöмыс усылiс Биярлы син улас, гöгрöсыс да дзимбырöсыыс, чöж кольк гырсяыс, быттöкö кебöд вылö и зырталöма найöс ю визулыс. Дерт, и мукод пöлöс посни изйiыс, галяыс, и рудыс, и лöзыс, пасьтала куйлiс, да видлы найöс писькöднысö, сöмын дзурктö и бырöдан. А дзимбырöсыыд, чорзбöм лыа сорасаыд, майбыр, сетчö на мыетшкö и сёсысöдз тшöктылö бергöдлыны писькöдчантö.

Кебöд вылас шогмана изсö чукöртны и ветлiс Бияр медвод-дза могөн. Öти-кö, шойччыштöма и лöö быттö, а мöд-кö, босьт-лас тшöтш везöтсö да вöйтлас кытчöкö тыас, көнi олöджык чериыс, и унджык кө шедö, катöдас тшöтш Намырлы, вештас содтöд көсийсылöмсö Борганыслөн уджалöмысь воча чомса вöчигас. Тайö пöрийö эз и пыдö пырав пыжнас Чöжмös юас, тыас усян вом дорсьыс, öтар-мöдар пöлөнсьыс, и öктас колана изсö. А чериыс öктысигкостаыс эз и дугдыв дзерöдчыны, сялькöдчис да полькöдчис ю вом дорсьыс муртса улынджык, изъя пыдöса льяпкыдiнас на. Нэр сыныс и гырысьыс кыпöдчöмаöсь кыськö джуджыдiнсьыс ыджыд кельöбөн да гыалöны кульмиганыс моз. Тыдалö, пожьясьысö локтöмаöсь юсяньыс петан сöстөм да кöдзыд ва вылас, а абу вердчыны. Сэк эськö тадзтö эз ызöдчыны, йöзöдны асьысö. Дай нинöм эз и кылав юсьыс, ойдлан гудыр ни ва нитш пызьыс.

Öктiс Бияр посни изсö сёс кымын, везöt куим вылö тыр-мымөн, и йötкыштчис пыжнас, петiс ты вылас, но ылöдзыс эз кывт. Повзьялöмсыйс сын кельöбыс воштысьлыс жö джуджы-дас мыйкö дыра кезлö и бара кыпöдчис нырөн ю вом дорла-ныыс. Ньöти шытöг, мед весиг оз тельскыштлы кык лопта пельыс-нас, сибöдчис Бияр да зэв öдийö, джынвийö кытшөн, вöйтiс везöтсö. Та бöрын кезжөмөн катiс ю вом дор весьтöдзыс да кучкыштiс кымыныськö ваас пельыс лопнас, ыштöкö туй индiс чериыслы пышйынысö.

Везöt вылiтiыс муномаöсь ли кодаркö пöлөнöдыс, абу öд синтöмöсь сынъясыд, мыйтакöыс и шедöма вöлi кельöбсьыс, и то на пыж нырыс тыри Биярлөн. А ставнас кө кельöбыс зургис да гыдъясис везötас, эськö асьсö сэтчö и матö воштiс.

Изъяссö, везötсö да черисö, джынсö кымын, Бияр катлiс ас

¹ *Водж* — чери кыян дөмөд, топыда кыём раддысь.

ордас, вайис Унаыслы керан да солалан уджсö, а мöд джынсö шедассыы Намырлы и шуліс ныр улас пуктыны, да муніс вор ли мый ли сылысь корлыны. Керка öдзöс водзас (керканас эськö мукуа кодь оланінтö эз и позь шуны да), пидзöсчанысьöмөн, Намырыс вартіс ид кольта, кучкаліс песлалан көлуйöс моз, сера нöшкөн.

— Мед унджык усьö!— шешмунліс Бияр.

— Мый усьö?

— Идйид.

— Усяс мыйкö, нуртöмид! Со тай кутшöм,— петкöдліс Намыр шеньöб ид тусьяссö.

— Эн öмöй куйöдавлюй?

— Лым вылас йöйид шыблаліс да. Лым ванас и нуис.

Йöй улас, дерт, Боргансö коліс гөгөрвоны, и мед нин оз ло омöльтöма сійöс, нинöм эз шу сэсся Бияр, сёрниыс понда сöмын юаліс:

— А кытөн нö талун Борганыд?

— Ягö муніс. Пув пö тай видзöдла.

— Вайлы вор ли ыджыдджык шердын.

— Сэсся?

— Чери сэсся катöда. Мый көсйысьлі.

— Катöд!— вом пасьтанас нюмдыліс Намыр да пыраліс керкаас шердынысла.

Сійөн сэсся и катöдіс Бияр черисö, пуктіс керка öдзöс водз пос помас, Намырыслы ныр улас.

— Кер, мед оз небзы. Да эн лөгась ме вылö.

— Ог. Босьта да окышта на.

— Эн ышмы.

— Ог öд вомдзав. Мед шедны и кутас!

— Мед, а эн ышмы.

— Польшь абу! Лок, пöжöм йöлөн юктала. Гортад на сета и. Унаыдлы.

— Вай. Нуа.

— А ачыд нö он и пырав? Зывöктан, көні ми олам?

— Ньöти ог зывöкты.

— А он кө, и лок!— сойбордйöдыс кыскис Намыр Биярöс керка пытшкас да гөрд биторья горсьыс на водзö тойлаліс, пуксьöдіс узьлан джодж вылас да оковны и кутіс маласьöмөн.

Водзпöрсö эськö Бияр мездысьны и көсйыліс, тімбыльтны Намырсö ылөджык ассяньыс да чеччыны, но эз на сэтшöмасö скөрмы, да небыда на ки улас шедöмысь Намырыслөн паськöмыс сöмын и вильскöбтіс вывланьö, кушмöдіс сылысь кык

ыджыд туйс кодь кыз да шылыыд лядвейяссө. А мед инмылас кийд тыр вир-яя мортыдлөн, муртса на зонсьыд петөмыдлөн, аньыдлөн дзеданаинад, мый сэки лоө.

Куйлан на и коли Намырыс узьлан джодж вылас, дивзалис сэн висьыс моз лөнбөмысла. А Бияр и керкасьыс на петны повзис, калькөдіс өдзөссө да кыйкнитліс, оз-ө кодкө вуджрась көнкө, и вөлись воськовтіс ортсыас, мышкыртчыліс чери тыра шердын весьтас, кидос вөчис, быттьокө сөмын на и вайис черисө да мудзсө веськөдө. Но ывла югыдыс синмас и кучкис, да сэтчө и нюкыртөдліс сійөс яндзимысла. Өтпырйө кык мортлысь быттьө медся видзанасө гусяліс, Борганлысь и Унаыслысь.

Кор локтіс асланыс воча чом дорө, Унаыс керө нин вөлі черисө, пукталөма кучик пожсьыс паськыд лекан вылө да, и юрсө эз и лэптыв, сөмын синбөжаліс, а видзөдіс кө эськө веськыда, төдөмысь, өдйө на и казяліс нөйтөма кодьлысь усурмуномсө. Медтыкө сөмын оз и лөсявлы на Унаыскөд паныда синмөн, Бияр видлаліс тшапөдыяссө, пыдөджык муас зургышталіс, да пондіс өшлыны везөтсө. Сэки и босьтіс сійөс кутшөмкө ййө кызөм, посныыд да дулытөм.

— Мый нө сэтшөма кызөдан? — дөзмөмпырысь юалис Унаыс.

— Ме ог төд, кынмыссьөма кө-а.

— А водлы, пыр да.

— Эналы, өшла нин тайөс.

Помалис сөся өшлыны везөтсө да пырис воча чомьяс, водіс висьөм улас лэдэчысьөмөн, и сідзикөн и пөжис гуся яндзимсө, лэптіс көнкө зінгысь номйөс моз. Рьгтнас Унаыс чери выйөн на сійөс юкталіс, чукөртөма вөлі керигас паськыд рач тыр, да сывдіс гор вылас да.

Аскинас Бияр пуксьыліс розьөдлыны вайөм посни изсө, но өдйө и дугдіс, мөвпыштіс да, мый татшөм уджтө позьө на и төв кежлас эновтлыны, оз на тай кевгыны Борганыс ни Адасыс, а вот радзыс да гымгаыс, аслыс нин регыд ковмас йи увсьыс кыйсьынысө, и уськөдчис мөд удж вылас. Ыджыд чернас туйтөдалөмөн да ичөтнас тышкышталөмөн, чаль чуньыс кызаөн юкалис медводзаён босьтөм пожөм лекансө. Веськыд да пыді увтөм сөнөдысла юковыс некытчө эз и кежөдлы, колскакылөмөн чуктөдаліс пасьталанас шедан дзавсө. Аслыс быдөн нимкодь лои Биярлы татшөм окта уджсьыс.

Радз вылас, кык чунь вомлөс пасьтанас, нинөм нин эз сулав юкавны шедөдөм дзавсө, пургыслысь нин сійө кывзысис да муртса

бертовтöмьсь и чашкаліс мича визьöн, китö нин сöмын и пуктыв, чашкöд помöдзьыс. А дзав колясыс, кытысь эз нин пет раддзьыс, бара жö эз шыбитсьы, муніс гымга вылас, сöмын коліс на юкавны ньöр кызаöн.

Лун дай мöдöс на босьтіс радзсö да гымга ньöрсö юкалöмыс да вöлалöмыс, но кыны кö радзсö куим сорöмö¹, сывйöн-джынйöна кузяö, да кык коластöн сувтöдны ты дорас ваас, кык гымга коластьясас вöйтöмөн, öтарö-мöдарö вомөн, бур вит сыв кузя и артмас воджыс. А сы мында вылö нин и тырмис раддзьыс да ньöрйыс.

Дерт, гымга юръяссö вöчавны, нель пельсöн кö, коліс на то-миник льöм пусö керавны, вöсни бедьяс кызасö, кусыньö сетчанасö, но тагысь Биярлы тöждьыс эз нин вольты: мый-мый, а льöм пуыд кыськö ты пöлөнсьыс и сюрö. Мöдторйысь сійöс шогöдіс, мыйöн кутас кыны радзсö да гымгаяссö? Эськö тулыснас кö, ьджьыд ваыс усьöм бöрын, кор быд бужöдын везьялö кырöдöм пу вужйыс, ловъяывывсьыс небыдыс на, ветлы да вундав сöмын пуртнад, а öнi нö, арнас, кысь сэтшöмыс сюрас, косьмытöм нюдзьыс? Водзöсасыны нö петалас сиктас, оз-ö кодкö мездыв ьджьыд тупыль кöвйöн? Гашкö, и эм кодлөнкö, вöдитöны тай шабдiсö и пышсö, да пуктасны жö öд донсö, мый дыра сэсса, колöкö, он мынлы. А сiдз нин öшалö водзöсыс Адаслы, да нöшта сэтчö öшöдас? Кутшöм нö морт лöб сэки, йöзлысь кыйöдысь? Эз на матö во да оз и шыасьлы некод дiнö татшöм могнад. Ветлас кузь бужöд дiнас, кытöн пожöма ягыс, да кыськö сэтысь на чукöртас нюдз вужтö. Ковмас кö, и чернас на бузöдас лыасö, а оз лок тыртöгыд!

Локтан лунас и катiс Бияр бужöд дiнас пыжнас. И ылавліс на мыйкö дыра кежлö, вунöдліс могсö. Вывсяньыс сöмын вöлі бужöдыс лыаысь, джьиджъяслөн поздысян розьöсь, а увланысö вочасөн едждаммис локöбъясөн² косьмалöм еджьыд сёйысь, кытысь мамыс вап³ пуліс шабдi вьй содтылöмөн, мед мичмöдны кыöм дöрасö. А нöшта уліас, лабдаөн⁴ öшйöм пыдіас, бара на мыйкö еджьыдаліс, киссян пыригöсь видзöднысö. Чайтіс, еджьыд сёйыс на и лэччö сэтчöдз, ульсавлöмсьыс да косьмывлöмсьыс пыригöссöма, а зургыліс пельыс помнас, да пыр и кыліс измöм

¹ Сорöм — праслö.

² Локöб — глыба, рочөн кö.

³ Вап — мичмöдан краска.

⁴ Лабда — ортсöөн öшйöм кыркöтш.

чорыдсö пытшкөссьыс. Вөлөмакө, вальді¹ сэні, усьтөматө ли лутө вöчны кöрттө сывдигад медся на коланторйыс, гашкө. Гудралан сорасөн сөйсө, и лыасө, и дзимбырсө, да он кö содты на лятиас вальдитө, оз и артмы лючки нинөм. Мукөд йөйыс тай уль куйөд пуктöны сы пыдди, да öтчыд-мөдысь донавлөм бöрын и жугласьö усьтөмаыс, а луас кисьтөм сыв кöртыс быттьökө пузыльö; кынмас да, сарөгөсь и лоö ли емаөсь.

Код төдас, му пуксьбөмсяньыс-ö нин сулалө тайö бужöда лыбöдыс ли Эжваыс на коркө пуктылөма да бөр кырöдыштöма, эрдөдöма ассьыс вайлөмсö, но он тай быдлаысь аддзы еджыд сөйтö да вальдитө, а тані со орчөнөсь, волы кор көсьян. Бияр весиг мөвпыштгис, мый поэьö на и вежас вылө нулыны кыкнанторсö. Гамө, шуам, лэчөдны, кöрт изьыс вылө вежны. Ли Сэрөгö², Емва катыдас босьтылыны, сов суксьыс вештысьны, сэтысь тай, висьталіс Адаc, сов васö найö ваялöны.

Бужöд пөлөныс водзö катигөн Бияр нөджъяліс, кытчö эськө сувтылыны, кытысь вермас сюрны уль пожөм вужйыс. Косыс тырыс везъяліс бужöд йивсяньыс, килльысьбөма нин кырсьыс и рудөдöмаөсь нин, а ловъяыс гежөд усис син улас. На вöсна öд он кавшасьлы сы вылнаас. Медтö эськө кыськө чукöраджык веськаліс ловъя вужйыс. И воис сэсся сэтшөмысь весьтö. Бужöд йылыс кузякодь кырдöма потасөн, но кырдом йылас кутчысьбөмөн и öшаліс быттьökө. Та вöсна и восьсөн кольөм вужъясыс абу на вöлі косьмөмаөсь.

Йөйталіс Бияр да веськыда и кавшасис öшалан лыа лёдз дінас, но кымынкө вуж и вевъяліс перйыны, буздіс кок увсьыс лыаыс, да морöснас бөр искөвтіс уліас. Вөлісь гөгөрвоис кайны кыткө бужöд йылас да сэтысянь и вундавын вужсö да нетшкыны лыа лёдзсьыс. Сідзикөн и чукөртіс сэсся ыджыдкодь гөрддзым, йиаліс рудзөг кольтаөс моз да чөвтис бужöд улас, пыж дінас. Но ачыс бөрсö эз на лэччы. Локтöма нин лои, да шуис видзөдлыны ягсö. Дзуртан кос ялаысь да посни тэсь пувйысь öтдор ягас нинөм эз и быдмы, пожөм пуяссö кö он артав. Көр сіт нөшта, кольөм төвсьяыс на, чутасис көнсюрö еджыд яла вылас, и татшөм пастö, дерт, он нин вермы сідзтö кольны вöралысь вежөрнад. Төд вылас и босьтіс Бияр, мый бара на öд төлыд волас да вайөдлас татчö көръяссö йирны лым увсьыс яласö.

Лыаөдзыс нин таялөм ордымөд сиктланьыс нырөн вөсьлалігөн

¹ Вальді — алебастр.

² Сэрөг — öнія Серегов.

сійö петіс кушинö, кытөн тыдалісны биасьлөминъяс да ляпкалөм рөчторъяс, а на пөвстын пуысь вөчөм морт пертасъяс, кодъясөс сулалан пожом пуясысь и вөчалөмаөсь: кералөмаөсь пожомсö вылөджык да кольөм джуджыд мырсьыс и лөсалөмаөсь. Со кытөн, вөлөмкө, Овкөджаьслөн шойнаыс, со кытчö и вайоны кулөмасö да сотоны, а лысьөм коляссö гуалöны, казътылөм вылас эсся пертассö сылысь вөчöны.

Но öти пертас, важ нин мукöд сертиыс, мусяньыс сісьмөмысла оран кока, йöгра син гуранъяса да былъкъя бандзибъяса и вöлі видзөднысö, ыштöкө сорасьнысö нин и сулалі коми ногаыс костын. Скөрмис Бияр да дыр эз видзөд эсся, вынысьөн йөткыштөмөн ратшкөбтіс муас, мед оз нин мөдысь веж синсö.

Водзö сійö эз нин ветлы, косіс бөр ордымөдыс пыж весътас. Но эз на вевъяв лэччыны бужöд йивсьыс, кок шыяс кыліс бөрсяньыс. Кыгысь коді найöс уськөдіс татчö, Кекур ая-пия мыччысисны. Кодъяскö мөдъяс кө вöліны, сідзи на лөсялөмөн и позис чайтны, а тайöяс, колөкө, и кыйöдісны на. А сідзкө и виччысьлас, кутасны оз пондыны. Черыс тай пыжас коли, да сійö-а, öти пуртнад кык чераыдлы паныд он на сулав.

— Мый нö кийд лудö? — ачыс Кекурыс водзджык и шыясис.

— Песовтам кө эськö! — киргыштіс Шайыс.

— Эсійöс пөрөді да? — эз и соссьы Бияр.

— А мый нö, эн пежав сядэйсö!¹ — зырөдыштіс Кекурыс, но эз на матö.

— Мед оз урсась сэтöні дай. Комиыслы!

— А ачыл эн урсав миянös? Помавны и воин?

— Асьтö кө эськө помалам! — черас и кутчысис Шайыс да водзөджык айсьыс петіс.

— Керышт! — дінас сылы и воськовтіс Бияр, ыштöкө садьсö воштіс, ньöти нин абу дона юрыс, а эськө артыштіс, мый ырыштчытöгыд чернад он на сапкы, а ырыштчынысö и оз сет Шайыслы, вувзьыяс да мырддяс черсö.

Бөрыньтчис кө эськө Бияр ли бергөдчис пышйөм вылө, Шайыслы кивыв и лон, а дзык дінас и сувтіс да падмөдліс, буракö, сійös, ачыс сійö бөрыньтчыштіс да лэптөм пыдди лэдзліс черсö. Тайö здукыс и тырмис Биярлы тшöтш кутчысьны чер воропас да нетшыштны Шайыслөн кисьыс, а асьсö сійös зыркнитны пельпомнас да уськөдны кок йивсьыс. Скөрвывсьыс эсся

¹ Сядэй — йöграыслөн сувтөдланыс.

тышкис на мырддьом чернас Шайыслы веськыд кок пыддосас: мед чотликасьо! Тадзи тай и вочлоны бур йёзыс, кор колө велдны коддоскө нэмыс кежлө.

Мыйкө, кылө, горзис Кекурыс, ыршасис аслас чернас и, но польсы пон моз нин шыбласис, да кивыль эз и керлы Бияр сы вылө и горзөмсө пель пөлөныс лэдзис, пыдди эз пукты. Пуксис бужод йыв дорышас да исковтис улиас, пыжыс дорө. И мырддьом черсө, дерт, босьтис аслыс вылө.

Кымынкө лун мысти, кор дорччан коласө нин вөлі тшупө Бияр, пестерөн мышкас локтис сы динө Кекурыс. Сувтис да тапикасьны кутис довъялгмозыс, а веськыдасө видзөддыны эз и лысьтлы. И кывйыс на, тыдалө, эз сюр шыасьнысө.

— Мый нө ветлан? — дөзмис виччысьнысө да юалис Бияр.

— Ыж тай начким да.

— Аслад гидысь өд.

— А яйсө вайи, бөрладорсө, — пөрччис пестерсө Кекур.

— Меньым?

— Тиянлы, гозъялы.

— Мый вылө кө?

— Вай бөр черсө, кодос Шайыслысь мырдин.

— Вывті лоө, — вомалис Бияр.

— А вый тупыль на пункті.

— Чер вылад ме кык сы мында на кодлыськө вежа. Ог кө куим мында на, выльысь дзирода да.

— А мортсө өд жугодін жө. Пыктөм кока гортын куйлө. Пидзөсөдзис пыкөсыс, — бөрддзис Кекур. — Сійөс он артав?

— Ме сэн чертөм вөлі. И код төдас на, мый эськө вөчинныд ая-пия, верминныд кө. Оні сэссия и пестерөн локтан, абу яндзим?

— А быдлаө колө черыс. Синваон тай и кора бөрсө. Вай, эн йөрмөд, а?!

— Ог нин, — сетчис Бияр.

— А көні гөтырыд, мед ректө пестерсө.

Бияр пыраліс воча чомъяс да петкөдіс мырддылөм черсө, и Унаыслы тшөктис петавны да ректыны Кекурыслысь пестерсө. Но мунны нин и коліс сэссия Кекурыслы (черыс тасма козьянас, тыртөм пестерыс мышку саяс), а сійө мыйлакө эз на вөрзыы, кутшөмкө сёрни бергөдліс на юрас.

— Этійө... — нурбыльтис сэссия.

— Мый? — зумышмөдчыліс Бияр. Чайтис, мый бара и письтылас Кекурыслөн лөгыс.

— Эн больгы. Некодлы.

— Мый ог больгы?

— Кытчө Шайыс жугөдіс коксө. Бурдлас на, гашкө. А йөзыслы нинөмла төдны.

— Но, чөв ола.

Пу йивьяссыд, да колаыс дзескыд и артмис, муртса бергавнытө торан, выльвывссыс выльбөс, ыджыдджыкөс, ковмис лэптыны. Сөмын кө эськө пушкансө и өшөдіс Бияр да донөдчанінсө и вөчис, шомссыс би кутансө, да нөшта дорччан изсө пуктіс, сэк унджык и коли на тыртөминыс, а усътөмасө на сэтчө тэчис и луасьнысө изки кодь гөгрөсөс тапкөдіс дасьтөм сук лятиссыс. Сэсся өд мый көсьян вөчны сывдөм көртссыс, сы серти и лусө нин вөчан.

Эськө эз и орлы ни джөмдыв Биярлөн уджыс, эз кө зыкө воыны Унаыскөд. А зыкас волісны пушкан пондаыс. Кучик ли абутөм вывссыд дөра коліс сы вылө, мед топавлана-пасыкавлана ветліс, а йөра вольсө, кыкссыс өтисө, эз сет Унаыс ни вонсө мыйдакө вундыны. Ыштөкө эз на вөв воча чомыйс да ывлаө нин и колісны гозья. Код төдас пө, кутшөм на лоө төлыс да кытчө на мый ковмас. Эз и вермы Бияр кывйө сетчөдны сійөс, мыетшкө и көсийсис көртө и йөратө, и оштө на кыйны да, мырдөн сэсся и босьтис өти йөра вольсө, йөткыштис Унасө гырджанас, мед мынтөдчас.

Коліс на и шом вөчны, төв кежлас на заптыны, да шом гусө кодйыны кайис пөрөмаинас, аслас тыла дінас. Дась пөрөм пуыс сән өта-мөд вылас вевсөн куйліс, чинтав сөмын, кузя-ө колө, и гусө кодйыны муыс небыд вөлі, трунда сора. Он өд ортсө, му веркөсас, биась да сідзикөн шомтө уськөд, джын уджтө сідзтө, ырнялан бинад, он аддзыв, пөймсө кө он курав. Быть кодйы гутө да пестысь сэтчө, сэсся вевтгы лөпнас да бөр тыртышт мунас, мед трунтитөмөн и сотчис пестылөмыд да вочасөн кыз өгырө чукталіс. Бура кө өд тай артмас шомыд, сиртөм ни вывті сотөм, лөз биөн и өзйө бөрыннас, вижтө оз лэдзлы.

Но гусө кодйөмыс ни пессө вөчөмыс сійө луннас Биярлөн эз на ло. Воис тыла дінас, а сәті, көдзөм вывтыыс, ош тапикасьөма, өтилаын вальмасьөма на, пытшсө ли мый ли вөтлөма, абу нин сюрөма кыскө вөрсьыд лыаиныд. Водз на сылы пырны аслас гуас и госсө на, гашкө, эз тырвыйө чөж төв кежлас, да сійөн и энөвтис ассыс гожся кытшовсө. Код төдас, гашкө, коркө, регыдья кадө, бара на петкөдчылас, выльысь вальмасьнысө во-лас? Абу өд ныристөм ни синтөм, кылө и аддзө, мый мортлөн

тані уджалома, да оз тай со инө и пукты, полөм абу. А сылөн кө абу, и Биярлөн абу.

Бөр и лэччис сійө чомъя гортас да корис Унаыслысь ыж яй тор, Кекурыслөн вайөмысь, нөшта кымынкө чери на дай ошкыслы сам вылас; пожъяліс яйсө и черисө сола васьыс, мед өдийөджык небзясны да тшыкан көрсө лэдзасны, ачыс тай ошкыд тшыкөдыштлө жө яйтө, чөскыдөс на сэтысь кылө; и нель пельөса, вывланьө пиня, куим кузь көрт тув на босьтис Бияр да бара кайис тыла дінас пыльөм пуктыны.

Тыласө кытшөвтигөн кок туяліс ошкыслысь локтөмсө и мунөмсө да мунөм туй вывсьыс нин казяліс пожөмө пайысьсөмсө, вылсыань, вөсни гөрд кырссяныс, гирсийөдлөмсө. Сөмын кө гыжсө сійө лэчтис, сэтшөм вылөдз эз на судзөдчыс, сьөдасьөм кыз кырсьсө куш и гылөдіс. Сідзкө, воывлөм вылө на арталіс. Да мыйла нө оз и волы, кынөмпөтыс ко сюрыштас? Со тай кузялаыс нитш-касьлөм нин сись пусө пузувтөма, гөса лельөсө сэтысь өктөма. А мыйта на сэтшөм сись пуыс со куйлө!

Кытчө эськө пыльөмсө пуктыны, сійөс нин и нөдждъяліс Бияр да важ вужля аддзис, гөгөрыс нин өшалан нитшкөн тырөма. Сэтчө и вөчис горс да сюйис самсө, тупкис бөр нитшнас, но эз топыда, мед тшыкан көрыс ылөджык паркйис. Ыштөкө аслыс вылө и дзөбис самсө, а эз ошсө пөрийөдлыны. Та бөрын кераліс коз понөлыас да єстьіс майөгөн дінъяссө, зутшійөдліс вужля дорас кык тымөдөн, пырыштан кост ошкыслы коліс весьт куим пасьтааөс.

Пыльөмсө вөчөмыс лунсө сөйис Биярлысь, а медясө октөмыс. Коліс өд сідзикөн октыны, радзтор вылө и мыдждөдны көрт тувьяснас кучкан лекансө да сы вылө на пуктөм кер помсө, мед пыр и пезьдіс пыльөмыс, мыніс радзторйыс таян помсьыс, мыйөн сөмын тувччас ошкыс муас сайөдөм таян вылас. Абу өд көч ошкыд, мед варкавны пыльөм улад, и көрт тувнад он на ви сійөс мышку вывсьяныс, сюрса лыыс и мездас кутшөмакө, но косявлас жө өд ловья яйсө пескылясигас да вир-гырдөн и мунас кытчөдзкө.

Вой, дай мөд, дай коймөд эз волы ошкыс выльысьсө тыла дінас. Гашкө, көнкө и матын гөграліс, да шом гуыслөн тшынасьсөмысь видзчысис. А эштис Биярлөн нокыс, ыджыд чукөр өкмис шомыс, вуж доддя вөлөн кө, куим-нельысь на ваймөн, и шом гуыс кусөма коли, и волөма ошкыс да шөдлөма пыльөм улас.

Шуйга киняулас ёкмьыльтөм сөпысөн кайис Бияр, мед ас вылас и лэччөдыштны шөмсө (вөвтө өд кодлыськө корлан, да бара вештысь), да водзпөрнас и кежаліс вөрас видзөддыны пыльөмсө,

а вужля дорас сэтөн ставыс пусь-пась. Көрт тувья лекансö мы-
етшкö кыскöма на ошкыс вылысас да гөнсö и вирсö сэтчö ко-
льöма. Но мыйöн төдан, ёна-ö доймалис да ылöдз-ö мунис? Нитш
вылас войталом гырдыс серти и ковмас туявны. Сукмöма нин
эськö гырдыс, коркö войсяыс нин, но кыткöяясö люзьгöмөн и
виялöма да кузяөн визыйöдлöма нитшсö öтарөн и мöдарөн. А
тадзтö öд öдйö жö ойöстан ловья лолыд.

Абу ылöдз и ваткыльтöма ошкыс, пöрöм пу сайö водлöма. И
кок шысö на Биярлысь матöдз абу кылöма дойсö пыкöмысла ли
абу нин вермöма сувтнысö, вылысас воöмысь нин сöмын лыбöд-
чыштис да пунктис юрсö пöрöм пуыс ылö, корснитис нырнас чуш-
нитöм сорөн.

Гашкö, мудералö на, матöджык мед сибöдны да уськöдчыны
бөрья эбös вывсьыс, тайös и чайтис Бияр да чернас лösöдчöмөн
тувчышталис сылань, муртса кö нöшта, и судзас нин сöтьштны
юр бөрланыс, кöни баябöж ёсьыс. А ошкыс эз и вөрзьев, видзöдис-
видзöдис да куньтыргис синъяссö, лизгырмунис став вывтырнас
да пöлыньөн и уськöдис юрсö пöрöм пуыс вывсьыс. Кувтöдзыс
коньөр и доймалöма, вöлөмкö, ордлы костыс весиг кыклати восьса
жервидзис.

Кульнысö Бияр эз и босьтчы пырысьсö, педзышталöмөн
лөнбöдис асьсö мыжа кылöмсьыс. Эськö ошкыс кö сылы мыйкö
лөксö вöчис таöдз ли öнисö, кувтöдзыс, курчис ли мый ли, сэк,
гашкö, такалис и ставыс, а куйлö со коньөр, эштöма нин олöмыс, и
яндзим быдөн сы водзын. Висьтавлöны тай шмонитöмөн, но
збыль туйö, мый ошкысь и лолöма му вылас комыис, и артмö,
быгтьö ас виратö, öти вужьятö и виин кодöскö.

Перйылис нин Бияр пуртсö, мед сэсса кульны ошсö кадсö
воштöм дорысь, но эз на лыб кыис, и шуис эновтлыны. Косалис
вужля динас, кытчö октылис пыльöмсö, да перьялис кучкан лека-
нас тувьялөм көрт тувьяссö: вывти на лöö сэтшöм донаторнад
шыбласьöмыд, бур йöзыс важ пыжсö сотöны да сэтысь бөр став
көрт тувсö чукөртöны. Вöлись сэсса, мунис да, кулис ошсö, и то на
дзугыльтöдлис лөка дойдалöмсьыс.

Госыс ошкыслөн кык чунь вомлös кыза и вöли. Буракö, абу и
шедлöма пöтасаджык сёяныс аслас кытшовсьыс, а йöзад пыр-
нытö он на и лысьт, асьтö мед оз косявлыны, и петöма шöйтнысö.
Та мында госнад öд он жö вод төв кежлад гуад, тöлысь-мöдөн и
папалас унзильыд.

Ош кыйöмнас Бияр некодлы эз и ошйысь. Эськö яйвыв
ошкös кö, мös ли вöv косявлысьсös, мунис да чергöдис вожа

йыла шынас, сэк позис и вылө кывъясьны-а, дышпырысь вочавидзавны быдсяма юасьёмыс вылө, ыштөкө оз и сулав паськөдны сёрнисө. Унаыслөн вомысь нин петөма сылөн ош кыйёмыс, Намырлы калбөг вомаыд висьтасьёма, миян пө тай ош яй вайис-а, сэсся, буракө, эз нин некодлы төдлытөмөн коль сиктас.

Аскинас сөмын ваяліс Бияр шомсө. Жаяліс да пуксис кола дорас чаг чукөр вылө, ойбырө сетчыліс. И сэки кодкө тувкис сылы пидзөсас. Вөлөмкө, Тутөыс мынтөдчөма дом йивсьыс, йирөма көвсө, сьыліас утшысыс¹ да бовъялан көв помыс и кольөма. Но абу тай пышйөма воддза гортас, мевъялөма нин, сідзкө, выльлаас. И бур вылө бурөн жө и тувкис со.

Ворсөдчыштис ськөд Бияр, а сэсся ышмөмвывсьыс мөвпыштис дзерөдыштны сійөс, мед томсяньыс и велалас мунны ош вылас. Медводз ош кунас повзёдліс да зильгана увтөдіс, сы бөрын сөпсьыс виж ванас, бурдөдчан вылө кольөдөмнас, несйөдлытөдзыс исөдіс, и медбөрын ош гыжнас нырсө, гөнаинсө, муртсаника парсьштис. Таысь Тутөыс эрыштчыліс да тайкө эз пурьшт кисө, варскыны и чеччыштлис, а синъясыс сылөн скөрмөмысла вежсьылісны быдөн, көдзыдлөз рөмаось лолісны. Кытчөдз эз дзөб Бияр ош гыжсө, сэтчөдз Тутөыс эз и сайкав, и малыштнысө на эз сетчы дзык пырсө, бөжнас эз легөд ни.

Бурасьтөм на и лои Биярлөн ськөд, Борган сэтчө уси.

— Мый нө висьталан? — ылөсас и юаліс Бияр, а яндзимысла аслас йирмөг лэчкис мышкуөдыс. Но он өд вузав юртө, ме пө эськө пежалі тэнө да.

— Сідзи. Ош пө тай кыйөмыд да.

— Мый сійө йөйтө?!

— Мыйла йөй? — чуймис Борган.

— Пыльөмө тай пырөма, татчө, тыла дорө и пуктылі да.

— Сідзтө өд ставыс йөй, коді шедө...

— А йөйыс и шедө! — лыбзьыштис Бияр. — Сюсьыс ылі ветлө мортсьыд!

— Яйыс өд өткодь. Ошлөн кө, ошлөн. Мед вомад пырө-а.

— А нуышт! Бур кузя!

— Ог, бара шуасяс кыз путкыльыд, — омөльтис Борган гөтырсө.

— Мый нө шуө? — ыркмунліс Бияр повзёөмысла, эз-ө нин петав Намырыслөн ковтөм кывйыс.

¹ Утшыс — ошейник, рочөн кө.

— Йёзыслы пö тай шедö, тэныд нинöм оз-а, китöм чодзлы.
А сийöс и курксöма, вöлöмкö, кырныш моз.

— Дзоньвидза на кыкнан кыид да. Ен сыкöдөн!

— Черöс жугöдi, увйö сöтышгi да. Веськыда, буракö, лоöма скөрвывсьыд. Со кызди чуктöдi,— мышку сайсьыс, лаз нопсьыс, кыскис Борган бантьяйсьыс на вылö потöм черсö.

— Татшöм черыд!— видзöдлiс да дöжньшгiс Бияр.— Ме тэныд шулi нин, мися, вай шыбита! Аддзан он?

— Мый аддза ог?

— Сывдöмаöсь тай көртсö да көрт сiт¹ сорнас и кисьтöмаöсь луас. Со тэгйыс² на чиръясөн тыдалö. И абу лючки и донöд-лöмаöсь выльысьсö да ваö брутокöмөн и дзирöдöмаöсь. Йиторъясөн со быгтьö и кынмöма.

— Он нин вермы йитны? Пузьöдлöмнад кызкö?

— Сы дыра жö öд лоас. Мöд увйöдз. Юасьлы йёзыслысь.

— Мый?

— Абу-ö кодлөнкö көрт жугласыс.

— Сюрö бара. Ачым на кыськö жугалöм черкуш³ аддзылi. Корсьла кö! А сэсся?⁴— нюмъевтлiс нин да бöр уси Борган сьöлöмнас.

— Сывдам сэсся да выльысь кысьтам. Мый тэн колö!

Шедiс Борганлы лачаыд, да дыртö сийö эз нин сулав, летйы-сян тэрыб воськолөн и мунiс сиктас. Бияр весиг мöвпшгiс, мый регыд и бергöдчас тыра лаз нопнас да оз нин вермы виччысьлы-ны аскисö, кевгыны кутас пырысьөн и сывдыны вайöм көрт жуглассö. Но рыгтя пемыдöдзыс сийö эз нин петкöдчыв. Йёзыд öд асланыс абу жö ййöсь да абу и лышкыдасьöмаöсь сыкöд, нöшта нин тöдмалöм бöрад, кытчö да мыйла чукöртö сийö став сюрана көрт жуглассö. Тадзтö пö аслыным на ковмас, вермам жö тэ моз Биярыд дiнö мөгмöдчывны.

Биасьлiс ывлаас Бияр да öгырö уськöдiс, и шоддза яй⁴ вöли вöчö ош яйсьыс, кор локтiс Борганыс. Сюрöма сылы кодлөнкö шыбитлöм черкушыс да кодкö жугласьöм кокансö сетöма, ёна нин дзайтöмысла, буракö, сы мында и перйис лаз нопсьыс. Но öд и аслас потöм черыс на вöли, да позис нин ломзьöдлыны усьтö-масö, вийöдны сорастöм бур көртсö öти чер тырыд.

¹ Көрт сiт — шлак.

² Тэг — сера, минерал.

³ Черкуш — важся гöран, көрт йыла.

⁴ Шоддза яй — вöсни беддьö пысавлöм яй, шашлык нога.

— Мед, тырмылас, — такөдіс Бияр. — Видлам аски, мыйкө артмас кө.

— Оз нө артмы? — шай-паймунліс Борган.

— Мыйла оз?! Коді шуө?

— Ачылд өні шуин да. Мыйкө пө артмас кө.

— Водзвыв нө колө ошйысьны? Кыгысь сэтшөм комисо аддзылін?

— А ыдьясян жө быгтьө да?

— Артмыгөдзис и ыдьяся. Айө моз! — дөзмис Бияр. — Кытшала сёрнисө он гөгөрво!

— Гөгөрвои, — шешмунліс Борган.

— Сей шоддза яйсө. Босьт эсийө ыджыд торсө.

— Ог кө-а.

— Мыйла он?

— Сёян да пөтан.

— А мый нө... эськө?! — шемөсө усьлі Бияр.

— Юалас кыз путкыльыс. Мыйон пө пөтин.

— А ну тшөтш сылы. Шодзнас и ну. Миян со на.

— Сідзи, гашкө, озджык дыдгы.

— Аски лок-а. Колө кө черыд.

— Ковтөг оз ов! — нюркнитіс Борган.

Шодзнас и нуис сәсся сийө гортас өдъя пөжөм ош яйсө. И сы мунөм бөрүн нин емьштис Биярлы юрас, эз-ө йөйтав татшөм лышкыдасьбөмнас, оз-ө Намырыс аслыс ывлө и пукты тайөс, козин туйө на коркөясьыс, да водзөсө на вельмы, ком кыйөдны и кут. Дерт, кытшлавны и пондас Намырсьыс, оз нин сәсся сылы шедөдчыв, да ань сам ылад тай асьтө на, садь төдтөмөс, кыскө.

— Мый нө пытькырасян? — шыасис Унаыс, петөма воча чомсьыс да.

— Тшынсьыс тай курзьөдіс.

— А абу нин өти шодз да?

— Борганлы сеті. Он кө вид.

— А мед, Намырыслысь ме босьта жө рузумсө.

— Кутшөм рузум?

— Сетө тай вөлі. На пө, колөкө, Биярылды нямөд ылас.

— Нинөмла, — өлөдіс Бияр.

— Но, отарө нө сылы? Мыйта чери нулін и!

— А кыз кужан.

— А дьөбө нө кольчча? — чиктыліс Унаыс асланьыс венөмысь. Эз төд да эз и вермы сийө вежөртнысө, мыйла Намырыс вөзйыліс рузумсө, да сыысь нин бур вөлі.

Аскиа луныс Биярлөн көрта удж вылас и муніс. Борганос сөмын сійө и виччысис, а кыкөн локтісны Адаскөд. Ытшкысян торпыриг да чегөм өжын вайис Адасыс, вөралан пурт пө эськө да өжыныс кө выльысь артмас, мед и дженьыдджык воддзасыс, сөмын оз рөшкыд-а. Но Борганос черыс и вийсьөдіс, бөрдмөныс нин коліс, да пыксьыліс став көрт жуглассө отлаын сывдөмысь, медтө оз пайкөдны бөрыннас, ичө-тик чер и кисьтны.

— Кыкысь нө ломзьөдлам?!— ланьтөдіс сійөс Бияр.— Оз төр тэнад шыбласыд өтилаас?

— А оз кө вияв менлы вылас?

— Вешйы, эн урсась!

Бияр тшөктіс кыкыслы ваявны да мыччавны сылы пазавтөмджык шомсө, а ачыс лэдзалис усьтөма пытшкас вывсянныс юмыр восьсаинөдыс. Тырыштис мыйдакө усьтөмаыс, да вөлись пуктыштис көрт жуглассө, бердөдіс шомнас да бара пуктыштис, тадзи вочасөн и тыргіс усьтөмасө. Увсянныс ломзьөднысө кольөм горсйөдыс суйис сартасөн бисө. Бура дыр на пуркйис-петіс сьөд тшыныс, везйөн өшөдіс сасө кола йиркас, ыштөкө эз аддзы сэтысь ывла югыд усянінсө. Но ньөжйөникөн кельдөдіс тшыныс да руа лөзөн и кутіс качны. Сідзкө, өна нин кутчысис биыс да лэптис өдьялунсө шомсө ырньөдөмөн. И, төдөмысь, коліс нин содтыны шомсө. Видзөдліс Бияр, а усьтөма пытшкас тыртлөмыс весьтысь нин унджык пуксьөма. Өдйө сэссия и лөдсалис юмыр восьсаинөдыс, лов гөнсө кисьыс и синкымьяссө тшөтш чишкаліс.

Томнас том, а Борган серти Адасыс верстьөджыкө асьсө пуктіс, олөм олысьсө, та вөсна эз и гыав, кывсө пыдын кутіс и, эськө төдтөмөн жө вөлі сылы көрттө сывдөмыд да; ас кежас, тыдалө, и мөвпалис, кызди да мый сэн вөчсьө, усьтөма пытшкас, да помсө и виччысис. А Борганлөн эз овсьы чөвтө, помала тойліс сійөс кодкө юасьнысө.

— А этат кө петас?— копыртчылөмөн нюжөдліс сійө кисө ломзьөдчан горйыслань, кыті вералөмөн нин пырис сынөдыс доналөм усьтөмаас.

— Мый петас?— векуштчыліс Бияр.

— Сылөм көртыс?

— Лөсьөдөма сылы нөптовсө.

— А сэтысь кызди?

— Розьөд.

— Кутшөм розьөд? Көні?

— Тупкөма. Эн кут ланьтлыны?

— А-а... оз нө сэтчө веськав? — мөмъялыштис да бара шыясис Борган.

— Кытчө, мый?

— Нөптовас. Пөимыс и быдтор.

— Веськавтөг оз.

— Бара көрт сит и лоө сідзтө.

— Торйөдан.

— Сорассө?

— Ачид тэ сорасыс! — нимгысис дөнзьөмысла Бияр. — Мыйкө вежөралөн, а мыйкө йөйыслөн. Абу нө дас пөв сьөкыд сывдөм көртгыс быдсяма коляссыс? Оз улас пуксы?

— А сэсса?

— Увсяньыс и лэдзам сэсса, восьтам розьсө да. А бөрыннас көрт ситсө. Та мындасө он гөгөрво кын юрнад?

— А он нө кынтывлы юртө? — дорйысьшыштис Борган.

— Сэтшөм на и чужлөмыд! — вомалис Бияр да инө эз и пукты лөгасьөмысла сылысь вешкырасьөмсө. Мыйкө дыра мысти нин аслыс эз ло руж кывтөм пемөсасьөмсьыс, а уськөдчан уджыс эз на вөв, и Адас динө шыясис:

— Абу на кык лопта пельыса?

— Абу на, — нюмыртчыліс Адас. Эз тай ков сылы няклявны, код йылысь тшөтш сёрниыс.

— А мый нө жуйялан? Коктөмасьө жө, буракө, корасыс-сьыс-а.

— Ог и жуйяв. Мелань нин мамыс.

— Он өд мамсө вай. Дугды нин сы вылө ыстысьнытө.

— А Ниасө и нуөдла.

— Кытчө нуөдлан?

— Пув вотны. И мый лоаныс лоө мед!

— А мед и лоө! — ызийөдіс Бияр. — А пувйыс нө эмышт?

— Эм көнсюрө. Гырысь и. Отлаын и ветламой.

— Дөзмөдчынысө тияны?

— Ылыстчам өд. Мед шы он кывлы! — серөктас Адас.

Лун шөрыс эз на вөв, Бияр восьтіс усьтөма увладорсьыс тупкылөм розьсө да вийөдөс кузь вугъя лөданө сылөм көртсө, кытчөдз сорасыс, сьөд шактараыс, эз кут петны. Муас нин сэсса көрт ситыс и вияліс. А лөдансьыс бурсө кисьталіс лөсьөдөм луясас. Полис, мый, гашкө, оз на и тырмы, но буретша тырисны куимнан луыс. Сөмын тай бөрья кыкыс, Адас понда вьлөн на вөчөмаыс, пузылысны улысла-а, мисьтөмөс и артмөдісны мыгөр

сертиыс пуртсö да öжынсö. Но öд сы вылö и водзö на дорöмыс, мед кытi колö лямöдны да вöснöдны, дзирöдны на дай.

Дорччан бисö и ломзöдiс сэсся Бияр да сьölöмсö ассъыс бурмöдöм могысь пуртсö да öжынсö Адаслы водзджык и дорис да дзирöдiс, воропавны да лэчтыны сöмын и колис. А Борганöс виччысьöдiс на. Туяна и артмöма вöли черыс, пысыс шыльыд пытшкöса и, а сылы эськö мед лусъыс перiöм бöрын и дась нин вöли, мун да керась, чезрасис сэн пинь висьöмысь моз, полiс кывсö песны да.

Дорöм бöрас Бияр выльысь на донöдлiс черсö да муртса кежлö суйлiс ваö, а сэсся сетiс кеснас¹ Борганыслы да тшöктiс котральштны ывлаас. Кык бур тадзикөн вöчис: черсö лючки дзирöдiс и Боргансö песöдыштiс.

Чöжмös ю пölöныс катöдiс Адаc пувсö вотны. Сэкъясö, кор ордымыс матыстчылис ю чукыль дiнас, Бияр нöжмöдлiс видзöдлыны изъя пыдöса югыдлöз ваас да бöръяөн и вöсьлалiс. А сы водзвылын посниа да тэрыба тувччалiс Ниа, пельпомъяснас тшöтш вöрöдiс, ыштöкö сынышталiс. Вывтырнас сiйö ичötджык вöли Унаысь дай зэрна кодь гөрöсiник, и эз и вермы асьсö кокныдатö нуны, эз и нывлөн кодь вöv вöрасыс, лайкова кывтана. Сы серти Унаыс, кодi Адаc бöрся и вöсьлалiс, веж петанаджыкөн видзöдсис Биярлы, весигтö выли юраөн, мыетшкö и мышсянныс.

Кодлы пö тай мый енмыд сетас. Вир-яйсö и тэчассö вывтiджык и сетöма Ниаыслы, абу ыджда сертиыс, а чужöмсö и мичаös, еджыд сёйысь моз лöсьыда тапкöдöм да шыльöдöм банаös, войгыштан вöсни ныраös, сёй рöм синмаös, юрсисö шурыдös и. Öнтай на, кор сулалыштiсны Адаcлөн керка дорас, чуймис Бияр Ниа вылас öтчыд и видзöдлöмысь да нимкодясис гусьөн синбöжавлёмөн. И долыд на босьтлiс сыысь, мый коктöммöдiс Шайсö да оз нин сылы и веськав Ниаыс, а петас регыд Адаc саяс да нöти оз и тшыкöдны гозъя коми вирсö.

Кутшöм воö да кытчö на артмас пувыйд. Аддзылан тулыс помнас, пасьтала дзоридзалö еджыдөн, туйгö нин и гаровтчö, а локтан арнас, да тыртöм вöрыс, тусьөн-тусьөн сюралышталö: коркö гөрддзасигас на и кынтылöма войтöвглöм ывлаыс. Та вöсна тешкодь и овлö, мый вывтасiнас нöти абу вотöсыс, а матын, увтасас, эмьшт. Васöд муыс да öшалан улис сынöдыс и видзыш-

¹Кес — клеши.

тöны ыльöбөн локтан кöдзидсьыс, ассьыныс воддза шоныдсö сетьштöны.

Эз и бур вөрö, а ляпкыдик пожöма вутшкöсь нюкöсö кеждис Адаc пувсö вотны. Вутшгяс вывсянньыс и быдмисны пуясыс, а костаныс мутшкöса петалöма керчыс да чöдлачыс; кöнсюрö чöдлач тусьясыс бовъялисны на. Но и пувйыс пемыдгöрдөн öшалис кузь заяс помас вутшгяс гөгöрыс, öкты сöмын джыввийö копырөн. И ваис эз пычыкась кок увсьыд.

— Эстөн гырысьджык на, пыдиас,— шуис Адаc.— Сэсся кодарö сетчаннуд-а.

— Кодарöкö öд,— шпыньмунис Бияр.

— А торйöдчам нö?— юалис Уна.

— Огöй, сидз ылыстчылам,— вочавидзис Адаc.— Тi кыкөн и ми кыкөн.

— Огö öд кольöй,— пыльсмуналис Ниа.— Татчö бöр и пета-там.

— Да мунöй, мунöй!— ышöдис Бияр.

— Бытгö удзöдам ми найöс,— дольыштитс Уна, кор мунисны Адаcыс да Ниаыс.

— Сы понда, дерт, тэныд!— дзерöдис Бияр.

— А мыйла нö?

— Нинöм налы содтöд синсьыс.

— Оз öд мусукасьны кутны?

— А мый озыс?

— Лун югыднас?

— А мый нö, пöсялан кö сэтчö?! Оз нö кыскы пöлыд динö?

— Эн ыкшаась!

— Ачыд он-а? Мый дыра нин певъялан менö!

— Ме эськö, пондылан кö!

— А кор нö?

— Бöрти рытнас... гашкö,— нюмсермуналис Уна.

Пырисны нюкöсас пыдöджык да мöдарöджык мунысьяс сертиыс и кутисны вотчыны. Пувйыс збыльысь гырысьджык и вöли сэн дай кисьмöмаджык, китырөн апыштан вомад, да юмов суксö резыштöмөн и потласьö пинь улад, шомыс оз и кыв, кодакодь на ыштöкö.

Унабыслысь рытнас кöсьысьöмсö мөвпалöмөн да сыысь водзвыв гажмыштöмөн и вотчис Бияр. Син водзас на сувтöдлис, кызди пöрччыясны кушöдз да водасны, да ёна и нокасьны сэсся, дай оз на и öтчыдысь. Сы бöрын, кор йöра вольса пушкан вылас мырддигөн йöткыштитс Бияр гыррдзанас Унасö, эз на сэсся и

сибодды сійо, пыр на чушгяліс; чинліс төлысьыс и выльысь нин чужис, а век на кутіс лөгасьомсө. А оз нө чепсась томдырнад ай колөмыд?

Вотчигмозыс водзланьоджык вешйисны вочасөн да эз и ка-
зявлыны, мый чукчи, вөлөмкө, тшөтш вотчө, кокалө пувсө. Кот-
сьыны сійо кутіс налөн матыстчөмысь да нюжоддыны тошка
юрсө, тапикасьны пукалан вутш вылас, бытгтө йөткыштчыны и
көсйө лэбзьөм водзас. Но бордьяссө эз на паськөдыштлы, эз на
тэрмась эновтны пувъяинтө, ачыс на виччысис, кор мунасны сы
дінысь.

Пуртыс да биваыс сөмын и вөлі Биярлөн сьорас, ичөт черсө
весиг эз суй тасма козьянас. А ньөввужсө босьтны и юрас эз
волы. Со эськө и яйыд, кык лун сөймөн гозьялы, да он лый
мыйөнкө, пуртнас кө нин оз шыбит. Но сы вийөдзыхд чукчыис оз
и сибөд, дай пурттө на, гашкө, ковмас корсьны, дзурс пырас йыв-
нас кытчөкө да.

Кысь эськө веськоддыс, но ланьтыліс кө чукчыис, позис на
кызкө-мыйкө вотчынысө, а котсөмыс сьлөн муртса и оравліс,
да пель сьөдмыгөдзыхс лои Биярлы. Көтөрөн уськөдчылөмөн
повзөдіс чукчисө, мед лэбзяс кытчө гажыс. А сійө матөник и
кыпөдчис, кос йыла пожөмө, резювсө на сэтысь чегьяліс сьөкы-
дысла. Но бырыштис, тыдалө, полөмыс, да дугдіс сэсся гораасө
шыалөмсьыс, ас кежас моз костөн-костөн и пондіс тоткыш-
тавны.

Сайкалыштис Бияр да бара өддзис вотчынысө, сэсся веськөд-
чыліс кос мудзөмсьыс да видзөдліс Унаыс вылө, кодлөн шарс-
көмыс и кыліс орчөнсьыс. Ээв пувъя вутш и сюрөма сылы, да
кыкнан кинас и вотчис, лысьтис бытгтөкө пувсө кок улас пунктөм
кидозьяс. И тырны нин кутөма кидозйыс, регыд кисьтыны лок-
тас Биярлы рак-нопьяс¹, зэлөдөм вевта чуманас.

— Ойя да! — виччысьтөг лөвтыштис Унаыс.

— Мый нө сэтчө? — эз и видзөдлы лючки сылань, юалис
Бияр.

— Кокөс тай көтөді.

— Кытчөкө?

— Вутш улас. Ва вөлөма. Эг и төдлы, пырис.

Ковмис Биярлы пестысьны да би перйыны, косьтыны Уна-
ыслысь чарки пөвсө да вурун чөрөссө. А чукчыис эз и лэбзьи
кос йыла пожөм йывсьыс, сөмын гораджыка пондыліс котсыны,

¹ Рак-ноп — пуысь да сямөдысь вөчөм, торья лапөдьяса.

кор Бияр шун пусö нетшкаліс бипур вылас, и бөр лөнъодчис тоткышталөмөдз, бисъыс ни тшынсьыс эз повзъы.

Чарки пöлыс, сирваа кучиксьыд да, öдйö и шураліс, а чөрöсыс бура дыр на руаліс, эськö мый вынсьыс и пидзраліс Бияр да, кымыныськö гугöдліс косьтігас и. Унаыс пукаліс воча сылы лямальштöм паськыд вутш вылын, лэптывліс да нюжөдліс биланьыс кöтасьлөм шуйга коксö. Ачыс сэки гатшöдчыліс вутш вылас да кыскышталіс на йöрдöс помсö, и тупльöс пöкъя да пидзöса еджыд кокыс синмас и пырис Биярлы, вирыс тіркмунылытöдз дэльöдіс сійöс: со пö эськö, да он босът. Он öд тшыгвылысь моз уськөдчы да лөкысь и мыйкөкер.

Чөрös косьмытöдзыс и пыкис Бияр сэтшöма нин колөмсö. А кытшовтіс сэссия бипурсö, лажыньтчис Уна дінас, мед кышавны сылы чөрöссö, инмис кинас сылөн куш кокас, и мыніс мывкыд кутөдсьыс, ыштöкө усьны нин и кутіс кыськö вылысь да ачыс чеччыштіс.

— Дугды но, кыськö тай эмыд!— водзсасис на Унаыс.

— Ог! Абу жö ме кöч вира тэныд!

— Да воас на рыгыс, шулі эг?!

— Рытöдзыд йöйман на татчö!

— Он аддзы, видзөдöны?

— Коді?

— Чукчыис!

— Сылөн видзөдöмыд! Кодлыкö оз висьтав!

— А бара нин со котсö. Яндысьтöмьясыд пö тай эмось, вöрад нин со мый керсьöны.

— Мед котсö, ачыд кö он!

— А тэныд и Енмыс нин абу. Лун шöра лунас колö!

— Енмыд лун и вой аддзö. И бурөнсьыд некодös на абу ёрлöма. А ог нö ме бурөн?— бөррдзана шуис Бияр.

Та бöрын Унаыс небыд кйөн нин сэссия пыксьышталіс, куньса синмөн да. И рытнас гортаныс, водісны да, эз на öтчыдысь ноксьыны и.

Пув вотан луныс тай и вөлöма гозъялөн шудаөн. Локтан гожöмнас Унаыс чужтіс пиös, да тайö лун вылас и усис сылөн сьöктöмыс.

Медыджыд могсö төв кejas Бияр пуктис керка керсö пөрöдны, мед тулыснас кырссыйны да тшупны ульвивсыйс, гожомнас косьтыны, а мати арнас, зэрласьтöдзис на, лэптыны нитш вылö. Öтнас керкаыс и öкмöдис сылы вогögöрся уджсö да нöшта йöзöс на медавлöмөн. Вештысыйсö медавлöмсыйс сийö арталис вöчасьöмөн, кодлы мый колö, пусь-ö-көртысь. Но пуйд кö ылö ветлытög и сюрö, кытчö кутшöм лöсälö, тö көрттö абусыйд он сывды, а көрта изсö Гамысь сöмын и висьталöны, а тыртöгыд сэтчö он жö ветлы, öдйö на шуасны, пукты пö водзöстö. И төвся туйön да вöла-дöддьön эськö медся окта¹ ваявны сэтись көрта изсö, да кытысь вöла-доддыйс, он кö кодкөдкө сёрнитчы донысь донön? Со на кыздикөн öшйис Бияр вылö керкасö лэптöмыс. А öд и мукöд шогыс на эз петавлыны юрсыйс, пуксян төлыс сöмын ылыстыштитис найöс-а. Тулысыс воас, да мутö на ковмас вöчны-кокавны, идтö и шабдитö кодзыштны, сэсся видзтö кытчökö весавны, көсьян кö чаньтö да куканьтö лöсьöдны. И няньсыйд да көм-паськөмсыйд эськö мед эн орлы, и йöзад эн петавлы быд коланторйысла. Ыв-лаынджык аслас Биярлөн уджыс, да горт гögör олөмсö Унаылысь оз и адззы быттьökö, а сылы помала мыйкö да мыйкö колö: то латкаыд, то ватланыд, то тасьтйид, то шомöсыйд, то печканыд — помыс оз и волы. Ас олөм вылад петан, да медтыкö ставыс аслад и вöли.

Чери кыйöмсыйс да торйön нин вöралөмсыйс Бияр эз и чайт асьсö дзескөдны, но сöмын матигögöрас петавлөм вылö и чөвтасис на вежөрнас таво арсö, мед оз лöв ылөдчöма керка лэптöмсыйс. Збылысь кö öд вöравнытö да дырөн ветлөмөн, колö на и чös туй писькөдны да вөр керка вöчны, ноддя дорад пыр он узьлы, а кор нö быдлаөсö эштылан? Сидзи нин и ковмас төвсö кыскыны: öти лун, шуам, пөрöдчыны, мөд лун кыйны мыйкö уськөдчывны. Тайön и такөдлис асьсö Бияр да ньöти эз дзуглясь сы понда, мый кодкө локтан вöралөмсö нин и гаралö, а сылы и шунытö на нинöм. Но ыштökö дояинсö и емалис сылысь чукчиыс, кодös адззылисны Унаыскөд пувсö во-тигас, кайны и тойлис. Шуис ветлыны ньöввужнас да лыйны, и велөдөм могысь Тутösö тшöтш нуöдлыны: усьöдан да, гашкö,

¹ *Окта* — эффективöя, öния ногөн кö.

тявкӧдас нин, ыладлас чукчисӧ, а пувъяинсьыд сійӧ некытчӧ на эз лэбзый, тӧдӧмысь, зэв нин орчча ягас из чирсӧ кокалыштны.

Мунисны сэсса Тутӧыскӧд медводдзаысь кыйсьынысӧ. Вӧрӧдзый вотӧдз Бияр эз лысьт сійӧс мынтӧдлыны дом йывсьыс, но тӧдӧмӧн и нуӧдис Адаслӧн керка динтӧыс, медым видзӧдлыны, вунӧдӧма абу на воддза гортсӧ да кодарӧ нин ёнджыкасӧ кыскӧ. Локтисны сэтчӧ керка дӧнас да кежны и зэлӧдчыліс Тутӧыс, исалис сынӧдсӧ ныр йывсӧ тэрыба вӧрӧдӧмӧн. Парскис таысь Биярлы, да ачыс эз удит мӧвпыштлыны, мыйла и шыбитіс кисьыс дом помсӧ. Но бӧрсӧ эз нин копыртчыв кутнысӧ, ӧтнас и шавксӧдіс Чӧжмӧс юдорса вӧрас. И сэтӧн сійӧс и вӧтӧдіс Тутӧыс. Дерт, сывліс та бӧрын Бияр, ӧдийӧ и мынтӧдіс утшыссӧ Тутӧыслӧн сьыліысь. Аслас понійӧ нин и пуктіс сійӧс.

Ичӧтыд, мортыд ли понійыд, мый оз аддзы, сэтчӧ на и ылаӧ, оз вермы син пырыс сідзсӧ лэдзны. И Тутӧыс туй кузялаыс ылавліс, пыстасӧ и кенясӧ увталіс, быд мыр увсӧ исалис, а то и гудйисис на, шырӧс, буракӧ, кыліс да. Вӧдзпӧрсӧ Бияр сувтыштавліс виччысьлынысӧ, а сэсса дӧзмис да эз и ньӧжмӧдлы: вӧтӧдас, колӧкӧ. И пувъя нюкысас ӧтнас кежис ордым вывсьыс; матын эз тыдав Тутӧыс, эз петкӧдчыв чукӧстӧм вылас ни. Кутшӧм нӧ пон быдмӧ, асьыс месайсӧ¹ кӧ нин оз вермы туявны?

Пырис Бияр нюкӧсас да медводз кос йыла пожӧмланьыс и веськӧдчис. Дерт, эз зурзьӧд нинӧмысь видзчысьтӧг, кывзысьмӧмӧн да ӧгарӧ-мӧдарӧ видзӧдалӧмӧн и воськовталіс, озӧ кыськӧ сьӧдӧн уськӧдчы чукчиыс. Но некысь тыдаланаинсьыс сійӧс эз аддзы, эськӧ джуджыд вутш выӧ и быдӧн сувтліс да. А кокасӧмыс сылӧн, регыдъяыс на, корсьтӧгыс тыдаліс, куш нин пув кышыс гӧрдӧдіс пыччалӧм тугъяссьыс. Сідзкӧ, ягас на и лэбзис да пуртікасьӧ кӧнкӧ сәні, эз кӧ нин сюзь ли дозмӧр варыш пановтны Биярӧс. Но найӧ эськӧ тані и пуркйисны та ыджда чукчитӧ, и тӧлыс на лэбӧдаліс кольӧм гӧнсӧ.

Весьтас, орчча ягас, и петіс сэсса Бияр, нӧджъяліс тыдалысьджык вужлясӧ да лыа рӧчсӧ, сисьмӧм вужлясьыс нин артмӧмсӧ, и ӧти лыа рӧч сайысь кодкӧ быгтӧ муртсаника мыччысьліс. Та вӧсна кытшолӧнджык и босьтіс сійӧ, ньӧввужсьыс бура лыйны судзанаӧн, но эз на тыдовтчы сылы рӧч сайыс,

¹ Месай — кӧзяин.

ырс воис Тутõыс, чеччышталис нимкодъысла да видзõдлис син-мас, ыштõкõ юалис, кытчõ водзõсõ, и ризõдис рõчланьыс, эрыштіс да зильгыны-увтны кутіс бõжсõ летõмõн, вочасõн саявны. Но сы пыдди рõч мõдарсьыс бõрõн-бõрõн петкõдчис чукчи. Абу õд пышкай сійõ веськыдатõ жбыркнитны, õддзõдчыштны сылы колõ, а õддзõдчынысõ и эз сет Тутõыс. Таысь бур здуксõ Бияр эз нин и виччысь лыйнысõ. Шпут инмис ньõвйис чукчиыслы, да паськõдõм бõж вылас и ляпмунис сійõ, пõри бокша. И Тутõыс эз коль сійõс видлытõг, варснитис юр бõрсõ.

Õти бõрад пõ тай мõд на колõ, и Биярлы эз на мунсы ягсьыс, ветлõдлыштны на сійõс кыскис, оз-õ нõшта чукчи ли кõн¹ дозмõрыс лыйны сюр. Важсõ и вильсõ, унаõс пуртікссõ аддзылис, а сэсся и кодлõнкõ чõсыс син улас усис, пезьдõма нин. Матыстчис видзõдлыны, кодї шедõма, а сәни сьõла кõкъямыс кымын тыдалыштõны швачкан увсьыс, котырнас и пырõмаõсь. Дерт, кодкõ õти жõ эськõ тувччис таян вылас, да чõскыд õд оз юась, кодї мыжаыс. Гашкõ, сьõла-мамыс на и чукõстіс, локтõй пõ пуртікасьõй небыд кос лыа вылас, сэсся ачыс и тальыштіс, кытчõ оз ков.

Мисьтõм и мустõм вõлі йõзыдлõн чõс туй вылад ветлõдлынытõ, да Бияр бергõдчис Чõжмõс ю дорас, ордым вылас. Лыйõм чукчисьыс сійõс чезыртõдліс, сідзикõн со артмис да, ыштõкõ йõзыслысь и пайкис. Гашкõ, ковмас на и юасьлыны, кодлõн татї чõс туйыс, да висьтасьны мортыслы, мед оз скõрав, сёрнисõ оз паськõд ни. Сійõ õд, тõдõмысь, казявліс жõ чукчисõ ли пуртікасьны волõмсõ, да шедõмсõ и виччысис, õнї этша нин абутõ виччысян, и элясяс бõрынджык сиктас, зэв ыджыд чукчи пõ вõлі олõ чõс туй вылын, да кыйõма, буракõ, кодкõ, а аддзылысьыд õд эм, и висьталас сылы, Бияр пõ вõлі сәктõ вõрас кайõ, мышкас ньõввужъя. Он сәки соссьы!

Ордым вывтіыс гортас нин бõр ләччигõн Бияр кыліс водзвывсьыс Тутõыслысь авкõдчõмсõ. Вõлõмкõ, урпиõс вõтõдõма да козийõ кыпõдõма. Урыд кыкысь пиянасьлõ пõtõса воад, тулыснас и гожõмнас, да гожся чужõмыс на тайõ и вõлі, весьт кузя кымын, бõжсõ кõ он тшõтш лыдды, гõрд гоб кодь рõма гõна на, лõзõднысõ абу на пондылõма арся ыркыдсьыс. Эз на эськõ сәтшõма и лыб Биярлõн кыис лыйны урписõ, да Тутõыс эз õвсьы, вурзаліс кыйны колõмысла, нõшта нин ассъыс медводдза аддзõмторсõ, и мед ышõдны сійõс водзõ вылас, Бияр

¹ Кõн — сера.

сетчис сылы, кыскис нюлыссыс¹ шмака йыла ньöv да уськөдiс урписö. Чорыдджыка, буракö, лоöма лыйöмыс, да голякывтöдз жугалöма урпиыслөн юрыс. Мунигмозыс и кулис сэссия Бияр урписö да сетiс Тутöыслы сёйны, а кусö шыбитiс.

Öнтайсö, вöрас кайигөн, Бияр эз видзöдавлы ёнасö Чöжмös ю вылас, кор ордымыс вайöдлiс матöсö, а öнi, некытчö нин тэрмасьтöгыд бöртö лэччигас, колöмаөн сувтавлiс ю чукыль кыркötшьясас, ёсь синмөн дзоргис пьдöсöдзыс тыдалан джуджыд гöбликъясас. Аслыс вöлi тешкөдъ сыысь, мый тыртöмөн и чайтсис юыс, ньöти черитöмөн, а сэссия, кымынкö здук мысти, ыштöкö вöрзбылiс чериыс сылөн дзоргöмысь, абусыыс лолiс да бара воштысьылiс визувсьыс вералан ва рöм улас. Комыс и мыкыс, и ёкышыс, и седарыс на, мыетшкö и чунь кузяöсь, югнитлöмөн висьталасны асьнысö. Турунвиж сера налимыс катьдöсь ньöжйөнник вешйöмнас тыдöдлiс асьсö и.

Кыйöм понда кö, катлыны татчö пыжнад эз и сулав. Эськö гырысь комыс кö кöнкö сулалiс, öтиөн киад босьтанаыс, сэк позис и мудзтысьылыны-а. Та вöсна водзöсö Бияр эз нин сэтшöма и сувтавалы. Но воис зудъя-изъя джём кырта йылö, да кодкö быттö кыскис на видзöдлыны улас, мегырөн нюжалысь гобликас. Пемыд вуджөръясыс сэтысь, сой кузяöсь да пес кызаöсь, пыр и суйсисны синмас. Гырысь комыс, вöлöмкö, öксьöмабсь сэтчö. Петöмабсь нин посни ёльяссьыс, кытөн дзевсясöны гожöмнас ва лудiк сёйöмсьыс, да кылöдчöны тöv жежлас Куа тыас ли Эжваас. Зэв регыдөн, матыс лун-войсö, дерт, оз на вошны кытчöкö Чöжмös юсьыс, кывтыдöджык, гашкö, сöмын вешъясны-а, бурджык вылö на пыжнад катлынытö, и воыны кö да кыбны войнас, уна пöv на мудзтö вештан да. Дерт, кыкөн кодкөдкö-а, зiбъясьыськөд пыж бöрсяньыд.

Тайö мывнас тырöмөн и шавксьöдiс сэссия Бияр да ыззьöдiс асьсö сы вылö, мед талун и ветлыны сирöд чагсö перйыны. Кос пожöм мыртö ылысь оз на ков корсьны, сиктсьыс и сюрö, керкаяс сайсьыс. Дай аслас керассьыс на позьö уль сирöд мырсö чуктöдлыны чагъяс, косьтыны войсö воча чомъяс, гор вылас. Аски асьвсö лöсьöдчöм вылö и видзны, а лун шöр бöрас коркö катны Чöжмös юöдыс гырысь ком сулаланiнöдзыс, мед сэтөн нин виччысьылыны пемдöмсö, шойччыштны öти сайын и. Сöмын вот кодöс ёрт вылас нуöдлыны, Адасöс али Борганöс?

¹ *Нюлыс* — ньövъяссö видзан, колчан.

Казьтылөма лои Боргансө, и Енмыс-ө-кодi паньд сийöс и уськөдiс ордым вылас. Оз и тэрмась, лашиктö, пöрысь моз, киас бeдь босьтöма да. А тасма козьянас öшöдöм выль черыс кузь воропнас асьсö жö и нöйтышталö пидзöс кусыняс, кодкö быттö томиник на айыслысь черсö и пышйöдöма.

— Ылөдз-ö нö та öдйöсö? — шмонитöмөн шыясис Бияр.

— Чöс туй вылö. Видзöдлыны.

— Октысин нин? Абу öмöй водз на?

— Сидз, кымынкö чöс. Öнi сөйыштöм вылö, мый шeдыш-тас. А тöв кежлад водз на кыйнытö, тшыкö.

— Эстөн тэнад чöс туйыд, пувья нюкөссайса ягас?

— Менам.

— Сидзкö, тэнсьыд и аддзылi öти чöс. Сьöла котыр шeдö-ма, көкъямысөн кымын.

— А чукчисö эн казьявлы, сэтөн и олö да? — юалис Борган.

— Лыйи ме сийöс, — висьтасис Бияр. — Бöрыннас нин чöстö аддзи. Эськö эг и лысьт-а. Ог тöд, мый сөсся шуан. Сета, колöкö? Со, лаз ноппын.

— Эн йöйтав! Эн öд шeдöмсö пышкав.

— А тэныд эськö шeдi жö. Ныр увсьыд и босьтi быттö. На, эн лөгась!

— Дугды, дугды, — öлөдiс Борган, мед оз перйи Бияр лаз нопсьыс чукчисö. — Менö сулö на могыд тэ динö.

— А менö и суис нин. Ас дiнад. Ёрт колö!

— Кытчöкö?

— Эстөн, мегыра гобликас, гырысь комыс öксöма, кывтаньыс. Кыбны эськö, а?!

— Оз шeдны.

— Мыйла оз? — чуймис Бияр.

— Пескыльтчöны азьлас увсьыд, он удит бытшкынытö.

— Лөсьöдчан да тювкан.

— А он инмы. Югнитас и абу нин. Унаöс нин тась йöйтöдлiсны. Сийөн некод оз и усьлась комтö кыбны.

— Он ветлы?

— Ог кө-а, — нурбыльтiс Борган.

Сылөн падмөдöмыс эз на öвсьöд Биярöс, мөдарөсö на дзерöдiс: мый лоан ло ветлыны кыбнысö. Некыз эз эскыссьы, мый оз инмы комыслы азьласнас. Мед, абу кө мукöд чериыс кодь варгöс, син увсьыд и лыйыштö, а войся пемыдыс и сийöс на, тöдöмысь, лөньöдö, вылысас усян би югöрыс оз повзьöд на.

Он кө удит бытшкыныгө, сідзкө, кутшөмкө здук оз и тырмы, ли ачыл на мыйкө он вежөрт, сы вөсна и дьөбө колян.

Воис Бияр вөрсьыс да сөйштіс, и муніс чагсө перйыны. Некодос эз шу нуодлынысө, отнасөн и ветлыны кыбнысө. Оз кө шед нинөм, оз и мыжа ло йөзыс водзын, и ачыс оз сэтшөма янав, сёрнисө йөзыслыс кыскав. Ветліс тай кытчөкө войколөн, а кытчө да мыйла, төдтөгыс оласны. Зуд перйыны, шуас дай, сэтөн тай, зудья-изья кырта улас, и сулалө гырысь комыс. А катлөм донсө поэбө и налимсө кыбны, медся на чөскыд сылөн выя мускыс.

Аскинас Бияр ломзөбдіс коласьыс дорччан горсө. Вит пиня и вөлі сылөн азыласыс, ки вомлөсысь муртса паськыдджык, да кык нинь нөшта содтіс, отарас да мөдарас. Нель пельөса көрт тувьяссьыс, кутшөмыс сылөн вөлыштис, и дорис тошка пиньяссө да пузырьдөмөн йитис. И, дерт, кесліс сэсся азылассө ставнас, мед ёсьөн и бырсмуніс комыслы да пысасис яяс, өйөстөдіс сійөс нетшкысьбөмсьыс.

Но лун шөр бөрас, кор коліс нин катны Чөжмөс юас, ставсө нин лои лэччөдөма пыжас да, Биярөс топөдіс на отнасөн мөдөдчөмсьыс. Кыдзи нө эськө кутас кыбны, оз кө ло пыжсө кутысьыс? Аддзас, шуам, комсө да лөсьөдчас бытшкыны, а сэк коста визулыс сыв кымын кылөдас? Азыласыл өд абу нбөв, он лый сійөн, дай мый вынсьыл тьовкнитөтө, мыетшкө и веськыда, ваыд өдій на кежөдас кытчөкө.

— Гашкө, кыкөн катлам да? — чуйдіс Бияр Унаыслы.

— Ме помысь сэн... Сэсся менө и ёран.

— Ог. Зібнас кө йөткасьыштан и.

— Комтөгыс олам, — кайтіс Уна. — Ныр улад со черыс.

— Ме ог и комыс понда сэтшөма.

— Мый понда нө?

— Шедө оз! Дуль ваөс нө кута нылавлны, ас синмөн аддзылі да?

— Гашкө, и ковмас на.

— Оз! Коньөрад менө он на уськөд! — вочааліс Бияр. — Лок, катлам!

Кыкөн гозья и катісны сэсся. Усьны кутөм өтка виж корсө кылөдіс нин Чөжмөс юыс, ляскаліс алькөс изья дорөсьясас да пөрөм пуяссьыс пөрөмьясас. Бур нин сыысь вөлі, мый керасьнысө некыт на эз ковмы, осьса визув нырыс, пыжнас лыбаныс, быдлавысь на сюрис коська ляпкыдіньяссьыс. Ачыс на пайгөс пыжыс и дөзмөдіс медсясө, дзибрөсасис да пышйөдіс

нырсө визувджык вылас. А гобликъясас, кыті ваыс муткыльт-чытөг шуныгис, кык кокни и вөлі зібъясънысө.

Кымын матыстчисны зудъя-изъя кырта дінас, сымын сюсь-джыка синмаліс Бияр гобликъяссө, эз-ө нин кылөдчыны гырысь комыс, улөджык кытчөкө сувтны, но некысь на найөс эз аддзы. А налимсө кузяла син улас уськөдліс, весиг ляпкы-дінъяссыыс, вөрзёмаось нин көдзыд визув паныдыс катнысө да; тылыма ва нитшкыс моз и легъялісны, польдчөм кынө-маось. Бытшкис кымынөскө ыджыдсө да керис өтиөс видзөд-лынысө, мый нин сэтшөмасө сөйөма, а сійө эштылөма нин горшасънысө гожся тшыгъялөм бөрас, ыджыд китыр нбылалөма өссө.

Рөмдан веркыднас воисны зудъя-изъя кырта дорас, сув-тісны гоблик уліас, ляпкалан кось юрас. Медводз кырта йы-лас и кайліс Бияр, видзөдіс гобликас, сәнөсь абу на гырысь комыс. Ен ськөдөн, сәнөсь на вөліны. Өні позис и биасъны да юква пуны керөм налимсыйс, виччысьны пемдөмсө.

Нуръясьөм бөрас нин, пемдөмсө виччысигөн, Унаыс ыш-ловзис шыөн да дількъялөмөн юаліс:

— А Намырсө нө мелиавлін?

— Коді шуө? — назгыштіс Бияр.

— Ачыс.

— Мый шуө?

— Мырддыла кө пө эськө Бияртө!

— Мед оз больгы!

— А мыйла нө эськө лысьтө?

— Вежыс, колөкө, петө да. Сійөн оз и яндысь.

— Этша на Борганыс? — нюркнитіс Уна.

— Гашкө, и этша. Кык ён тай сы серти.

— А урсалас кө тәнө?

— Эн скөрмөдчы.

— А кыр пон моз вөтчан дай!

— Ланьт! — чорыдаліс Бияр.

И ланьтіс эськө сәсся Унаыс, да аслыс дзескыд лои гөгөр, ыштөкө усис кытчөкө, да вылысас и буздыны кутіс муыс, тыр-тас сэтчө, оз кө вөрзёмы. Чеччис мырдөнысь да кыпөдчис вөрас кос лөпсө чукөртны, турун юр судтаа лэччөдліс бипур дорас, кык вой кежлө тырмас. А Унаыс, буракө, чайтіс, мый войсө тан колялөм понда и зільө сійө, да инө и пуктіс сылысь ноксьөмсө.

Сап пемыдсö ывлаыслысь Бияр эз и виччысь. Бипурсьыс пöлөсөн усян югöрыс сідзи нин судзис кось шöрöдзыс кымын, виж югыдөн тыдöдіс пыдöссö. А пыжас öд пешаас биясян, нырсьыс на вылö, да веськыдатö, вывсыньыд улöтö, пырыс и югзёдан сөдз ваа джуджыдінтö. Öгыраджык сэрапомсö и кыскаліс бипурсьыс да ломзёдіс пешасö, содтіс сирöd чагсö.

— Петалам, — шуіс Унаыслы.

Гобликöдзыс катнысö Бияр босьтліс жö зібсö, сэся азьласнас и сувтіс пыж нырланьыс, пеша дінас, а Унаыслы тшöктіс гусьöникөн йоткасны. Öтпырйö вит-ö-квайт ком, сьöдоват мыш вылаөсь, усины син улас гöгыльöн югзёдöм васьыс, вешйисны ньöжйöник, быттьökö вылысаныс усян би югöрыслысь и кывзысисны.

— Энлы, энлы, — öлөдіс Бияр Унасö. Лэдзис азьлассö ваас да веськöдіс öти комлы мышку шöрас, сувтса борд улас, бытшкис вынысьөн, а югмунлөмсö сöмын и адззыліс комыслысь да азьласыслысь ва пыдöс изъяс гольсмунөмсö кывліс.

— Эз шед? — шыасис Унаыс.

— Эз тай.

— А оз и шедны.

— Дугды, зібъяла, — ырьштчыліс Бияр азьлас пунас. Пыр и артыштіс сійö, мый матысяньджык кө бытшкас, бытбөн веськалас. Но и матысяньыс нинөм сьлөн эз артмы, кымынысь на эз видлы да: ли водзвыв уйкнитас комыс, ли пескыльтчыны вевъялас. Сідзкö, пескыльтчöмсö и колö пановтны, кузяланогыс бытшкыны азьласнас, а оз вомөнногыс, сэки юрладорнас ли бöрладорнас кутшöмкö пиньö да пысасяс комыс, а мынөмсьыс позьö и ва пыдöсас личкывны сійöс да содтöд бытшкыны азьлассö бертөвтөмөн.

Тадзсö вежöртöмысь и мойвиис Биярлы. Пыж кузялаыс, Унаыслы кок улөдзыс, чукöрмис шедöм комыс, ставныс öткодьöсь, нöш кызаөсь. Бияр весиг мөвпыштіс, мый позьö и Памалы нуыштны коркö төвся туйнас водзасьöм вылö. Дерт, солалөмөн-а тшыксьöмсьыс.

Көтасьöмабсь и жаялөмабсь, асья войсö гозъя бипур дорас нин виччысисны. Мыйөн югдыштіс, бөр кывтісны гортаныс. Мыссьыны сöмын и сувтлісны сюн сёя кыркötш дінö, нильöг сёйнас уськөдісны чужөм вывсьыныс сирöd чагсьыс сибдөм сасö.

Йи сувттөдзис на Бияр потшыштис воджнас Куа ты мөдарсө, тувъялис пыжсяньыс майөгъяссө да лэдзалис на костө радзсө кык восьсаин кольөмөн. Но гымгаяссө эз на вöйтав, сідзи на вöли сөйнысө чериыс да, виччысис төв пуксян көдздөдөмсө да лымгялөмсө, мед кынтөмнас нин и видзны сөсся шедөм черисө. Сэтчө жө и сов сукыс зэв уна мунис комсө идралөм вылө, туйс пьдөсас и кольыштис. Гашкө, Сэрөгас и ковмас ветлыны медводз төвся туйнас.

А ар помсө ножөдіс, да лункосмысьсөн ылөдчис ывлаыс: то вöй төлыс швичкө, чирскакылө кок улад пужъялөм муыс, и Куа тыыс дор гөгөрыс колипасьөма, а шөрыс кыза нин сөникөсь, то бара нин ульсалө, вевся пемыд кымөр локтө лунывьсьыс, кижа кодь посни лым нисьсө зэр вайө.

Сэссия тай кучкис жө веж көдзыдыс, өти вöйөн мусө и васө кам кынтис. И чорыд кын вылас нин кокни қос лымйөн пушыда лымгялис кок шегсьыд на джуджыда. Тувччан да, ляпыкыда и веськалө тальыштнытө, унджыкыс гөгөр пуркмунлө.

И то на Бияр лун-мөдсө виччысис, пөрөдчыны петалис орчча пожөм дзибьяс. Но көдзыдыс эз личав, енэжыс сэзьмыс да вылө-вылө нөйкалис, а вöй улас кодзулөссьылис да выльмыськөм төлысьсөн видзөдчис, и шуис вöйтавны гымгаяссө.

Ииыс Куа ты вылас эз на вөв и кыз, кык чунь вомлөс, видлис чернас да. Но лөньбөн сувтөмысла пасьталаыс зымакылис, некыт эз лайкьяв ни ратшкы. Сөмын Чөжмөс ю вомас руалис усян визувсьыс кузьмөсөн артмөм рыыс.

Кералис Бияр йисө воджас кольөм восьсаингьяс весьтьсьыс да вöйталис гымгаяссө: өтисө — өтарө вөмөн, мөдсө — мөдарөөн. Сэссия петалис тысайса веретя вылас да кералис пашкыр коз понөльысь лыссө, вайис да вевттялис сийөн гымгаяс вывсьыс восьса васө, мед оз пьдіа йизьы видлігөдзис. И быри сэссия уджыс. А гортас кайнысө эз на кыскы. Довъялыштны ыззьөдіс ас шөдйөн, видзөдлыны, коді кытөн ветлөдчө вөрса олысьыс.

Көсйис нин довгыны, и син бөжнас Борганөс казялис, коді гортсяньыс веськыда лэччис ты вылас, сэссия зонпосни моз өддзөдчылөмөн исковталис йи вивтйыс сылань. Буракө, кутшөмкө долыд на морттө новлөдіс. Гашкө, и водзвыв на мыйыськө.

— Вердө оз? — варова шыасис Борган, эз на лючки и матыстчы-а.

— Ме ог төд, вердас оз. Талун на со вöйталі гымгаяссө да. Аски мый висьталас.

— А қор нин воджтö вöчлiн да?
 — Мед, восьсаөн на видзи.
 — Сiдзтö, дерт. Пыж тырыд гырысь комсö кыбöмыд да.
 — А ме тәнö нүөдлi. Ачыд бөрнясин.
 — Он öд чайт.
 — А кытчö нö эськö öнi? — юалис Бияр.
 — Дзуг пуктавлi, да видзöдлыны.
 — Кутшöм дзуг, кодлы?
 — Сьöдбöжлы.
 — Оз нö орöдчы, пиньыс абу ни? Абу öд уркай!
 — А он и уркайлы моз пукты.
 — А кызди нö?
 — Сюсь тай кылан! — шпыньмунлис Борган.
 — И шедö мыйкö дай?
 — Тöрыт на куимöс вайи.
 — Эн ылöдчы.
 — Со, исыштлы лаз нопйöс.
 — Ог али мый? — шуис Бияр да исыштіс Борганлысь лаз нопсö. И збыльысь, кыліс сэтысь вукöдан кöрыс.
 — Но?! — гылыда серöктiс Борган, видзöдліс Биярлөн чез-расöм ыло да. — Ылöдча ог?
 — Он. А абу жö восьла морт. Ме тай тэысь нинöм ог дзеб! Лок ветлам, да петкöдла öти дзуг, а? Сэссия ме кольчча тэысь, ачым жежа кытчöкö.
 — А он нö пановтны кут менö?
 — Пановтнытö ме и сiдз верма. Потш перъя, да сэтысь и артмас налькйыд сьöдбöжыдлы. А сам вылас чери ли яй небзöда дай. Öдйö на кылас да волас. Лөп чукöрыд сюрö и, кытөн шырыс олö, — кайтіс Бияр.
 — Но, ветлам, — сетчис Борган.
 Петісны ты вывсьыс да муныштiсны мыйтакö кывтыдыс, и кык веретя костö, векни кузь сөнö, кежöдіс сійö. Кутшöмкö тувсов ытваөн на тырыс сүйлöма сэтчö гырысь лөпсö да шактарсö, лёдзөн да дзуөн пукталöма. Пипуыс и гумыйс да тöзъыс пырыс нин петалöма, везйöдлöма-сибдöдöма вайöм егсö. Шыр оланiн и артмöма сөн кузялаыс, сьöдбöжыкыслы майбыр да. Воськовтан кымыныськö, и бара нин сьöдбöж кок туйыс вомöналö сөнсö, кыка-кыка гуранөн да костөн-костөн серöдö небыд лымсö.
 И медводдза дзугъяс и шедöма вöлі сьöдбöжыс, öшалö дженъидик майöг йылын. Абу и юрас шедöма, а öти водз кокас, шуйгаас, но абу тай гөгөрвоöма йирыштны лэчсö, орöдчыны

абу вермөма и, эськө вöснъыдик и вöлi лэчкыс да, кымынкö вöв бöж сiсыс лабиника и путшкöма. Сьöлöмыс на, буракö, потöма повзьöмысла, муртса и пессьыштöма.

Аслас синмөн и аддзис Бияр, кыдзи, вöлөм, кыйсьö Борганыс, кокниа да сюся: тувъялас майöг да тшöтшöдöм йылас и öктас куим-нель лэч, оз и кöртав лэч помъяссö, а костодас пурт йывнас майöгсö да сэтчö и топодас ёсьтöм желльöн. Сэся самсö, косьтöм лёкгагсö, бедь йылö öшöдас дай лэчьяссьыс вылöджык. Вот и дзуг сьлөн, и шедö со и...

— Кодкö эськö тэнö велöдис жö да,— шуис Бияр.

— Некод эз, ачым,— дözмис Борган.— Чайтан, нинöм нин юрö оз волы, тэ быдтор кужан-а?

— Ме ог быдторсö.

— А мый нö эськö дзерöдан менö? Асьтö сöмын сюсьö пуктан?

— Öдйö öд лөгасяс.

— А мöдысь эн лэптысь дай.

— Но, мылышты.

— А кольччыны кöсйылiн, ачыд кытчöкö мунны.

— Ог и вöтчы сэся,— вочавидзис Бияр.

— А кытчö нö мунан?

— Кытшовта, гашкö, Куа ты йывсö да ягöдыс лэчча. Мед нин вошö луныс.

— Воштан, дерт, тэ, варышлөн кодь синмыд да.

— Виж синма нö?

— Ставсö аддзан. Сэся волан да кыян дай.

— Кыйнытö колö на. Да шедö ли оз на.

— Комыд тай шедöма,— кывчуткис Борган.

— А мыйысь нö эськö повзин?

— Нинöмысь эг.

— Эн кö, эн и вежгы,— вомалис Бияр.

Куа ты йывланыс и веськöдчис сийö, вомöналис сьöрсьөн-бöрсьөн веретаяссö да сёнъяссö. Аддзывтöг эз ов быдсяма кок туйсö: сьöдбöжыслысь и анчаыслысь, урыслысь и кöчыслысь. Сидзи на öти урöс, пон оз ков, вöрзьöдлiс чернас тышкөмөн коз пуысь, вöтлылiс вож помас. А кок туйыс урыслөн и вись-талiс, мый коз пуас сийö сэн: лэччылöма да ветлöма кытчöкö, польштöмысла посниа и чеччалöма, пуксьыштлöма на лым вылас, а бöрсö гырыся чеччалöмөн нин локтöма.

Ыштылiс эськö Бияр сьöдбöжыслы и анчаыслы кымынкö нальк пуктыны, да öлöдис на асьсö, шуис торъя лун та вылö

видзны, гортас водзвыв и вöлавны таянъяссö да, и ньöввужсö да Тутöсö тшöтш босьтлыны, гашкö, урсыыс на öтдор кодöскö лыйны вичмас. Эз висътав Борганыслы, а гуся мöвпыс Биярöс ягас на кыскис, видзöдлыны сэтысь, оз-ö волыны нин кöръясыс яласö йирны. Ляпкыд на эськö лымыйыс, нюр туруныд сюрö на налы, да нярмöм кын турунсыыд этша нин пöтан кодзыд дырийид.

Синтö перъян мутшкöс пипу раскöд писькöдчис Бияр Куа ты йылас, лэччис бöръя верста вывсьыс да. И эз на вевъяв петны рассьыс ортсö, казялис гöгрöс пома пипу мыръяссö, пемдыгöмсö на регыдысла, ыштöкö кодкö ныж черөн и титшкöдöма гöгöрыс да нöшта увсянь вылöөн. Вöлöмкö, мойяс олöны Куа ты йылас! Тавысь, тыдалö, и повзис Борганыс, чайтис да, мый казялас кö Бияр мойясыслысь олöмсö, сэсся волас да кыяс нин. Аслыс, буракö, оз шед, да медтыкö эськö и мöдлы эз шед.

Куа ты йылыс, вутшкöсь дорöса ляпкыдыныс, водзö на чукыльöн Эжваланыс нюжалис, ляк баддяинö зурасис, а таті паськаліс нин тьыс да туруна визьöбъясөн вомöнасяліс. Сідз-тадз, некытчöтö кутчысьтöгыд, туруныд эськö эз на быдмы ва шöрад. Лючки и висъталісны визьöбъясыс, кытөн йи улас важөн нин тыасбöм пуыс. Колöкö, Эжваыс на и пыртліс ытванас пöрöм пусö да ляскис татчö, а сэсся нин мойясыс содтöд порöмалісны. Но позъясыс налөн некөн эз тыдавны, быттьöкö олöмаöсь на кынтавтöдзыс и вешйöмаöсь кытчöкö. Та вöсна паныда бужöдас и веськöдіс Бияр синсö. Яг нöрысыс таті эз нин вöв сэтшöм джуджыд, да сэтчö, сувтсөн усян бужöдас, и вöчалöмаöсь, буракö, пырмöсьяссö, ва пыдісянныс на кодйысьöмөн. Видлы öні найöс кыйны кызкö! Көнкö эськö тані и эмöсь, да он босьт. И сёяныс төвбыд кежлö; эз этша, тöдöмысь, пыртлыны пипу чинтасъяссö да турунсö. Гожöмöдзыс он и вермы найöс кыйнытö, кыскасьöны сэки да ордымөн и ветлöдчöны, пукты нальктö ли кыйöдчыны пуксьыв югыд войнас, да он нин, майбыр, пöръяссы. Но мый сыысь, гожся кусьыд, йикиа кодъ гöнасыыд? Сулалыштис Бияр колöмысла ышлолалігтыр да ягас и кавшасис.

Волісны кö нин кöръясыс яласö йирны, то, дерт, кысянъкö яг сайсянныс, войладорсянныс. И öти туйöд на, гашкö, и волісны, нуöдысь бöрся: найö öд котырөн жö олöны, да оз кö войшöдлы кодкö, ош ли кöин, оз и разöдчывны. И тöвся туйнысö оз энöвтны, оз кö кодкö уськöдчыв сэтөн на вылö; быд

пöрийтö выльлатыд писькöдчынытö да нöшта кынöмöдзыд
лымйöдыд и найöс дышыс босьтö.

Ягсö войладорöдыс кытшовтöмөн и шуис Бияр лэччыны гор-
тас. Но кузякодъ нин мунис нёджъясигтырйиыс, а мед кодкö
дзутöма вöли лымсö, лукйисьöма ягас, некыс эз аддзы. Чайтöм
сертиыс джын кытшовыс коли нин, кор казялис кöръясыслыс
йирсьöминсö. Эз и веськыдав сэтi, а кежис яг сибöдас, козъя
нюрланяс, да нюрас на пырыштöмөн сетчис гортланьыс нырөн
и воис чальпаса лымъя туй дорас. Волöмаöсь и мунöмаöсь сэтi
кöръясыс дасөн кымын, абу кö унджыкөнöсь на. И вольтöг
оз на овны, сюмалас кынöмныс да. Сöмын кызди кыян-а? Лэч
пуктам гезйись? Пыльöм вöчан кык пу костö? Гу кодьян да
ёсьяс сувтöдалан? Но кöрыд öд абу жö ныристöм да оз на
быдлаётö и суйсьы ошкыд моз. Гашкö, медся на бур тöлыся
войö кыйöдчыны пуксьывны, лыйны ньöввужсьыд йöрвужди-
нас, лытöминас?

Шыбласис Бияр мөвпнас да эз и вермы сувтны öти вылö.
Но мед тöдмавны, повзясны оз кöръясыс сылөн кок туйысь,
матыстчис чальпаса туй дiнас да эз чеччышт вöмöныс, а та-
лыштитi шöрас, сiдзикөн вуджис. Видзöдлас сэсся кымынкö
лун мысти, вежöмаöсь абу кöръясыс воддза туйнысö. И мыйкö
сэки мөвпыштас нин. Гашкö, лызь гоз на вöчас сэк кежлö и.

Шуны кö, эз эськö вошты Бияр лунсö, а нинöм эз вай
гортас, да ыштöкö сiдзи на и довъялис. Та вöсна буретш и
лöсялис лызьсö тöд вылас уськöдлöмыс. Чöжмös ю вом дорас
петигөн нин видласис чернас да бöрйис шогмана коз, улыс
увтöмös да винёвтöмös, пöрöдiс сийös да чинтiс нельысь чер
воропыс кузя, босьтiс сэсся чинтассö пельпом вылас да лэч-
чис горулыс. Но вуджны юсö эз на вермы, вöсна на вöли
сэн сувтöма йиыс да. Ковмис Куа ты вылас бöр петны да ю
вом дорсьыс рысö на кытшовтны.

Быттьöкö виччысьöма сылысь локтöмсö, Куа ты сайсьыс,
матыс веретя помсьыс, и Борган мыччысис, вежөн öтлаасьлөм
вылö босьтiс нырвизьсö, öддзöдiс на восьлассö. Гөгөрвоис Бияр,
мый сувтöдлас на сийös Борганыс да сёрнитöдас, и ачыс водз-
джык сувтiс, лэдзис пельпом вывсьыс коз чинтассö помногыс,
кутiс пöрöмсьыс.

— Мый вылö нö тайös кыскан? — юалис Борган.

— Лызь вылö. Лымъялö тай со.

— Сэсся кытчö лызьнад?

— Вöрö.

- Мый кыйны?
- Мый шедө,— дөжныштіс Бияр.
- А мойясыслысь оломсө аддзылін?
- Абу өд синтөм.
- А кызди кыян?
- Некедз. Эськө ты вылас кө поздысисны-а. Буджөдсө өд он косяв.
- Сийө өд и эм,— серөктыліс Борган нимкодъысла.— А нальктө пуктылан съөдбөжыдлы?
- Ме ог төд. Оз кө дыш ло.
- Мыйла дыш?
- Тэ бөрся өд он кый. Тырөма со лаз нопйыд да.
- Сизим и эм. А сёысь на сизимыд котралө.
- Мед котралө.
- А мый нө кутан кыйны?
- Нинөм ог,— дзерөдіс Бияр.— Меным пөрөдчыны колө.
- А лызьтө нө кодлы вөчан?
- Аслым. Пальөдчыны петавны.
- А кызди нө вөчан?
- Мыйла кызди?! Поткөда шөри тайөс, коз чинтассө, да лөсала дай. Сэсья пуртөн и өжынөн босьтала, и ставыс.
- Сідзтө и ме кужа.
- А мый нө он куж?
- Öдйө тай и чегө,— нурбыльтіс Борган.
- Чегө, дерт, увъяыд.
- А увтөмингыс на ратшмунө.
- Сідзкө, абу на мыйкө сідзи.
- Он висътав?
- Эны, видзөдла да.
- Кор?
- Кор петкөдлан,— дөзмис Бияр да лэптіс коз чинтассө пельпом вылас. И кайис на вадорсьыс воча чом дорас, а Борган виччысис нин сийөс лызь пөлөн:
- Со, колөкө, видзөдлы.
- Лызь пидөсыс бонзьөма нин вөлі да чегана туйдөма, зарс-видзис желльөсь потасөн. Эз и босьтылы Бияр лызьсө киас, синсө чөвтлөмысь и гөгөрвоис Борганыслысь йөйталөмсө. Та вөсна ыкшапырысь и шуис:
- Кокорнитөмыд асьтө да.
- Кыдзыкө?
- Мөдарө вөчөмыд. Пу съөмөсладорсьыс лызь пидөсыд.

— Кырсьладорсьыс нө колө?

— А кытї нө эськө топыдджык пуыс? Шөрөдыс, чайтан?

— Меным и юрө эз волы.

— Эз кө и, ветлы тайон.

— Ог, выль гоз воча. А вая, колөкө, өти съөдбөж. Сэсса ачыл кулян.

— Мыйысь?

— Висьталөмсьыд.

Бур ногон кө, Биярлы эськө вомавны и коліс Боргансө, но вадорсьыс на кайигон мөвпыштліс сійө шабді кужсө Борганьыслысь корыштны.

— Съөдбөжыд меным аслым шедас.

— А мый нө колө? — повзъыштис Борган.

— Шабді кужтө кө эськө вайыштан. Китыр кымын.

— Нуліс нин Унаыд да. Уджалөмсьыс.

— Сійө шөрт печкө. Он пайки сылысь.

— А тэныд нө кытчө колө?

— Нырагез вылө. Верви¹ вылө и. Көмыд өд киссьө, — эскөдіс Бияр.

Дерт, Борган ньөти эз ыдъясь та понда, ыджыд китыр на вайис шабді кужсө. А медым оз вывтї нин отарө ло, Бияр сылы сетіс жө кык сола ком. Дольдөсө сэсса и колины отамод выланыс.

Збыль вылас эськө мөдтор вылө на коліс Биярлы шабді кужыс. Лэч пуктыны кыскис сійөс көръясылон туй вылас, мед оз и казавлыны, мый кыткө мыйкө вежсьөма, мортлөн на исыс кылө и. Сибөдчылін туй дінас да көрталін лэч помсө кутшөмкө пуө, а лэзмунөмсьыс ньөр йылө ли лыс тугийө өшөдін дай койбедьнад судзөдчылөмөн. И ассыйд истө ни кок туйтө он коль матіас, вөрад шөдйөн олысь көрыд абу на яранылдөн ли йөграылдөн видзаныд кодь, йөрасыйд на сюсьджык, йөраыд вылысад и вермас локны мөс моз, а вөрса көрыдлысь он босьт. Но медтө шедлас-а, сюйлас юрсө лэчкас, сэсса оз нин ордчы джаггөрөдөн вөчан шыркөссө да. А кор лэчкыд шабді кужсьыд артмас нин: дыр-ө нө нырагезтө гартны куим-нөльөс да отилаад путшкыньтө?

Аскинас и дась нин вөлі Бияр ветлыны да пуктыны лэчсө, но кутіс на асьсө ырсьялөмсьыс, виччысьөдіс кымынкө лунсө, мед бара воласны көръясыс яласө йирны да лючки бөр и му-

¹ *Верви* — драгва.

насны. Воджсьыс гымгаяссö видлыны и лэччис вадорас, а Борган, видзöдö да, кольöма нин ассьыс асья кок туйсö, тирöдöма посни воськовнас дзугъяс дiнас. Войыс сулалан кодзыд вöли, зöридзыс и эжöрыс со Куа ты дорöсас бeдь кызaдз гьiортöмaсь, да котравтöг эз ов сьöдбöжыс, бара кымыныдкö веськалiс. А пукавяс нö гортад, кор шeдö?

Дерт, петiс вежыс Биярлөн тшöтш ветлыны да кымынкö нальк вöчны сьöдбöжыслы. Сидзи и шуис аслыс, мый лэптылас гымгаяссö да катöдас черисö, мыйкö шeдöма кö, и дыр оз нюжмась сeсья. Дугдылас кö пöрöдчöмсьыс, кузь на тöлыс, коркö бөр на вöтöдас колана пу лыдтö. Да и ковмас на донаджык куыд нянь вылад вежнйтö, мыйыскö вештысьныгтö. Веськыд кузя кö, и Унаыслы на колö бергöдны мыйöнкö сойпоссьыс, кодöс сов сук вылас сетiс, эзысьыс ли зарниьс на мыйкö козьнавыны.

Еджыд черыс, гырысьыс, буракö, лэччöма нин Куа ты йиръясас ли вискöдыс Эжваас петöма тöвйынытö, ньöти абу ветлöма войнас, нэр сыныс да кельчыис и пырöма гымгаясас. Но сы весьтö налимьс да сирпиыс шötöмаöсь, ыштöкö мырдөн тöрöдчöмаöсь. И гычыс на кыскö сэтчö суйсьöма, ставыс öткодь, пипу кор гырся. Буретш гычыс и чуйдiс Биярлы анчалы налькьяссö пуктавыны сьöдбöжыслы дорысь. Тöрыт тай кымынлаысь адзылi анча кок туйсö, кутшöм сёнын гöптор, сэтөн и чеччалöма вомöныс и гөгöрыс, вутшъяс костöдыс йи улас пыравлöма и. Ва шыр вылын да чери вылын медясö и олö сийö да гöпгъяс дорас и гартчö. А кутшöм чери нö гычсьыс öтдор кольччас тупкöс да пöдлан гöптад? Гычыс и вердö сийöс öнi. И самалан кö нальктö öти гычөн, оз на ылитi котöрт, видлас на дась пуктöмтö. Кеня кучикаöсь эськö анчаылдөн бөр кок чунь костъясыс, ваын и уяланаöсь, да тöвнад и ва улад он кокниа веськав. Нинöм и сьöдбöжсьыс, анчаыс кö шeдас, öти анча куыс на вит сьöдбöж ку дон мунас, а ур кутö и кызь витöс вештас. Анча куыд тулан кулы ни низь кулы оз сетчы, сы вöсна мый сук да топыд дженъыд гöна, дас во оз вушйы ни веж рöмсö.

Эз вевъяв унасö, пемыдыс нин бөр вöтлiс Биярöс гортас, но куим нальк сийö луннас пуктiс анчаыслы. И урсö квайтöс лыйис ньöввужсьыс, Тутöсö тшöтш нуöдлiс да. Öти анчаос на вöтлiс Тутöыс бaдь вуж улысь, гашкö и, позсьыс, но эз вермы суйднысö, удитiс анчаыс тювк пырны гöптас писькöдöм розьö. А кымын розь, колöкö, сьлөн гöп гөгöрыс, кытысь кор-

сян? И ачыс Бияр ййталіс, эз босът сьорсьыс казсьо, эз и чайт, мый ковмас кытчөкө да. Эз өд низь кыйны мун, кодї небьд лым вывтїд на өдїө котөртө табъя кокнас, а пуавныгө лёка кужо да понйїдлөн вөтөдөмысь вужля улө и дзесьо. Но и анчаыслы эськө лөсяліс казъыс, чери моз и йөрмис сэтчө, кытшалөма кө вөлі бадсьо, кор на гудйїсис Тутөыс вуж улас.

Аскинас Бияр босьтїс нин казсьо, но тадзтө эз нин тшук. Гоз-мөд урөс и увтїс сөмын Тутөыс. Дерт, ветлөдлөма кө вөлі веретаяс вывтїыс, лыйныгө урыд сюрис на, да анчаыслы налькьяссө пуктавыны колөмыс нөшта на воссис, сы вөсна мый воддза куим пуктылөмсьыс кыкас шедөма нин вөлі. И коймөд налькйїс эськө кыйөма, но абу анчаөс, а шырөс. Анчаыс бөрыннас нин волөма да сөйөма шырсө, гыч самыс да шырыслөн юрыс и кольөма нальк костас. Но и мед, тадзтө кө, и анчаыс тайө дыр оз нин котрав.

А ывлаыс вывтїөн көдздөдіс да вывтїөн и лэдзис вежон мысти, букыдөн вежсис сэзъыс, бусөдан лым петїс, лызь пыдөсад сибдан. Татшөм лунад эськө мудзтө и корсян вөрсьыд, да лызь туйтө өд өдїө жө тыртө, син водзад и сайөдө. А тайө и колө Биярлы көр лэчсө пуктыны. И ветліс да пуктїс. Сэтчө и пуктїс, кытї ачыс вуджліс көръясыслысь ягас волан туйсө, сы вөсна мый көръясыс йирсьынысө кыкысь нин волөмаөсь сы бөрын да воддзаысьсө сөмын и повзъыштөмаөсь, педзыштөмаөсь сы водзын, кытї вуджліс, но абу косөмаөсь ни разы-пели кежалөмаөсь. Вьль лымсьыс көръясылөн кок туйыс абу на вөлі сэтшөма воглөма, чальпасалөм южыс бура на төдчис. А лэчсө пуктөм бөрын Бияр и тышкышгїс на муртсаника чернас козйө, гылөдіс сэтысь лым буссө, ыштөкө төвруыс и уськөдөма. Лымйөссөм турун вез моз и кутїс видзөдсьыны та бөрын лэчкыс.

Бөр нин гортас и мөдөдчыліс Бияр, да кыкис на сїйөс видзөдлыны, эз-ө петкөдчывыны кытчөкө Куа ты йылас олысь мойясыс. Медым ваялісны кө төв кежлас сөянсө да оз и вөтлы өні некытчө кынөмныс, а ва увсянъыд да му пытшкад вөчөм пырмөсад өд и лаваны на колө. Бужөд веркөсас али мый кодйїсисны, сынөдыслы пырнысө тшөттш розьөдалїсны? Ветлөдлыштны кө эськө бужөд дорөдыс койбедьнад сутшйөдлөмөн, верман и веськавыны да кутшөмкө розьө. Сөмын водзөсө мый вөчан-а? Кералан кын мусө да ыдждөдан розьсө, би сэтчө сюян, мед вөтлыны мойсө? Но өд оз увлань тшынтө кыскы, аслыд нырад и пуркнитас.

«Колө йөйтө песны!»— сувтовкерліс да чиршөдліс асьсө Бияр. А косөмсьыс дількъяліс на съөлөмыс, медтыкө эськө видзөдлыны и пом, инасьны кодарөкө, и эз на бергөдчы гортас. Мед, оз на сэтчө атшав, мыетшкө и нинөмлаысла ветлас. Гашкө дай, казялас на кыськө мойясыслысь петкөдчылөмсө? Гашкө, быри нин гажныс ывла вывсьыс да Куа тыыслөн лажмыд дорөсас и петалісны? Нюйтөсь да туруна сәті, да кызатө, төдөмысь, оз и йизьыв, а вөсни йитө налы өти здук төрмөныд йирыштнытө. Да и небзис со ывлаыс.

А мойясыс петалөмаөсь и эмөсь туруна дорөсас. Блөджыксө, пипу раскөдзыс, абу ветлөмаөсь, сідзи на тапикасьмаөсь гөрд нюйтөсь кокъяснаныс, кыскалөмаөсь бөрсьыныс пелыс лоп кодь бөжъяснысө. Найө өд, пемөсьясыд, мортсьыд на бурджыка кылөны ывла вежсьөмтө да водзвыв и төдөны, шондөдас-ө-көдздөдас. И йиыс туруна дорөсөдыс ачыс кытисюрө воссялөма, жеръялө нюйтысла сімпе-мыд ванас.

Нель майөг да кык кер чинтас и коліс Биярлы кызпыд вылас. Мойыд өд абу съөдбөжыд ли анчаыд, потшсьыд сылы он вөч налькөтө, буриндзи пыльөм нин колө сылы, мед чорыда и вартас сюрса лыас да лямөдас сэтчө кувтөдзыс. Майөгьяссө Бияр пипу рассьыс и перйис да сутшкаліс чернас йисө розьөдлөмөн, а кер чинтасьяссө перйиыны ковмис ягас кайлыны, пожом сәтысь пөрөдны. Кор лөсаліс вартан чинтассө, өти сайысь и талянсө да пезьдансө вөлаліс пуртнас чуктөдөм дзавйысь. Луныс сылөн Куа ты йылас и коліс, видзөдө да, рөмдө нин. Но и пуктөма да октөма лои пыльөмсө, мед кыйө. А войнас, төдөмысь, бара петаласны мойясыс. Мортыд дөзман лунтыр гортад пукавнытө, а найө өд дөзмөны жө дзескыдінад куткырвидзнытө.

Лун куйм лесөбасис на ывлаыс, да Бияр некытчө эз и ветлы, сөмын гымгаяссө воджсьыс видлавны лэччывліс. Сэссия выльысь көдздөдіс, пакта лымйөн сэзьмөм вой улас пызйыштис, а асывнас шонді мыгчысис қельыдгөрд гөгыльөн, и муніс кытшовтны став пукталөмсө. Өти анча и шедөма вөлі, буретш сийө налькъяс, кытчө шырыс шедлі, мукөд налькъяссө лымсьыс весалөма и лои. А вот Куа ты йылас пыльөмыс кыйөма вөлі мойсө, пуктөм бөрас локтан войнас и кыйөма. Эз волы лесөбысла, а эськө мөд на, гашкө, веськаліс, и кор лэчкас шедөма вөлі көрыс, коркө тавой на и шедөма. Лөзовьеджыд гөна ай көр.

Пөрөдчө вөлі Бияр пожом дзибъяс, Адаc сы динө локтис, тошкаcсьома, cьодасьома вөр керкаас дыр олөмысла, нюрсмунөм векни чужөмыс и висьталө, мый коми вужийьсь, а эськө йөграөн и позис чайтны ныр-вомыс вижөдөмысла. Ньöти мыcсьывтөг, төдөмысь, эз ов сәни, да гөвкъялан тшыныд на өд пуксьө-йиджтысьö кучикад көрта сiм моз.

— Удж да мог!— видзаасис Адаc.

— Ен бурөн!— вочавидзис Бияр.— Петөмыд тай вөрсьыд. Оз өмөй нө шед?

— Шедыштө. Да сiдзи, колана моз.

— Ош гу али мый аддзин?

— Оштө ачым на чергөда, некодөс ог чукөст.

— А мый нө суис?

— Висьталі нин эськө Унаыдлы да,— серөктис Адаc.— Кыла, пөрөдчан, да аддзөдла нин, мися, асьтө. Волөй пукав-нытө бөрти. Аски ме бөр жө вөрө-а. Мамө сур пуыштөма.

— А мый нө тiян?— юалис Бияр.

— Кикутөм. Ниакөд. Дыр-ө сәcся нюжөдан?

— Оз и ков. Да өд матө оз сибөд Ниаыд татшөм чужөм-над. Вөрсаөн и чайтас. Вежөмаөсь пө, шуас.

— Пывса на өд. Ломтөма нин. Воланныд жө өд?

— Корөминад нө мыйла он!— кайтис Бияр.

Кузь-ө нө төвса луныд?! Оз өд весьшөрө гаравлыны, шон-дыс пө ойбырасьö жө төвнад, гожса дженьыд унсө веськөдө. Локтис Бияр пөрөдчанінсьыс да пуксьыліс лунъя пызан саяс, и рөмдыны нин кутөма ывлаыс, рыгсө вайө, петалис лымла да. Сэтөн нин и бөртиыд, Адаcыслөн шулөмыс, он кө сап пемыдсө виччысь. А лымсө Унаыс тшөктис пыртны, ва пө шонта да мед вөлі мыcсьома юрсянныд кок улөдзыд, а то пө шөгөдө нин менө ньылөмсьыд, йөзыс водзын сән яналан и.

Пөрөдчигас Бияр атшвайөдліс асьсө, да петавтөг эз ов ньы-лөмыс. И аслыс долыдөн бура и мыссис сәcся, кыгтi колө сюн сөйөн на быгзөдліс, а бөрыннас ньыв пу лыс пөжөм ваөн киськаcис. Чышкысигас шмонитөмөн дольыштис Унаыcлы:

— Öнi мeысь кöч оз повзъы, вылысö и зурзөдас пөлөс синнас. Оз и кыв морт иссө. А көчсьыд пырисаыд вөрад некod на абу.

— Пасьгась, сiйөс төд,— тәрмөдліс Унаыc.— Оз кутны сән виччысьны миянөс.

А, вөлөмкө, найөс, гозъяөс, буретш и виччысьöны медся Адаc ордас, абу на весиг панлөмаөсь кикутөмсө, пызан саяс

абу пуксьылёмаось ни, юктасьыштёмаось сөмын: верьяссө — сурөн, аньяссө — чужваён. Пырёмён тшөтш и найос юктөдс Адасылён мамыс, кык бекарён вайис кывтсьыс көтшасас. И эәни жө гусьөндзи каймөстис:

— Тян вылө тай сувтiм-а, гозья вылө. Онө кө лөгасьбөй.

— Мыйыськө?¹— юалис Бияр.

— Асьнытө Памайд гөтралөма, да бур гозья и эмось. А мед эськө и таянлы бурныд вуджас.

— А мый нө колө вөчны?²

— Кикүтөмсө вежөдны. Кузьчышгьянөн гөрөдавлыны.

— Вежөдам.

— А колө на өд и кыв шуны,— чуйдс Уна.— Кам¹ нимсянь и Об² нимсянь.

— Сийө өд и эм!— сюртчис Адаслөн мамыс.— Да өд ку-жанныд шунытө. Сур кывныд сюрө, гашкө.

— Мыйла оз?³— вочавидзис Бияр.

— А оз на быдөнылы. Мукодыслы кодлыкөтө бурсиймыд зепсьыс мыйкө сетөм кодь.

— Абу кө ми сэтшөмось-а?³

— Абу, абу!— такөдс Адаслөн мамыс.— Сийөн и сувтiм тiян вылө, Ен синувса гозья вылө.

Кикүтөмыс кузя эз и нюжав. Адас да Ниа сувтисны джодж шөрас да киасисны, а Бияр да Уна гаровтисны налысь кияссө кузьчышгьянөн да гөрөдалисны. Сэссия Бияр ышловзис да шуис:

— Пемыд нин эськө ывлаыс, да Мезөсыд өд синма, Ыджыд Енмыд миян. Ставсө аддзө да төдө. Төдө, майбыр, и Адасылыс да Ниялыс важөн нин лөсялөмсө. Сийөн и мыльштис найос да вайөдс кикүтөмөдзыс, лов да лов гөрөдалөмөдзыс. И мукөд Енмыслы, төдөмысь, кесйөдс, мед эз лэдзлыны син увсьыс. Көнкө эськө танось и эмось Камыд да Обыд, да оз тай шыасьлыны-а. Ме, инө, шуа Камыс пыдди. Мед шог ни висьөм оз сулы Адасөс, вөрысь и ваысь шедө сылы да мед би видзысьөн и лоө сылы Ниаыс! Ина кыкнанныслы!

— А ме Об пыддиыс шуа,— кайтис Уна.— Мед шог ни висьөм жө оз сулы Ниаос, уна йылөм и чужтас аслас югыд вир-яйнас да лов курыдсө оз и ньялавлы! Мед би перйысьөн и лоө сылы Адасыс! Ина кыкнанныслы!

Кикүтөм бөрад он на гозьяён ло, сөмын на верөспуён да

¹ Кам — верьяслөн Ен, найос видзысь.

² Об — аньяслөн Ен, найос видзысь.

гөтырпуөн йөз син водзас; он на лысьт и өтлаадтө водлыны, он кө нин гусьон көнкө. Но и бөрынтьчыныгө гөтрасьомсьыд некытчө жө нин ловъя юрнад, он кө нин пышйы кытчөкө йөзыслөн еромьсь. Кикүтөмыд — нэмыд кежлө ерд¹ сетөм. Да и паса нин лоан ныла-зонмаыд. Ниалөн мамыс и пунктис Адаслы юр вылас гөгрөс еджыд гын, кытчө вөлі вурөма кык ермөг вундас, өтиыс лөзысь, а мөдыс вижысь. Пеляч² улас и ковмас өні новлыны Адаслы тайө гынсө, сиктас кө петө ли мөдлаб кытчөкө, оз вөрө-а, мед быдөн и адзыласны, кытөн пөрччылас пелячсө, мый абу нин сийө пөвтөм. И Адаслөн мамыс пиличалис Ниаөс, пунктис сылы юр вылас кузьчышгыянысь өшувка, кытчө вөлі вурьштөма ермөгысь жө вундасьяс, лөз, гөрд и турунвиж рөмаысь. Мичмөдөм өшувкасө тайөс Ниалы верөс сайө петгөдзыс жө ковмас новлыны, весиг веж көдзыд лунас, кор ной чышгыянасяс на, мед ермөг вундас помьясыс быть тыдалісны мышку саяс.

Пызан сайө пуксьытөдзыс на Адас висьталіс, мый коркө төв шөр бөрас гөтрасясны найө Ниаыскөд, гашкө, Емдіно на лэччыласны, Пама водзө сувтлыны. А куш кинад сэтчө он лэччы, пуктыны кө, мед мыйкө пуктыны енколаас, донаджык куяс. Та вөсна оз и тэрмась, джуджыд лымыөдзыс вөралас на. Аски асывнас и каяс вөр керкаас да, гашкө, төлысь-мөд оз воы. И мед оз гажтөмтчы некод, содтіс на.

— А ачылд нө? — жугыльтчыліс Ниа.

— А ме сы вылө и эм, мудз ни гажтөм. Тыртөм нортөн нө лэчча гортө? — нюмыртчыліс Адас.

— Он эськө да, — намыштіс Ниа. Нинөм сэсся эз и лысьт шуны.

Торъя гаж, нөшта нин сьылан-йөктанаөс, эз и виччысь Биар. Чайтіс, пукыштасны пызан саяс, варовитыштасны кодлы абу дыш, и муналасны гортаныс. Гөжөмын кө да ывла вылын тыра пызан саяд тадзтө лөсялан, сэк, гашкө, дырджык оз и мунсьы йөзаинсьыд, а гөвкъялан тшына керкаад син курыдсьыд на дыгөдас. Горйыс ломтысис и кык пеша на өзйисны, да йиркыс нин эз тыдав, эськө тшын петан розяс и кыскис видзөднысө да. Ывласа ыркыд сынөдыс на эз тырмы вөтлыны тшынсө. Но, буракө, шоныдсө видзисны, эз на восьтывны керка өдзөссө посводзас.

¹ *Ёрд* — клятва, кыв сетөм.

² *Пеляч* — пеля шапка.

Дөзмис Бияр да мунөм ылаө нин и чеччис, тильштис синсө.
И сэки сөмын Адаслөн мамыс уськөдчис да восьтис өдзөссө,
мыжмөдчана шуис:

— Пөдан и эм татчө. А тэ нө мунысь нин, Биярыс?

— Пукалим тай. Ен бурөн.

— Эны на, — шыясис Адаc. — Гортыд өд оз пышйы.

— Отнас быгтьөкө и воліс, — эльтыштис Унаыс.

— Он тай чеччы.

— А менам бырөма нин гажөй йөзсыс. Век ассыд сөмын
эн кывзысь.

— Но ыркөдчышта, — петіс Бияр посводзас. Сулаліс сэн
дырөкө Уна ылас лөгасьөмөн, но скөрмөмөдзыс эз жө волы:
сөмын гортсө и оло сійө, да кыскө, дерт, сійөс йөзид дорад;
кызди аслыс Биярлы кыйөмыд колө, сідзи жө сылы и варо-
витөмыд колө; видзөдан тай да, сёрниас и ылавлөны аныасид,
лунтыр вермасны варгыны.

Йөзыс, кылө, чеччавны жө кутісны пызан сайсьыс, веш-
тавны дісеқъяссө, но мыйлакө некод на эз пасьтась да пет
посводзас. Сы пыдди кодкө пөдлаліс на өдзөссө, да сап пе-
мыдас и коли Бияр, ыштөкө вунөдісны сійөс, эм али абу көнкө.
Дерт, парскис сылы таысь да пырис бөр керкаас. Вөлөмкө,
сувталамабсь джодж шөрас да виччысьөны, кор Борган да На-
мыр ворсны-гажөдны кутасны. И Биярлөн пырөм улө и лөсяліс
налөн, гозьялөн, гажөдны пондөмыс. Моздорас ыджыд
йөгысь вөчөм си кумлиөн, квайт сияөн, ворсіс Борганыс, а
Намырыс отсасис сылы сөйысь вөчөм тильгунөн. И сэтшөм
лөсьыда, йөктөдана, налөн артмис, мый өти здукөн и ышмис-
ны йөзыс да кутісны зымөдны кытшөн гөгралөмөн. Он төд
на морттө буратө да чайтан, мый сэтшөм и эм, тэ серти бөрын-
джык на кытчө колө, а кодлы на мый, вөлөм кө, Енмыд се-
тас. Сетөма тай со Борганыслы и Намырыслы ворсан шыяссө
перьян сямлунсө, он и вөтчы та туйөд на бөрся.

— Лок, эн сулав! — петаліс кытшсьыс да кыскыштис Би-
ярөс Унаыс.

— Мекөд эн на йөктыв.

— Кодкөд нө?

— Маюрыдкөд.

— Эн лөсьөдды. Ме эг на и сувтлы йөктынысө.

— Синнад тай сійөс сөйин-а.

— Тэнө и эг?

— Эн.

— Ог тэкӧд ов ни? — эльтыштӧ водзӧссӧ Бияр.

— Тувчав. Варгылясьӧ сэн ош моз. Он ӧмӧй кыв ворсӧмсӧ? Улӧ-вылӧсӧ?

— Тэ ӧд... кужан нин да.

— А сьӧлӧмтӧгӧд он и велавлы, — бара на дойдыштӧ Унаыс да швырк бергӧдчис водзвылас. Вылын коска да паськалан бӧждора, табйӧн кыӧм каля сера ордӧса¹ вӧлі сійӧ, да ичмоньлуныс мыгӧрсъыс и куснясяна нюдз вӧрассьыс сідзикӧн и пӧртмасис сьысь, шоныд моз оняліс. Век на кыскалӧ Биярӧс Маюрнас, кутшӧмкӧ меліасьӧм и виччысьӧ помала, а нэмыс кежлӧ нин и гозйӧдчисны, да век на сылы этша, ыштӧкӧ меліасьӧмыс и коланаджык став олӧм дорсьыс. Код тӧдас, гашкӧ, налӧн, аньясыдлӧн, оз и овлы сьӧлӧм пӧтлӧмыс да?

Йӧктӧмсьыс на Унаыс эз пӧтлы. Мыйӧн Борган триньӧбтыліс вылысь муртса коставлӧм бӧрас, пыр и чеччыштліс ӧгыр вылысь моз. И Биярӧс на лешмӧдіс, эз лэдзлы пуксьывнысьӧ. Гашкӧ и, петкӧдліс сылы и мукӧдыслы, со пӧ на ме кутшӧм, абу на мижуй вира. Вӧрад ветлӧдлӧмысь, кор лунтыртӧ он пуксьыв, ӧнджыкасӧ лядвей вылысад и кучкӧ, изьялӧ быгтӧ сӧті, а йӧктӧмсьыд, вӧлӧмкӧ, кок кусыньыд доймӧ, пидзӧсад и дзенгӧ да.

Кор нин дугдыласны йӧктӧмсьыс, сійӧс нин и виччысис Бияр, да нимкодь быдӧн лои сылы Борганлӧн ньӧжмыда да нора ворсӧмысь. Но Намырыс сӧки эновтӧ тильгунсӧ да сьыланкыв пондӧс нуӧдны, и сылы тшӧтш мӧрччис шогӧдана сьылӧмыс. Кусан йӧлӧга моз уалана сьыліс Намырыс, ыштӧкӧ эз и вомнас, а морӧс пыдінас. Некод налӧн Борганыскӧд эз быдмы, да сійӧн, тӧдӧмысь, и шогалисны гозья.

Оліс-выліс гозья,
Кага бӧрдысьныс эз вӧв.
Коді найӧс вердас-удас,
Асьныс пӧрысьмасны кор?

Тувсов лунӧ ывла вылӧ
Петӧс ӧтчӧд гӧтырыс.
Гӧгӧр кылӧ, лӧбач сьылӧ,
Гӧгӧр лӧсьбӧдӧны поз.

¹ Ордӧс — платтӧ.

Синва петö коньöр аньлөн,
Некыдз синваыс оз сувт.
Видзöдö да, тури лэбö,
Лэччö-лэччö сыланьö.

Воис весьтас, шыв-шыв вöчис,
Мыйкö муас уськöдiс.
Вөлöм, уськöдöма тури
Көньөрöйлы анькытш тусь.

Пуктiс сийöс öшинь улас,
Оз-ö шоныд муас чуж?
Войнас кылö, кодкö бöрдö,
Бöрдö дзöля кага моз.

Öдйö петiс ывла ывлö
Видзöдлыны, кодi сэн.
А сэн ловъя, ловъя кага,
Муса, муса, муса пи.

Пыртiс гортас, мыськис, тöбис
Еджыд шабдi рузумөн.
Öнi гозъя быдтысьöны,
Казьтылöны туриöс.

Гортаныс локтигөн Бияр кöсйылис на шуны Унаыслы, мед дугдас нин сэсся кыскавны Маюрсö, но эз удит, пановтiс Унаыс:

- А миян лоö жö вердысьыд. Оз на тури ков.
- Мыйöн тöдан?
- Тöда.
- А мый нö эськö сэтшöма йöктiн?
- Бöрдöмысь.
- Кутшöм бöрдöмысь?
- Абу ме тэныд муса.
- Эн скöрмöд,— вомалис Бияр.
- Скöравныгтö сöмын и кужан.
- Мый нö ог?
- Эг на тöдлы небыд кывтö. Кор аслыд колö, сэки сöмын.
- А колöмыс нö абу мусаысь?

— Абу. Муса дырйиыд сідзи на сюрё небыд кывйыд. Ме тай шулі тэныд, мися, тэ менам и вежа югыдыс. А көні водзёсыд?

— А тэ менам вежа муыс, сідзтё кө. Этша на?

— Абу,— бурасис Уна.

4

Керка керсё порёдөмысь Бияр эз ордчыв дыр кежлас, сөмын вөравнысё да вөчасьнысё. Тшөтш и шойчөдліс сэкьясё асьсё эбөссьыс уськөдан сьөкыд уджсьыс. Джуджыд лымйөдзыс квайтмынысь унджык кер сылөн чукөрмис нин, а коліс на мөд сы мында арталөм сертиыс. Томвывсьыс кыскис на сійөс ыдждөдчынысё, дас сизим кер судтаөс лэптыны бердьяссө, мед эз мусяньыс джоджа вөв керкаыс и мед йиркөдзыс кинад эн судз, и торья посводза да кык вежөса на, дыр олана да узьлан пыдіа, и сигөралөм вевта лымсө да зэрсө кыйөмысь.

А лымсө сапкис и сапкис, өти войнас сы кыза пуктыліс, мый торыгтя кок туйыд аскинас, видзөдан да, шылялөма нин, воглөмыс и кольыштөма. Нюжөдіс Бияр ыліас петалөмсө и казяліс сэсса, мый асьсө и йөрмөдіс: кодкө өд сылы вөла туйтө оз пискөд, дай вөвтө на, гашкө, оз сетлыны доньыс донөн, шуасны, атшвайөдан пө лопдойөдз, да асьным вөвтөг колям. Сідзи и лои, код дінө эз шыасьлы Овкөджас, вөла дінас. Өтнас Кекур коли сэтшөмыс, кодлысь эз на юавлы. А юавнысө сылысь и эз лэпты сьөлөмыс, мустөмджык на вөлі вурд кульөм дорысь.

Ачыс, буракө, Кекурыс кывлөма кодлыськө, Бияр пө вөв юасьсө, да паныд лөсьөдчис сылы Куа ты нөрысас, юан ва катөдігас. Эз кө нө лөсьөдчы, кытысь сэтчө уси да мыйла сулалөмнас виччысис? Пыр тай и нускыштіс пөдөм ныр пырыс:

— Кытчө нө вөвнас мөдөдчан?

— Емдіно көсийлі!— скөрмис Бияр.— Төдан нин, а сувтөмыд сэтчө да кывйөс кыян. Эн ручась.

— Ачыд тай ручасян. Йөзыслы Гамө на тшөтш шулөмыд-а. Сэрөгө и. Меным и соссян?

— А ме нө могмөдчылі тэ дінө? Юавлі вөвтө?

— Эн тай волы.

— А мездылан нө эськө?

— Мый огыс? — нурбыльтис Кекур. — Йӧгралы жӧ нин
вӧлі төвийӧда-а.

— Кодӧс?

— Пӧрысь вӧвсӧ. Чергысяс кӧ, и мед. А мыйтакӧтӧ кыс-
касяс на. Лымгяд пырӧ и, оз на ков зоръявны.

— Гашкӧ и, босьтла, — падъялыштис да кывийӧ сетчис Бияр.
Дерт, эськӧ матӧдӧма лоӧ тадзтӧ Кекурсӧ, бурасьӧма на быттьӧ
сыкӧд, да йӧрмӧмыдлысь и лоӧ кывзысьсны, лэдзылыны ныртӧ. —
Донысь-ӧ мый шуан-а?

— Бурджык чер да ытшкысян кӧ доран и.

— Вывті жӧ эськӧ да. Ог ӧд аслым кольӧд вӧвтӧ.

— А турун додь на ӧд ковмас. Сійӧс он артав? — вомалис
Кекур. — Ачым со вӧзъя и. Бур кузя.

— Кутшӧм бур кузя?

— Век ӧд он лӧгав. Овны кӧ быттьӧ.

— Но мед, — ышловзис Бияр.

— Мый мед?

— Тэнад донысь. А мый нӧ йӧграыслы вӧвсьыс? Гарыштін
тай. Найӧс ӧд кӧрныс вердӧ.

— Вӧв вирсӧ найӧ юӧны. Вежа лун налӧн овлӧ гождӧмнас,
да сэки. Асланыс Енмыс на тшӧктылӧма. Коркӧ важӧнсӧ найӧ
паськыдинын и овлӧмаӧсь. Вӧв видзӧмӧн. А сэссия вӧтлӧмаӧсь
найӧс сэтгысь, и кӧрӧ кутчысьӧмаӧсь тшыгылы кулӧмсьыныс. Но
вӧв вирыс налы быттьӧ Енсяньыс на.

— Кыгысь тӧдан?

— Пӧчӧ висьтавліс. Сысянь миян йӧгра сорасыс.

— Кодкӧ и йӧгра вожа вылад ыштгылӧма?!

— Пӧльӧным, коді сэссия?! — эз и лӧгась Кекур. —
Вӧтлӧмаӧсь татысь йӧграсӧ да меда туйӧ ӧти нылӧс кольӧдӧ-
ма, а сэссия личкылӧма дай гӧтыр туйӧ тшӧтш видзӧма. А ӧні
быттьӧ ми сыысь мыжаӧсь.

— Некод оз мыжав.

— Он тай. Синнад вӧлі он аддзы да.

— Но аддза нин, — такӧдіс Бияр.

Тадзикӧн и сюри сылы вӧлыд, мыніс йӧрмылӧмсьыс. Эз
эськӧ вӧв нимкодъ таысь, сьӧлӧмыс лючки эз и веськав, да
овлӧ ӧд тай, кор матӧ оз лӧсяв сӧстӧм ваыд горшыд кось-
мигӧн да кутшӧмкӧ гуранысь и лоӧ юны, ном позсьыс. Кодкӧ
мӧд кӧ эськӧ убӧлитис вӧвсӧ, эз и сетчы Кекурыслы кӧкӧднысӧ,
а ӧні воча синмӧн и ковмас сы вылӧ видзӧдлыны да нӧшта

водзёсао на пуксыны. Но он од чигьяв, шулывлёны тай, кор сёянсьыд дзескыд, а мукдлаас на лёсялө татшөм шуөмыд, кор мыйёнкө дзескыдад воан.

Лун дай, мөд дай, кёймөд дай эз на вермы Бияр петны туяс, виччысис ывлаыслысь сэзьмөмсө да төвсьыс ланьтөмсө, чорыдджыка көдздөдөмсө. Небыд, нальпак лымйыд тыртөм доддяд на кыза ошйө, а тыратө пурмөдны и кутас, чомкост джынийон и сувтөдас вөвтө, уськөдас кок йывсьыс. Мед и джуджыд, а чишкалан көдзыдсьыд майкалөм, пушыд лымйыд пазавны и кутас вөлыд водзын и додь улад. Дерт, мөдарөнас абу жө бур ёна көдзыдыд, турунтө өдийө жө ректөдас. Оз эськө вөлыд турды, лыйсян көдзыда войтө на ывлаад суалас, да мед эськө эз и дугдыв турунтө мурчкөмысь, сідзикон аслыс пөтсө и шоныдсө перйөмысь. А код төдас на, кымын вой ковмас ветлыны Биярлы. Мед эськө эз жө ковмы тыртөг бергөдчыны.

Турун додьянас и вайөдіс Бияр вөвсө Кекур ордсьыс горт дорас, аслас воча чом дінас. Сэсся разьліс на вылыс потшсө да лэдзавліс видзчысьөмөн турунсө, джынсө кымын, мед оз чирйыссьы, и выльысь сөвтчис. Кыйдөс куяссө да сола комсө пунктис, еджыд сөйсө, Куа ты бужөдсьыс перйылөмсө, ыджыдкодь кык ёкмыль, и көр яйсө, шуйга бөрладорсө. Сөвтис бөр турунсө да злөдіс потшнас, и артмөм воргаас, потш улас, суйис шыпуртсө. Медбөрын чөвтис асьыс нопсө, йбра вольсө да лызь гозсө.

Сөвтчигас на Унаыс велөдіс, мед аддзөдлас Емдінсьыс Нирасө да водзасьөм сылы пыргас, гоз-мөд ком да көр яйсө пунымөдысь. Сибыд сёрниа пө Нираыс. Мамөысь на кужөмөн да сьөлөмөн бурөдіс менө сәки вадорас, кор тай Емдінас сувтлім, и он кө пө пырав, ме тәныд! И көсийсьтөг эз ов Бияр да содтис на, мый, гашкө, сы ордө и сувтлас узынысө.

Вөрзыны нин вөлі көсийө Бияр, кыскыштіс вөвсө сермөд сюмысөдыс, мед аслыс и муныштны водзвылас Эжва вылас петтөдзыс, да бөрья здукас Унаыс уськөдіс мыйкө төд вылас, горөдіс: «Энлы на, энлы!» Котөрөн пыраліс воча чомьяс да пыстөм ем петкөдіс, судзөдчылөмөн сутшкыштіс-суйис Биярлы пелячас, юр чут весьтас.

— Емыд тәнад и видзас мыйыськө.

— Юртө и видзас,— вочааліс Унаыс.— Сюсь йөзыс косьтөм сьөдбөж яй на босьтлөны кузь туяс.

— Воим тай со татчө. Олам и. Нинөм на эгө лоий.

— А сьокыд нө? Из пукті? Мед ветлө!

— Но мед, инө, — шуис Бияр да вөрзвөдіс вөвсө.

Пөрысьнас пөрысь, багыльось пемыдгөрд гөна да джудж-даммө син көршаяса вөлі вөлыс, да абу на изсьөм пиньяса да веськалөм мыш выла. Нетшкысьтөг на кыскис додсьө, тыр-мымөн эбөсөн. Кузь гыркыс ыштөкө и отсаліс сылы дугдыв-төгыс тувчавнысө пышына гыжъя дженьыд кокъяснас, да Бияр ногө эджык и вөйлась. Ачыс на Бияр пөсяліс и жаяліс, кор петісны Эжва вылас. Лымийыс сәні, гашкө весьтөн ляпкаліс вөрас дорысь, дзуртан топыда кыліс уліас, йи бердас пуксьө-мысла.

Эжва кузяыс и коліс эськө лэччыны Биярлы, сьөрт вылас петавлытөг, но оз өд веськыда кучкы Эжваыс, вөрвысянь да вөрвылө и шыблассө, көджөн-көджөн чукльөдлө, кык пөв, гашкө, нюжөдө туйсө. Та вөсна кыскис сийөс весьтасавны вывті нин мегъя өти көдж. Веськылдаторса джуджыд вөрвылыс тыдалана висьталіс, ог пө со ме зэв ылын и помассыы, да ме пөлөн кө веськөдчан, кутшөмкө сөнөд, регыд бөр и петан Эжва вылад. И босьтіс да кежөдіс Бияр вөвсө.

Өвкөджсьыс петігөн на чайтіс лунөн и воөдчыны Емдінас, мед пемыднас нин, а пемыдыс сийөс көдж вомөнас и суис, як бадбьөн тырөм сөнө. Ыштіс кузь да восьса сөн вылас, эз мөвпыштлы водзвыв мый кыткө тырөма вермас лоны, и йөрмис сэтчө, кык верета костас. Өтарө ни мөдарө он кеж, сук сулалө веретяса вылас кылдза-козъя вөрыс и водзвылас сьөд як бадбьыс, эськө видзөднысө абу нин и ылын Эжва весьтас паськалан восьсаыс да. Сідз нин лешмисны вөлыс и ачыс, пуяс вывсьыс на нөбөдөма төлыс тукта лымсө да, лажмөдөма быдөн сөнсө, а сэтчө и черсө на ковмис перйыны Биярлы. Кераліс-кераліс як бадсьө, и орны кутіс сойыс, энөвтчис ловсө веськөдыштны, да эз и югды син улас. Вөлөмкө, пуксьө нин пемыдыс. Лэдзалис вөвсө да сөдаліс торйөн лым вылас, мед оз ачыс нетшкы додсьыс турунсө. Сэсса перйис нопсьыс пулөм яй тор да табъя нянь, из кодьөсь кынмөмысла, гаровтчис юр вылысөдзыс йөра вольнас и уськөдчис лымъяс, вөрышталөмөн вөйтчис пыдөджык, пондіс шыр моз гуджгыны яйсө да няньсө. Сідзикөн и унмовсис коркө мысти. Воліс эськө юрас би пестывны, да мудзвывсьыс дышыс пыр и веніс.

Аскинас, лөз югыднас на, сувтіс керасны да маті лун шөрөн вөлісь петіс Эжва вылас. Сы серти вөлыслы шөйчөгыс унджык сюрис, а дась кералөм да таялөминтіыд додьтө кыски-

гад эз весиг пöсъявлы, войся гыöрыс на öшалис кынöм улö-дзыс, и Эжва кузяыс водзöсö эз сьöкыда и тувчав, юрсö мовкйöдлытöг. Додь бöрас нин лöсьöдчис Бияр и то на кольны кутис гөгöр рудзалöмысла. Дöзмис асьö песöмысь да кайис додь вылас, бара гаровтчис йöра вольнас. И вугыртис сясся кокныдысла да шоныдысла.

Садьмис вöлыслөн корсейöдлöмысь. Сувтöма да лöддзысь моз пыркнитлö юрсö. Скöрысь горöдöмсьыс на оз элöдчыв. «Ры али мый сэнй?» — ыркмунли сясся Бияр да чеччыштис додьсьыс паськалöм синмөн. Сэки сöмын казялис, мыйла сувтöма вöлыс. Кöраяс вомöналöмаöсь Эжвасö кык дадюла, абу и важөн на, коркö асивнас. Кыськö вöрсьыс, шуйгаладорсьыс, петöмаöсь да виджадөн веськыдладорас сетчöмаöсь, сьöрт вылас. Дерт, йöграяс, кодй сясся вермас лоны? Гашкö, Емдинас жö мыйкö лэччöдисны вежас вылö, гашкö, сидзи шöйтöны, мыйөн налысь тöдан? И веськалан кö на шöрö, бурөн оз и лэдзны, ловтö на, гашкö, босьтасны. А кытчö воштысян вöла-додьянад? Он кöсийы, да лоö повны. И вöлыс со повзöма, оз жö буракö, лэпты кöр иссö, а, гашкö и, йöгра иссö на.

Мый лоан ло, косны эз кос ни Эжва вывсьыс некытчö эз кеждчы Бияр, сермöдас кутчысьöмөн вуджöдис вöвсö ас бöрсяыс кöраясыслөн кольöм туй вомöныс. Ырскöбтылöмөн и вöтчис вöлыс, ыштöкö лөкинись видзчысьöмөн, да аслас вермана öдөн и мöдöдчис водзöсö. А Биярлөн сьöлöмыс, дерт, эз инась. Мед ылысьджык тыдалис сылы, бара кайис додь вылас да пуксьöмөн нин тубрасис йöра вольнас.

Кор лои ордийöдöма сьöртсö, кытчö кöраясыс вöли мунöмаöсь, а тыдалана водзиас, Эжва кывтыдас, лымийыс вöрзвöдлытöм нөйкалис, Бияр такалыштис да гыравыласис гырэдзанас турун вылас. Но эз на удит сетчыны ойбырыслы, горзöмьяс кылис бöрвывсьыс: «Ко-о, ко-о» Кык дадюла, кöрьяссö бöрсяныыс зибьялöмөн, вöтöдисны сийöс. Йöграяс и вöлöмаöсь, кукуля сөвикаöсь, сямсьöд чужöмаöсь, тасмасыныыс öшалан пуртаöсь да вольсалöм нөввужъяöсь. Пидзöсчанысьöмаöсь кыкнанныс, да быттöкö кодй коднысö пановтас дадювнас.

Бияр шöйöвошлис, кольччыны-ö додь вылас али чеччыштынны да паныд и лöсьöдчыны. Гашкö, шöйöвошлöмыс и отсалис сылы нюжмöдны кымынкö здуксö, бöр ас выяс вöдчыны да мөвпыштлыны, мый бурджык на, оз кö чеччышт додь вывсьыс. Мед йöграыс чайтöны, мый шедис нин налы да оз и

видзчысьны сыысь ёнасö, ньöввужъяснысö оз перйивны ни. Йöра вольнас сайöдöмөн кыкис додь потш увсьыс шыпуртсö, топöдiс воропнас шуйга киняулас.

А йöграыс дадьювъяснас вöтöдiсны нин додьсö шöракостанаыс босьтöмөн, кöсйылисны нин сувтны, но вöвсö аддзöмысла да сылөн кыза корснитöмысла кöръясыс чепöсйисны садътöг повзбöмөн да ыли кытшөн, öтарö-мöдарö, бөр шердйöдiсны йöграсö. Ковмис налы ас кокнаыс нин вöтöдны додьсö. Вöли кö Биярлөн сёрас ньöввужыс, кыкнансö и позис чергöдны. И то на сйёс кодкö быттьö тойыштлис додь вывсьыс, муртса эз чечышт кодараскö, мед паныд и уськöдчывыны кодныслыкö. Но кутчыс таысь, мед мöдыс сэк коста вöвсö оз помав.

Öти йöграыс, томджыкыс видзöднысö, водзджык вöтöдiс додьсö, сэсся пановтiс да сувтöдiс вöвсö, горöдiс дзерöдана:

— Саран¹, дыр-ö олан?

— Ме ог тöд.

— Лэччы сэтысь.

— Сэсся мый?

— Тотшка² сэсся!

— Тотшкы,— ньöжмыда и вочавидзис Бияр, ыштöкö эз на пыдди пукты. Видзöдлис, кöни нин мöд йöграыс, да эз на сйё дзык матын вöв, весигтö эз нин сэтшöма и тэрмась, но пуртсö киас нин кутiс. Сы вотöдз на колiс ылöдлыны томсö, и Бияр эз чечышт, а вылысас йöра вольнас и люзгысис-лэччис додь вывсьыс томысладорö.

— Шедiн öд, саранöй!— векыштчылис томыс, муртса син потасьясыс и кольлисны, да вöлись кыкис пуртсö.

Но и Биярлы тайö здукыс тырмис шамыртны шуйга киняувсьыс шыпурт воропсö да сутшкыны пом ёсьнас йöграыслы кынöмас. Эз эськö вынысьөн ло сутшкöмыс, дай сöвикыс на видзыштiс йöграсö, но инмылöма, буракö, сылы пытшкöдзыс, öдийö тай ойöстiс да нюкыртчис водзланьö, сунгысис юнаслымъяс. Мöдысьсö Бияр эз нин и сутшкы сылы ни сöтышт юрас, кимлöсвивыв уськöдiс вывсьыс йöра вольсö да уськöдчис додь сайтыс мöдыслы воча. Да кывлöма, тыдалö, сйё ойöстöмсö и удитöма вежöртны, кодлы веськалис, бөр нин пышйис аслас дадьюв дiнас. Пондылис на Бияр вöтчыны сы бöрся, да казялис, мый оз нин суöd, дай ньöввужсö на кыкис сйё

¹ Саран — таdzi йöграыс шулöмаöсь комисö.

² Тотшка — виа, начка.

пышйгмозыс да лыйны и бергөдчывліс. А кытчө восьсаинад саймовтчылан тюван ньөвсьыд.¹

Сувтіс Бияр да видзөдны и кутіс, кытчө тайө йөграыс мунас, оз-ө выльысь, дадювнас нин, матыстчыв сылань, ньөвнас судзана-инмана выйөдз. Вермас өд и вөлыслы на лыйны, нинөм он босьт сылысь. Таысь повзёмысла и уськөдчис бөр Бияр додь саяс, кыскис ымөставлысь том йөгралысь ньөввужсө да нюлыссө, разис косьыс тасмасө да сюйис пуртөсас лымсьыс тыдалысь пуртсө. И лөсьөдчис асьсө, мөд йөграсө, лыйны, мед сөмын матыстчылас.

Но мөдыс өд эз жө вөв синтөм, и ылі кытшолөн, көрьяссө лёкысь зібьяліг, веськөдчис томыслөн сулалысь дадюв дінө. Сэки и чуткис Биярлы вежөрас пановтны мөд йөграсө да аслыс и босьтны томыслысь дадювсө. Сэтчань и уськөдчис сэсыя. И лөньөдыштис кө эськө асьсө, кор матө нин воис, да ньөжмыда и сибөдчис сэсыя, сылөн и лои дадюлыс. А төдтөм морттө да нөшта наланьө зырөдысьтө көрьясыс эз нин лэптыны, нетшыштчисуы да лымсө бусйиг сетчисны мөд йөграыслөн дадювлань. Йирыштис пиньсө Бияр да бергөдчис додь дінас. Том йөграыс сәні нюокрасис на кымыньон, и скөрвывсьыс сөтыштис сылы шыпуртнас сьылдзирьяс.

Енэж тырыс кодзувөн нин воис Бияр Емдінас. Увсяньыс и вывсяньыс ыштөкө вайөдісны сійөс сэтчө: увсяньыс — Эжваыс, а вывсяньыс — дзодзөг туйыс¹; ырнилан пөйма кодь визьөбөн и өшаліс сійө юр весьтас.

Ляпкыдөсь да сьөдөсь видзөдчисны керкаясыс мылькьяс вылас. Сөмын мыльк вылас, кытөн Памаыс оліс, джуджыдджыка кыпаліс изья-керья тымөдыс. Гашкө, сы вөсна, мый тымөд водзас бипур өзйис да югдөдіс пөлөнсө. Бипур дінас кодьяскө вуджрасисны кыкөн, кианыс кипеляөсь, быттьөкө гормөдчанаөсь. Найө эз и кыйөдны Бияр бөрся, төдөмөн виччысисны, кор сійө ачыс кыпөдчас вөла-додьнас. Эжва вывсьыс вала туйыс матө и катөдіс насянь, кык мыльккостса нөковөдыс.

Додьсө бөрсяньыс йөткышталөмөн Бияр отсаліс вөлыслы, и вөлыс бөрья эбөссьыс, а сувтлытөг на кыпөдчис кык мыльк костөдзыс, сэтчө вөлісь сувтіс, кыліс, буракө, сийөснас да, мый доддыс оз нин увланьсө кыскы. Сэтчө жө, нөковас, лэчисны и кык видзысьыс.

¹ *Дзодзөг туй* — млечный путь, рочөн кө.

- Коді сэтшөмыс? — юалис өтикыс.
- Бияр. Овкөджысь. Памаыд төдө менө. Камарыд и.
- Ме төда жө,— шуис мөд видзысьыс, видзөдліс пöлы-
ня юрөн да.— Гожөм помас татчө сувтлін. Гөтырыдкөд. Пыжа
вөлін. Югдінсьыд пышйөмыд.
- Да, ог тай и соссьы.
- А өні кыгчө? Войнад ме тэнө татчө ог лэдз,— докк-
нитіс юрнас бөрвыв воддза видзысьыс.
- Ог и вөзйысь өні. Луныс меным воас на.
- А көн нө узян?
- Коді лэдзас. Нираөс тай гөтыр висьталіс. Водзасьөм
сылы пуктіс и. Төдмасьөмаөсь вөлі тані вадорас.
- Ниравидлөн эськө со и керкаыс да. Лыстыан он сы ордө?
- Ог өд ме сөй сійөс.
- А сьөп аньыс¹ нинөм тэн оз висьтав?
- Висьталө. Вөйлөма пө тай верөсыс.
- Сэссия, чайтан, некодөс оз и видз?
- Ме ог төд.
- Тавой эськө өгнас да,— шешмунліс мөд видзысьыс.
- А нуөд дай,— тшөктіс сылы воддзаыс.— Лэдзлас,
гашкө, войтө узьны.
- Мөд видзысьыс сэссия и нуөдіс Биярөс вөла-додьнас Нира
керка дорас, ачыс и игөдчис.
- Коді нин сәні? — петіс, кылө, Нираыс посводзас, но
игансө эз на восьты.
- Ме. Чив.
- Зорьяла кө эськө! Кыр понйөс! Дыр он исась да.
- Ог и исась. Мортөс вайөді. Узьысьөс.
- Кутшөм узьысьөс?
- Овкөджысь. Со тані. Ачыс оз шыась-а! — дөзмис Чи-
выс.
- Шыасы, мыйла ог? — гарыштіс Бияр.
- Но и муні ме,— шавксьөдіс сэссия Чивыс.
- Ковмис на Биярлы висьтасьны Нираыслы, коді сійө да мый-
ла веськөдчис сы ордө, и сәки сөмын восьтіс Нираыс посводз
өдзөс игансө.
- Лок,— шуис.
- Энлы, лэдзала вөлөс да сөдала да.
- Кор Бияр пырис керкаас, пызан вылас сәні сись нин өзйис.

¹ Сьөп ань — дөва, сьөп — дөвеч.

Көтшасас, дісек помас, эськө сулаліс пешаыс, сартаса и быдөн, да сисьсө на, сэтшөм донасө, өзтөма мыйлакө Нираыс. И кысы сылы сиськыс?

— Пөрччысы. Абу өд көдзыд. Өгыра на со горйыс. Кынөмыд, көнкө, сюмалө и. Вайышта мыйкө.

— Ме эськө вайышти жө тэныд да.

— Кывлі.

— Аски нин ректыла доддьөс.

— Аски, дерт.

Ид шыдөса рок, сывдөм вия гурана, да чужва вайис Нираыс. И кодкө узьысы ымөстис, кылө, да бергөдчис сәки горсаяс, пемыд пельөсас.

— Коді нө? — юаліс Бияр.

— Пийй.

— Ыджыд нин?

— Вит тырө. Колис тай, ачыс вөйи-а, — казытыліс верөссө Нира. — А мый нө он пуксы? Довъялан нин-а муззөмыдла. Усьөм чужөма и.

— Шоньдсыыс кө-а.

— Но, сөйышт да, өдйөджык и унмовсян.

Син водзас шыр биөн и дзузьяліс сиськыс, дэльөдіс юавнысө, и панясыыштіс Бияр да дольыштіс:

— Кысыкө и сись нин тэнад?

— Абуджык тшына сартас ногөйд.

— Абу эськө да. Абу жө өд и донтөм.

— Камар тай вайліс. Югдіно вөлі ветлөма да.

— Лысытан нө өні Югдінас?

— Лысытан пө тай. Кыйдөстө кө ваян. Сы вылө пө и горшасьө Мөскуаыд.

— А мый нө, сибөдлан Камарсө?

— Быть өд, — лөгасыліс Нира. — Мед кольлө Унаыд өтнас.

— Талун эськө вермис кольны да.

— Мыйла?

— Йөграяс тай уськөдчылісны. Кыкөн. Көра дадюлаөсь.

— А нинөм абу лоөмыд да? Дзоньвидза.

— Он өд сетчы? — кайтіс Бияр. — Асьсө на, өтисө, чергөді. Мөдсө эг вевъяв-а. Өні эськө шобрөдлө жө ачымөс да. Бара быттьө и пежаси.

— Пежасин на кыткө! Йөгра пондаыд! — вомаліс Нира. — Со, вод да узь, — индіс мышку саяс, көні тыдыштіс вольпася вылыс джоджыс.

Аскинас Бияр садьмис кодлөнкө сійӧс малалӧмысь. Чуй-мис быдӧн, Нирасӧ и чайтӧс да. Куйльштӧс вӧрзъывтӧг да синсӧ восьтывтӧг, а сӧсся кутӧс небыдика кисӧ и бара чуймис: ичӧт киа кодкӧ. Вӧлӧмкӧ, пиыс Нираыслӧн водӧма ськӧд орчӧн да маласьӧ.

— Мый нӧ... нимтӧ ог тӧд-а?

— Пилим.

— А мый нӧ менӧ, тӧдтӧмсӧ, малалан?

— Сидзи.

— А тошкала кӧ Пилимӧс?

— Тошкав.

— А он пов?

— Ог.

— Но, лок кутла.

— Кутлы,— топӧдчис Пилимыс.— А менам ӧд айӧйд вӧлӧма жӧ. Эз нӧ, чайтан?

— Тӧда.

— А ме быдма да некор ог вӧй ваад.

— Оз и ков.

— А ме ог пов Камарсьыд.

— Эн,— тшӧкмунлис Бияр.

— Локтас тай да водны меным и тшӧктӧ. Ачыс мамӧкӧд-а... Эськӧ!— муркыштӧс пиньнас Пилим.

— Сидз эськӧ да.

— А тӧ верман сійӧс?

— Верма,— шӧйӧвошлис да шуис Бияр, медтыкӧ лов-вир сетны ичӧт мортыслы.— А мамыд нӧ кӧнӧ?— кежӧдис сӧсся сӧрнисӧ.

— Вала лӧччис.

— А югыд нин, буракӧ, ывлаыс да.

— Югыд.

— Чеччыны тай колӧ. Узьсьӧма дышыдлӧн.

— А дыш нӧ тӧ?— серӧктӧс Пилим.

— Дыш,— нюжӧдис Бияр серам сорӧн жӧ.

Гадьӧн тупкалӧм ӧшинь тасӧдыс гудыр югыдыс коркӧ шӧрӧдзыс нин пырис. Нюжмасьнысӧ аслыс Бияр сӧсся эз и сет, петалис да ректылис додсьӧ, лӧсьӧдис Пама ордас нуансӧ, пыртӧс Нираыслы водзасьӧмсӧ, и эз кыкӧс, а витӧс гырысь сола комсӧ да кӧр яйсӧ витысь кымын жӧ пуӧмӧн. И, дерт, аслыс вылӧ на кольӧдис эз этшаӧс кыйдӧс куяссӧ да еджыд сӧй ӧкмьльсӧ. Пилимыс сы бӧрся и вӧтлысис, отсавны на

тшөтш кутчысылс да, ойгөмыс¹ и вежыс петіс Биярлөн сы вылө, дась козънавны мыйкө сылы, матыстны ас дорас.

— А тасмайд эм зонмөлөн?²— юалис Бияр.

— Абу на.

— Эз өмөй коль айылдөн?²

— Эз. Тасманас и сотісны да. Аддзылі өд.

— Но сета ме тэныд тасматө. Со пурта и быдөн.

— Вай!— сэтшөм долыд босьтіс Пилимсө.

Виөм йөграбыслысь тасмасө и козъналіс сылы Бияр. Сөмын эз на тшөкты новлынысө, дзеблыны кытчөкө тшөктіс. Но эз и кывзысь дай эз и вермы Пилимыс кывзысьнысө, пырисны нин керкаас да: ветлас кытчөкө гор саяс, аслас пельөсас, и бара нин тасмаасьөмөн петө. Сідзи и суис сійөс мамыс, кор валасьыс воис.

— Мый нө кагасө йөйтөдлан?²— пыр и дузгысылс таысь Нираыс.

— Ог жө йөйтөдлы,— вочаалис Бияр.— Лючки козъналі да.

— Тасма на сылы кутшөмкө. Куш сітанас кө он швучкы.

— Быдмө тай. Мөдысь и ковмас.

— Ковмас эськө да,— лигышмунлі Нира.— А тайө нө?

— Воззасьөмтө пырті. Шулі тай.

— Но, Ен мед видзас гозьяөс. А оз на Унаыд нөбась?

— Нөбасьө. Коркө гожөмнас пиалас.

— Майбыр, татшөм верөсыдкөд. Мед оз мырддыны-а!

— Кодөс?²— эз гөгөрво Бияр.

— Асьтө. Унаыдлысь.

— Коді мырддяс?²

— Ме кодъыс,— шешмунлі Нира.— Сэссия кытчө талун?

— Пама ордас. А дыр-ө-мый сэтөн... Колөкө, узыны на ковмас. Аски нин кодарөкө.

— Узь, төран өд.

— Локта,— көсйысис Бияр.

— А тэ өд сөйтөм на.

— Мед. Сы пондаыд.

— Он кө эськө пуксьыв да сөйышт!¹— ыдждалыштіс Нира, ыштөкө скөрысь на, и кокни лолөн и кывзысис сылысь Бияр.

Пама ордас ветлынысө Бияр эз нин доддявлы вөвсө, дадь корис Нираыслысь. Сэтчө и пуктіс сола кома шомөссө да

¹ Ойгыны — жалитны.

кыйдос куяса тубрассо да гургөдіс бөрсыс. Пилимыс тшөтш вөтчис сы бөрся, водзпөрсө котөртилис, а сәсся ышмис да чечыштавлины кутіс дадь вылас, и пуксис бөрья помыс.

Паныдасис кутшөмкө пөчө, локтіс нин гортас, ветлөма, буракө, енколаас да, и нвөти родыштлытөг юалис вежыня вомнас:

— Коді нө? Эг тай нө төд?

— Эн, дерт, абу татысь да.

— А мый нө йөзыслысь кыскалан?

— Мый йөзыслысь? — дөзмис Бияр.

— Писө.

— Мед гурьясьө. Тайө на и гажыс сылы.

— Ассьыд гурийөдлы.

— Ланьт, ачыд он төд, мыйысь каттысян.

— Ог төд! — нерыштис пөчө. — Ас дінад нин велөдан да!

— А ас діно и велөда! — муркнитис Бияр.

Мынөма эськө быттьө лои пөчөсьыс, да таысь эз на лөнъшт сьөлөмыс. Юрас на эз волы, медтыкө сибөдчывны Нира дінас, да нөшта Пилимыс отсөгөн, а ыштөкө атөдісны¹ нин сійөс, син улө шеді.

Вөла-доддьөн төран, гурйив осьтөм өдзөс пыртөдіс Пама ордас, мылькөсө гөгөрөн босьтөм тымөд пытшкас. И некод эз сулав видзысьыс өдзөс водзас. Луннад да, буракө, некодысь эз и видзчысьны. Но пытшкас, вежа кыз пу дінас, жөвьяліс кодкө кипельсө киняулас топөдөмөн. Казяліс Биярөс дадьнас да вөрзыштис сылы воча, букыша синмаліс. Гашкө и, сы вөсна тшөтш букышасьө, мый и ачыс Бияр элалөм чужөма на вөлі.

— Коді? Кытысь?

— Бияр. Овкөджысь.

— А шомөсад?

— Сола ком. Ректыны вөлі колө да. Меным ковмас на шомөсыс.

— Ректасны тэтөг.

— А куяссө нө? Кыддзас өшла? Со тай өшлөмаөсь.

— Уна?

— Со тубрас. Дыр-ө меным разьнытө?!

— Тэтөг разясны.

— Мый нө ме, сулавны тані кута? Зонсө тайөс кынта и? — скөрмис Бияр.

— Ковмас кө, и сулыштан.

¹ Атөдны — уличать, рочөн кө.

— Дугды! Абу кө морттуйыд-а?

— Со тэныд морттуйыс!— чургөдiс видзысыс кипельсö, муртса эз инмы ёсьнас да плавкөс чер йывнас Биярлы морөсас.

Бияр кынмылис кок йылас да ныр пырыс лолыштöмөн бөр воодчис ас вылас. Виччысис, кор видзысыс бөр кыскыштас асланыс кипельсö. А сийö водзö на воськовтис кипельыслысь кузь воропсö киняувтиыс лэдзöмөн. Повзёмысла бёрддзис, кылö, и Пилим. Таысь и лёкөдчис Бияр этшсыс петавтöдз да нёрвотчылöмөн веськөдчис доймөмсыс, кутчысис кипель воропас да нетшыштана пөрөдөмөн ляскөбтис видзысысö.

— Мый вöчан?!— ырöстiс сийö да бауөн и пондылис пышйыны, но здук-мөдөн и лизгырмунi öйöстөмысла.

— Эштöда йöйкүөс!— вөтөдiс да скөрвыивсыс чужийс на сылы Бияр.— Он кө чеччы да висьтав кодлыкö!

— А вай кипельсö!

— Ог. Сидз ветлан.

— Да, сэсса менö вөтласны.

— А нинөмла и видзны быд понсö.

Но видзысыс эз на чеччы, вермытöм улö уськөдчис да вегылясьны кутис, быттö эз ситанас сылы чужийы Бияр, а йөрвудждiнас, и ойзалис ывла тырнас. Кыськө öдйö и локталыны йөзыс, енколаас волөмыс-ö, Пама ордас кесьялысыс-ö, и кодкө на пиысь и котöртис сэсса висьтавны, мед петаласны. Регыд мысти и уськөдчисны ырскөбөн матi керкасыс Камар да нöшта кыкөн, дасьбсь вируляö вöчны Биярöс.

— Пуктан он!— горөдiс Камар.— Кисьыд!

— На!— шыбитiс Бияр кипельсö сылы кок улас.

— А тэ али мый?— төдiс Камарыс.

— Ме.

— А мый нö ыкшаасян?!

— Со ыкшаыд тiян. Бур йөзыслөн понийыс сюсьджык. Вайи со, мися, ректыны колö, да сулөдны кутис.

— Сы могысь и сувтөдöма сийöс.

— Со тай, сулалö!— чиктылис Бияр.— Эз нö вермы чукöстлыны татчö кодöскö? Мед эськө пойгин на быдөн водзын, кодi татөн вердчö.

— Эн лэптысь. Пойгысь на и эм ачыл.

— А тэ водзын ог кут-а.

— Кыкысь эн шу!— öлөдiс Камар, да кежөдчис куйлысь дiнас.— Чеччы, таяла!

— Чечча,— лыбөдчис сийö.

— Мун син водзысь!
— Кытчö муна?
— Кыті восьса!— öвтыштіс Камар тымöд öдзöсланьыс да бөр матыстчис Бияр дінö.— Мый нö эсийöс новлөдлан?
— Кодöс?
— гөгөрвотөмө сетчис Бияр.
— Зырымбедьсö.
— Юавны нö коліс? Тәнсьыд?
— Лок пыралам,— вөрзёдліс Камар öтар бандзибсö, ыштöкö пиньыс ёнтыштöмысь, да довкнитіс юрнас матыс кер-каланьыс.

— Пыралам. Ог öні-а.

— А кор нö?

— Дадьсö ог коль татчö, шомöссö да.

— Ректасны да ваясны. Эстчö öдзöс дорас.

— А зонмыс нö мед виччысьлö?

— Мед гортас мунö. Лок!

— Эналы, енколаас ветла да,— пыкчис Бияр, медтыкö дээрöдыштны на Камарсö. И Пилим дінас шыасис:— Мун гортад, мун, абу тай ылын. Ме öд локта коркö.

Енколаас нин, чöv усьöмнас сулалігөн, Бияр мөвпыштіс, мый, гашкö, вывті и аснырасис Камарыскöд, да водзöстö сійö косöдас на сылысь, а колöкö, и мукöд видзысьсö тшöтш уськөдас, да варкөдасны сэтчö яй быгыльöдз. Ывлаад, йöз дырийыд, эз лысьт Камарыс лёксö песны, а керкаад, оз и öтнас сэн ло да, вощылас сылы гажыд. Но пондыласны кö öд, кыккирудз оз жö кут сулавны, кырлас жö пуртнас коді веськалö ки улас. Мед сэся Памаыс шуö мыжасö, сетöма тай Енмыс сылы мывкыдсö.

А енколаас сулалысь мувыв енъясыс Бияр вылö и видзöдісны пемыд сингурангьяснас да ыштöкö шогалісны нин сы вöсна ньöти шытөг да вөрзёывтөг, тшöтш и Мезöсыс водзын мыжмөдчисны, эг пö вермой кывзысьтөмсьыс сійöс кутны, да воштам, буракö, мортсö, мылышт, верман кö.

— Мылышты, Мезöсöй, мылышты!— вомгорулас шуис Бияр да висьтасис кевмана:— Быдөнлы öд он сетчы ловъявывсьыд. Мыйла, сідзкö, олан?

Абу на пырöма, ывлаас, маті керка дінас, виччысис Камарыс, öнтая кык видзысьыскöд, кодъяскöд уськөдчыліс Бияр вылö. А вежа кыз пу дорас вель видзысь нин кодкö ветлөдліс. Кыліс Биярлысь лымйысь дзуртана кок шысö да бергөдчис сылань:

- Кытчö нö?
- Пыравны тай тшöктіс Камарыд. Со виччысьö.
- Мед оз ойкöдны-а.
- Ме ог тöд.
- Сійö и эм. Менö нин эн тöд-а. Тöрытсыньыд.
- Тöдi öнi. Чивөн тай висьтасин, кор игöдчин Нира ор-
дас. А мый нö, ог пырав?
- А висян он?!
- Мыйöн?
- Полан висьöмнас.
- Ёнасö эськö... ог да.
- Сидз кö и, эн бөрнясь. Быдмылöмыд тай.

Локтіс Бияр маті керка дінас, да Камарыс восьтіс посводз öдзöссö, а кык видзысьыс сылы бөрвылас и лöсьöдчисны, тайкö йöртасны. Шулöны тай, кöинлы пö медся мустöмыс, кор бөрся-
ньыс кодкö вöтчö, а мортыдлы нö муса, кор мышку сайся-
ньыд и вермасны вувзысьыны.

- Ме ог тадзтö!— эз воськовт Бияр тагöс вомöныс.
- Мый нö повзин?— гөрöктіс Камар.
- Быгтьöкö шеді ме тiяны.
- А эн нö шед?
- Мыйысь? Мый кодлысь шышкалі?
- Вылö тай пуксян. Бордтöгыд.
- А тэ и бордья?
- Петкöдла, колöкö!

Видзчысис эськö Бияр Камарсьыс, дась ныр-вомас и ко-
сьыштны сылы, медтыкö сöмын ырыштчылас, да кык видзысьсö
сэки эновтліс син увсьыс, и кыкыс найö и тойыштісны пель-
помас, а тагöсыс содтöд на сэтчö конійыштіс, и гатшасис пос-
водзас. Дерт, сэссия эз жуйявны куимöныс, чужъявны и пон-
дісны кытчö веськалö. Гын юра кöмаöсь найö вöліны, да сійöн
на и мездысис Бияр, эз кывлы сьöмдöдана дойсö, садьсö эз
воштыв ни. Та вöсна и вежöртіс кымыньöдчыны кызкö да
гусьöнпырысь кыскыны пуртсö. Но эз удит кымыньöдчынысö,
талыыштіс морöс вылас Камарыс да бертовтіс гынкöмсö:

- Пычикта кö ловтö?!
- Пычикты,— киргыштіс Бияр.
- Оглы на. Öти здукөн и эштан тадзтö. А мед нэмтö эн
вунöдлы. Бурсö он жö тöд-а.
- Тöда. Воддзатö.
- А мый нö вечмасин?

— Пойгысь пö тай и эм тэ. Ачыд шуин.

— А кодi нö тэ ме водзын?

— Некод, буракö.

— Некоднас и ов öни. Кыскöй керкаас!— тшöктiс Камар кык видзысьыслы.— Ме ськöд бызгышта на.

— Ачым пыра,— намыштiс Бияр, бытгöкö сетчис нин Камарыслы, лөгсö оз кут ни сы вылö.

— А мый нö он чеччы?

— Энлы, вермöдча да.

И сöмын на сувтiс Бияр, кык видзысьыс сойбордiйдыс кутöмөн пыртöдисны сiйöс керкаас, пуксьöдисны ляпкыдик да дженьыдик, мöс лысьтан кодь дiсек вылö. А Камарыслы бöра улöс сувтöдисны ломтысьыс гор дорас. Но керкаыс мыйлакö эз вöв тшына, и Бияр лэптылис юрсö да казялис гыркöс пытшкöса кыз пипу кер, кодлөн улыс помыс öшалiс гор весьтас. Сэтчö и кыскис тшынсö.

Кöртись гормöдчанөн Камарыс тойлыштiс горсьыс пессö да вöлись пуксис аслас джуджыд улöс вылö, но шыасьöм пыдди нюжмасьыштiс на да очсыштiс, ыштöкö сöмын на палялис. Эз и тэрмась сiйö мыйкö шунысö ли юавнысö. Тыдалö, чайтiс нин, мый колана помö и вайöдис Биярöс, да оз нин лысьт öни сiйö тшетшыйсьынытö, ставсö и нылыштас, мый он шу сылы.

— Колам öгöй?— юалис öти видзысьыс.

— Онöй,— нюмыртчылис Камар. И кор петiсны найö кыкöныс, ойгана ышловзис: Кöни тавой узян-а?

— Кытчö сувтi,— вочавидзис Бияр.

— Мед кок туйыд сэн эз вöв. Кылин?!

— Кыли. Кодкö öд узьтöдас.

— Пама öнтай гарыштiс... висьталöма лои да... мед пö пыралас. А эськö... Жергöдлы мöдысь пиньтö?

— Сэссия мед эг и мортö ачымöс пукты?

— Мортас мед Югдiнад пуксин.

— А мыйла нö эськö татчö веськали? Эг нö вермы пидзöсчанысьны рочыс водзын?

— А ме водзын и пидзöсчанысян!

— Ог.

— Он кö и!— кутчысис Камар шыпуртас, но эз удит перыйнысö, Бияр пановтiс сiйöс, тывöдчöмөн порöдис улöснас и быдөн горланьыс да пидзöснас и зымкнитiс морöсас:

— Со тэныд пидзöсчаньыд!

— Энлы, веськавлан на,— шедiс Камарлы лолыс.

— Шулы мөдысь? Сюя горъяд? — и вир пузьомысла Бияр гор водзас и кыскыштіс Камарсө, а мед оз горзы, шамыргіс голясө. Юрсиыс, а сәсся и тошкыс чышкасьны кутіс Камарыслөн, нырыс и пельясыс гөрдөдісны, да и аслас Биярлөн ки мышкыс доналіс пиалан дөйөдз, и бөр кыскыштіс Камарсө да мынтөдчис голясыс.

Кулома нисьө ловья и куйліс Камарыс. Но дырөкө мысти пондіс чери моз апасьны. Мед өдйөджык воас садыс, Бияр кучкышталіс сылы чужөмас, и сәки казяліс, мый сямөд вылыс моз киллысысьө сылөн кучикыс нырсыс и бандзибьясыс, ульсалан кельдыгөрдөн воссялө пыдіыс. Таысь Бияр муртса и родыштіс, сәсся нимкодъыслы на сетчис, мый дыр өні оз лысыт Камарыс петкөдчывны йөзысыла.

Кык видзысыс, Камарыслөн пон-пурьсысыс, ывлаас и педзикасисны, да мыйөн кылісны Биярлысь петөмсө, паныд и лөсьөдчисны; былялөм синмаөсь эскытөмысла.

— Лэдзис али мый нин? — юалис шыасылысыс.

— Лэдзис.

— А кытчө өні?

— Пама тай тшөктөма пыравны. Вешйө сәтысь!

— А удтысян сылы? Миян вылө?

— Ог.

— Мыйла он?

— Мед унныд бырлө.

— Мыйысь?

— Водзөсыс.

Эз на вунөд Бияр, кытчө гожөм помнас пыраліс Пама дінас, да төдана керкаас и веськөдчис, а вөлөмкө мөд керкаын сійө төвйө, орччаас, енколаыс кодъ ёсь вевтаын да сыысь абу и вывті ыджыдын. Шоныд вылас горсө абу нин изйысь тәчөма, а сөйысь өтсор вартөма, сөмын тшын петансө сөйизйысь лыбөдөма, кызди тай рочыслысь висьталөны вичко ләптөмсө.

Вежыс петіс Биярлөн татшөм горйыс вылө да мөвпыштіс, мый ләптас аслыс керкасө да шоныд вылас сөйысь жө вартас горсө и тшын петансө вөчас, мед эз ковмы куткырасьны биыс ваймытөдз синтө курдөдөмысь. А ортсысянныс горсө и тшын петансө вальдён на еджөдас, гудралас вальдісө кызьөр лятиөдз да сідзикөн мавтас. Мыйла абу Памаыс тшөктөма мичөднысө горсө да тшын петансө, та вылө и бурасыөма, рудагөрдә рөм вылас?

Видзааліс да эз на Памаыс дзик пырсё пан сёрнисё, мөвпальштис мыйкё ас кежас, весигтё ышловзъыліс да бергөдліс чужомсё, быттьокё несійодны кёсийё. Та вёсна и вичмыштіс Биярлы кадыс аслыс коланасё вежёртавны. Тшөтш и сы йылысь на удитіс сійё вежёртны, мый кывсяс жё Памаыслы сылөн вывтисёмыс, нөшта нин Камарсё чишкалөмыс да код тодас на, мый сыкод таысь вөчасны, а висьталас кё ачыс водзвыв, гашкё, оз на мынтөдчыны сыысь, Овкөджас на овны и лэдзасны.

— Омөльтчөмыд кё-а? — кывчөвтис Памаыс сёрнисё панөм могысь. — Воддза сертиыд на шупалөмыд быттьокё.

— Он өд, Вежа Айка, гортад куйлы. Уджыд оз бырлы, бөрсяньыд и вөтлысьё.

— А сёянсьыд? Дзескыд абу?

— Няньсьыд дзескыд. А сідзтё эськё чери-яйтё кыям да.

— Няньсьыс тай и дзескалім.

— А лэдзёны пё Югдінас да? — каймөстіс Бияр. — Дугдісны өмөй Ветійөсаыс вайны сэтчө няньсё?

— Найөтө эськё вайёны да.

— Вежин дай куяс вылад. Майбыр, оз на бөрыньтчыны. Ур ку вылад на синсё вөлі арыштёны. Төда өд.

— Мөскуаыс чиркалө. Найөс и миянөс. Миянөс ёнджыка на. Джын кусё мырддьёны. Донаджыксё да.

— Он кё сет и?

— Быть өд сет. Косьё пырөмнад... тшыглы колян. Уна-ө нө миян тан асланым няньыд волө?

— А сідзтё өд паськалас на Мөскуаыдлөн горшыс.

— Паськавтөг оз ов, Орда водзын и легөдчө да. Доддьысь доддьөн мөдөдө сэтчө кыйдөс кусё. Мед сөмын оз уськөдчыны бара тотараыс.

— А миянлысь и көповтө?!

— Босьтіс Югдінтө да. Вискөс моз тупкис. Пөдлан тыё и колим. Веськыд кузя кё! — курзьөдліс чужомсё Пама.

— Асьным жё эськё мыжаөсь да. Став комиыс татысь. Отвылысь кё сувтім да эг кё сетчөй и. Коммусаыс тай сула-лөны, тотараыслы на оз сетчыны. А ми быттьө ошъяс, быдөнлөн аслас кытшов.

— Сэтчө и воим.

— А чорыдджыка шу дай. Коді оз кывзысь, мед юрнас и пудьясьё. Тэ өд Памаыс!

— А мөдарө кё лоө?

— Мый мөдарө?

— Лөгөда ас ыла мукөд өксысө. А кодкө, кывытдса-
ыс, Мөскуаыс дорө на шыбитчас. Воштала сідзикөн Коми
мусө?

— А бурнад өд... тадзтө... воштан жө коркө!— дөжныштис
Бияр да бөрыннас нин йөжгыльмунлі урсасьөмсьыс. Скөрмөмсө
Памаыслысь и виччысис, морөс вывсьыс рубөжсө тай и ша-
мыртліс сійө.

— Сыысь өд и шогыс,— ыджыда лолыштөмсьыс лыбавліс
Памаыс.

— Мөскуасыд он мын ни,— ыззис таысь Бияр.— Оз
и ожманөн, йөрмөдчөмөн и босьтас. Няньтөгьд дыр он чеч-
чав.

— Няньысла и колө петавны Ветйөас.

— Кытікө? Эжва катыдыс? Йөгра пырыс?

— Эжваас ю усьө. Сыктыв нима. А сэн, вывланяс, коми-
ыс оло жө нин. Сэтчө кө письтам и!

— Синнад эськө письтан да. Көні йөграыс сулалөны-а,
Сюдө чукөрыс? Няньтө ни юртө на он вай, гашкө.

— А мый нө, бара нин сибалісны?

— Тані тай нин и шежлысьөны. Төрьт на ме ыла уськөд-
чылісны кыкөн. Дадюлабсь. Öтиыслысь эськө босьті жө ловсө
да.

— Ветлыны колө да кыйөдлыны. Кытөнөсь да унаөнөсь.
Он ветлы?— корана юаліс Пама, ыштөкө эз вермы тшөкты-
нысө.

— Верма,— вочавидзис Бияр.— А кор?

— Öні коркө. Коскөдз лымсө он виччысь.

— Ветла. Да меным Гамө на вөлі колө ветлыны, Вежа
Айка. Сэрөгө и. Сов ваысла.

— А Гамас мыйла?

— Көрт изсө перйыштны.

— Ваясны тэныд көрт изтө и сов ватө. Ме вөла-додьясөн
ыстыла. Сэсса мый колө?

— Нинөм кө оз-а.

— А няньыд?— кыйис кывсө Пама.

— Няньыд кор оз ков да?— вашмунліс Бияр.

— Няньсө ачыл катөдан. Вөла пө тай.

— Вөла.

— Аски и вөрзян бөр.

— Вөрзя.

- Сэссия кодкө чужысь лоӧ оз на гозъялӧн?
- Лоӧ. Коркӧ гожӧмнас.
- Месянь бур кыв гӧтырылды.
- Висьтала.
- А бара кӧ йӧгра шӧрад веськавлан тӧрыгтя мозыд?
- Нинӧм он тӧд.
- Мӧдӧдла морт-мӧдӧс Камаркӧд.
- Оз ков.
- Эн повтӧмась ловъя юрнад. Бурӧн шуа.
- Да мыйкӧ... оз вермы аскитӧ Камарыд.
- Мыйла оз вермы? — шай-паймунлис Пама.
- Ме ог тӧд, виан он-а.
- Кодӧс?
- Менӧ.
- Мыйысь?
- Лолӧн эг лэпты Камартӧ да.
- А висьтав?

Асьсӧ эз и сайӧд, шы кывзытӧмӧ на пуктис, лючки сидзи и висьтасис Бияр, кызди-мый лон ставыс тыра додьянас татчӧ локтӧмсяньыс. Помас няргытӧг кайтис:

— Сэссия ачыл тӧдан, Вежа Айка, гортӧ али кытчӧ меным туйыс.

— Ӧти ногӧн кӧ... эстчӧ вӧрас и катӧдны колӧ да. Ас кокнад. Мед эз и войтыштылы татчӧ вирыд. Ме ачим ог лысьт горӧдны сы вылӧ, кысь нин киӧн воны, а тэ... Тӧдан он, кодлӧн сийӧ пиыс?

— Ме ог.

— Визысь¹ ӧксылӧн. Кӧвъялис мырдӧн айыс, да менӧ нин и пановталӧ мукӧддырийыс. Этшсӧ ворсӧдӧ.

— Позьӧ ӧд ӧлӧдны.

— Кокни тэныд шунытӧ. Кывсяс ӧнӧ ӧксысылы, питӧ пӧ чишкалӧмаӧсь, да кивыль оз и керлы? Водзӧс виртӧг и эновт-час? А зыкӧ ме пыра сыкӧд тэ вӧсна?

— Но мед и катӧдӧны вӧрас. Бурмылис жӧ сьӧлӧмӧй-а.

— Эн тэрмась. Сэтчӧ абу дыр,— вомалис Пама.

— А кызди нӧ сэссия?!

— Гортад мунан, ми тэкӧд сӧрнитчим.

— А оз нӧ сэки тэ вылӧ тшӧтш усь мыжыс?

— Ме асьсӧ мыжда Камарсӧ. Мися, нинӧм абуысь тэ вылӧ

¹ Виз — ӧнӧя Княжпогост.

воома. Нира ордад узьомсьыд. Вєськыд кузя кӧ, колӧ нин вӧлі кодлыкӧ джӧмдӧдны сійӧс. Водз аски петан?

— Югдандорыс.

— Сідзкӧ, ӧні и ну няньтӧ. Верман кык сепыс идсӧ?

— Дадьнад нӧ мый он? А оз вывтӧ ло? Сідз нин, шуан, няньсьыд, дзєскыд да.

— Кок эбӧсэджык лоан. Мєным юӧр колӧ йӧгра йивсьыс.

— Вая,— кӧсйысис Бияр. И мунігас нин чӧвтліс синсӧ горйыс да тшын петаныс вылӧ.

— Мый нӧ, эз шогмы тэныд?— юалис Пама.

— Шогмис. Да еджыдӧн кӧ эськӧ мавтны, вальдӧн! Мыйла эн тшӧкты?

— Мєным юрӧ эз воы.

— А корӧ еджыдсӧ да? Мамӧ кӧ эськӧ, шуис.

— Корӧ и эм. А он кӧсйы коркӧ видлыны мамтӧ?

— Абу ӧд кӧсйӧм сайын, Вежа Айка. Йӧзасян да... Югдін шӧрас и кераласны. И мамӧӧс оз малыштны. Ӑні ӧд сійӧ быттӧ оз и тӧд-а, кытӧні ме. Маюр кӧ эз удты нин сійӧс.

— А кодӧ сэтшӧмыс, Маюрыс?

— Ныв вӧлі. Коркӧ ме ышмылі нин ськӧд, киняулӧдыс сывйышті. И ньӧти эз и лӧгась. Ме сійӧс и кӧсйылі татчӧ нуӧдны. Ёнджыка на Уна дорысь. А мамӧ висьталіс, сійӧ пӧ рочӧс нин аддзӧма, сьӧд паськӧмаӧс.

— Сідзкӧ, эн и дількъяв ӧні сы вӧсна.

— Ог и дількъяв,— вочавидзис Бияр.— Быттӧ тай влӧдліс, да сыысь жельӧдлӧ-а.

— А жельсьыд и ӧдлӧ на, он кӧ нетшышт. Абу и муса, колӧкӧ, Унаыд? Овны олан-а,— гарыштіс Пама.— Мед эськӧ эг жӧ ме сы вылӧ тиянӧс гозйӧд.

— Эн,— шуис Бияр да муртса эз лазгӧдлы синсӧ. Сэки эськӧ пыр и казяліс Памаыс, мый абу на тырвыйӧ вєськыд сылӧн воча кывйыс.

— А рочыс нӧ сэтшӧма нин тӧдӧ тэӧ, сӧмын петкӧдчыв Югдінад?

— Тӧдтӧг оз ов, кодӧ ловйӧн колис. Воча син вӧлі кера-сьӧма да. Шедӧ кӧ, сэтчӧ и орийӧдлісны. Да вӧрыс мездіс.

— А гусьӧн кӧ?

— Гашкӧ. Да кутшӧм могӧн ӧд?

— Тӧдмавны. Суйсяс оз водзӧ Мӧскуаыс.

— Суйсьыгӧг и олас, мыйта нин йӧз мусӧ горшаліс да. Чӧв, Вежа Айка!

— Коркө регыднас, ме шуа. А сідзтө Мёскуаыдлысь он нин аддзыв буртө. Поздысьö нин Югдінад да.

— А мый нө Камарыд абу төдмалөма? Ветлөма пö тай.

— Сылөн кывйыс, восьтас вомсö, и петö нин. Оз куж сёрнитны кытшовнас. А колö йöзыслысь колана кывсö вотны, мед оз и казявыны. Ветлан кө эськө, мамтө видлігмоз? Маюртö на аддзылан и, гаж бырöмысь шуан. Гашкө, сы пыр и төдмалан лючки.

— Дöзмас кө, важөн нин верöс сайын да? Кодкө пö вайöдіс тэнö татчö! И вузалас на рочыслы.

— Оз кө-а,— ыдъясъыштис Пама.— Оз öмöй шонавлы сьöлөмыс, аньтуя кө? Абу на пö со и вунөдөма. Ме тай чайта-а.

— Но, ветла, гусьöнтö кө,— лыбъыліс Бияр.— А кор?

— Коркө тулысланьыс. Öнi мөдарö на туйыд.

Кык видзысьыс, кодъяс чужъялісны Биярöс, бара ывлаас нин и виччысисны сійöс. Памаыслөн төвъян керка дінас. Гашкө, пыравны нин и көсйылісны, да асьныс на падъялісны, эз төдны да, код дор сувтас Памаыс!

— Мый вöчöмыд Камарыскөд?— полö нисьö оз, баръёва воськовталіс вома видзысьыс Биярлань, мыйөн сійö лэччис пос помас.

— Водзöссö бергөді.

— А висьталам кө Памаыслы?

— Висьталөма нин сылы.

— Сэсся мый?

— Ачыд юав. Вомыд тай эм.

Узьнысьö Бияр, дерт, эз и вöзйысь кытчөкө мөдлаö, инö нин эз пукты Камарыслысь шулөмсö да, Нира ордö и кольччис. А лоис гортас зэв на и дона катөданыс, кык сепыс идйыс, да аслыс вылө кольбөдлөм куяссö лышкыдывывсьыс ставсö кымын Нираыслы и сетіс, мед вежлалө, мый вылө көсйö, сөмын мой кусö да куим анча ку аслыс вылөсö нин и торйөдіс, тшөктіс видзлыны төдлытөг ковмана кежлө. И еджыд сөй ёкмыльсö кольбөдіс Нираыслы, висьталіс сылы сьöрсөн-бөрсөн, кызди мамыс Югдінас вöчліс вапсö шабді вый сорнас да зарнивижөн мичмөдліс дөрасö.

Лөсьбөдчөм бөрас, сөмын доддяв аски вөвсö да вөрзъы гортас, Бияр пуксис лунъя сөйны, шняпкысис личөдчөмөн дісек вылас да гыравыласис на гырдызаяснас пызан дорышас, и сэки

вөлись ёнтавны кутіс чужъялөмсьыс гөгөр доймалөмыс, ыштөкө вир-яйыслысь личалөмсө и виччысис, лолыслысь лөняна ветлөмсө да.

— Мый нө, пытш али мый сөйө?— юалис Нира, казяліс сылысь куснясьөмсө да.— Миян эз вөв пытшыд, ачыд кө эн вай гортсыд ли кыськө.

— Оз, сідзи доймышталө,— шуис Бияр.

— Доймышталас тэныд сідзи, чезрасян нин сэні да. Мися, гашкө, яя шыдыд нин оз пыр тэныд. Абу и аслад көр яйыд. Ми тай зэв чөскыда сөйим-а. Эня-пия.

— Пырө. Буретш пось и.

— А мыйнө кытчө лоин, доймалыштө шуан? Нөйтисны али мый? Коді?

— Камар воливлысьыд.

— Камарнад эськө тэ менө... эн дзерөд да!— чушсө лэдзліс Нира.

— Бергөді жө өд аслыс водзөссө. Өні дыр оз волю сэсся.

— А мед некор оз и волю!

— Мед,— нюмьөвтис на весиг Бияр.

Но пукавнысө ни бур пөт сөйнысө сійө эз и вермы. Доякылөмыс содіс на, ки пыдөс пасьтаясөн емаліс мышку пөлөньясас да лядвейясас, быттьөкө кынталіс сэтясті да бөр кутіс шонавны, сутшакяна чөсөдны вирыс локтөмысь. Ойзөданасө эськө некыт на эз доймы, да дугдывтөг пыксьөдіс.

— Гашкө, ме видзөдла да?— чуйдіс Нира.

— Мыйкө видзөдлан!

— А мый нө, тадзи и кутан йөжгылясьны? Водлы, пөрччысьлы да. Ог вомдзав. Гашкө, чегөма кыткө?

— Чегис кө, важөн нин тупляси көнкө.

— А пыкталіс кө? Дундан сэтчө да он и вермы аски чечынытө? Вежнясян сэні!

— Но, водла,— сетчис Бияр кывйө. Унаыс кө вөлі Нира пыддиыс, дерт, эз нин сэтшөма и яндысь, дзеб чужъялөмсө, а Нира водзас коньөрнас петкөдчылөмсьыс кезйөдліс на сійөс. Но ковмис.

— Чужъялөмаөсь кө-а?— пыр и гөгөрвоис Нира, куштөдіс кымыньөн куйлысь Биярөс да.— Лөзөдалөма нин гөгөр, пыкталөма и. Водз эн висьтав-а!

— Мыйкө и сетіс водзджыкыд?

— А сетіс на, көдзыд ваа рузумөн кө вөлі зыралөма. Со тай кутшөм на топыд том вывгырыд, чепөльтнытө оз шед. Став

вир сёныд эз на пот. И кыскис эськө сукмөмсө. А өнi... он кö пывсян ломтыв?!

— Ме ог төд,— нурбыльтiс Бияр.

— Ме төдa!— тапкыштiс Нира мышкас да кыскыштiс бөр улыс дөрөм-гачсö, сэсся шебралiс на вылысас.— Куйлы, водöмыд кö! Кок йылад на Унаыдлы мөдöдa. Эськö аслым и кольöдi да,— серöктыштiс, кылö.

Куйлөмсьыс да шебрас улас шоналөмсьыс доякылөмыс Биярлөн лөнъыштiс, синсö весиг вермис кунълыны, но унмыс эз на волы. Узьö нисьö олö — сiдзикөн и кыскис кадсö. Гор саяс, аслас пельöсас, ноксис мыйкö Пилим, шыён кыскыштавлiс нырнас, да тайö тшöтш пуксис сылы сьөлөм вылас, аскидзыс, колөкö, и куйлас.

Но пырис ывласьыс Нира да чукөстiс:

— Лок пывсьöдa! Верман он чеччынытö?

— Верма.

— Сукмантö кышавлы дай. Карта сайын пывсяныс. Туйсö таялөмa. Мун да вод. Ме локта.

Пывсян кöджас, кöдзыдас пөрччысигөн, дояинъясыс Биярлөн бара ёнтышталiсны, ыштöкö йиторьяс на вылö öшыйлисны, и пыркöдчигмоз и пырис сийö пывсянас, öдъя пемыдас. Öкмөм тшынсьыс пешаыс шыр биён нин öзйис, тайкö кусас. Кималаснас корсис бердсьыс тшын кыскöдсö да перйис тупкөд тувсö. Сiдз нин сотана онялiс горяньыс, а Нираыс кутöмa на öдсö, мед төдчылас, буракö.

Со и ачыс, кылö, локтiс, кышöдчыштiс кöджас да юалис:

— Водiн эн на?

— Эг на.

— А мый нö вöчан?

— Тшынсö вöтла.

— Эн öмöй восьты тупкөдсö? Сийöс эн гөгөрво?

— Восьтi.

— Восьтiн кö, и вод сэсся. Вылыс джоджас. Кымыньөн.

Ме пыра.

— Пыр.

Кывзан да, быттö дузъялөмөн и сёрнитö Нираыс, некор оз овлы бурнас ни мелiнас, а ньöти оз и кыв сысянь дöзмöмыс да öгдортöмыс. Та вöсна он и вермы сы вылö лөгасьнытö.

Тапкөдiс и зыралiс сийö Биярöс, содтöд вылас корöсьөн на швачкөдiс, сэсся бергöдчыны тшöктiс.

— Водзтө өд ачым верма,— шуис Бияр.

— Мый эськө он вермы да.

— А видзөднысö тэныд ме вылө?

— Быдтор ог аддзы дай. Ланьт!

Дөрөм мыг кежсьыс вөлі Нираыс, да пöсялөмсьыс и васьыс котасьөмсьыс дөрөм мыгйыс гөгөрыс нин сибдалөма сы вылө, дэльөдана и төдчөдө мыгөрсө, а кияснас да пельпомъяснас вөрөдөмысь и лыбыштало на вочасөн, лядвөйяссө тыдөдө. Нетшыштлас эськө увланыс бөждорсө да оз өд сулав сэссия вөрзбывтөг: то васө лөданнас гумовтас, то корөсьсө лэптылас. А Биярлы, мый сылы куйлынытө да нөшта осьса синнад?¹ Кылө и кылө, кыдзикөн зэлалө мышку кузялаыс, визмунлө став вөйыс¹.

— Пуксьы, кунваала юртө.

Пуксис Бияр да лэдзис кокъяссө улыс джоджас, инмыліс пидзөснас Нираыслы кык пидзөс костас, и нюжавліс кыис каньлөн водз кокыс моз.

— Кыськө тай эм!— чушкөдчыліс Нираыс.— Сөмын на вишкө вөлі, а маласьө нин.

— Ачылд өд бурдөдін,— вочавидзис Бияр.

— А полөмыд?

— Кодысь?

— Унасьыд. Төдлас кө?

— Мыйөн?

— Көдзалан сы дінө да. Менө кутан син водзад уськөдлыны. Мед сөмын шедлө нө? Муні и вуні?

— Шедлөм пондаылд кө! Эг и матө пукты тэнө.

— Мый понда нө?

— Вөйтөлөн тай быттьө кыскө.

— Кыті?— нерыштіс Нира.

— Сьөлөмөс и быдлаті.

— Сьөп ань дінас?

— А мый нө, абу веж петана? Мывкыдтөм да? Гашкө, Енмыслөн сетөмөн и лоан меным.

— А ёрас кө Енмыд, ыстысян сы вылө-а?

— Оз таысьтө.

— Вай огө ворсөдчөй.

— Огө и ворсөдчөй!— итылясис Бияр да сывъяліс Нираос кос гөгөрыс, топөдіс асланыс.

¹ Вөй — нерв.

— Ог кө эськө сетчы, сы мында на и босътан менö да.
— А лёкысь нö ме?
— Да кыськө тай усин ме шөрö!— нормис Нира да ачыс тшöтш сывъялис Биярöс сзылі гөгöрыс.

Аскинас, югдандорыс, Бияр вöрзис гортас. Кольбöдигас Нира юалис сылысь:

— Сэссия кор волан?
— Ог регыдöн.
— Но мед, бырасджык гажöй.

Шойччöдöм бöрад да гортланьыд нырнад вöлыс эз и нрöжмöдлы, зияпырысь тувччаліс аслас южмыштöм туйöд. Йöра вольнас тубрасьбöмөн Бияр доддяс и гургис кузяла, видзöдаліс водзисьыс, абу-ö бара волöмаöсь йöграыс, дзу-гöмаöсь кыткö Эжва вывсьыс лымсö.

Виöм йöграсö ловйөн кольöмыс сьöрсьыс и нуöма, бер-гöдчылöма дадювнас да. Воддзаясьсö пазöдалöм лымйыс и тыдаліс Эжва вылас. Но öд кöнкö мöдлаын на, кутшöмкö чукуль сайын, вермисны виччысьны йöграыс, ю вылас пентавлытöг. Воан весьтасаныс, и уськöдчасны, босътасны кытшö да шойтö и вöчасны. И вöлыс, и няньыс налы веськалас. Вöвсö, дерт, сэнi и тотшкасны пöсь вирсö юыштны долыд выланыс.

Чукуль йивланьыс матысмигөн Бияр кежöдіс вöвсö ылöджык, веськöдліс Эжва мöдарланьыс, мед удитны сувтны лызь вылас да воöдчыны вөрöдзыс, кытысь йöграыслы куттöм нин сійöс лоö: сук вöрад öд дадювнад он жö пыр. А вöлыс мегыр увтіыс и видзöдлывліс син пöвнас да тшамöсасьліс гөгөрвотöм кежöдöмсьыс, чорыда горöдöмысь и кывзысьліс. Шысö сетлöмысь Бияр ёнасö эз и видзчысь, сы вöсна мый лöсьбöдчисны кө нин йöграыс, син уланыс и кутöны ю вывсö.

Но, ен ськöдөн, йöграыс некысь эз мыччысьлы и выльысь волöмыс налөн некысь эз тыдавлы. Öтилаті йöраяс вöлөм во-мöналöмаöсь Эжвасö, лёддзён лэпталöмаöсь лымсö, да сзысь и повзыльіс Бияр.

Вой шөр гөгöрыс, лёкмöм водзын гөнсялöм öтка тöлысь улын, лючки воис гортас.

Войнас Бияр и ректысис, эз виччысь асывсö. Кык сепыс идсыйд Унаыс быдөн чуймыліс, индынысö весиг эз сяммы, кытчö и идравны воча чомъяс. Но Бияр пыр и öлöдіс сійöс, мед оз кальöг вомась, ошійысь кодкö водзын.

— Эн öд гусяв?— повзыйліс Унаыс.

— Эг.

— Мырддин нö кодлыськö?

— Эг.

— А кытысь нö?

— Пама сетіс.

— Мый вылö?

— Водзö вылö. Быдсяма кöрта колансö дорны.

— Абусыс?

— Ваясны на кöрт изсö. Оз нин ков аслым ветлыны.

— А мыйысь нö, сідзтöкö, полан?

— Нинöмысь ог. Этшаджык вежаласны!— крапкис Бияр.

— Мед эськö и вежаласны!— вочааліс Уна.— Йöгряяс

тай волісны да...

— Кор волісны?

— Тöрыг. Гашкö, дасөн.

— Лёкысьöн?

— Эз, бурөн. Вежласны. Кыстö и, пажкутö и, кöр вольтö и, кыйдöс кутö и — мый сöмын оз вöзйыны. А мый вылö ме вежа? Вурунды ни, дöраыд ни, вый тупылыыд ни... Оз нö вежыд пет?

— Эны, овмöдчылам на. А сёрнисö эз лэдзлыны?— юаліс Бияр.

— Кутшöм сёрни?

— Мый виöмаöсь кодöскö на пиысь.

— Ме эг кывлы. А мый нö, тэ виин?

— Ог öд ассьым юрöс сет!

— А мед чужийн дай! Сэсся видзчысь öні наысь!— лöвтыштіс Уна.

— Мед воласны лёкысьнад!

— А войнас кö локтасны? Огö и тöдлöй?

— Со, öдйö увтыштас,— индыліс Бияр Тутö вылас.— Ачыд эн больгы некодлы-а.

— Сідзи на сьöлöмыд потас. Он и лысьтлы унмовсьлы-нытö войнас.

— А мед оз на пот дай. Ланьт, эн никсы!

Чеврасян и коли Унаыс, а Бияр нуöдіс вöвсö Кекур ордас.

Ыштөкө ээ кывны сылысь зымгөмөн нин игөдчөмсө, ни асла-
ныс кыкнан понйыслысь чепсасьөмөн увтөмсө, дыр ээ шыась-
лыны Кекур ордсаыс, посводзас ээ петавны ни, сэтшөма, ты-
далө, повзисны войся ветлыссьыд. А Биярлы аслыс юрас ээ
жө волы, мый весьөпөртны и вермис куш йиркөдчөмнас. Мыйөн
тай шыасис ачыс, горөдiс: “Петалөй кодкө!” — пыр и петiс
Кекурыс, вылыс паськөма нин и.

— Мый нө повзөдчан?

— Вөвтө вайи.

— А воин нө нин?

— Вои.

— А регыд и ветлiн да?

— Регыд.

— А көрт изтө? Вайин?

— Эг на.

— А мыйөн нө вештысян вөвсьыд?

— Мыйөн шулiн. Дора на ме тэныд чертө да ытшкысянтө.

— Мыйысь? Сөйысь али пуысь?

— Ваясны. Пама ачыс көйысис.

— Сэтшөма нин лэптө тэнө?

— А мый озыс?

— Сэсся баярө татчө пуктас?

— Гашкө, — ыкшаасьыштiс Бияр.

— Но, мун гортад, — дзугыльтчылис Кекур.

— Энлы, лэдзала вөвтө да.

— Ачым лэдзала.

Но Биярлөн ээ на мунсьы, сылы колiс кызкө сөрнитө-
дыштны Кекурсө, юасьыштны сылысь өттор-мөдтор, да мед
эськө ээ и гөгөрволы Кекурыс, кутшөм мөгөн юасьөсө.

— А зэв на и бура ветлiс вөлыд, некыгчө ээ сувтлы. Йөгра-
лы нин, шуан, видзан-а, — вөрзбылис нин быттө Бияр да бер-
гөдчис на.

— Ветлө на эськө да. Оз нин тырсяв.

— Сидзтөкө, дерт. А волөмаось пө тай йөграыс. Гөтыр вись-
талiс.

— Волiсны.

— Көнкө нө матын сулалөны?

— Кодi кытөн. Ас котырнас. Этша нө Эжва пөлөныс ягыс?

— А кутшөмкө тай Сюдөос висьталөны, он төд?

— Төда. Оксы туйөыс налөн.

— А сийө нө кытөн сулалө?

— Сыктыв усянінас.
 — Ылын нө тасянь?
 — Лун-мөд пө тай көрнад. А мый нө, кутшөм мог суис? —
 юалис Кекур да доровтчыліс быдөн.
 — Ветлыны кө, мися, — скөрмөдчыліс Бияр.
 — Мыйла?
 — Вежласьны. Вөчала көрта колансө да.
 — Меным тай юөр ыстөма жө, — лигышмунліс Кекур.
 — Коді?
 — Сюдөбс. Ныв сылөн быдмө, да Шай сайө сетө.
 — Босьтөй дай.
 — Босьтан кытчөкө, сідз нин йөгра вирсьыс он мын-а. Эн
 серав!

— Ог, муна.

Абу на водөма вөлі Унаыс, кор локтіс Бияр гортас. Пук-
 сьөма джек вылө өгралысь гор дорас да куткырвидзө, малыш-
 талө ки пөвнас дінас куйлысь Тутөсө. А Тутөбс шы эз сет-
 лы, ывласяньыс кок шы сертиыс на, буракө, төдіс, коді локтө.

Унасө өнтая чирьштөмысь на эз көдзав Бияр, а бара и
 скөрмис сэтчө, эз вермы чувшьявтөгыс шуны:

— Мый нө понсө тшыкөдан?

— Йөйыд тай эм! — вомалис Уна.

— Сылөн аслас пасьыс вылысас. Абу нин кычан. Мед вош-
 тылас ныриссө!

— Мыйысь? Вердышти, да сыысь? Эг өд көк аканьөн.

— Керка шоныдсьыс. Оз и уляв со нырыс.

— Аслад мед оз уляв. Абу нин мортлөн сёрниыд.

— Маласян сәні, пуксьөмыд да.

— Кодөскө өд ог малав сәсся.

Таысь и тшөкмунис Бияр. Дзөрнясьыштіс тыртөм синмөн
 да пөрчысьны кутіс ньөжйөникөн, быттьөкө кыйны мыйкө
 ветліс да мудзсө сөмын и вайис. Разис кывзысьтөм кияснас
 тасмасө да перйис юр вывтөбс лазсө, пыркөдчөмөн уськөдіс
 ной сукмансө. Воча кывйыс Унаыслөн гыжнаөн и кыліс кытөнкө
 сьылі улас, морөс пыдіас, да водзөс шуөм пыддиыс и
 мөвпыштіс, мый некор оз и усьлы сьылы мусаад, бурджык понтө
 малалас верөстө дорысь. Та туйөд Нираыс кык чукыль во-
 дзын сы серти, сёрни вылас сөмын и сутшакасяна, а збыль вылас
 онялө мелінас. Абу и колөма, гашкө, нуөдны Югдінсьыс.

— Эг кө эськө нуөд сьөрысь...

— Нуөдін тай... мыйлакө...

— Гөтыр вылө!— горөдіс Бияр.
 — Со, кынөмыд кө сюмалө. Вөралан гачыд и. Виль дөмаса.
 — Мый тэ горт олөмтө висьталан?
 — А мый нө, вожасьлөмтө колө? Сытөг олан? Гөтыр и эм, сэсса нинөм!— дөжныштис Уна.
 — Оз на тырмы тай.
 — Оз и тырмы. Аддзылан нө коркө нюмтө? Шондіыс унджыкысь петавлө, төв шөр локтө-а.
 — Эз өд гажөй быр... быд лунтө нюмъявнытө...
 — А тэнад оз и бырлы мейсь. Эм-ө, абу-ө.
 — Эм да, сійөн и оз.
 — Кула, инө, он-ө ойгышт?!
 — Ланьт, кучкысян,— ырыштчыліс Бияр.
 — Кучкы. Мустөмыдлы өд сы мында и доньс.
 — Мустөмас тэ ачыд пуксян. Шобрөдлө нин коньөрөс.

Ог төд, мый корсян тадзтө-а.

— Тэнө и корся.
 — Вошлася нө ме?
 — Вошласьөм оз ков.
 — А мый сэсса ниртан морөстө?
 — Быгь өд. Синнад аддзан, а сьөлөмнад он. Муса нө ме тэныд? Шу өтчыд.
 — Муслуныд водзөса жө.
 — Кытөн нө водзөсыд?
 — Кытөн аслад!
 — Ме тэ бөрся вөтчи, лолөн-юрөн пудъяси,— тшын курыдысь моз мышкырөн и чеччис Уна джек вывсьыс да койтов-кайтов муніс вольпась дінас, уськөдчис сэтчө кымыньөн да пондіс сыркъявны ымөставлөмөн.

Вөлісь шымыртис Биярөс ойгөмыс, лигыштөдіс йиджтысян сьөкыдөн. Гор дорас, джек вылас и пуксис да вежис ыштөкө Унасө, ачыс пондіс малавны Тутөсө. Мед эськө лолыд сувтавлө, сэтшөма кыскө нылыд дінө, сэк, гашкө, и гөтрасьөм бөрад на биваыд кодь колана и лоө сійө, сьөлөмыдлы би перьяна. А Унаыс сылы син улас на сөмын и усьліс водзсө, веж петьштана. Мукөд нылыс эськө и син улад оз усьлы, аддзан и он аддзы быгтьө, да та серти кө, абу и өтисор Унаыс ковтөмыскөд. Но өд мусаавнытө, кагаөс моз моздорад босьтлынытө оз жө тай ышөд. Гөтырө сөмын и пуктан, ньөти он вылөджык. Аслыс тай Унасянныс помся лөгасьөмыс инмө, да сійө-а. Мыйлакө өд вөтчис сы бөрся код төдас кытчөсө,

нинөмөн эз артась, локтіс и пуксис пыжас. Эз кө нө сідзикөн на, кыв шулыгөгьыс, мусаав ас кежас, эновтіс нө эськө Югдінсө сыкөд тшөтшсө? Одій на бергөдчис эськө кывйыс огтө шуны. Сійөн оз и тырмы өні сылы меліыс ни водзө вылө лачаыс. А Бияр чорыдасьө на сыкөд, гөтыр туйө сөмын и видзө, садьсө оз төд.

Дерт, аслыс Биярлы вичмө жө уджыс и мудзыс, дугдывтөг асьсө туртөмыс, став шөгсө и курыдсө сьолөм вылас босьтөмыс, а сэтчө на и юрнас ковмылө пудьясьны, и нинөмлы помыс оз и воы, кыгчөдз ловья. И он лок да норась Унаыслы, кокньөд асьтө сідзикөн сылөн ойгөм улө. Дай абу и мича норасьнытө, вермытөм улад сетчынытө.

Сы вылө и эм сійө, мед тасмаыс некор эз личавлы, гортас сөмын и разьліс. Эз на тай и эштыв шоныд гор дорас тадзи пукавнысө да понсө малавнысө. Кысь сәсся сылы небыдлуныс да мелуныс? Позьө и Унаыслы гөгөрвоыштны сійөс да вьлөджык пуктыны чорыдасьөмсө сылысь, а оз матө пөрийө. Чорыдасьлө кө, оз на сы понда, мый лөгьыс петө сы вылө.

Понсө Бияр эз кольөд воча чомьяс, осьтис өдзөссө да шыгьөдіс ывлаө. Тутөыс ләпгыліс сы вылө векньөдөм синьяссө да вурзыштіс дөзмөмысла, сөмын на пө малалін, а вөтлан нин, сәсся лөгасьөмпырысь и петіс. Таысь Биярөс бара и дзугыльтөдліс: со и понсө нин лои лөгасьөдөма ас вылас. А эськө кызди колө, сідзи на и вөчис. Но и мед велөдчөны овнысө, мый Унаыс, мый Тутөыс. Некодлы мед оз и овлы кокньөдчан личыс, аслыс тай сылы оз жө овлы.

Унаыс оз на вөлі узь, кор Бияр, сөйыштіс да, тшөтш водіс сыкөд орччөн. Көсийыліс тапкыштны сылы, оз нин быгтьө сәтшөма скөрав, да эз и лыбав кыыс. Кутьыштіс лов шысө да лэдзис шуигмозыс:

— Аски меным сюра пуан. Чирсан идсө да.

— Дыр кежлө мунан?

— Дыр кежлө.

— Кыгчө?

— Вөрө кыгчөкө. Норт вөча да.

— Йөзыс петөны нин вөрсьыд.

— Коді?

— Адаc. Петны пө лои. Понийө пө оз нин подйылымьяс.

— А ме ог и босьт понтө.

— Мый нө тэн понтөгьыс шедас?

— Мый шедас, сійө и шедас.
 — Йойтав, — нурбыльтіс Уна.
 — Йойтавны и лоө. Дырджык ог лок да.
 — Мыйла?
 — Оз-ө гажой быр.
 — Кодысь?
 — Тэысь, — тапкыштіс Бияр.
 — Узь, водін кө.
 — Эны, унмовся да. Он жө сибөдлы-а.
 — Сибөдлан кызкө тэнө.
 — Сідзи жө.
 — Дугды, дугды, — пескылясьыштіс Уна, но эз лёкысь.
 — Сэссия и дугды, — куштөдіс сійөс Бияр. И веськаліс
 бөрыннас налькйө моз.

Чеччис Унаыс чышкысьны рузумөн да дыркодь мыйлакө эз вод бөрсө. Кыргыштіс на, кылө. И юаліс, быттьөкө пөрдлісны сійөс нем виччысьтөг:

— Кизьөр тай нө?
 — Мый?
 — Лызыд. Сук овлө-а.
 — И ме мыжа?
 — А коді нө?
 — Эн сөр!
 — Ачылд эн-а. Узин Ниравскөд?
 — Узи тэныд! Сылөн пиыс нин мый ыджа.
 — Пиыд и кутас съөд войнад.
 — А сы дінө Камар вольвлө! — ковмис ыстысьны Бияр-лы. — Лөсьөдас сэтчө мөдөс, садьсө воштас!
 — А мыйла нө эськө кизьөр? — ыдьясис на Уна.
 — Эз нө меным шедлы мудзыс да дойыс? Ставсө кө висьтавны? Со, колөкө, лөзыс! — чеччис Бияр да лэптіс улыс дөрөмсө, сувтіс гор водзас, кытысь бура на кучкис югыдыс.
 — Кымынлати! — нюркнитіс Уна да өвсис кывсө кыйөмысь.

Эжваыслысь ыджыд чукыльсө ордйөдөм могысь гортсыыс Бияр Куа ты йывланыс и веськөдчис. Ачыс лызя, нортыс бөрвылас, лымгяс весьтысь на джуджыда войласиг, нбөжйөник-вылысь и петіс ылі туяс. Мед этшаджык шедас мудзыс да дырджык оз лешмы, эз и чөвтав лызьяссө водзысь водзө, а йөткыліс сувтсөнпырысь, муртсаник кок кусыньон, да отсөг вылас, нортсө кыскынысө, вешталіс пельпомьяссө, ыштөкө сы-

нышталис. Койбедьсö, водзпöрсö киас и босьтлис да, ковтöмысла пуктис нортъяс, суйыштис көртöд улас.

Тадзикöн, весьтасавлöмөн, и чайтис Бияр дженьдöдавны туйсö, Эжва вылас этшаджыкысь петавлöмөн, вомынысь да вомыно сöмын. Но Куа ты йывсянныс Эжваланыс вөрöдыс писькöдчитöн на и гөгөрвоис, мый бурджык на ю вылас петны, паськыда осьсаинас: зэв эськö лызя, да улöдзыс небыд вöрса лымийыс оз и лыбöд ёна, пидзöсöдзыс войтöдö, дай нортсö на пурмöдö. Асьтö пöрийöдлөм и артмö: мыйдакö дженьдöдан туйтö, а куим сы мында рудзалан.

Дерт, Эжва вывсьыд, он кө и кежавлы некытчö да кузяла кө лызь туйтö колян, кокныда жö и йöзöдан асьтö. Сидзи на вермасны адззывны кысянью йöграыс ли туавны бöрсяныс, саран али кодi пö мунöма да мый корсьö тась, миянладорсьыс. И öдийö вöтöдасны көра дадювъяснас. И код төдас, мый вöчасны, он кө удит саймовтчыны вöрас. Вермас лоны, мый сийö йöгра котырыслы и веськалас, кодъяс пиысь виис öтикöс. Да и мукод котырыслы нин, төдöмысь, кывсис виöмыд.

Некоднан ногыс эз вöв Биярлы сьöлөм сертигыс: ни дзесьясьöмнас муннысö, сöмын кытиястикö Эжва вылас петавлöмөн, ни ю кузялаыс нортнас кысысьнысö. Но артыштис, мый дзесьясьöмнад, гашкö, лунсö унаöс воштас и асьсö на кок йывсьыс уськöдас, да сетчис дзерöдан повтöмыслы, Эжва кузяыс и шуис кайнысö. Абу öд синтöм ни пельтöм, уськöдчасны кө кытысянью йöграыс ли вöтöдны кутасны, кытшад налы оз на шедöдчы, а морт кык-куимыдкöд и сидзи на водзсаяс: ньöввужсö и шыпуртсö босьтöма жö сылөн, сöмын перйы нортсьыс.

Дадювъяснас йöграыс йи сувтöмсянныс нин ветывлöмаöсь Эжва вывтйыс, и кымын водзö катыдланыс, сымын уналатi. И быд пöрийö выльлатi, пазöдтöм лымийöдыс, быттьöкö абу лысьтлöмаöсь коркөся туйöдыс, весигтö, гашкö, асласöдыс. Дерт, көръясыд абу вöлыд сьöктаöсь, дай нель чуня-гыжъя кокаöсь, лымийыд найöс кутöджык, но öд и налы мудзыд сюрö, вöтлыны кө öдийöджык. А мыйлакö таялөм юж туйыс некөн оз и тыдавлы.

Вөлөмкö, көръяс бöрас кольөм чальпасыс чорыда кынмалöма кодзыдсьыс да зэв на и дözмöдö выльысьтö сэтi мунигөн, лютки-летки и артмö мунöмыд, быттьöкö вутшкöсинтi. И көръяссö, төдöмысь, конийöдлö воддза чальпасыс. Та вылө и сувтис Бияр вежөрнас да ачыс кежис жö вөрзёдытöм лым

вылас. Пыр эськө и вöйласьныджык кутіс, но и довкъявнысö дугдіс став вывтырнас.

Кöні-мый сулалöны йöграыс, сійö эз на казявлы, кык чомкост нин, гашкö, кайис да Эжва кузяыс. И матыс ягсö, мед пожöма вөр дзйбйөн көнкö кыпаліс, эз жö адззыв. А көр помсыд олiгад вывтiтö он бöрiйiсь, джуджыдджык кыр йылö и сувт, абу кө юсяныс ылын и, көрыдлысь на лоö и кывзысьны, ялаа ягö чомъясьныгтö, медтыкö и вөр пыдіас. Мыйöн тай тыдовтчис веськыдывывсьыс öшалан локöбъяса лыа бужöдыс да сэтчö петысь пашкыр пожöмъяса ягыс, пыр и усис синмас лöz чыкылясөн кайысь тшын сюръяыс.

Сыысь нин бур вöлі Биярлы, мый орччөн ни костöнсö эз сэсся тыдав тшыныс. Унаöсь ли этшаöнöсь, а öти чомйö на, буракö, төрисны сэтөн йöгра котырыс. И некод эз вуджрась бужöд йылас, морт ни пон. Сöмын кырныш кыпöдчыліс яг весьтас да гöгралыштiс тшын сюръя гöгöрыс, и бөр лэччис кокасьнысö ли виччысьлынысö, оз-ö мыйкö вичмы сылы яя сёян мыльöссыйс.

Мöд пöрйö кө, Бияр, гашкö, пыдди эз и пукты кырнышсö, а öні, туядтö регыд на петöм мысти, чезыртчыломөн мөвпыштiс, мый, гашкö, эз и бур водзын петкöдчыв кырнышыс, нöшта нин йöгра оланiнсьыс. Та вöсна и жежöдчис Эжва мöдарланыс да öдйöпырысьөн ордйöдіс бужöдсö, и то на бергöдчывліс, оз-ö вöтöдны. Вылі чукыльöдзыс, кытчöдз эз саяв лыа бужöдыс, эз и нбöжмöдлы ловсö веськöдны.

Квайг кымын чомкост, ылöсас кө, муніс сійö рöмдан веркыдöдзыс. Видзöдліс нин, кытөн эськö войковтнысö, би перйивны пуксьынысö да, и сэки мыйкö сьöд вöран усис син улас. Ёль нисьö ю петіс Эжваас, да сэтысь, вомдорсьыс вылысьджык. Водзпöрсö санөн и чайтiс сьöдысла да ляпкыдысла, а вöломкö, морт сэтөн вöрласьö, улöдз копырөн керасьö.

Эз и кывлы ни казявлы сійö Биярлысь матыстчöмсö, мышку саяс нин и сувтiс да. Майöгъясөн да лыскөн дöмыштöма ёльсö джыныыс кымын, джуджыдладортiыс, гымга вöйтöма кывтан чериыслы, и тiтшкис-кераліс йисö, мед лэпгывны гымгасö. Буракö, некымын лун нин абу видлöма, пемыдлöz чорыдöдз кынмöма йиыс гымга весьтас.

— Отсала,— шуис Бияр, медтыкö оз сэтшöма повззы йöграыс. Кукыля сöвика да кузь төбöка вöлі сійö, да сідзи нин, чужöмсö петкöдлытöг, висьталіс, кодi сэтшöмыс.

Но виччысьтöмысла да нöшта коминад шыасьöмысла пес-

кыльмуніс йӱграыс да пӱрис ӱтар ки вылас, быттьӱ баялбӱжас и тышкисны. Сӱмын вомыс калькавліс да син потасъясыс пась-кавлісны, и гырысь тусьӱн петіс синваыс.

— Чеччы, эн пов,— такӱдіс Бияр.— Коминас кужан?

— Кужа. А он нӱ ви?

— Ог.

— А мый нӱ ветлӱдлан?

— Сідзи, вӱралан могӱн.

— А таті ӱд абу нин комиыдлӱн.

— Мед, вӱрыс ӱд паськыд. Чеччы ли вешійыв.

— Мыйла?

— Отсала гымгатӱ лӱптывны.

Йӱгра вуджис бауӱн дӱмӱд саяс да вӱлись сувтіс кокъяс йылас, кутіс видзӱдны няргана, быттьӱкӱ ичӱт на. Кизьӱри-ник тошка да тшӱтшамӱс ныр-вома, арлыднас сійӱ эз и вӱв ӱна ыджыд Биярысь, ньӱти на чукуртӱм, но вывтырнас пель-помӱдзыс на, гашкӱ, эз ло сылы, да верстьӱ водзын мыжа зонка моз и кутіс асьсӱ, нӱйтӱм виччысис.

Бияр мездысис лызьсьыс да перійис тасма козьянсьыс черсӱ, гӱгыльӱн, гымгаыслы тӱрмӱмӱн, кералис йисӱ, и лӱптіс гым-гасӱ. Сьӱкыдысла ковмис весиг таджикасьлыны, шӱтӱма чериыс да, пурт кузя комыс да налимыс. Но пӱдӱм сора небзьӱм чери кӱрыс пыр и кучкис нырас, зывӱк быдӱн лои.

— Колӱкӱ, ачыд ректы.

— Ректа,— вочавидзис йӱгра да восьтіс гымга бӱрсӱ. Ловьяыс и нильзьӱм чериыс путкыльмуніс лым гуранас.

Татшӱмторійис эськӱ и комиыслӱн овлӱ. Дышысла ли мый-лакӱ дырджык оз видлы кулӱмтӱ ли гымгатӱ да тшыкӱдӱ шедӱм черисӱ. Но ӱд оз и босът гортас, ни васӱ оз пежав, шыблав бӱр сэтчӱ, а муас кытчӱкӱ идралӱ, сӱйӱны мед, кодлы сюрӱ, шырыс и кырнышыс. А йӱгралы аслыс на коліс нильзьӱм чериыс, ловьясӱ бӱрйӱм пыдди ставсӱ сӱвтис кучик сепысас.

— Сӱян нӱ тшыкӱмсӱ?— кезійӱдліс Биярӱс.

— Ог.

— А сӱвтін да?

— Мед. Кӱръясӱс верда,— висъталис йӱгра.

— Найӱ нӱ сӱйӱны?

— Лысӱ он аддзыв.

— Эн сӱр.

— Ог и сӱр. Ачыд нӱ он йирлы нин сӱйтӱ? Оз сэтшӱма ковлы?

— Ковлө, кор оз мыйкө тырмы вир-яйыдлы.
 — Налөн өд вир-яй жө. Уна-ө пөтөс ялаыдлөн?
 — Но, гөгөрвои,— кывийө сетчис Бияр.
 — А кытчө нө өні?
 — Узьны кытчөкө.
 — Узь, төран өд. Ми кыкөнөсь и эмось гозья. Юртө ого на кералөй!— лыбзис йөгра.
 — Блын чомийд?
 — Абу, эстөн ягас. Кайыштан да.
 — Гашкө и... Бвлаад дорысь,— шуис Бияр. Торья сийөс эз и кыскы йөгра ордас, сыысь на полис, мед эськө оз то-йөссы, но ыштіс чайтөмысла, мый, гашкө, содтөд на мыйкө төдмалас аслыс коланасө, кор воасны кузджык сөрниас.
 Чомийс йөгралөн ичөтик и вөлі, сыв кык кузя зіб кутанъ-ясысь, дай сийөс на кышөма вушъялөм гөна важ көр куясөн. Чизыр төвсыд да лым пырзьөмсыд сөмын и сайөдыштас, а шоныдтө дыр оз видз, биыд ваймөмыдкөд тшөтш и кодзалас. Но кызкө тай олоны, буракө, гозья.
 Яг пасьталаыс, кытчөдз тыдаліс гежөд пожөмьяс костөдыс, лымийс некөн эз вөв пузувттөмыс, быдлаті нин кодйысьлө-маөсь көрьясыс, корсьөмаөсь яласө. Но асьныс некытысь эз тыдавы.
 — Көнөсь нө көрьясыд?— юалис Бияр.
 — Водзынөсь.
 — Сідзи и ветлоны? Оз разөдчавны?
 — Оз. Поньясөй өд сэтөнөсь.
 — А уна көрыд?
 — Кытысь унаыс? Дас сизим. Овны и тырмыштө. Сөмын на витөс нуисны и.
 — Кодікө?
 — Сюдөсянь волісны. Ті нө оно вештөй мынтө?
 — Вештам.
 — А вайөдла көрьясө?— чуйдіс йөгра.
 — Мыйла?
 — Видзөдлан, кызди сөйөны черитө.
 — Пемдан. Мудзөмыд и,— өлөдіс Бияр.
 — Ог өд ачим ветлы. Кисьта лым вылас, и өдийө кыласны иссө да докталасны. Со, колөкө!
 — Эн, оз ков.
 Но йөгра эз нин кывзысь сылысь, кыкис мыйдакө водзө-джык чери тыра сепыссө да путкыльтіс лым вылас. Сэсся бөр

кутіс пуктавыны сепысас вьльӧнджык шедӧм черисӧ, а нильзӧмсӧ шыблавны ас гӧгӧрыс. Тӧлыс некысянь эз ыркӧдлы, йӧвва гудыра нин сулаліс сынӧдыс, и сулалан сынӧдас на здук-мӧдӧн и воис Биярӧдз мустӧм исыс. Регыд и кӧръясыс, буракӧ, кылісны, пондісны петкӧдчавны яг пыдісьыс, сувтавлӧмӧн матыстчавны. Кык пон, пемыдруд лезь гӧнаось, тшӧтшыд пеляось да лэдзӧм бӧжаось, санъяс кодьӧс и эмось, тшӧтш собисны кӧръяс бӧрсяыс. Мыйӧн казялісны найӧ Биярӧс, уськӧдчисны кыккокйив да пановтісны кӧръяссӧ, кутісны увтны ӧтарӧ да мӧдарӧ: кӧръяс вылас и Бияр вылӧ. Ырыштчавлӧмӧн и чужъялӧмӧн на йӧгра ланьтӧдіс понъяссӧ, но кӧръясыс эз на лысьтны локны шыблалӧм чери дінас, дувидзисны.

— Полӧны тэысь, — дӧжныштіс йӧгра. — Сувтлы чом саяс. Сэсянь видзӧдлы.

Чом сайсяньыс сэся и кыйкъялыштіс Бияр. И юрас сылы воис сэки, мый и ас олысь кӧрсӧ, кодъяс воливӧны Куа ты ягас, поэӧ ылӧдлыны тшыкӧм черинад, велӧг вылӧ кытчӧкӧ пуктыны да. Мыйӧнкӧ ӧд найӧ оз торъявны видзансьыс, ӧнджыка на, гашкӧ, номсасӧны тӧвнад, шыртӧ на лым увсьыс куталӧны.

Дышӧдіс Биярлы сулавны чом саяс да петкӧдчис сэтысь.

— Аддзылін? — долыда юаліс йӧгра.

— Аддзылі.

— А зумыш да?

— Мудзи.

— Но, лок пырам.

Гӧтырыс йӧгралӧн весьӧпӧрліс повзӧмысла, биас и уськӧдіс пусян дарсӧ, йӧршитчис чом бердланьыс, лимзалӧмӧн шуавны кутіс мыйкӧ ас ногыс, кытысь Бияр «саран» кыв сӧмын и велаліс. Сэтшӧма нин, тыдалӧ, пырӧма коньӧрлы комиссьыс полӧмыс.

— Эн пов, — такӧдіс Бияр. — Узя да бӧр муна. — И лэптіс бисьыс дарсӧ, мед оз сотчы. Таысь и мортъяммис йӧгра гӧтырыс, чеччис да босьтіс Бияр кивысь дарсӧ, пожъяліс кодзыд ваӧн, сэся курышталіс пӧртсьыс яя шыд кенсьӧ.

Ни улӧс, ни джек эз тыдав чомъяс, да пидзӧсчанясьны и кӧсйыліс Бияр, но йӧгра ордйӧдіс сійӧс:

— Энлы, пуксьӧда на.

Чомъяс пыран лапӧд дорас, ывлаас, чукӧртӧма вӧлі ягсьыс чукльӧсь кос пожӧм увсӧ, лун-мӧд тырмас ломтысьнысӧ, и йӧгра

пыртис моздорас увъяссö да пукталис тэчöмөн, а вылысас, небыд вылас, пуктис дöра эждö юрлöс. Ачыс пуксис бипур мöдaрас, кокъяссö ситан улас сюркнялöмөн.

Сыла и кöра эськö вöли яя шыдыс, мыччис Биярлы йöгра гöтырыс джуджыд пу бекарын да, но дзик дуб, он вермы юнытö, шома юмовөн ловгөнъсьыд бöр и горзбöдö. И пöв вылö вундалöм яйыс, со эськö ныр улас и руалö да, мустöм лои шыдсö видлöм бöрын.

— Совтöг нö оланныд? — каймöстис Бияр.

— Мый сыысь? — вочаалис йöгра.

— Оз öмöй нö колышт? Вом кöр вылад?

— Ковмас кö öд, кудзтö юыштин дай.

Бияр вешкыртчылис юрсö лэдзлöмөн, но нинöм нин эз шу, мед оз шöйöвошны йöгра гозъяыс. Абусö кытысь найö сылы босьтасны? Ичөтсянныд кö, мам йöвсянныд на, велöдасны няньтöг да совтöг овны, дерт, он и тöдлы ни кывлы сэссия колöмсö. Сийөн и шог абу йöгра гозъяыслөн нянныд да солыд понда.

— Оз пыр? — мыжаа юалис йöгра.

— Оз, совтöгыд.

— А кын яйыс?

— Ме ог тöд.

— Энлы, вайла.

Йöгра петалис чомсьыс да вайыс кын яй тшытш, шуялис пуртнас вöсна, вöзйис видлыны. Посни сia кöр яйыс вомас эськö и сылис Биярлөн, эз нин ков нятшкыны ёна, сöмын нылыштав, да нылыштöмсьыс и мыктöдлис. Чайтис, узяс кö йöгра ордас, ньöти оз и видз сюрасö, а со и ковмас, буракö, да унджык на öтнаслы дорысь. Гашкö, кыласаджык солаөн пуöм сюра сорнас дуб шыдыс да яйыс, но он öд гусьөн сөй йöгра гозъясьыс, морт кытырөн и налы лöö сетыштны. Ружтыштис, ыштöкö мудзöмсьыс, да петалис ывлаас, пыртис нортсьыс рузум ёкмьальсö, кытөн вöли сюраыс. Зэв на и лöсялис сийö кынöмыс пöттöдз кылöдны шыдсö да яйсö. И йöгра гозъяыс чöсмасисны, чепöльөн öктысисны ки пыдöссьыныс. Татшöм сөянсö, пыригöсь кос роксö, найö нэмнас на абу видлöмаось, но эз тай пискаасьны.

Пöтыштöм бöрас, би дiнас ойбырасигөн, Бияр виччысис, кор йöгра ачыс панас сёрнисö: öд, тöдöмысь, эз на сийö бурась лочки юасьтöгыд, кытчö да мыйла Биярлөн туйыс. Колöкö, полис на ас кежас, мый буртö он на босьт комиыдлысь, да

видзёдало нин тайо, оланін корсьо тулыс кежлас, вөралом вьлө
ыстысьо-а.

Виччысьомыс Биярлөн и вөрзьөдліс сэсса быттьо йограсо,
восьтөдіс сылысь вомсө:

— Вөралан могөн, шуан, а понтом да?

— Мый понсьыс джуджыд лымнад? Ас бөрсяид и кутас
ветлөдлыны. Да вомад видзөдны сөйгад.

— А коді нө увталас уртө ли мый ли?

— Некод. Дай оз и ков урыд,— шуис Бияр.

— Мый нө колө?

— Низь, шедө кө. Сійон и шөйта. Керка көсья лэпты-
ны...

— Кытчө?— пыр и юалис йогра.

— Овкөджө. Сэтөн ола да. А мыйөнкө өд вештысь йөзыд-
лы, кодос уджөдан. Лөсьыд тэныд, чомьяд велалөмыд да.

— А понтогыд и кыян низьтө?! Эн ылөдчы.

— Мед сюрлө кок туйыс!— ыкпашалис Бияр.

— Сэсса?

— Туяла сэсса. Низьыд абу тулан пуад кайнытө да пуав-
нытө. И дженьыд кока. Одиё на мудзас да вужля улө пырас.

— А сэтысь кызди?

— Вөтлан. Дыр-ө нө бедьтө перйыны?

— А сэсса? Кинад кутан?— нерыштана серөктіс йогра.

— Он. Ачыс шедө. Казьөн водзвыв гөгөртан да. Вуж-
лясө.

— Кутшөм казьөн?

— Везөд кодь. Шөртысь кыёма. Йөрмас сэтчө, и кучкин
юрас бедьнад. Куыс оз тшык ни. А понийыд кыті на курч-
час,— варовө сетчис Бияр, сы вөсна мый кидос вылас босьтіс
сьөрсьыс казьсө да эз и пов, корас кө йограыс петкөдлыны.

— А мый нө ю кузяыс ветлөдлан, он пыді вөрөдыс?

— Пырала на пыдіас. Бөр лөктігөн. А өні водзө на каты-
дас көсья ветлыны. Гашкө и, Сыктыв усянінөдзыс. Да он
лысьт-а. Шедан Сюдөдыды да... Сэтөн пө тай и сулалө.

— Сэтөн.

— А сылөн өд сө синмыс!

— Мортыс сө синма?— чуймис йогра.

— Куш асьсө ог и шу. Сы гөгөр на мыйдаөн гартчөны.

— Сідзтө кө, дерт.

— Чомсө сөос висьталөны-а.

— Коді висьталө?

— Миян, Овкөджсаыс.
 — Мед оз содтавны.
 — А этша нө?! Он кө соссы быгтгы? — дзерөдіс Бияр.
 — Дас өти кө-а.
 — Но, нинөм и корсьны меным сэгтысь. Кайыштла на вой-
 колөн и бергөдча. А то низь моз и шедан йөз муад локтөм-
 сьыд.
 — А таті өд йөз му жө нин тэныд. Абу нө? — кыйис
 кывсө йөгра.
 — Шулің нин өнтай, вадорад, — дольыштіс Бияр. — Эг
 тай и вомав сыысь. Удзөда нө ме тэнө кымынкө низьнад?
 Помтөм-дортөм тай вөрыс, кодлы абу дыш.
 — А он нө бара лок, шедыштас кө?
 — Гашкө.
 — А тэ бөрся и мукөдыс. И бара миянөс вөтланьыд, син-
 над онө кутөй аддзыны. Эз нө миян вөв Овкөджыд?
 — Тіян пө тай.
 — А татчө нин ныраөсь! Скөрман эськө да...
 — Ог. Скөрнад кө, тадзи ме тэкөд эг пукав. Бурөн локті,
 бурөн и муна.
 — А вод, локтө жө нин унмыд-а, — лигышмунліс йөгра. —
 Со этан шоныдджык.
 Но шоныдінсьыс и зывөктөдіс Биярөс, видзчысис тойөс-
 сьомсьыс да. Унаысь нин казьявліс сійө йөгра гозьяыслысь
 гырдызаяснас гыжъясьбөмсө.
 — Мый меным шоныдсьыс? — вочавидзис Бияр да гыөрөсь
 лапөд дорас и нюжөдчис, гартолөн вольсалөм көр вольяс вы-
 лас. — Абу өд өтпөлөса. — И тасмасө ни ягавөнсьө эз личөд,
 сөмын черсө перйис козьянсьыс да суйыштіс мусяньыс содтөд
 юрувт пыдди.
 — Шебрала, — шуис йөгра.
 — Эн, ньылөдан сідзтө, — өвтыштіс Бияр.
 Пукалігас унмыс матын нин и бергаліс, а водіс да, ылыс-
 мис кыгчөкө. Гашкө и, сы вөсна, мый вожаліс вежөрыс йөграсө
 донъялөмысь. Отарсяньыс кө, нинөмла быгтгы и пуктыны сійөс
 морт туяс, а мөдарсяньыс кө, олысь жө өд сійө му вылас.
 Тігысьбө, колөкө, сьөлөмыс, мед эськө оз вөтлыны коркө ре-
 гыдөн ягсьыс татысь. Аслыс со энөвтны ковмис Югдінсө, да
 оз нө и пет лөгыс рочыс вылө? И йөграыслөн петтөг оз ов
 коми вылас. А сідзи со и артмө, коді кодөс вермө, сылысь и
 мырддылө мусө.

Мыйкө сьод тыдаліс лым вылас, Эжва шөрас. Матоджык вотодзис Бияр эз и вермы тодмавны, мый сэтшөмыс. Ыркнитлысь төлыс лыбодліс да вотлыштис сылы паныдөн чукчи гөн, да вөлись гөгөрвоис, кытысь сэтчө сьодыс лои. И чуймис таысь: ачыс өмөй нө куліс чукчыис, лэбис-лэбис да усис? Кодлөнкө яй сөйысьлөн на, тодомысь, уджыс.

Сідзи и вөлөма. Низь тапикасьөма чукчи гөгөрыс гөна пыдөса дженъыдик кокъяснас, сьылісө чегтөдзис пурөма, а сәсся өти борд увсө, көя бердсө, гуранөн сөйөма, чигъяинсө. И пөт кынөмнас нин дышиника чеччалөма вөра кыркөтшланьыс, кок туйсьыс на өтдор кольөма небыд лым вылас визьөна нөптовьяс.

Ывла көдзыдсьыс йи чорыдөдз нин кынмөма вөлі чукчыис виөм бөрас. Коркө асья войнас на, буракө, кутөма низьыс сийөс репасьыс да абу судзөма өдийсө сьыліөдзис, и асьсө тшөтш лэбөдөма чукчыис, кытчөдз вермөма. Эжва шөрас сәсся и усьөмаөсь. И кынөмыс өшйытөдзис горшасьөма та бөрын низьыс, да и ылөдз, көнкө, эз и мун, дзесис кытчөкө да узьө. «Тужавлыны кө эськө!» — мөвпыштис Бияр да эз нин и өлөд асьсө манитчөмсьыс. Перйис нортсьыс койбедьсө да казьсө и вөрзис туюсьнысө. Нортсө Эжва шөрас и колис.

А низьыс кайөма кыркөтш йылас да этшаник и муныштөма, пырөма лыбөм вужъя кос коз улө, парьялөма писькөдчигас гылалөм кырсьсө да нитшсө. Дерт, кивтөг эз ов сийө Биярлысь локтөмсө да гөгөрыс ветлөдчөмсө, но ньөтчыд эз мычысьлы, эз и пов да, мый кыйны вермасны сәтысь.

Кор лои өшлөма казьсө косьмөм коз гөгөрыс, тупкөма низьыслы пышгян туйсө, Бияр босьтис койбедьсө да есьладор помнас сутшкыштис коз улас, а сәсся вөрөдөмөн суйыштис пыдөдзис. Одийө тай быйкмунис низьыс пыран розьөдыс да өтчыд и чеччыштис, гартчис казяс. Сәтысь и кыйис сийөс Бияр, кучкис юрас да койбедьнас, зырладор помнас.

Кань сьөкта, гашкө, вөлі низьыс, кузь гырка да сьылісьыс кыз туп юра, сьөдпемыд мыш выла да еджоват чута морөса, кынөм улөдзис судзан пашкыр бөжа. Он и убөлит кульнытө мичаысла. Но он өд кынты да сывды көнкө би водзын ли гортад вотөдзыд кыскав, медся на бур дась шоныдывьсьыс кульнытө. И Бияр перйис пуртсө да вожөдіс пытшкөсладорсяньыс бөр кокъяссө.

Низьсө кулигмоз и петис сийө кыркөтш йылас: воськовтас лызьнас да сувтлас, воськовтас да сувтлас. Оз и видзөд өнасө

водзвылас да кывзись, сы вылө асьсө и веськөдөма, медтыкө оз тшыкөд низь кусө. Отчыл тай чатөртлис юрсө, төвнырлысь шушкөм кодь кылис да. Вөлөмкө, таръяс, гашкө, сеөнөсь лэбөны Эжва саяс, кылдза пөлөнас, гарсө кокавны. Та вөсна эз и инө пукты бөрынджык кылөмсө, лымийсылысь шарскөмсө да «коо-коо» горөдлөмсө. Чайтис, пуксялисны таръясыс кызьясас да шарскөдчөны вожъяснас, котсалөны ас костаныс.

А воис кыркөтш йылас и аддзис: сылөн норт дорын көра дадула нин сулалө, Эжва кытыдыс нырөн. Йөгра гозъя, видзөднысө, мөдөдчөмаөсь кытчөкө, гашкө и, асланыс Сюдөдзис, да төдмавны и сувтөмаөсь, коді сэтшөмыс, нортаыс, ветлөдлө наладорын. Гөтырыс даддяс и куткырвидзис, а верөсыс чеччөма да көр вөтлан зіб йывнас тувкалө норт вылас көрталөм тубырө. А сәні Биярлөн шыпуртыс и ньөввужйыс, он нин шу мукөд коланасө.

Казялис, буракө, мый көртысь мыйкө эм тубыр пытшкас, инмылис зіб йывнас пөртъяс ли шыпуртас, и нөджьявны кутис кыркөтшланьыс, оз-ө кодкө мыгчась сэтөн. Мед оз усь сылы син улас, Бияр мышкыртчис коз поноль сайө, виччысьөдіс на асьсө сы вылө лачаөн, мый оз на, гашкө, ышты йөграыс гусясьнысө да нинөмла и петкөдчывнысө. Но веж петөмыс көрта колан вылад тойлис нин, тыдалө, йөграсө, да дзөрнясьтөг и сибөдчис норт дінас, кыскис пуртсө, муртса кө и вундіс көртөд көвсө.

— Вешъян он, вирөсь вом!— лыбөдчис да горөдіс Бияр, петис кыркөтш дорышас.

— Саран! Саран кум!¹— чирөстіс йөгра гөтырыс да көръяссө тшөтш весьөпөртис. Кыккокийыв и нетшыштчисны найө да бура ылө шердийөдісны йөгра гөтырсө, кытчөдз сийө эз уськөдчы дадьсыс да веськөдлан сюмысас кутчысьөмөн, водсөн лымийөдыс кыскысьөмөн, сувтөд чепсасьыс дадювсө.

Усьлө да чеччө, мыйкө ас ногыс горзө лымйөн тырөм вомнас, ковмис йөгралы вөтөдны дадювсө. Жаявтөдзис лои сылы дженьыл кокъяснад нуны дона юртө. Эз кө отсав гөтырыс, даддяс нин, гашкө, эз во, лымъяс и сунтшиктис.

Атөдіс² йөграсө, со на кызди вөтлөдіс, тешкодь и вөлі видзөднысө, да долыдысла Бияр шешмунліс, но пыр и тіркмунліс таыс, мед эськө оз вомдзав асьсө. Отарөсө на туйыс эз по-

¹ Саран кум — коми морт.

² Атөдіс — суны мыйкө вөчигөн.

мась сылөн, да код төдас на, мый вермас лоны водзынас. Кык вой эськө лои узьома нин гортсьыс петом бөрын, воддзасо чомйын да модсо лымйын, а коймодос на ковмас конкө узьны Сыктыв усянінас вотодзыс, и сэки сомын, нельод лунас, ас-лас синмон аддзодлас Сюдоыслысь сулаланинсо. Дерг, гусьон-а, кысянькө вөрсяньыс. Сэссия, гашкө, водзө на ветлас Сыктыв катыдыс, төдмалас, кысянь бара олоны комиыс. Но од и асьсо сийос тайо йогра гозьяыс быттьо атөдісны жө, висьтавтөг оз овны мукөдыслы, саран пө тани шежлысьо. Кыйодасны да низьсо моз и виасны. Косан кө бөр гортад, оз нин ков видз-чысьны таысь, сьолөмнад он усьлы ни. Да од мыйкө и вись-тавны ковмас Памаыслы. А мый нө висьталан? Повзи пө да некытчө эг и волы? Тадзтө юртө янөдом дорысь бурджык нин олөмсьыд дугдыны.

Лэччис Бияр кыркөтш йывсьыс да падъялыштис, босьтны-ө чукчисө. Эз ачыс кый, да быттьо модлысь и шышкалө. А Енмыс од абу синтом, да кызди да мыйон на бергодас аслыд дасьыд вылө горшасьомтө. Оти рыт пуан да сеян, а мод рыт, колөкө, коктө чеган ли синтө зурган увйө. Оз, оз босьт, низь куыс нин тырмымон сылы, а чукчисө мед кырныш ли руч сө-йоны, кодныслы воддзык сюрө.

Доддясис Бияр нортас да модөдчис водзө Эжва катыдыс. Йогра гозьяыслөн дадюв туйныс нуөдіс сийос ю вивсьыс ке-жавлытөг, а кытти колө и индалис весьтасавны ыджыда нин діалөм чукульяссө, кежөдліс коркөя визувсьыс кольөм виямъ-ясас.

Тшын петасьяс өткымынлаысь аддзыліс Бияр вөр вылыс-сьыс, и то кык да өтка сюръяаос, а ловья мортөс сэссия некы-тысь эз уськөдлы син улас. И йогра гозьяыс некытчө вөлі абу сувтлөмаось шойччөдыштны көръяссө, тэрмасьөмаось, бу-ракө, дась югыдөн на воөдчыны Сыктыв усянінөдзыс. Сідзкө, абу нин сэтшөм ылын сэтчөдз. Зэв эськө нель кокаось көръя-сыд, да регыд на атшалөны, төдөмысь, өдийотө вөтлөмысь, нөшта нин сьокта дадьнад. Йограыд чомкосттө оз вермы пыш-йыны, топыдджык лым вывти да восьсаинтти кө, лызнад мор-тыд и суөдан, вөрыс на сийос и мездө, а көрыд нө эбөсаджык сыысь? Со тай, кок туй сертиныс кө, абу нин гырыся да өта-мөдсьыныс костөн тувччалөмаось көръясыс, а топөдчалөмон да дзугсялөмон, сэтчө-татчө шыбласьөмон.

Рөмдыны нин кутис ывлаыс, сук пемыдө пөрис Эжва пөлөнсьыс вөрыс, он нин и торйөд синнад пуяссө, он кө йыв-

ланьыс видзёдлы. Коліс кытчөкө узмөдчыны, биасьлыны пусьынысө да аски нин кызкө-мыйкө, гашкө и, вөрөдыс сэсса, матыстчывны Сюдөбислөн сулаланиөдзыс. Колөкө, эськө вой шөрөдзыс на воис сэтчө, Сюдө водзас и сувтіс, да оз өд водзасьысөн лок сы дінө. Тадзсө мөвпыштөмысь и чуткис Биярлы юрас: а мый эськө, восьсөн кө и локтас аски луннас, некытчө сайласьтөг? Асьныс тай нө, йөграыс, волөмаось Овкөджас бурысьсөн, юөр на со ыстөма Сюдөбис Кекурлы, а на дінө нө оз позь воыны бурнас? Но, сетас низь кусө, мылыштны и корас сыысь, мый наладорысь вөралө. Оз нө эскыны?

Бисө перйигас и пемдіс ывлаыс. Пузьөдөм лым ваас сук рокөдз гудраліс Бияр сюрасө да сійөс и паняліс кынөмыс чорзытөдз. Сэсса вылысь на пузьөдліс лым васө пөртсө мыськалөм могысь, пув корсө лым увсьыс нетшкыштис да орьөдліс сэтчө, и юис горш косьманінас небыдик шома-юмова көра ныассө. Но эз на бурмы сьөлөмыс, солаөс корыштис, и китыр кельчи, солаөн косьтылөмсө, босьтіс йирнысө, лынас и каджгөдіс. Эз на и быр кисьыс черыис, локны кутис унмыс, и тубыртчис йөра вольнас да уськөдчис лымьяс, кык коз костө, кытчө туктаыс на вөлі гылалөма, вөрөдчышталіс, медым вылысас тшөтш буздалас гуран дорөссьыс лымйыс. Репасын быттө и лои. И кольыштөм черисө йиригмоз и унмовсис.

А садьмис вөтасьөмысь. Ыштөкө мамыс и садьмөдө, шебрассө на вылыссьыс вешталө, а улыс дөрөм-гача и куйлө, да ыркыдыс пондө мөрчыны, и йөжгылясьны лоө, сэтшөм на дыш чеччынысө, синмыс на оз воссьы ни. Но өд мамыс эськө легөдыштис сійөс, некыті эз дойд, а өтпырйө мышкас, и кокас, и пельпомас чужйисны. Чеччыштөмөн и сувтіс сэки Бияр, да витөнөсь йөграыс дінас, вины и дасьөсь сійөс, черсө и шыпуртсө нин босьтөмаось сылысь, видлы водзасьынтө. А өти йөгра, ыштөкө тальышглөм ныра, сюмыс көлыш на бовкйөдліс шуйга киас.

Кывсө ньылыштөм коньөрө и сетчис Бияр, медтыкө чайтөны, мый шедіс налы да оз и ырьянась, чургөдіс кияссө, мед, колөкө, көрталөны. Веськаліс нин, кызди репасын узьысь чукчыис низьыслы, да өні сылы кывзысьны и коліс, а то шоймөдасны, нинөм он төд.

Долыдөсь, гизьөны ас костаныс, тойлалісны сійөс йөграыс Эжва вылас. Куим дадов сулалісны сәні, виж гьөраось көрьясыс төлысь югөр улас.

Со и воис Бияр Сыктыв усянінас, Сюдөас. Сөмын эз ас кокнас-а.

Кузя нюжалысь джуджыд нөрыс йывсьыс, козъя вөр кост-сьыс өти чом и тыдаліс, сырса пуяс йылө чөвтөм сабри кодъ ёсьман йыла. Мукодсө, ичөтсө, вөрыс на сайөдіс, тшын сюръя-ясыс и висьталісны, мый абу өтка тыдалысь ыджыд чомыйс.

Шор усис Сыктыв юас, да шорыслөн кырасөд и кайисны көра дадувъясыс, мышсянъыс пырисны нөрыс йылас, сувтісны неылө Сюдөыслөн чомсянъыс. Турдіс и позяліс Бияр даддяс көрталөмөн пукалөмысь да сійөс нин и виччысис, кор разясны да чеччөдасны. Но сы пыдди шы кшпөдісны йөгра-ыс, мед петаласны йөзыс да видзөдласны, кодөс найө кутісны. Дерт, чукөрмисны сэсса гырысьыс и посниыс. А куш видзөдөмсьыд, да нөшта лөг петан комиыд вылө, он на такав, и дзерөдны пондісны Биярөс: кодкө пон моз эрыштчылө сы вылө, кодкө лымйөн шыбитө, кодкө беддён зурйөдлө.

Бурөн эськө эз на помассы татшөм лөкалөмыд, дойдалісны на, колөкө, Биярөс, да ныв сэки кыськө мыччысис, и йөзыс пыр и вешйышталісны «Сюла, Сюла» шуалігырийи. Лымйөн тырөм неыджыд коз понөль ыштөкө и локтіс, сэтшөм мыгөра вөлі нылыс: еджыд нойөн кышөм маличаа, вывсянъыс увланьö паскалана, да и еджыд көр куысь кукыльыс лым тукта вылө жө муніс, муртса ныр-вомыс и тыдыштіс кукыльсьыс.

Нылыс вылө и веськөдіс Бияр синъяссө. А шыблалөм лым-сьыс синъясыс читкырасисны да вазисны, эз вермы тільышт-нысө, и синваыс сэсса петіс. Таысь нылыс и вөрзыліс да педзыштіс, лыбөдліс вом пельөссө, быттө бөрддзыны жө көсийө.

Дерт, эз вөв еджыд чужөма нылыс, йөграыслөн вижоват сімыс и сылы вуджөма, но нырыс казялана векни вөлі да синъяс весьтас и тшупөда. Мичаө и пуксис, төдөмысь, йөгра костас.

Нинөм эз шу сійө некодлы, сөмын өвтыштіс ки гугыс, мед разөдчасны, и бөр муніс. Эз тыдавны малича увсьыс кокъя-сыс, да ыштөкө кывтіс и эм. Бияр видзөдіс, кытчө сійө пырас, а сійө ыджыд чомъяс и пырис, Сюдө ордас. Сылөн нылыс, буракө, вөлі, а Сюлаыс — нимыс.

Регыд и Биярөс разисны да нуөдісны Сюдө ордас. Гөгөр позялөмысла сійө довъяліс на, эз и вермы зумыдасө тувчавны, да сойбордъясөдыс кутөмөн и кыскисны, восьтісны пыран лапөдсө да йөткыштісны чомъяс. Кымынён бипур дорас и усис

Бияр нитшялём кокъяс йывсьыс, кывны кутіс вирыслысь визъ-
ялёмсö да пидзöсчанысис, а сэсся и сувтіс.

Сы водзын, бипур саяс, пукаліс Сюдöбис кык-ö-куим юрлöс
вылын, турунвиж рöма ермөгъыс дөрöма, мышку вылас сьöдбöж
куясысь вурöм вевттьöд чöвтöма. Гежöдіник сьöд сіяса тош-
кыс ляскысöма кыз банъяса чужöм гөгöрыс. Кияснас вöсьысь¹
сикöтшön ворсöдчис.

Довкнитіс кодыкö юрнас Сюдöбис, и öшанön сайöдöм чом
пыдисьыс мышкыртчöмön олöма нин ань петіс, муртса и лэп-
тыліс Бияр вылö синсö да руалан пöсь шыда бекар мыччис.

— Ю,— шуыштіс.

— Юа,— чöвтіс Бияр. Руыс серти нин ныриснас сійö
кыліс, мый абу дуб шыдыс.

— Соловны тшöкті,— дольыштіс Сюдö.— Ті öд солөн
сёянныд, сараныд. Тшыкöмысь поланныд.

— Кытчö öд велалан,— вочавидзис Бияр.— Тэ тай, эн
скöрмы-а, велалöмыд жö.

— Кытчö?

— Коминас сёрнитнытö.

— Он öд воштгысь тиянысь. Талань и суйсянныд да. Мо-
гыд на сулö и.

— Сулö. Менö тай суис жö.

— Кутшöм мог?

— Вөралан. Öвкöджын керка лэпта, да кымынкö низь,
мися, оз-ö шед. Йöзтö öд чукöстан, да вештысь кызкö. Зеп
тыр вежтан² кö эськö вöлі...

— Сэсся татчö пырин? Таті нин тиян лои?

— Сыысь и мыжа. Öг соссьы.

— А синтö кö тшöкта öгыравны? Югыдсö мед он аддзыв
сэсся? Да сідзи и вöтла?

— Ачyd тöдан, Сюдö öксы. Верман кö, мылышты, а он
кö...

— Ю шыдсö.

— Юа. Зэв чöскыд.

— Кекурыс нö кызди нин олö?— виччысьтөг юалис Сюдö.

— Вермана. Йöзидлысь оз водзöсасьлы.

— Сійön и лэптысьö? Чиг саранö пуксьö? Юöр ыстылі,
да абу и сетчöма кывйö. Энлы, пойгылас на!

¹ Вöсь — жемчуг.

² Вежтан — эзысь сьöм.

— Кутшөм юөр нө? — нинөм төдтөмө лэдзчысис Бияр. —
Абу кө гуся?

— Абу. Ныв менам быдмис, да көсыйлі пиыс сайё сетны.
Мися, мед йитөс лоё йёгра-сараныс костын. А абу и шогмө-
ма сылы, сора вирлы. Еджыд чери кыйё, гөрдсө оз-а. Сюла,
петкөдчыв!

— Ог, — ошан сайсьыс вочавидзис Сюла да мыйкө йёгра
ногыс на тоткыштіс.

— Оз тэнө сёйны! — горөдіс Сюдө.

— Со, — петкөдчыліс Сюла да дзирыд сьөд сингьяснас син-
бөжаліс Биярөс. Вылын коска лөз йөрдаса вөлі сійё, пельки-
ник нывка мыгөра, да ловъя акань вылө и муніс.

— Мисьтөм нө? — юалис Сюдө.

— Абу. Веж петана, — ошкыштіс Бияр.

— Вай, — кыйис кывсө Сюдө.

— Ме гөтыра нин.

— Мөд лоё.

— Он лысыт. Йёзсө дөзмөдан. Памаөс и.

— Ёна и төдө тэнө Памаыд?!

— Төдө. Ачыс гозйөдіс, да кывсяс кө... Гашкө, водзсө, а
өні комиыд некод нин оз ов уна гөтырнад.

— Онө кырсавай ни? — нерыштіс Сюдө. — Кымын нылөс
нин миянлысь мырдөнавлінныд?

— Ме эг-а.

— Мед шедлө!

— Ме ачым нин шеді. Он кө лэдз бөр...

— Ог. Мырийё на тшөкта көртавны ылөдчөмсьыд.

— Ме ылөдча? — дузгысьліс Бияр.

— Пуксьы, эн сулав.

Бияр пуксис кокъяссө бөрас кусыньтөмөн да выльысь шы-
асис дорйысына:

— Ме тэнө ылөдлі? Мыйөнкө?

— Вөравны пө тай петі, висьтасин.

— Вөравны.

— А мыйла нө шыпуртсө босьтін, морт виан ньөвсө да,
эсы кузя көрт йыласө?

— Ковмас кө, мися. Ош гу сюрө ли, йөра кок туй аддзы-
ла ли. Яй сёянтөгьд өд кокыд оз жө кыскав.

— Кыйин кө эськө оштө, юртө понгьяс нин кыскалісны
да, — зелькнитіс сикөтшнас Сюдө.

— Оз нө позь? Асьныд онө и кыйлөй?

— Ошсö ми вежаö пуктам. И виöмыслы на кевмысям. Огö тiян моз... сёйин и сiталiн.

— Абу öмöй вöв тiян вежаыс?

— Кыкнанныс.

— Но, тöдны кута,— намыштiс Бияр.

— А ручасынгытö... Кор дугдан? Кöни веськыд кывйыд?

— Кутшöм веськыд кыв?

— Мый тась корсян? Кодi ыстiс?

— Некод эз.

— А Памаыд?

— Сылөн метöг эм... видзысьыс и кеслачыс.

— Тэнö тай, видзöда, ыстöма-а. Висьтала, колökö, мый-ла?— чиктылис Сюдö да виччысьыштiс, оз-ö Бияр шу мыйкö, но сiйö чöв олис.— Висьтала ог?— ыззис таысь Сюдö.

— Висьтав.

— Йöрмис Памаыд, сэтчö ни татчö! Пыр на менö дзескöдiс, а öни асьсö тодмышкалöны. Югдiнад Мöскуа нин ыджыдалö. Коммуад ни Ветйöад он нин сэтi письты. И татi кöсйö.

— А татi нö письтан?!— чуймöмөн юалис Бияр.— Тасянь öд мый ыджда мусюр на, гашкö, колö вуджны. Тöвбыднас он бергöдчы. И тэ он лэдз!

— А мый бурысь?!

— Сiйöс и шуа. Выныд тэнад судзяс жö.

— Ковмас кö, ме Эжва йывсьыс и Из сайысь на чукöста. Тi кö сёөнöсь, и ми сёөнöсь. Сiдзи и висьтав Памаыдлы. Мед сöмын суйсьылас!

— Кыдзи нö ме висьтала, он кö бөр менö лэдз?

— Лэдза, висьтасян кö.

— Мый?

— Мый Памаыдлөн могөн ветлан.

— Ньöти ог. Тадзтö быдтор позьö мортыд вылö вожд-ны.

— Бөрддзы. Кужан кö!— чирöдiс Сюдö.

— Кужли. Эг на кö вунöд.

— А нимыд?

— Бияр.

— Коли на шыдыд?

— Кольыштiс.

— Мися, яйөн на верда, а нинöмла. Пет ывлаас.

— Ачым?— дорынтычлыс Бияр виччысьтöмысла. И мөвпыштiс на сэсса, мый, гашкö, оз и кут Сюдöыс сы вылö

торъя лёксö, да ывласьыс нин кутшöмкö олан чомйö и нуодасны сийöс, мед син улын лоö. Но мыйöн петис сийö ывлаас, пыр и усыкöдчисны сы вылö йöграыс да лэччöдисны нöрыс йывсьыс мыйтакö горулö, йöртисны горсийöн кодйылöминö, кöни везйöн öшалис кыз пужйыс. Пышйöмсьыс тупкисны лöсалöм кер помъясысь шывиналöм öдзöсөн, кодöс кыклати на пыкисны ортсысянныс. И мунисны.

Муртса пуксьыштнысö да кусыня кокöн водыштнысö и төрис Бияр горсьяс. А мед оз на кув войся кодзыдсьыс изöймитöмысла, кык көр воль, чирсийсьöм гöнаöс, вöли шыбитöмаöсь сэтчö.

Коркö лун сьöмöснас и лэдзлывлисны сийöс асмогасьнысö да ветлöдлыштнысö. Но эз тшыгйöдны, пöсь шыдыскöд тшöтш пуöм яйсö на вайлывлисны, а мукöддырийыс и кын яйсö на вöсна шуялöмөн. Ачыс на, буракö, Сюдöыс кык йылөн вожалис сы динö: öтинас бытшкыны и дась, а мöднас асланьыс матыстны. Сылөн тшöктытöг эськö эз на тадзтö вердны, ва вылын и видзисны да нöйтисны на.

Бияр эз и ыдъясь, мый öтчыдъя сёрни вылас и сувтас Сюдöыс, виччысис, кор бара нуöдласны сы динö, да тайкö эз сорассы лун лыднас, кымын нин коли татчö, горсьяс, йöртöм бöрын. Öтиторсö дугдывтöг вежöрас гудралöмсьыс ыштöкö öдны и кутлис юрыс. Сизим лун мысти, арталöм сертиыс, вöлис катöдисны сийöс нöрыс йылас да дзумгисны Сюдöыслөн чомъяс.

— Шонтысь, пуксьы лючки да, — довкнитис юрнас Сюдö.

— Шонтыся.

— Гөтырсьыд эз на гажыд быр?

— Эз. Ме дыр шуи ветлыны.

— А нэмтö кö?

— Ме ог төд.

— Он и төд, кор водзöсыд суас.

— Кутшöм водзöс? Мыйысь?

— Морт виёмсьыд!

— Кор?

— Емдинад ветлөгөн.

— А-а., — киргыштитис Бияр, гөгөрвоис да, мый некытчö нин сылы таысь соссьынысö: ыстылöма нин Сюдöыс кодöскö Овкöджас и төдö нин Кекурыслысь вöвсö босьтлöмсö. Колöкö, удтысис на Кекурыс, медтыкö мынны сыысь. И Уна водзас на жерьялис, эн пö виччысь öни верöстö.

— Асьтö кö тшöкта чергöдны? — доровтчыліс Сюдö водз-
ланьыс.

— Тшöкты. Сöмын кодi мыжаыс-а?

— Эн ниглясь. Мед талань синмыд.

— Мед, — веськöдіс Бияр юрсö. — Найö кыкөнöсь вöліны,
кык дадулаöсь. Асьныс ме вылö уськöдчисны. Сэссия мед эг
и дорйысь? Мöдыс ловйөн коли, позьö юавны сылысь. Колöкö
и, тані. Ог пов.

— Тані и юалам, — кайтіс Сюдö да горöдіс мыйкö йöгра
ногыс.

Кымынкö здук и коли, пыртöдісны кодöскö. Став йöграыс
быттьö öткодъöсь чужöм вылас и паськөмнас, да сійö-ö вöлі
мöд уськöдчылысьыс, код төдас. Дай матысьсö, воча синсö,
Бияр эз и аддзыв сійöс.

Сюдö юасяліс мыйкö пыртöдöмыслысь, а мöдыс эскöдчана
вочавидзліс да гогийöдліс юрнас. И кыкөн йöграыс, кодъяс
тшöтш пырисны чомъяс да кольчисны, пондісны педзикась-
ны Биярлөн мышку сайын. Сöмын нин виччысисны, гашкö,
Сюдöыслысь бөръя кывсö, мед кыскыны ывлаас да тотшкы-
ны.

— Тэ на вылö уськöдчöмыд, — дöжныштiс Сюдö.

— Эжва шöрас? Вöла додънас? Тырыс на турун сэтөн
дай! — вочааліс Бияр. — Мед оз лöсьöдлы!

— Чеччыштöмыд додъ вывсьыд.

— Сэссия нö эськö и вöтöді? Эз кöра дадулаöсь вöвны?
Асьныс лов босътны и петалöмаöсь. Да ме шöрö веськалісны.
Чайтісны, сэтчö и лётмуна киён да кокөн.

Сюдö бара на мыйкö юалис пыртöдöмаыслысь, но эз, бу-
ракö, такав сылөн воча кывйысь, да чушкерис юмыртöм вом-
нас. И кык йöграыс шошаöдыс и кыскисны коймöдсö, ывла-
сьыс нин ойöстöмыс кывліс. Та бöрын Сюдö лигышмунліс да
пыдöджыка вöйтчис юрлöсьяс вылас, косіника нюмъөвтiс Би-
ярлы, со пö кутшöм ме веськыд мортыс. Чöв усьліс да
каймöстіс:

— Югдінысь пö тай ачыл?

— Сэтысь.

— Юртö нуин?

— Нуи, сідзтö кö. Он öд увтчы сэн пон моз... эштöм бöрад.
Дасөн рочыс öти коми вылас да.

— Чайтан, водзö оз и локны?

— Тöдан öд. Мед поздысьлас кöйныд.

— Водзёс Памаыдлы. Ачыс эз на жё пётлы. Узьсьё на сылөн?

— Ме кыгысь тёда?!

— А мыйла сійё лэптё тэнё?

— Ньёти оз лэпты. Лэдзис Овкөджас овмөдчыны и ставыс. А кытчөкө өд воштысь вөлі меным.

— А көрт изсө кодлы вайёмаось сылөн тшөктөм серти? Абу тэныд?

— Меным. Вайёмаось кө нин.

— Мый вылө?

— Сывдыны да мыйкө дорны. Көрта колансө.

— Морт виансө и?

— И сэтшөмсө тшөтш,— ыштөкө бытьён висьтасис Бияр.— Ме айёлысь на велөдчылі көртсьыс вөчасьны. А Памаыслы колө, буракө. Сьысь и няньён на мездьштис.

— А мыйла нө эн гортад ов, воин Емдінсьыд и татчө? Эз кө Памаыд ысты?

— Эз. Кор на, мися, ваясны көрт изсө, дай кузь на, мися, төлыс, а петала кө вөравны гортын олөм дорысь... Век өд он воча чомйын ов. А кодкө оз лэпты меным сідзтө керкатө.

— Кывзан да, мыйла и кута ме тэнө тани?— шешмунліс Сюдө.— А ог кө ме тэныд эскы?

— Эн. Тэнад гаж.

— А сідзи вөчам кө?

— Кыдзи?

— Ме серти. Овны татчө кольөда.

— Код туйө?— бөрвывтчыліс Бияр.

— Верөс туйө. Сюлалы. Мед пиөс вайө. Вежны менө. Кык вираөс. Оз-ө бурась Нумыс?— чатөртчыліс Сюдө тшын пөтан розьланьыс. Тагысь Бияр и гөгөрвоис, мый ассьыныс Енсө тадзи йөграыс шуоны.

— А мый нө, оз сет питө?

— Чужас, и босьтө. Сизимөс нин босьтис. Нывьяссө өкмысөс и. Отнас Сюла и быдмис.

— Тэныд өд позьө... унджык гөтырөн овны. Кодсянькө и быдмас пиыд.

— Чайтан, өтиөс нин и вайөдлі? Аслам на вирөй, буракө, ойөстөм.

— Гашкө, сөянтө вежны колө,— чуйдіс Бияр, медтыкө оз гөтрөд сійөс Сюдөыс.— Көрыд тай быдтор сөйө, иса черитө

на. А мортыдлы нө оз ков? Коляоз и отсалас, гашкө, пожом туту ли. Ог нин вотөстө шу.

— Абу на, тыдалө, сөян сайын.

— Мый сайын нө?

— Нитшкассьома нин вирөй. Айөсянь и мамөсянь. Öти вужйись став өксы котырыс. А он лысьт торкныгтө, кодөс-сюрөтө вайны. Сюла вылө нин и лачаөй. Сылы колө...— лөнбөдчыліс Сюдө,— выль көйдысыс. Сійөн эг на и сет не-код сайө ас котырсьыс.

— Ме өд абу жө өксы пи. Абу йөгра ни. Асьтө тавись мыждасны.

— Сысь этшаджык шогыс. Менам тэ вылө нин синмөй. Вескыда шуа.

— Мыйла ме вылө буретш?

— Еджыд и, ыджыд и, вежөра и.

— Эн, Сюдө өксы, тшөктөд менө. Юрөй усьө. Садь төдтөмөйла.

— А збыль нө эськө мед усьө?

— Мед и збыльыс. Он жө меным эскы-а.

— Ог. Памаыдлы тэ исасян.

— Сідзкө и... дыр-ө нө?!— вундыштіс Бияр кинас сьылі вельтөдыс.

— Энлы на. Овлы на. Сідзикөн.

— Қызди... сідзикөн?

— Йөрмөдтөг. Шоныд чомйын. Менам өд лөкыд тырмө, а бурыд тырмө жө,— нюмыртчыліс Сюдө.

Чомйө и нуөдісны сэсся Биярөс. Сылы вылө и сувтөдө-маөсь, тыдалө, чомсө, ичөтикөс, бипур гөгөрыс кытшовтныгтө и төрыштан. И лымсө ньөти абу вештышталөмаөсь, кок ула-ныс и таяләмаөсь, да лымйыс сөмын на сьыліс, ваөн пукаліс кын му вылас, тюрөбөн лэччаліс бипурсьыс артмыштөм нин гуранас, чискөдіс увсяныыс бипурсө. Несйөдлан уль сынөдыс лемасис ныр розьясад.

Сійө көр вольяссө и вайсны, кодьяс вөліны нөрысувса горсьяс, ёкмыляләмөн чужйисны чом пытшкас. Некугтчө на вөлі вольсасьнысө муыс косьмыгтөдз, да Бияр өшліс найөс зібьяс костас сюләмөн. Копыртчис бипур водзас да сетчис локта-лысь мөвпьясыслы.

Төдөмысь, ньөти эз и пов Сюдөыс, мый пышьяс сійө та-тысь, кыйөдас ком да. Матын кө эськө вөлі Овкөджөдыс, регыдөн и удитан, сэки, гашкө-а. Кыгчө нө төвнад пышьян

лызътөгүд да чертөгүд, биватөгүд да пурттөгүд, ньоти сёян-төгүд да? Ылөдз-ө нө джуджыд лымйөдыд собомнад воан, кытчө кок туйтө воштан? Ковмас нин виччысылыны тулыссө, сэки кызкө.

Но өд и Сюдөйс, төдөмысь, оз энотчы, босьтөма нин сийөс торшөдлан руыс да, мырдөн и көвъялас Сюласө. Көсийлөма тай нин Кекур ордас сетны, Шай саяс, да пыксөмаоьс ая-пиа, а Бияр сэтчө и лөсяліс быгтьө, дай ыкша вылас на Сюдөйслы, медтыкө водзөс босьтыштны Памалысь, ыстөмыд пө эськө ассьыд морттө кыйкъявны, да гөтрөді ме сийөс. Артыштан кө тайөс, и тулыснад на он лысьт пышйынытө. Кызкө да мыйкө, пиньсө йирөмөн, а сибөдас на, колөкө, Унаыс, а Пама водзас кутшөм синмөн сувтас? Урөс понйө и усяс нэмыс кежлө.

Мыйла өти мортыс вывті быдторйыс муно? Оз коньөрө пуксы, да сы вөсна.

Сьөлөмнас усьліс Бияр. Но синвасө эз лэдзлы. Ляксыян уль сынөдсьыс косөдіс ки пыдөснас чужөмсө.

Некод нин сы бөрся эз видзөд ни вөтлысь, өтнас нин ветлөдліс Бияр ывлаас, весиг ылыстчывлис чомъяс дорсьыс, вала лэччывлис Сыктыв вылас, юкмөсас, ли вөрас собавліс пєсла мөгөн. Кысь нин ассьыс черсө да пуртсө, нинөмс на көртасө эз сетны сылы киас, да пес вылас усьөм ув ёгсө и өктыліс.

Водзпөрсө йөграыс полисны сыысь, ыштөкө пурсысь понйысь, чөв усьөмөн дув сувтавлісны да виччысисны мунөмсө, а сөсся велалісны сы дінө да асьныс водзджык и пондісны шыасьлыны: “Кутсьө муна?” Гырысьслөн и посныслөн өткодя дөбыльтөмөн и артмыліс юалөмыс, эз сетчы налы «ч» шыыс да.

Том нывсө ни аньсө маті синмөн Бияр эз и адзывлы, зэв нин кодкө тірөдас чомйысь чомйө. Найө, буракө, ставныс олісны юрвыв тырнас уджөн: пусисны да вурсисны. Өти чомйысь сөмын кывліс сийө аньясыслысь гораджык сёрнисө. Найө сәні вөчалісны көр куяссө. Вукөдан өшурки ис и паркйис сәтысь. Өшуркинас шоммөдөмөн, буракө, уськөдісны куяс вывсьыс гөнсө да рака яйсө. А мыйөн сөсся? Кытысь налы комийды моз выльөвыс да рудзөг пызыыс, кор ньоти мөскөс оз видзны и нинөм оз көдзны?

Код төдас, пожъясьлісны эз төвнас йөграыс, кысь нин эськө пывсьынытө да. Колөкө и, шонтылісны ватө да чышкысьлісны көтөдөм рузүмөн. Дыр өд он жө вермы овны ньылөмөсь

вывтырнад, нельзыны и кутас кыті ниртсьөджык да чөсөдны, и улыс паськөмыд на нэдздалас. Телепит и лои Биярлы мыськыштны асьсө да улыс паськөмсө. Вөрсьыс сийө пөрысь пипу аддзыліс, сыв кызаөс. Сулалө и ловъя на, а кузяла нин ыджыда гыркса, төрмөм сьөмөса, чужйыштан кокнад, и кылө тыртөм пытшкөсыс. Пөрөдан да чинталан кө, уна и бурня артмас, а пидөсалан кө бурнясө, и шогмас на ватө видзны ли шонтынытө донөдлөм изнад. Но чертөгыд да пурттөгыд нө мый вөчан?

Та вөсна Бияр и вөйысис Сюдө дьнас. А лючки висьталөмыс эз и ло, мыйла вөйысьсөсө. Сөмын на шуис, мый колө эськө пыравны ыджыд чомъяс, пыр и котөртис өти висьтавыны Сюдөбылы. Табысь и чайтөма сийө, мый кывйө сетчыны и көсийө Бияр, да вашгылана и виччысис.

— Мый нө, дышөдіс? — серам сорөн юаліс Сюдө.

— Мыйыськө?

— Татшөм оломсьыс. Кынөмыд пөт. Уджыд абу. Узьлан өтнад. Он нө дөзмы?

— Дөзман. Ачыд он төд, коді и лоан да, — нурбыльтіс Бияр.

— Эг нө ме тэныд шулы?

— Шулін.

— А мый нө сэсья падъялан? — чорзьөдіс чужөмсө Сюдө. — Мыйла кортөгыс локтін?

— Могөн. Чер да пурт меным колө. Позьө кө, ассьымөс.

— Вывті лоө.

— Ог өд вины кодөскө.

— А мыйла нө?

— Вөчасьны. Уджтөгыд өд йөйман тадзтө.

— Сета уджтө. Няр песны!

— Менсьым пуыс кывзысьөджык.

— Сюсь асланыд.

— Асьтө өд быдөн төдан, — сюртчис Бияр.

— Сэсья тэ лызьтө коран, шыпурттө, ньөввужтө.

— Ог, мед тэнад лоө. Вердөмсыйд да видзөмсыйд.

— Тайө и став могыд?

— Абу на. Тасмаөс да биваөс кө бөр сетан и. Абу и морт быттө натөгыд.

— И ставыс?

— Ставыс. Эськө пышйыны кө ныръяси-а.

— А Сюласө ылыстан?

- Ылыста на.
- Матө оз ков? Вөрзөдлытөм нылыс?
- Абу өд колөм сайын.
- Мый сайын нө?
- Овны абу тани.
- Ов! — лыбзыйыс Сюдө.
- Сьолөмөй на потө.
- Сидзкө и... со ывлаыс.
- Дерт, — кывзысына нюрөстис Бияр.

Торъя эз нин и виччысь сийө, мый тшөктас Сюдөыс бергөдны сылы мырддылөм черсө да пуртсө, тасмасө да бивасө. Но регыд мысти и вайисны Биярлы чомъяс став корөмсө. Чайгис на, тыдалө, Сюдөыс, мый бурөн-сорөн, а вермас на кусыньтны сийөс асланыс, овны и кольөдны. А, колөкө, и ыджыдджык-тор вылө на арталіс, Памалы паныд и веськөдны сэсса сийөс.

Лоис вөчаснысө коланаыс, и лунсө колльөдан да шогсыыс мынтөдчылан уджыс лоис Биярлөн. Пөрөдіс сийө пөрысь пипусө да чинталіс кыис кузьятөн, и дас өти на петіс шомөс вылас шогман чинтасыс. Видлөм могысь, кутшөм артмө, медводз аслыс вылө и вөчис шомөссө. Уль пипуыд, ывласыд пыр-төмыд да кынвывсыыс шонтыштөмыд, кокныыда и сетчө чернад лөсальштнытө да пуртнад вөлальштнытө. Ворсөм моз и артмис бурняыс. А пыдөснас ковмис ноксыны. Вөлі кө эськө өжын да ки улад мукөд коланаыс, сэки өдйө да буретша и кодийн джусө, и пөвторыяссө топыда и пукталін вевся дорөсөн, а кытысь абусө босьтан? Виялана и артмис шомөс пыдөсыс, сөмын васыыс бөтейтөм бөрын дугдіс виявнысө.

Но мукөд шомөсыс, казялөм бөрад, кызди эськө колө, бурджыкөсь нин артмисны Биярлөн, эз и вөв яндзим вөзйыны кодлыкө. Сэсса и асьныс йөграыс кутісны могмөдчыны сы дінө, меным пө вөч жө. А водзөссө кынмөдөм көр яйсө вайісны.

Кык төлысь нин чужліс да пыдөсөдзыс воліс, коймөд выльысьөн петкөдчыліс чарлаөн сэзь воя енэжас Биярлөн йөграыслы шедөмсянь. Ывлаыс тулысланыө катовтіс, шондіавліс да турөбавліс. Уркайяс кыськө воисны маті вөрас, быдтысьөмаөсь нин веж кодзыдалігас да ас сөян вылө петкөдөмаөсь сьодасьтөм ныра на пияннысө.

Тулыссө нин и тэрмөдліс Бияр, весиг мөвпыштліс, мый, гашкө, оз и ков сылы виччысьны йи мунөмсө. Овлө өд тай, ульдывлас и пуксьөдас шоля лымсө, а локтан войнас сэтшөма кам кынмас, мый йөраөс чарөмыс лыбөдө, гыж йывнас

чирсийдлөмыс и тӧдчыштӧ. Сэтшӧм войнас и поэь уйкнитны да Эжва вылас петавлытӧг и писькӧдчыны вӧрӧдыс Овкӧджланьыс. Сэтысь, вӧрсьыд, куттӧм нин лоӧ сійӧс йӧграйдлы, дай черыс и пуртыс сьӧрас лоӧ, вӧтчыласны кӧ понъяснад. Ставнысӧ и эштӧдалас сьӧрсьӧн-бӧрсьӧн. А чомкост куим-ӧнӧль кӧ мунас тасянь рытыв-войӧ да сэсса веськыда войӧ сетчас, матӧ Овкӧдж дінас и петас, гашкӧ.

И Памаыслы вермас висътавны, мый адзъліс аслас синмӧн да тӧдмаліс йӧграыскӧд сӧрниясысь. Сыктыв кузяыс поэь жӧ петавны Коммуас да Ветйӧас, сӧмын мусюрсӧ и колӧ вуджны Кама йылас, дай ветлӧдчӧны сэтӧ комиыс, кодӧ Сыктыв катыдас олӧ. Волысян¹ нима сикт сэтысь унаӧн йӧграыс асьныс гаравлісны, сэтчӧ пӧ ми ветлывлам жӧ вежласныгӧ. Эжва катыдас кӧ он суйсьы ылӧ, то Сыктыв усянінсӧ и кутӧ сӧмын Сюдӧыс. А вермыныгӧ сійӧс, вӧтлыныгӧ Эжва катыдыс, морт дас вит и тырмас кӧрт сайӧдаыд да кипеляыд. Аслас Сюдӧыслӧн ветымыныс, гашкӧ, оз чукӧрмы, а ньӧв помсьыд куш дыр он водзась. Повны кӧ нин, мӧдторйысь колӧ. Локтан тӧвнас, туй сувтӧм бӧрас, вӧрзян, шуам, вӧла-додьяснад да пыр мунигмоз и босьтан Сыктыв усянінсӧ, ветлан Коммуӧдзыс да Ветйӧдзыс, а сэк коста чукӧртас Сюдӧыс став йӧграсӧ. Из сайысь на, гашкӧ, и веськалан налькйӧ моз бӧртӧ локтігад, няньтӧ ни юртӧ он вай. Босьтны и колӧ Сыктыв усянінсӧ да изкарӧн² сувтны татчӧ комиыслы.

Но мый эз волы Биярлы юрас, сыысь и дзугсис сійӧ, воштыліс мывкыдсӧ да. Асьсӧ том вир-яйыс и кокньӧдіс.

Кымыныськӧ вочаасьліс нин сійӧ Сюлаыскӧд. Водзсӧ быгтьӧ дзебсясьмӧн и оліс Сюлаыс, сідз-тадзтӧ ывлаас эз ветлӧдлы, а сэсса тыдавлыны кутіс: тувчыштало-муно кытчӧкӧ вӧсни йи улысь тыдалан пемыд ва визувкодъ ворсан синъясӧн. Восьсӧн Биярлы эськӧ оз и нумъѣвт, оз и паськавлыны банъясыс, да пельпомъясыс усьыштлӧны родӧмысла.

Ӧти лунӧ Бияр вӧласьӧ вӧлі чомъяс, пӧвторыяс лӧсьӧдӧ вьль шомӧс пыдӧс вылӧ, кодкӧ шыгыртіс пыран лапӧдсӧ, но ачыс эз на пыр ни эз шыась мыйлакӧ.

— Кодӧ нӧ? — юаліс Бияр.

— Ме, — кыліс нывлӧн вочавидзӧмыс. — Пырала?

— Пы-рав, — мывктыліс Бияр, тӧдіс нин кодӧ да.

¹ *Волысян* — ӧнія Вотча — Волся вежӧртӧмӧн.

² *Изкар* — крепость, рочӧн кӧ. Изкар нимыс эм Сыктывкарын.

— Мый нө вөчан²— чөв сулалыштіс пырөм бөрас да на-
мыштіс Сюла.
— Со тай, вөлася. Пуксы эстчө, бурня вылас.
— Пуксыла.
— А он нө пов... меысь²— юалис Бияр.
— Ог.
— А оз нө вид айыд, төдлас кө²
— Оз,— пыльсмунис Сюла.
— Кыкысь эн шу «оз»-тө.
— А сийө муніс.
— Кытчөкө²
— Из сайө, кан¹ дінө.
— Мыйлакө²
— Тэ понда да ме понда.
— Эн лөсьөдлы,— нюкыртчыліс Бияр.
— Ньоти ог. Шуас кө каныс, меным верөсөн и лоан.
— Эн тэрмась.
— Ог и тэрмась. А мый нө, пежала тэнө, йөгра ныв да²
— Он. Лежнөг тусь кодь тай. Кисьман выйын.
— Видлы, нетшышт да,— дэльөдіс Сюла.— Гашкө, юмов
нин²
— Энлы, мый айыд висьталас.
— А вола бөрти²
— Эн. Эн ышмы.
— Мыйла ог²
— Абу мича. Менө янөдан и,— шуис Бияр.
— Ой, шыр полысь!— дольыштіс Сюла да петіс чомсьыс.
Но рыгнас, пемдөм бөрас, бара на сийө локтіс. Он гөгөрво
чужөм сертиыс, мый и виччысьныгтө сысянь: тайкө нюмъөвтас
синва сорнас да юрнас и зурөдас Биярлы морөсас, тайкө йи-
рыштас пиньсө да ёрас нэмыд кежлө.
— Тадзтө... ме ог төд,— шөйөвошліс Бияр.
— Эг өд пукавны лок,— лөгасьтөг вомалис Сюла.
— Мыйла нө²
— Сов тэныд вайышті. Миян эмышт на. Оз нө ков²
— Колө эськө да,— сетчыштіс Бияр.
— Со, шуйга соскын,— кыскис Сюла малича сос пытш-
сьыс няр куысь вурөм ичөтик сепыс.— Пукта татчө, пөв вы-
лас²

¹ Кан — хан.

- Пукты. Аслыд менам нинөм водзёсыд абу-а.
- Оз и ков. А мый нө ыджыд биён олан?
- Гажаджык. Пессо өд вайома.
- Пөжсян татчө!
- Маличанад, дерт. Да... вай мунөмысь!— өлөдіс Бияр.
- Лёкыд тай эм. Вөтлыны и вомысь!— кыкис Сюла выв-
сыыс маличасө, лөсталан гөрд ермөгысь вурөм йөрдаса и коли,
нёнъясыс ёсиника төдчылөны увсянныс, кор лольштiгас лы-
бөдлас морөссө.
- Дыр-ө скөрмөдчан-а? Нуода кө эськө асланыд чомйө!
- Нуөд.
- Висьтала мамыдлы!
- Бытгө оз и төд?
- А нинөм тэныд тані вөчнытө.
- Юрситө сынала. Дзугсьома жө-а. Ызөн турун кодь.
- Со сылы сынаныс,— нуөдіс Бияр паськөдөм чуньяснас
юр вывтiыс.
- Чикысь кыа.
- Абу ме ныв тэныд чикысьнад ветлөдлыны. Абу йөгра
ни ыж бөжтө кыскавны.
- А вутш юрнад и мича? Ноко!— лөсьөдчис Сюла мыш-
ку саяс Биярлы да кутчысис сылы юрсиас, пондіс торйөдав-
лыны.
- Дугды, шуөны.
- Ог. Шыльөда да сәки.
- Дөзмөдан өд!
- Дөзмөдны и колө тэнө.
- Бияр пескыльтіс юрсө, а Сюла ыштөкө сійөс и виччысис,
варс курччис дойөдз сылысь маті веськыд бандзибсө, сәсся
сәтi жө и окавны кутіс.
- Сюласыс мынтөдчөм могысь на нетшыштчис да сувтiс
Бияр, а инмыліс кияснас вильсъялан ермөга Сюлаыслы, кывліс
сылысь тiръялан вивтырсө, да вөтөн моз и сетчис колөмыслөн
рулы...
- И кыкысь на дорыв вөрөдіс сәсся Сюласө.
- Кымынкө лун та бөрын ывласыс некысь эз услы Сюла-
ыс син улас Биярлы и чомъяс сы дiнө эз волы. Гашкө, та-
кавліс тәськассөмсыс да вермис сытөгыс олыштны. Но өти
рыт помө бара локтiс. Пөрччис маличасө да ниртласыны и кутіс
Бияр дiнө.
- Мый нө ачыд пондан?— янөдіс сійөс Бияр.

— Абу өд кулома. Тиян пö тай... саран нывъясыд... кулом чери кодъось-а.

Збыльысь шензёдана и вöли Сюлаыс, öдйөн ас дiнас кыс-кана: ворсан вира да восьса руа. Дерт, Бияр бара воштгылис юрсö.

И коймöдысь на, коставлис да, удитiс волены Сюлаыс.

— А мамыд нö мый шуö?— юалис Бияр.

— Нинöм оз.

— А пышгья кö ме коркö... ва восьбём бöрас?

— Пышйы. Койдысыд öд кольö.

Горшыс и нерöдасылис Биярлөн Сюлаыслөн воча кывйысь. Сылөн мунöм бöрын коды сöмын эз кевмысь — Мезöсыс-лы, и Вой пöлыслы, и Камыслы,— мед нин öдйöджык ульд-длас да чорыда чарöмасьлас лымйыс, и мед оз на вевъяв Сюдöыс воны Из сайсьыс.

И кутшöмкö Ен кылöма на сылысь кевмöмсö: ымрасян шондiөн сывдылис пуяс вывсьыс туктасö, шольмöдöмөн пуксьöдiс вöрсьыс лымсö, а бöрыннас войтöвтис да кам кынтис чер тыштö чеччöдан чарöмöдз.

Асья войсö, югдыштöмсö, Бияр эз и виччысь, пышйис сьод вөр пемыдас.

7

Эз и вöтчывны, буракö, йöграыс Бияр бöрся, морт шысö ни пон шысö сийö эз нин кывлы ыли вöрас. Коркö асывнас, вылын шондiөн нин, тöдöмысь, казялисны сылысь пышйöмсö да сэтчö и шойöвошисны: ульдöм лымйöдыд, пидзöсöдзыд вöйласигад, öдйö усур оран.

Ывлаыс ыштöкö Бияр дор и сулалис, кымрасьтöг да төлавтöг, луннас онялис, а войнас кынтылис дзирдалан чарöмöдз. Войя-нас и писькөдчис сийö гортланьыс сизима кодзув улöдыс: чатöртчылас да водзö. Витöд войнас воис Овкөджас.

Видзöднысö, Тутöыс долыдджык вöли сылөн вöмлы Уна-ыс дорысь, чеччалис да вурзалис гажыс бырöмысла, тувкөдiс нырнас. А Унаыс муртса и нёровтчылис морöс бердас да шлюп-кыштiс, эз и öшöдчыв сьылиас, бөр вешйыштiс. Коми ань-ясыд, гашкö, оз ставныс-а, тöдöны на асьыныс доннысö, да он и босыт налысь вывтiа нимкодьясьöмтö, пытшканыс найö видзöны сьөлөм личалöмтö. Мөдарö кö шуны, вичмис жö Уна-

ыслы виччысян шогыс да ловсö песöмыс, оз-ö верöстöг и коль да нöшта ыджыд кынöмнас. Та вöсна Бияр эз и лөгась Уна вылас, инö пуктiс сылысь этш кутöмсö.

А бöрыннас, кор Бияр водiс нин, а Унаыс пукалан на коли ломтысян гор дiнас, Бияр кылис сылысь ныр пырыс нускана никсалöмсö.

— Мый нö бöрдан? — юалис чуймöмөн.

— Сидзи.

— Ловйöн на вои да?!

— Сыысь и бöрда, — серöктыштöмөн кокньöдчис Унаыс.

Лун-мöд и кöсийс Бияр олыштны гортас, пальöдчыны йöгра-ыслы шедлöмысь, а сэсся лэччывны Емдiнас висьтасыны Памаыслы. Яндзим эськö сы водзын та дыратö да татшöм ковтöма ветлöмысь, да он öд кыскы висьтасыöмтö, синмөн аддзытöмөдз асьтö вайöд. Бурджык нин босьтны ас вылад, мый сийö шуас, да водзö вылас эскöдны на сийöс, мый абу на сэтшöм шыбитана морт тэ.

Но ва воссыгöдзыс Емдiнас лэччылöмыс Биярлөн эз и ло. Аскиа войнас и вежсис ывлаыс да лун дас, гашкö, турö-балiс рыгтыв-вой төлөн, гартöмөн пукталiс лым буссö, ыршасис нюжöдны на төвсö. А сэсся воссявалiс енэжыс да весьта-саджык шондiөн нин бара ульдöдiс да лямöдiс лымсö, войнас эз нин кынтывлы, и шондöдöм вылас нин зэр да лым сёян ру вайис лунвывсьыс пасьтала пемыдлöз кымöрөн. Кытчö татшöмнад петан гортсыыд, он кö сөнiкöсь васö корсьны?

Пыжөн нин и кывтiс Бияр Емдiнас, мыйөн дугдiс Эжва вывтiыс мунны кыз йиыс. А Куа ты вылас йиыс лыбис да зыртласис на, сэтөн рöшмöмсö да пазалöмсö и виччысис, и Эжва вылас Бияр дор ваöдыс на и петiс да визувсьыс письтöм вискöдыс.

Чайтiс, Памаыс кызмырдөн и видзаалас сийöс, букышсö оз и дзеблы, а мöдарö лои, нимкодьсö на Памаыс эз косöдлы, вашмунлис да ойгана и юалис ань сьöлöмөн:

— Воин?

— Вои.

— Менö он вид?

— Ог! — чуймис Бияр.

— Ыстылi да. Юр воштан туяс.

— Мед. Кодлыкö öд кут Коми мусö!

— Кодлы Енмыс шуöма.

— А тэныд и шуöма!

— Но, висьтась, инö.

— Висьтася. Нинöмөн ошйысьнытö-а.

— Оз и ков. Эн öд водзасьны лок.

Ньötчыд эз и торклы, сувтöдлы да выльысь юав, пель саяс сюркнялöмөн и кывзис Памаыс, сöмын акöстывлис инö пуктана, быттö тöданасö и гаралис сылы Бияр. Бөрьяпомыс весиг парскыштис Биярлы, казялис Памаыслысь дзугыльсö да, быттö элясьö нин сйö ас кежас, мыйла и ыстылис сйöс.

— Колö босьтны Сыктыв усянинсö, вöтлыны сэтысь Сюдöсö!— кайтис Бияр, медтыкö лыбзьöдны Памасö и асьсö сы водзын лэптыштны öти сайысь.— Сэки ставнас Сыктыв вожыс миян лö. И туйыд воссяс Коммуад и Ветйöад. Мынам на Мöскуасьыд.

— Вöтлынытö абу сьöкыд. Да кызди кутан-а? Тувсов рака мында на Сюдö саяд йöграыс.

— Изкар лэптам. Сотöмысь кö повны.

— Изкартö öти гожöмөн он лэпты. Дай йöзтö он лысьт унатö ордны му да видз уджсьыд. Вингыртны ковмас локтан төвсö.

— А мый нö, ланьтöдчам? Йöрмим кö, и мед? Сидзтö öд усян жö сьöлöмнад. Сэсса утшысавны¹ и шедан Мöскуаыдлы.

— Сьысь и курыдыс.

— А шу!

— Мый шуа?— зумыштчылис Пама.

— Мед лöсьöдчöны, ожманöдз кö воас. Кöрт изйыд эз на быр Гамсьыд. Ме на и дора дас кымын шыпурттö.

— Шуöма нин менам.

— А мыйысь нö курдöдö?

— Эжва кывтыдсаыс падъялöны, ачыл тöдан. И вевъялам огö судзан киён воча сувтны, уськөдчас кö Мöскуаыс. Да мед шойсö колис, а эз водзö пыр.

— Позьö öд ошкуйсö тшöтш чукöстлыны. Налөн петö жö лөгныс Мöскуаыс вылö. Мый нö, рочöсь кö?

— Сйö и бур, гашкö. Да на вылö артавнытö... Öти гожöмö петкөдчыласны, мөдö оз.

— Вынва вылас эськö быд гожöм волöны да.

— Чукöстам и найöс, ковмас ко. Энлы, мый гожöмыс висьталас. Гашкö, ветлан да?

— Кытчö?

¹ Утшыс — ошейник, рочөн кö.

— Югдінад. Мый сэн рочыс вөчөны? Совдорас да Пырасас сувтлан и. Колө кывсө кыйны сэтэысь өксыясыслысь. Синкымув и корсьөны нин меысь.

— А меным нө и восьтысясны? — ыдъясьыштіс Бияр.

— Ныылыд сёрнит. Сы вылө и вежөрыд.

— А кор, ветлыны кө? Öні?

— Öні ли ва усьөм бөрас. Сэссия некытчө нюжөднысө.

— Ог на эшты öнісө да. Мыйкө өд колө и көдзыштны. Чери кыйыштны и. Шыпуртөй на абу и. Вай ода кора¹ по-мас?

— А оз сёр ло?

— Но, эштөдча да. А гөран-көдзан дзодзөгсө быть виччысьлы.

— Медлы сідзи, — кывйө сетчис Пама. — Лок рытэя сөям.

— Ог лысьт, Вежа Айка.

— Мыйла?

— Зывөктан, висьтала кө.

— Мый сэтшөмсө?

— Но, гарыштлі тай Сюдөыслысь нывсө. Сибавліс, мися, ме дінө. Вөрөді ме сійөс. Эг на и өтчөд, — вешкыртчыліс Бияр.

— Садбыд нө көні вөлі?

— Юрын эськө да. Öдөбтылас вирыд, и вунөдлан.

— Сэссия мед мылышті ме тэнө таысь?

— Верман кө.

— Ме ог. Урсалін кө асьтө, ачыд и кыскав... Сир ёкмыльсө лов пыдіад!

— Кыскала, сідзтө кө.

— Шуньтө кокни. А мед чужлө кодкө, пи на сэтчө?! Асьсө вежны и быдтас сійөс Сюдөыд. Став коми вылас лёкөн. Ыджыд и бур вөчөмыд! — нерыштіс Пама.

— А вөтлан али кола на ме тэныд?

— Кат гортад.

— Ката. Дыр-ө нө төв дөрәтө зэвтны? Төлыс буретш и. Оз кө вежсьы вой улас. А сэссия?

— Ветлан Югдінад.

— Ветла, — кайтіс Бияр. — Мый оз ло, а тэысь вежөнтө ме некор ог тувчы, Вежа Айка.

— Но, эн кынмөдчы ва вылад, — өлөдана бурсиис Пама.

Узныисө Емдінас Бияр эз и лөсьөдчыв, сөмын Нира ордө

¹ Ода кора — май төлысь.

бөра-водз көсийліс пыравны, матыса синмөн сылы петкөдчывны, но гортас со и мөдөдіс Памаыс, да эз нин лысыт петавны сиктас, веськыда и лэччис вадорас. А сэтөн Камар да нөшта кыкөныс, кодъяс чужъявлісны сійөс, ветельяс сөвтисны кузьмөс пайгөс пыжө.

— Ловъя на? — дзерөда нюрөстіс Камар.

— А мый нө, гажыд быри коркөясъыд?

— Быри. Ёнакодь.

— Тувсов көчлөн вылыса на чужөмыд. Кыті еджыд, кыті руд. Абу на воөмыд, — пычкыштіс Бияр серамсө. Чишкавлөм бөрас Камарыслөн чужөмыс кытісюрө кеня кучикөсь на и вөлі.

— Чайтан, водзөстө он и кыскав?

— Перйы. Куимөнөсь тай.

— Юрыд потө, — кок увсыс из чужйыштіс Камар.

— Кодлөн водзджык, — ляпкөдчыліс Бияр да кималаснас бөрийшталіс, кутшөм из и босьтны.

— А мый эн кольччы йөграад?

— Дубөн сөйөны.

— А Пама дінас мый кысьясян?

— Мортөс корся.

— Кутшөм мортөс?

— Кодкөд өти би дөрө төран.

Эз и вежөрт Камар татшөм воча кывсө да эз и сяммы водзө мыйкө шунысө. Но медым оз на Бияр сайө коль венөмыс, катласьыштіс да назгыштіс:

— Мун син вежанінысь.

— Аслыд водзланьө, — ыштөкө бур кузя вочавидзис Бияр. Локтіс да и йөткыштіс ва вылас пыжсө. Сирваалөм кузь чуткөма вөлі сійө, да келалөмөн и сувтөдіс шолгасө да зэвтіс төв дөрасө. Вөлісь воськовтіс пыжас.

А Камарыс да ськөд кыкөныс, видзөдіс да, петөмаөсь нин асланыс пайгөс пыжнас ва вылас, но мыйлакө зелөдчывтөг и сынышталөны, муртса катөмыс и төдчыштө. Мыйкө, буракө, мөвпыштөмаөсь на. Виччысьөны, көнкө, кор Бияр вөтөдны кутас найөс да ва шөрланьысджык кежас, мед сэсса бергөдчывны да өдөбывьсыныс визув бөрыс тангыны сылы пыжас, мый лоан ло бөрыннас.

Ноксьөм улө на манитөдіс асьсө Бияр, оз-ө өдйөджык мөдөдчыны найөыс ли Эжва мөдарас вуджны, ойдан видзьяс вылас, кытчөкө өд лөсьөдчисны вөйтавны ветельяссө, но эз на мунсьы налөн ылөтө, гуся лөкнысө на пөжисны ылөдчиг-

тырйиныс. А төлыс тэрмөдліс нин Биярөс, повзьөдліс вой улас лөньөмөн, шлопкерлас төв дөрасө да личөдлас, и сийө вөрзөдчис скөрысла дпқан сьөлөмөн. Көрт пома йөткасян зібсө днас и пуктіс, пуклөс вылас, веськыд ки улас.

Эз и сорассьы, сідзи и лоис, кызди сийө чайтіс. Мыйон матысмис наланьө, весьтасавны да пановтны и кольыштис, найө джөма бергөдісны пыжнысө да зурган нырөн и веськөдісны сылөн пыж вылө. Бияр удитис таджикасьны да чургөдны зібсө, паныдавны налысь пыжсө да кеждөдны визув бөрыс, а сэссия, дась судзан выйысь, зутшкис мый вынсьыс дорөс увланыя.

— Ва пырө!— горөдіс кодкө. Гашкө и, ачыс Камарыс. Куимнанныс пондісны өдйөн-өдйөн сынны озынланыс.

Өти мортыд быдлаө он тырмы, нөшта нин тулыснад. Сэтчө и татчө уськөдчыліс Бияр, лунсө и войсө соравліс, медтыкө сөмын вевъявны. Сөйигас и уськөдліс кисьыс паньсө да сывк-мунліс, палялөм бөрас нин кынөмпөтсө панясыліс, и Унаыслы ковмывліс вылысь шонтыны сөянсө. Та вөсна и дузъявлісны гозья өта-мөд выланыс: өтиыслы бара нин коліс кытчөкө мунны, да тшыгылы он мун, а мөдыслөн кодзалөма нин пусян пөртыйд ли рачыд.

— Ме мыйон төда, кор садьман? Тэ понда он мырдмөд пусьөмасө!— вомавліс Унаыс, да виччысьлыны и кольліс Биярлы юрсө да пельпомьяссө довйөдлөмөн.

Кынөмыс Унаыслөн лэччыштөма нин вөлі да паськальштөма, абу нин вывті гөгрөса лыбана шушун улас, и коркө гөжөмланыс, оз кө вомдзассьы, виччысьны нин коліс сылысь чужтысьөмсө. Гортас нин бергавнысө, помасьлыгөгыс ноксьынысө, быд пөрийө копрасьнысө, эз вөв сылы кокни, а кытчө нин нуөдан сьөкыд удж вылас? Петаліс өтчид Бияр бөрся кырсьыны керка керьяссө, гогынсө сылысь и босьтліс, тэ пө чернад видлы, да ыстыны бөр и ковмис: оз уджав, а тильө уджсө, гогныштас кымыныськө и пуксьылас кер вылас, тырөма нин лолыс, видзөднытө ни ышлоалөмсө кывзыны он вермы.

Бур ногөн кө, коліс эськө кырсьыны керьяссө да тшупны и пондыны дась ульывысьыс, но регыдөн керкатө он тшуп, мый эськө и йөзөс чукөстлан, дай ачид на мед некытчө сэссия эн ылөдчы. Пучей сөйөмсьыс и видзис на Бияр пөрөдлөм керсө да кырсьяліс вочасөн, кор эштыліс. Йи мунан дзөдзөгыс уна нин лэбис ылі войвылас, кельөб бөрся кельөб долыда шыалөмөн

шлывгисны вылө кыпалөм енэжөдыс, лун дас кык-дас вит мысти, оз кө бергөдчыв на ырган көдзыдыс, и гөран-көдзан дзодзөгыс мыччыяс да көдзнытө тшөктөдас. А кытөн на и аслад муыд, кытчө пыран черкушнад¹, кытысь эжасө кокалан, кор гөгөр сувтса вөр? Бара пөрөмаинас и ковмис усъласьны Биярлы, мед нин этша вылас ид да шабді и көдзыштны.

Рудзөгыс, вөчлөм тыла вылас арся көдзлөмыс, Енмыслөн-ө-кодлөн бурөн абу и кынмалөма төвбыднас да чепөсийөма нин выль вежөднас, и видзөднысө вежөдыс эз и вөв өталягья. Да и мусиныс тани, водзө вылө кө арталөмөн, кысканаджык вөлі, сөйөда трунда сора, абу лыа лякөд, кутшөм Овкөджас. Татчө и поэьө йөрасьнытө ас мунад да ыдждөдчынытө.

Рудзөг көдзасьыс костальштөмөн и ректысис Бияр выль тыла улас, сотіс мый вермис шома пөимөдз, сөмын пөрласьөм пуясыслөн гырысьджык вужъясыс и колисны повзөдчан сьөдөсь, и найөс на сэсса берталіс зорйөн да соталіс. Выль муөдзыд тылаыдлы эськө ылын на, гөз-мөдысь путкыльтлөм бөрын на шогмана муыд артмас, но поэьө нин көдзлыны да арнас мыйкө виччысьны, и куйөдтө на оз ков суйны.

А коліс на и туяс Биярлы лөсьөдчыны. Памаяслөн тшөктөм серти төвнас вайөм көрт из чукөрыс быд пөрийө синмас и пырис сімөсь сера руд корөгьяснас, ыштөкө янөдөмөн юавліс, кор пө вөчан выль шыпурттө, сытөг али мый көсьян ветлыны?

Выль тылаыс да выль шыпуртыс и сөйисны сылысь луньяссө. Но сы весьтө и артмисны кыкнанныс. Куимысь ломзөдліс усьтөмасө да куим пөвстаөс жө и вөчис шыпуртсө, кызди айыс, Арийөыс: шөрыс дзирөдөм емдонысь, а өтар-мөдарас небыд көртысь, мед оз чег ни оз рабсьы. Кесліс зудья из ылын да видліс шыпуртсө, кутшөма босьтө, кос майөг кызөскодь сувтөдіс муас, а өтчыд сөтыштөмөн и орліс майөгыс.

Чери кыйөмсө Бияр эз и лыдды уджөн, ылөдчыны быттьөкө и петавліс ва вылас. Но өд и сэтысь мудзөн да көтасьөмөн воліс. И черисө, дерт, вайліс. Кульмысь чериыд абу гожся кодбыд югыд синма, нинөмысь оз видзчысь, быд вутш костө да бадь улө пырө ниртчынысө ойдігад, сөмын вөйтав кулөмтө ли везөттө.

Юрсө гыжйыштны эз эштыв Бияр, сідзи и коли куим

¹ Черкуш — көрт амыся, шабалатөм пу гөр.

вежоныс¹. А гōран-кōдзан дзодзōгыс мыйлакō эз на мыччысь-лыны. Тыдалō, кōдздōдōмсō на виччысисны кōнкō, да на серти и лои сēsся: кык чунь вомлōс кыза кынтыліс выль йисō асыв-вой тōвнас, сōмын визувинтясыс и кольлісны восьсаōсь, да сэнi и саксисны воом нин чōжыс.

Но лун-мōд и ыдждаліс асыв-вой тōлыс, рытив-лунсянь сылы паныдōн пōльыштіс да бōр вайис шоныдсō. А сēsся и шондіаліс син ēрана да весиг войыс мича югыд лоис воддза сертиыс. Войнас, чери кыйигас, и кыліс Бияр гōран-кōдзан дзодзōгыслысь готсбōмсō, чатыра юрōн дыр колльōдіс найōс дольдпырысь. И асывнас, сēйнысō эз пуксьыв, ветліс кōдзынсō. Пинкайяс ышмисны выль тыла вылас, лэбалісны да пуртіка-сисны пōимас, чивзісны дугдывтōг, некод нин эз тюрзы, ту-нав кōдзыдсō.

Кор на Бияр ноксис шыпуртнас, Унаыс гōгōрваис сылысь висьтасьтōгыс олōмсō да няргōмōн юаліс:

— Бара али мый кыгчōкō мунан?

— Колō.

— Кыгчō?

— Кывтыд.

— Кор?

— Регыд.

— А ме нō кызди? Ōтнамōс колян? Татшōм кынōмнас?
Кула мед татчō?

— Эн урсась. Быдōн на вайлōмаōсь кагатō,— вомаліс Бияр.

— А лō кō мыйкō? Ватō некодлы мыччыны!

— Ме али мый гōгиняла? Сюра-тошкаыс? Йōзыс гусьōн вайōны-а, сизим лун на оз петкōдчывны каганас. Мутисō али мый лэдза дінад? Воштōмыд нин мывкыдтō.

— А корсь гōгиньсō. Медав.

— Ме корся? Ачыд он вермы?

— Намырōс од ог кор,— чилōстіс Уна.— Ōти бур тōдса и эм да!

— А мый нō Намырыс? Оз лōсяв?

— Оз! Кага вайлытōмыд!

— А Адаслысь кō мамсō?— чуйдіс Бияр.

— Гашкō и, сійōс. Коркō тай пукавны воліс да пиōс вись-таліс. Чукья пō кынōмыд. Кыыс небыд и.

— Но, ветла.

¹ *Вежон* — важ коми ногыс вежоныс вōлōма нель лунысь.

— А сьолөмыд асад абу жө ньоти. Бур кывтө на лоө пычкыны тэнсьыд.

— Мойдлин нин тайос, дугды. Абу тэ сөмын шогыс да төждыс менам.

— А медся ыджыдыс, Енмыс ногон кө,— вочаалис Уна.

— Көин гозьяо сідзтө пöран. Ай көиныс пö тай энъыс-лысь и кывзысьö-а.

— А лёк нö?

— А Коми мусö кодi видзас?— ланьтöдис Бияр Унасö.

Адаслөн мамыс динö и ветліс сійö корлыны гөгинясьнысö Унаыслы, сёрнитчис ськөд, мед бөрья лун-войсö оз и энөвты Унасö да воча чомьяс и лоө ставыс, сы вöсна мый абу на олан керка воча чомыйс да пывсян пидди мед и лоө, а ачыс сэки, гашкö, оз на и вевъяв гортас, бара ылі туйö мөдөдчö да, а вевъялас кө, дорччан колаас олыштас.

Висьтасьöма, тыдалö, мамыс Адасыслы, тшөтш и туйö мөдөдчөмсö Биярлысь гарыштöма, вöзйысьны и локтіс Адасыс Биярлы:

— Мунан пö тай кытчөкө?

— Колö ветлыны.

— А ме тшөтш ветла?!

— Эн ышмы. Ог ме чөж кольк öктыны мун.

— Сійö и эм. Чайтан, джөмдөд лоа тэныд?

— Эштылан на юнад пудьясьны,— öлөдис Бияр.

— А сідзтө кулан жö гажтөмсьыд. Оштö чергöдан, и то быгтьö ловзылан. Ветла жö, а?

— Нинөм кыксьыс. И он лысьт лөгасьнытö.

— Мыйла ог лысьт?

— Мыйла вирöй тэкөд лөсялө. Ен ськөдөн, эмөсь на коми йöзыс.

Та вылö Адас, дерт, эз на бурась, ёна на көкөдис Биярöс, мед босьтлас сьöрсьыс, но Бияр эз сетчы.

Ойдөм Эжваыс сьöрт вылас төртөг на муткыльтіс гудыр васö да шердйөдөмөн и нөбөдис Биярöс пыжнас. Полөмыс весиг босьтліс сійöс, оз-ö письты кыткө пыжыс. Сиралис эськө гөгөр выльысь, донөдөм көрт беддён дзижалис пидөса-дор пөвьяса йитвежьяссö, да ваыдлы öд ыджыд кост оз и ков, а шердйөмыс төдчывтөг оз на ов.

Эз-эз дай видзөдаліс Бияр, оз-ö кыткө пыр нин ваыс, да некыс на эз казявлы, и ышловзылыс мыйкө дыра кежлө. Па-

ныда төв нырыс сөмын и резыштавліс пыжас васо да чужо-
мас пызйыштавліс ва буснас. Но сыысь о́д шогыд оз босыт.
Астыа кыанас петіс гортсыыс да лун шөр гөгөрыс и воис Емді-
нас, сувтіс Пама орд мыльк весьтас.

Тайо пөрийо Памаыс пуксыөдліс нин сійөс лунъясө сөй-
ны да нөшта и кода сурөн на. И лючкиджыка туйдөдаліс,
кодкөд көні да кутшөм сёрни кутны, бара гарыштіс, мед оз
и пов да омөльтны сійөс, Памасө, и видлас Совдорса да
Пырасса өксыясыс водзын, ыштөкө гусьөн сыысь и вөчө,
аснырнас.

— Кыыйыд на о́д оз бергөдчы сідзтө, Вежа Айка. Тэ сайын
и сулала, а тәнө жө бытыө и вузала. Шуласны тай, аслад
понийыд пө пурө,— зывөксыйс чуқрасыштіс Бияр.

— Сыысь ме ас вылө лов сьөкыдсө босыта. Ковмылө и
морттө самөн кыйны. Дэльөдышт ичөтикаөн, да вожалас оз
налөн кывныс. Сы мында и колө.

— А оз кө менө и сибөдлыны на дінө? Шуасны, коді пө
тэ сэтшөмыс?

— Со тайөс өшөдлан сьыліад, лаз улад,— мыччис Пама
ыргөнысь йитөса эзысь рубөж, чөж серпаса.— Петкөдлан, и
олас. Баяр пас тайө.

— А ме о́д некод на,— пыксыыштіс Бияр.

— Бөр и ваян меным. А верма и кольөдны,— нюмырт-
чыліс Пама.— Кыдзи ветлан?

— Ветла,— доровтіс Бияр юрсө.

— И кык серакусө на тайөс нуан,— мыччис Пама еджго-
ват кучикысь вөсныдык гөрддымыяс.— Этайөс, лөз көртөдасө,
Совдорса өксыыслы сетан, а этайөс, гөрд көртөдасө, Пырас-
саыслы. Эн сорав.

— Ог, ог о́д вунөд.

— А мамыыд өтдор кодкө матысыс коли эз Югдінад?

— Некод эз. Уналысь кө мамсө он лыдды.

— А мыйла нө он лыдды?

— Лыддя. Да колө о́д мыйкө и вайны налы. Донатор. А
мый ме вая? Сөмын ачымөс на и петкөдла,— шеныштіс Бияр
кыяснас.

— На босыт. Аслыд вылө и козин вылад,— мыччис Пама
ичөтик кучик сепыс, көні мыйкө көрт шыён зилькмуніс.

— Ме ог төд... Бытыө каньгөма лои да.

— Ньоти эз ло. Менам лөсьөдөма и вөлі. Вескыд кыв-
ыйыд меным таысь на дона. А пывсин эн туй водзад?

— Эг. Абу на аслам пывсяныс да. Сідз пожъяси воча чом-
йын.

— Коросьтөгьд и вөтлін, чайтан, сөстө? Мед вөлі пыв-
сьома лючки, да аски и кывтан водзө.

— Пывся. Гашкө, ог тани-а.

— Кытөн нө?

— Мыйкө ордын, — ружөктіс Бияр. — Нира ордын. Сылөн
эм пывсяныс.

— Ань чөскыдыс, шу, и.

— Эмтөм абу.

— А аслад кутөдыд?

— Кутшөм кутөд?

— Вежавидзөмыд! Мый эськө оз кыскы да йөртөм сьөп
аньыд динө?!

— Ме өд ог сы понда.

— Туту йывсьыд эн висьтав, — вомалис Пама, но эз
скөрысь, ачыс на бөрыннас шешмунліс.

— Уллона жө, веськыда кө. Төвнас тай кор волі.

— Дыр-ө уллунасян-а? Мегыр вылө кө сувтөдласны!

— Кутшөм мегыр вылө?

— Сэтшөм жө. Муыс оз понды кутны, да быть көнкө су-
лөдышт. Гөтырсьыд вывті ветлөмысь.

— Но, тани пывся да узя.

— Ачылд төдан.

— А Нира ордас нө? — шөйөвошліс Бияр виччысьтө-
мысла.

— Абу өд дом йылын.

Аслыс Памаыслы, буракө, личыдджык лои сьөлөм вылас,
шедыштіс лов-вирыс сыысь, мый ас кадө и локтіс Бияр, ньөти
эз нюжөд ветлөмсө да лючки, гашкө, и ветлас сылөн гуся мог-
нас, да та вөсна эз и дзескөд Биярөс, мышыштана пуктіс сы-
лысь ыкшаасьөмсө, Нираыскөд мусукасьөмсө. Эз тай и чи-
рышт өтчыдысьөн да помөдз, шмонитөмөн и өлөдіс, мегыр вы-
лын пө өд сулөдасны.

Тадзикөн Бияр и висьталіс аслыс Памаыслысь небы-
дасьөмсө, кор осььлаліс Нира ордас.

Сугөн вөлі бөрийө Нираыс пос помас, да сэтөн и лои ськөд
воддза сёрниыс: кутшөма нин олан да, кытчө мунан да. Сэсья
Нираыс пыр и мыжмөдчис:

— А кольін тай куястө...

— Но.

— Кык анча ку ме сэтись видзи нин. Нянь вылө. Ог төд, мый шуан-а.

— Нинөм ог. Ставсө и видз. Ачым тай со дөзмөдча жө. Гажөй быри и.

— Менам и эз, чайтан?

— Сийө и бур.

— А сөйөмыд, шуан?

— Сөйи.

— Шойчы, водлы да. Лок, вольсала.

Керкаас Бияр вольсалөмсө и вермис виччысьны. Но ма- ласьнысө сылы Нираыс кузя эз сетчы, өдийө и кутчысис сой- ясас да лэдзис увлань:

— Эн сэсса.

— Мыйла ог?

— Оз позь меным.

— Мыйла оз?

— Сидзи.

— А пывсянтө ломтылан?

— Ломтыла. Дыр-ө нө кык гортө?

Пывсян вылас и эновтчис Бияр, пөрччысис да водис шойч- чынысө. Чайтис, пывсигас и волас сы динө Нираыс коркөя мо- зыс, да водзөссө сылы таысь өти ли кык вежтан на сетас Па- маыслөн пунктөмысь: востыліс татчө локтігас кучик сепысторсө, да дасөс арталіс сэтись эзысь вежтансө.

Но эз и волы бөртинас Нираыс пывсянас. Куимысь эш- тыліс корөсясьны да мый дыра на куйлыны виччысигмозыс, но дількьялан сьөлөмөн и ковмис киськасьнысө бөръясьыс да пасьтасьнысө.

— Эн тай нө волы?— дузьялөмөн и юалис Нираыслысь, локтіс пывсянсьыс да, весиг горш косьманінас көзөдысь вайөм зараवासө эз вермы пөттөдзыс юны.

— Эг нө шулы, оз, мися, позь?

— Ме эг сидзи гөгөрво. Чайті...

— А полөмсө менсьым? Эн чайтлы?

— Мыйысь?

— Мыйысь!— нерыштис Нира.— Быдта нин өти айтөмс.

Мөдөс ог лөсбөд сэтчө!

— Сэк тай нө эн пов?

— Сэк позьбө вөлі. А өні буретш... матө мед көйдысыд эз веськав. Лун вит на. Висьталөны эськө...

— Мый висьталөны?

— Кутшөмкө турун, кага вайтөмөс. Пузьөдан кө пө сийөс да юан суксө, он пө некор и сьөкты. Да кытысь сэтшөм турунсө өні босьтан? Юавныгө на он лысьт некодлысь-а.

— Мыйла.

— Ёрасны, кывсяс да. Му вөрзян лёкыс и эм аныдылы сьөктөмсьыд асьтө тадзтө тшыкөдөмыд.

— Абу, инө, и колөма волыны,— нурбыльтіс Бияр.

— Лөгась да эн и волы сэсья.

— Лөгасьнысө на өд тэ вылө он вермы. Би дорө моз и кыскө.

— Он кө и, мөдысьөдз. Ог на пөрысьмы ни урөсмы.

— А, гашкө, ме муна да? Оз жө тай унмөй волы-а.

— Кытчө мунан?

— Кывта.

— Вой улас?

— Абу өд арся вой.

— Ме нинөм ог лысьт шуны,— дзугыльтчис Нира.— Сөйтөгыд ог лэдз-а.

Пуксьыліс Бияр сөйнысө да керкасьыс петтөдз падъяліс на, кольны абу Нираыслы өти ли кык вежтансө. Эз и сибөдлы со сийө, да эз и ков быттө лышкыдасьнысө сы водзын, а мөдарсяныс кө, абу жө и мяча тадзтө, быттө ньобасла и воліс Нира дорас, эз лолыс кыскөмөн-а.

— Со меным Пама туйө сетіс,— кыкис Бияр лазув зепсьыс кучик сепысторсө да перийс сэтысь кык вежтан.— Коля тэныд кыкөс. Эн ошйысь-а, кытысь.— И пуктіс пызан вылас.

— Йөйыд тай эм!— видзөдліс да бөрынтьчис Нира.

— Мыйла йөй?

— Та вылө өд мыйта... быдтор шедө!

— Мед и шедө. Эня-пиалы. А көні нө Пилимыд?

— Эстөн тай вөлі сяръясьөны. Налы өд, зонпоснидыды, лунтырыс этша. Кынөмыд оз сюмав ни.

— Сідзи и колө. Но, вольтөдз.

— А босьт бөр өтісө. Аслыд на ковмас.

— Пуктөмсө оз босьтлыны.

— А мый бурьсь, пуктін эськө да?

— Ме ог төд. Гашкө и, мусаысь,— вочавидзис Бияр.

— Кыськө тай эм!— лигыша нюмдыліс Нира.

Мый вöлі öні, тырөн на мунысь Эжва кузяйд, кывтнытö! Пукав пыжад да видзöд сöмын, кытчö шывгöдö, оз-ö баддьöсь пöлöйö суй. Бöжалан пелыснас и курасьышталіс Бияр, и то на ёнджыкасö сы понда, мед кынмöмыс оз босьт.

Узьыштнысö да кокъяссö веськöдны асывнас нин, лыбöм шондiөн, сувтiс кутшöмкö керöс улö. Вонсö эз и зэвтлы ков-тöмысла, йöра вольнас и тубыртчыліс уль муыс кыскöмысла да ыркыдысла. Чайтiс, лун шöрöдзыс и папаялас, а садьмис да, мöдарсянь нин кучкис шондiыс, рытив-лунсянь. Биасьлöм да сёйöм вылас бара на кадыс муніс, и рыгтявылыс коркö и лои водзö вөрзбöмыс.

А локтан асывнас, олöны нин вöлі йöзыс, воис Совдорас. Дольдыс вылö бара сiйö пöльöсö и паныдаліс öзынас, кодкöд маті сёрниö и воліс, кор совла могнас сувтлісны татчö Уна-ыскöд. Мышку саяс гымгаён и лэччис пöльöыс бужкöд выв-сьыс, аслас кум дорсьыс.

— Олан-вылан, бур мортыс!— чолöмаліс Бияр.

— Ола на эськö да. Аслад мед оз жö бырлы бурыд. А эг тай нö и тöд?!

— Югдiнысь. Арийöлөн. Эн на кö вунöд кольöм восьтö?

— Сiйö тай и эм.

— Сiйö. Сувтлім тай совтö корыштны. Гöтырпукöд.

— Чöв, эн нин казьтыв юр яндзимтö.

— Öтнад тэ и тöдiн садьтö да.

— А скөрман жö öд пон чукöрыд вылö. Шуи тай бöрын-нас, мися, курдöдлас на тайö совсьыныд, да муртса ачымöс эз пурны. Öні на ме вылö эралö. Гашкö, сiйö и кераліс пыжкöс. Дöмсъыны ковмис,— норасис пöльö.

— Коді?

— Дзарöыс. Коді тай карласис тэ водзын.

— Аддзöдла кö эськö сiйöс!— кайтiс Бияр.— Кута жö вöлі юрын-а.

— Со тай вöла эстөн, лажмыдас. Радз лэччöдöма. Менö эн удты-а.

— Ог. А кытөн нö öксъыдлөн ордыс?

— Пожöма дзибъяс. Да висьталöны, нёрпалö пö. Пöжöм йöв вылын и олö. Кынмöдчöма дозмөр койт вылын. А мый нö тэ, сы дiнö могөн?

— Сы дiнö. Памасянь.

— А ветлы! Мекöд эн сулав тан! Ме тэнö лунтыр боль-гöда! Дзарöыд мунас и!— тэрмöдліс пöльö.

Бужод вылас кайс Бияр да сәтi и восьлалiс кывтыдыс лажмыдiнөдыс, мед öнi и топöдлыны Дзарөсö да перйыны сылысь Унаыслысь сойпоссö. Вöла туйсьыс артмöm кырас йылас пур домавлан сюръя пом чурвидзис, да сы вылö и пуксис виччысьлынысö, вадорас эз нин лэччы.

Регыд и мыччысис Дзарöбыс: пуксьöма вуж додь вылас да нёръялö вöвсö, дыш лоöма подöнсö кайыштны.

— Сувтлы!— горöдiс Бияр, эськö нинöмла и вöлi да сэтшöм матисяньыд. И воськовтiс на водзлань.

— А-а...,— кальöгасьлис шöйöвошöмысла Дзарö, сэсся Биярлөн шыпуртыс вылö и лазгöдiс синсö да нёрвотчис, тайкö усяс додь вывсьыс.

— Чеччыв!

— А мый нö?

— Висьтася, эн кö тöд.

— Тöдi.

— Тöдiн кö, и ветлы гортад.

— Мыйла?

— Ваян, мый аслыдавлин. Вöлыд тан овлас.

— Вая. Гöтыр новлö.

— И некодöс бöрсьыд! Вöвнад и мөдöда шойтö!

Лютi-лётi Дзарö котöртис нöрыс паныдыс сиктас. Вöлыс вöрзьылис сы бöрся, да Бияр кутис дом помöдыс, кежöдiс эжа вылас, сукджык вежöдаинас, мед йирсьö. Ачыс бара пуксис сюръя пом вылас.

Эз и дыр ветлы Дзарöбыс. Пошиктöмөн нин довксöдiс-лэччис нöрыс вывсьыс да мыччис Биярлы Унаыслысь ыргөн сойпоссö:

— Со, кодöс босьтлi. А тадзтö ме жö и пайкöма коли. Совтöг нö катинныд?

— А коньöртöмтö миянös он артав? Йöграяс ми тэныд лоим?

— Мыйыс оз овлы да. Позьö öд мылыштны.

— Мылышта вот жöкльöös!— шусис Биярлөн, да сэтчö и ыльöбтiс чöжсьöм лёкыс: кытчö веськалö косьышталiс Дзарöлы, кытчöдз эз сунтшикась сийö эжа вылас.

Бöрыннас, нöрыс йылас нин шавксöдiс да, сувтовкерлiс Бияр, полясян лолөн вöтлiс бöръя лёксö. Видзöдлiс горулас, кулöма-ö-ловъя Дзарöбыс. Вöрöдчис нин сийö да лэптавлiс юрсö, кыссьышталiс доддьыс дiнö. Таысь Бияр и бурасис ас вылас: дырөн, а бергöдiс жö коньöртöмсьыс

водзөссө. И веськөдчис разі-пели керкаяс костөдыс пожөма дзибъяс, өксы ордас.

Сэні сійөс, дерт, эз на лэдзны сувтса керъяса гөрөдсьыс¹ водзө, коді пө тэ сэтшөмыс. Ковмис висътасыны, мый Пама-сянь, да петкөдлыны рубөжсө. И то на сулөдісны өдзөс орт-сыладорас, кытчөдз эз лок бөр өти видзысь, коді котөртліс висътавны өксыысы. Сійө жө сэссия и нуөдіс Биярөс өксы дінас, пыртөдіс ыджыд вежөс пыр на ичөтө, но шыпуртсө тшөктіс кольлыны ыджыдас.

Джуджыда лэптөм вольпась вылын, морөсөдзыс шебраса, мышку саяс юрлөсыс, пукаліс өксыыс. Шуласны тай мукөд морт йывсьыс, абу пө и быдмылөма, сэтшөм и вөлі сійө да нөшта нырсермунөма омөльтчөмысла. Эз кө айсяныыс вудж ыджыдалан артыс, эськө некод эз и пукты сійөс өксыад. Тшы-көдөмаөсь быттьө йылөмсө.

— Ен мед видзас, югыд өксы! — копыртчыліс Бияр.

— Асьтө водзөс! Кирга да, эн дөзмы.

— Ог. Висьөмыд өд оз юась.

— Эг тай нө аддзывлы тэнө Пама ордсьыс. Баярлөн пө рубөжыд-а.

— Эз и пукты. Сідзи сетіс. Туйө.

— Мый нө ворсөдчө?

— Гашкө, мед кесъяси сылы.

— А мый нө тэкөд велөдіс?

— Нинөм эз. Со тайөс серакусө, лөз көртөдасө, тшөктіс сетны тэныд киад. Сэссия пө кутшөм лоө воча кывйыс.

— Эны, лыддя да. Пуксыы, эн сулав.

Бияр пуксис пызан дорас, а сэні ляпкыдик гөгрөс дозйын, тусяпу вужйысь кыөмын, еджыд чөлан сулаліс, гашкө, кык ки вомлөс судта. Видзөднысө, эз пызъысь вөв сійө ни личкөмөн қосътөм рыськысь, а мыйлакө вывсяныыс чунялыштөма гуранөн. Өксыыс намөдчис, кылө, серакусө лыддигас, сылань эз и чөвтлы синсө, да телепит лои Биярлы видлыны, мый сэтшөм еджыдыс, ножөдліс кисө да чуньыштіс. Вөлөмакө, сов! Пуөмөн ли сідзи пактөдөмөн пуксьөдөмаөсь сов суксө, да зэв донатор и артмөма. Татшөм коланаыд вылө мый көсъян позьө ньөбны, сепыс пызь на, гашкө.

— Кужан он лыддысьнысө? — юаліс өксы.

— Ме ог. Менө некод эз велөдлы.

¹ Гөрөд — топыд да джуджыд йөр вежөртасын тані.

— Этаті тай эг лючки гөгөрво да. Этайё пассө. Вар али вер лоо?!
— А водзас мый? Вылісянныс?

— Мөскуаысь тай өлөдө. Көрта киаось мед вөлім. Ожман кежлө.

— Сідзкө, варыс и лөсялө,— шуис Бияр.

— Мыйон төдан?

— Лэдзан кө татчө Мөскуатө, варон и лоан сылы. Он нө?

— А сьөд кө локтасны? Венан кызкө сы мындасө? Лөсьыд Памайдлы ылісянныд тшөктасьнытө. Мед пуксьылас татчө!

— Комисө өд позьө жө чукөртны. Ошкуйсө да.

— Уна и чукөрмас комид! Шырнысө али мый ловъявыв-сьыныс? Сэссия мед бырам му вывсьыс?

— А мөд ногыс нө огө бырөй? Оз пөдты рочыс?

— Гашкө и, оз на. Висьтавнытө он лысьт-а,— курыдысь моз чукыртчыліс өксы.

— Мый?

— Волісны тай Югдінсьыс. Ва туйнас нин. Мөскуа улас и вөзйөны пырны. Оксьон жө пө и колян татчө. Сөмын воттө кутан вайны-а.

— Сэссия мый шуин?

— Эг на веськыдасө шу. Кытшлөдлі на.

— А, гашкө, сідзисө и бур да?— сюрис Биярлы комыс нылыдасө юавны.— Некытчө жө он воштысь-а Мөскуасьыд. Шунытө на эськө татшөмтортө кывйыд оз бергөдчы да.

— Эн и печлась, инө, кывнад. Бурьыд ывлаыс моз на веж-ласьсө, талун пөжө, а аски пужъялө. Талун теткөдчө тэкөд Мөскуаыд, а аски шошаөдыд петкөдас, кокыд оз инмыв.

— А мыйла нө эськө теткөдчө?

— Синтө пөртө. Югдінас на ёнмөдчө да. Изкар и лэптө аслыс. А мед ёнмөдчылас, бырө миянысь полөмыс!

— А кызди нө сэссия? Мыйкө ог ме тэнө гөгөрво.

— А ме ачым шөрө-выйө вошөма,— висьтасис өксы.

— Тайос нө и висьтала Памаыслы?

— Эн. Мыйла мортсө килькувтөдны? Сідз нин ставным усян сьөлөмаось да. Юрйыв кодзувтөг нө и колям сэссия?

— А мый нө висьтала?

— Со тай гижөма ачыс, көрта киаось пө мед вөлім. А

ёнмөдчыны и колө. И Коммуас петаваыны Сыктыв йывтыис. Сэтысь көрта колансө тшөтш ваявны. И став өксысө, менө и, чорыд дзабырө босьтны. Овны кө, өти могөн овны. Со и воча кывйыд менам.

— Абу и шогмытөм.

— А тэ водзө на?

— Пырасөдз, — вочавидзис Бияр.

— Сэтөн пельтө чошкөдлы-а.

— Чошкөдла.

— А сөйтөм на өд, көнкө? — юалис өксы.

— Сөйтөм.

— Висьтав, мед вердасны.

— Висьтаа. А тэныд бурдны дай, — бурсиис Бияр.

— Бурда жө кө-а. Юрөй абу нин биа да.

— А этайө нө мый татшөмыс, еджыдыс?

— Сов. Пуөмөн вөчөма. Висьталөны тай, лолавнытө пө отсалө. Тыястө весалө. А эм на өд татшөмыд, колө кө?

— Колө.

— Шу, мед сетасны.

— А водзөстө?

— Эн дөзмөдчы, — вочаалис өксы.

Мөдарө, вылө донъяломөн, и петис сы диньсы Бияр. Вежөрсө и шаньсө, майбыр, сетлөма на сылы Енмыс, вывтырсө абу-джык-а.

Эжва вом дорас, буретш сы весьтын кыркөтшас, кытысь кольөм во, Унаыскөд катигас, вөйшөдліс дзодзөг котырсө, и узьмөдчис Бияр. Буждалөма вөлі кыркөтшыс гырысь локөбъясөн, да сайөдыс пыжыслы йөз синсьыс өдйө и сюрис. Аслыс выліас кыкысь кавшасьлыны ковмис-а: өтчыдсө нопнас да ва тыра пөртнас, мөдысьсө воннас да йөра вольнас.

Пырасөдзыс эськө этша нин и коли, сөмын и пет Вынва вылас да катышт дырөкө, но сыннысө визув паныдыс и дышөдіс, и төлыс паныдаліс төв дөрасө сувтөдны. Мудзтысян, колөкө, жаявтөдзыд, а войнас нин коркө и воан. А коді кытчө лэдзас тэнө войнад?

Узис сэн кыркөтшас да аскинас и катіс Бияр Пырасөдзыс. Еджыд юра ай токты¹, повтөгыс нин уялысь, ыштөкө тшөтш отсаліс сылы пельсасьнысө. Лөсяліс водзвылас да кузяла

¹ Токты — гөгөра.

дэльөдiс: сибөдлас матө да пызыйштас ва вывтiыс, вөтөд пө, колөкө. И водзө сы бөрся сынан мудзтө кывтөг.

Код төдас, гашкө, сийө видзысьыс и вөли, бара сы шөрө и веськаліс Бияр, кодкөд тшетшыйсьыліс кольөм воас, кор сувтлісны Унаыскөд Пырасас. Веськыд киняулас шысө кутөмөн лэччис сийө вөра нөрысьыс да сувтiс сунтола бужөд йылас, вөртөм синмөн сөйис Биярөс, виччысис пыжнас матысмөмсө.

— Коді?— букөстiс сэсся.

— Морт. Он өмөй аддзы, кык кока?

— Мый тась корсян?

— Со тай токтысө, кутлі нин да пышыйс.

— А мыйла шыпурта?

— Пон курчөмысь. Тэ тай беддя жө,— эз эськө ков, да тойліс Биярөс вечмасьнысө, водзөс дзерөдны видзысьсө. Пуктасны быд сямтөмсө ыджыдалыштны йөзюд вылын, да увтыртны морттө и кыскө найөс.

— Он кө эськө лючки висьтав!

— Мый нө вөчан?

— Кайлы!— чиктыліс видзысь.

— А лэччыв ачюд. Мыйлакө өд вердө өксыыд.

— Ме ог. Менам потшөма тэныд туйсө.

— Потшөсыд өд абу на изья мусюр,— шуис Бияр да нюжмасьштіс. Сэсся косөджык кыскыштiс пыжсө да кидөс вылас бурджыка идралiс көлуйсө. И вөлись вөрзөдчис бужөд йылас катөдысь туй нөптовөдыс. Но шыпуртсө киас босьтiс, сөмын эз лэпты-а вылөджыксө.

Вывсяньыс увлань, Биярлы морөс весьтас, и чургөдiс видзысьыс табъя көрт пома, йывланьыс кык дорөсөн ёсьтөма шысө, нөшта кө оськовтас сийө, воча и бытшкас кусыня гырдыдза вывсьыс. Та вөсна и кынмыліс Бияр да мөвпыштiс, мый ырыштчас кө шыпуртнас, оз нин и удит сөтыштнысө видзысьлөн шы воропас. А висьтавнысө, кодi сийө сэтшөмыс, петкөдлыны рубөжсө сьөлөмыс эз жө лэпты: ачыс быттьөкө и повзис водзджык. Тыдавтөм ортыс-ө-кодi сэсся чуйдiс сылы увсяньыс и сапкыны шыпуртнас да ордны ли чегны видзысьыслысь шы воропсө. Ратшмунлөмыс та бөрын шы воропыслөн и кывліс, да бужөд улас и лэбовтiс көрта помыс.

— Т-тадзи т-тэ?!— мөмөтасьліс видзысьыс.

— Кеж сэтысь, гырдөсьта!— кайис Бияр бужөд йылас.

— Асьтө и оз, чайтан? Ылө и нуан коктө? Отнам и эм тани? Волөй!— горзыны кутiс видзысьыс.

— Со тэныд!— петкөдліс Бияр рубөжсө, мед оз увтчы пон моз да вөтлысь бөрсяныыс.— Көні өксыдлөн ордыс?

— Эстөні. А удтан менө?

— Удта, дерт. Вөснъыдик козыйд нин абу сюрөма, рөшкыд пожөмсьыс и вөчөмыд шы вороптө. Зырымөсь ныр!

Нөрыс вылас, сэтөн, кытчө катөдіс туйыс, кола нисьө сайник сулаліс, өдзөстөм да костөн кольөм бердъяса, и олома нин видзысь өтнас ворсіс сәні шегйөн паськыд пөвъя дісек вылын, печлаліс лөзөн да гөрдөн мичмөдөм шегъяссө ас пыддиыс и мөд ворсысь пыддиыс. Ворсөмсьыс ылаlöмысла эз и кывлы сийө Биярлысь лөктөмсө. И мөд видзысьыслысь горзөмсө, буракө, абу кывлөма ли абу инө и пунктөма сьөкыд пельнас. Кипельыслөн черладор помыс ортсын и тыдаліс берд костөдыс, босьтан кө, оз и казьявлы.

— Гусяла!— шуис Бияр да нюжөдліс кисө, ыштөкө кыкыны и көсийө кипельсө.

— Эн! Юрөн ог мын! А тэ и локтысьыс?

— Ме. Лок нуөд өксы ордад.

— Нуөда. А коді нө, кытысь?

— Емдінысь. Памасянь.

— Абу Камарыс кодь да?— ыдъясис олома мортыд.

— Сы пыдди. Со, колөкө,— перйыліс Бияр рубөжсө.

— Адззылі. Нуөда. Öнтай на рочьясөс нуөді. Куимөс.

— Ошкуйяс?

— Абу. Югдінсянь. Мөдысь нин лөктісны ва туйнас.

— Мый нө тась корсьөны?

— Асланыс кө кыскөны-а. Сийөс тай йөзыс сөрнитөны.

— А өксыныд кодарө?

— Ме ог төд. Миянлы өд мый тшөктасны.

— А мый нө тшөктасны?

— Мед огө сулөдөй найөс, пыр и вайөдім.

— А абу и лөсьыд водзасьысьястө сулөдны.

— Энлы, асьтө өдийө оз лэдзны,— дэлөдана каймөстіс олома мортыд.— Сэссия ме вылө эн лөгась-а.

— Ог. Абу өд гуга-бана.

Веськыдвывланяс нөрысыс нөшта на кыпаліс, да вөр діөдыс сыланьө восьлалігөн и паныдасисны куим рочыс. Вадорас нин найө лэччисны, петөмаөсь өксы ордсьыс да, варовөсь кыпыдысла. Но пыр и ланьтісны, мыйөн казьялісны Биярөс тасмаас пысалөм шыпуртнас, да падвежөн и кежөдчисны воча лөсялөмсьыс, өддзөдісны воськовнысө. Сөмын эз повзьөмысла, а

син улас Биярлы веськавлөмнысла, төдөмысь. ДаЙ кыкыс, гашкө, и вөліны рочыс, а коймөдыс, яла рөма синмаыс, кодкө коми и вөлі, Югдінса, аддзывлөм чужөма. Велалөма нин, буракө, рочнас, да комиыскөд сёрнисө кутны и новлөдлөны сійөс рочьясыс.

Өксы орд дорас вотөдзыс пөсис Бияр юр вежөрсө, коді эськө вермас лоны тайө комиыс, ловсө вузавлысьыс. Абу-ө Югдін мөдлапөвсьыс, Номъя сиктсьыс, орөс зонмыс, Матө нимаыс, коді вөлі вошөма войнас Мөскуаыскөд ожман водзас? Сійө кө и эм-а? Сійө сәсся эз нин и усьлы Биярлы син улас! И бара сыысь, пөжөсь вираысь, и колө видзчысьнытө. Төдтөг эз ов сійө, коді воча локтө, өдйө тай и намыштгис мыйкө кык рочысла, мед ланьтласны. А өні, көнкө, легөдө нин бөжсө, висьтавлө Бияр йылысь, со пө и аддзылнныд, кодөс медся өна көсийлнныд кутнытө.

Колөкө, оз на и вөрзьяны Пырассьыс, виччысьласны кытөнкө вадорас да сэтөн нин мыйкө вөчасны Биярөс. Куимыдлы, налы, мыйысь повнысө? Эсійө на, сямтөм видзчысьыс, вермас на дор сувтны и. Оз жө висьтавтөг ов ни Бияр йылысь, Памасянь пө ветлөдлө. Лооны кө эськө вадорас йөзыс, нинөмысь на и повнысө да, оз на рочтө, төдөмысь, дорйыны, да коді нө луннад вадорад довъялө, рыт-асывсө и уськөдчылөны черитө кыйны да.

Сідз нин дзугылыс босьтис Биярөс, а өксы ордас дыр на эз и лэдзны. Ачыс на өксыыс, буракө, шөйөвошліс виччысьтөмысла: сөмын на сёрнитгис рочьясыскөд, гашкө и, сетчис на лань да көсийысис мыйкө асланьыс водзөсөн, а сэтчө и Памасянь мортөс висьталөны, сыкөд колө кызкө сёрнитны, да мед эськө эн эрдөд асьтө.

Туй выв морттө, ньөти төдтөмтө на, он кө нин лөкөс сысянь виччысь, керкаад чукөстлөны и пызан саяд пуксьөдлөны, Енмыс пө сыысь тэныд коркө буртө ыстас на, а Биярөс мый дыра нин сулөдісны да кыв ни джын эз шулыны, тэнад пө өд кынөмыд ылісянь локтысьыдлөн сямалө, гашкө пө, сөйыштан водзпөрсө. Синваыс муртса эз доршась, сэтшөма скөрмис Бияр өксы вылас: сысянь өд ставыс петіс, сулөдөмыс и тшыгылы видзөмыс. А, гашкө и, Памасө на тадзи көсийис омөльтны өксыыс?

Коркө сәсся пыртөдісны жө Биярөс өксы дінас. Тшөктісны кольыны шыпуртсө, да кывзысьөдіс асьсө, эз нин вөч зыксө. Но пырис пыді вежөсас да нинөм эз шу, юрсө эз копыртлы

ни. Дерт, парскис таысь өксыыслы, да быдөн бөрһынтычыштіс сійӧ, а беринӧсь чужӧмыс нӧшта на гӧрдӧдіс да аньпель¹ рӧма лои.

— Мый нӧ ветлӧдлан? Коді сэтшӧмыс?

— Эз ӧмӧй нӧ висътавны?

— А ачӧд он вермы?

— Верма. Сераку вайи Памасянь. Со!— перйис Бияр гӧрд кӧртӧда тубырсӧ.

— Пукты пызан вылас. А ачӧд коді сылы лоан?

— Баяр. Со рубӧжӧй.

— Кор пуктіс?

— Регыд на.

— А кыгысь, кутшӧм котырысь? Коді айыд?

— Югдінысь. Арийӧлӧн.

— Тэнӧ, сідзкӧ, и висъталӧны?

— Мый?

— Садьтӧ пӧ тай воштылӧмыд, морт вирсыс.

— А мый нӧ, сетчыны и коліс рочыслы?

— А мый бурыс? Кымынӧн комиыс тшӧтш усисны тэ вӧсна? Он аддзы, вермӧны нин?— сюрис сӧрни визъыс, да ыззис ӧксы.

— Сійӧн и исасян тан рочыскӧд?— вомаліс Бияр.— Аддзылі ӧд, кодъяс волӧмаӧсь.

— Мед оз быгъы вомыд! Кутшӧмкӧ тэ вӧйпысь менӧ!

— А лыдды серакусӧ.

— Эштыла. Абу нин тӧдтӧм Памайдлӧн чиршӧдлӧмыд.

— Сідзи нӧ и муна?

— Мун! Ылӧдз-ӧ муна-а?

— Ваыд ӧд ямлӧ, ӧксыӧй, быгӧйӧн жӧ эськӧ тулӧ да. Чайтан, дыр и гӧвкъялан роч гы вылад?

— А Памасьыд мый кольӧ, зэв эськӧ ожманасъны кӧсйӧ да? Йӧграӧн чайтӧ рочтӧ?

— Бырӧ нӧ мед Коми муыс? Быттӧ эз и вӧвлы?

— А мӧд ногыс оз быр? Оз усьны став кага вӧчысыс?

— Рочыс ӧд усьӧ жӧ. Он кӧ куш киӧн пет. Сыысь на тай полӧны. Эськӧ артасисны тӧкӧд?

— Сӧсся мый висъталан?— чӧв усьліс да шыасис ӧксы.

— Лыдды серакусӧ, да кутшӧм лоӧ веськыд воча кывйыд. Мый Памайслы висътавны?

¹ Аньпель — рыжик.

— Абу ме лявут сылы ыджыдавнытö ме вылын! Менам пыддзык вужйыс сы серти!

— Ме ог тöд,— нурбыльтіс Бияр.— А öні сійö комиысы Ен бöрас мöдыс. И он лысыт сылысы кывсö вуджны!

— Он-ö нин повзбöдлы?— сырмис öксы.

— Шуöмыс тэныд олас,— аддзö нин, да дзерöдіс на сэтчö Бияр.

— Визьйöдла ныр-вомтö!— перйис öксы тасмаас öшалысы чукля пуртöссыыс ичотик чукри пуртсö да зырöдіс Бияр вылö.

Ырскöбтыны вежöссыыс ни аслыс пуртсö кыскыны эз вöв Биярлы кивыв: пышъян, да вöтчасны, ырыштчан воча аслад пуртнад, да горзыны кутас. Мый лоан ло и лöсьöдчис, пур кутан гез моз зэлаlöма. А öксысö тойліс нин лёкыс, да кырыштны и судзöдчис чукри пуртнас. Но Бияр удитіс шамыртны шуйга кинас сылысы килутшсö, а веськыднас топöдіс голясö:

— Нетшышта гольгантö!

Лётмуні öксыыслөн улыс черлыыс, да джагалöмсыыс нин повзбöмысла личöдіс Бияр сылысы голясö, но эз на мынтöд, мед оз усь сійö кок йывсыыс, зыркмун джоджас, виччысыыштіс, кор тыр лолыс шедас. Сы бöрын на öксыыс довъяліс мыйкö дыра, тіліс нильзвöм синъяссö.

— Муні ме,— шуис Бияр.— И мед вöтчыласны ме бöрся! Локта мöдысы, ог нин öтнам, да пыді вужнад и нетшышта. Памалы ов, көсьян кө овнытö!

Öксыыслөн öнтайсö виччысьöдöмыс, мыйысы Бияр сэтшöма дількмунліс, бур вылö на и лоöма сылы: лэччис бöр вадорас, а Пырассаыс кодсюрö лэччалöмаөсь жö нин сэтчö, ветлыны мед чери кыйнысö. И куимöныс, Югдінсыыс волöмаясыс, абу на мунöмаөсь, сійöс, буракö, и виччысьöмаөсь. Пукалöны вöлі бужöд йылас, да вöрзбышталісны ракаяс моз, лэбзыны абу. Но йöзыд дырйи эз лысытны ни шыасылыны, ни воча сувтавны. Кык рочыс эськö шыпуртаөсь нин вöліны дай көрт гöгыля дөрöмаөсь на вылысаныс, но асьныс на, тыдалö, видзчысисны комияс син водзад косьтö панöмысь.

Кывтлыны бөр Эжва вомöдзыс и шуис аслыс Бияр. Петас кө öд ва вылас да катан нырөн и вöрзяс, эсійö куимыс оз жö кутны жуявны. Гашкö, эськö оз и сетчы налы суöднысö, да оз нö атöд асьсö, мый Югдінас туйсö кутö? И дзебсыылас кө кытчöкö, лк баддбö пыралас пыжнас, да сідзи и воштасны сійöс, оз нö бöрыннас мамыс вылын лёкнысö песны?

Видзодліс Бияр, абу-ө вөрөдөмаось мыйкө пыжсьыс, да йоткыштис пыжсө ставнас ва вылөдзыс, и кодлөнкө кок увсьыс посни из дзуртөмсө кыліс. Бергөдчис, а Матөыс сы діно локтө.

— Мый нө колө?

— Чайтан, эг и төд тэнө, Биярөс?

— Мый сэсся?

— Вошин тай кытчөкө да.

— А тэ эн вош сэки? Эн рочыс дорө пышйы? Чайтан, ылө и воин? Матө на өд нимыд.

— Рочыдкөд позьө на овнытө.

— Позьө, ловтө кө вузалан.

— А тэ нө кодлы вузалин?

— Сідзи көсийси. Мезөсыслы!

— Кытөн нө олан?

— Эжва йылас.

— А мыйла татчө волін?

— Пытш вузавны. Йөгра чомийсь куталі да.

— А кытчө өні?

— Гортө.

— А Югдіныд абу нин горт?

— Мый ме сэтысь корся?

— Мамтө видлыны.

— Мамөйдлы ме кулөма нин. Бырөма ли.

— А ловья на локтан!

— Сэсся мед юрөс кералисны? Эн жерйөдлы көч пиньтө!

— А мый мамыдлы висьтала?

— Нинөм он! Абу кө синва юысь!

Эжва вомөдзыс сэсся и кывтіс Бияр да қатіс войсө узяні-нөдзыс. И нөшта кык вой на узис сэтөн. Отисө төдөмөн и коляліс, мед збыльысь и чайтөны эсян куимөныс сылысь бөр мунөмсө, а мөд войсө төвзъысис асыввывсянь, катша шыдөсөн сьякйис, син ни пель вөлі, да кытчө лысьтан петнытө?

Коймөд вой улас сөмын, төв дөранас асыв-луно бергөдчөм төвсө кыйөмөн, катіс Бияр Югдінас.

Блөкодь на кывтыдө Югдісяньыс колис Бияр пыжсө, кыс-кис коз поноль пөвстө да кымыньтіс джынвйө, мед кось-мыштас пыдөсыс и понөльысьс бөр веськаласны. Сэсся кайис вөрвылас да сэті и пыськөдчис му йөрьяс дорөдзыс, петіс кышолөн кывтыдпомыс весьтө да потшөсьяс костөдыс нин си-

бөдчис асланыс карта сайё. Катлысян өдзөсөдыс, игнасьлан потшө розьёдыс кыскыломён, пырис посьылас. Но посводзас эз на веськав: бөр өдзөсыс игана жө вөлі, и некыз он восьты. Ковмис игөдчыны өтчыдысь дай мөдысь, гораджыка нин. Вөлись, кылө, петіс мамыс.

— Мамө, эн повзъы,— ачыс водзджык и шыасис Бияр.

— А, Енмөй, Енмөй! Вөтасыныгө он куж! Энлы, восьта, восьта. Кытысь нө усин?

— Ылысь, сывйө кутланй.

— А энлы, ачым кутла. Малышта юртө.

— Эн өмөй на төд?

— А сьөлөмөй потөмысь! Абу жө на тай ортыд. Ачыл и эм. Тошкыл чорзөма-а.

— Тошкыл өд көвтө буссө и васө.

— А лок керкаас. Шөпъяла нин йөйыл, посводзын сулө-да.

Кымынкө өгыр югьялісны на горъяс вижөн, да пөлялыштіс мамыс на вылө, а сэсса сюяліс ломзөдчансө, кыскө ваялөм лөпсө да кос увсө. Ньюкыртөдліс быдөн таысь Биярөс, да эз и вермы юавтөгыс видзөднысө:

— Пестөг нө колин?

— Эм на эськө важ чипасыд, да бара өд веж көдзыд төлыд воас. А коді меным өдъя пессө вөчас?— няргыштіс мамыс. Но сэтчө и дыгыдасис ас вылас, кучкыштіс шуйга кинас йөрвуждінас: — Кыскө тай лоан йөйыл! Эн на пуксьыв, а шөгөда нин тэнө. Пуксьы, эн сулав. Да өлөд менө няргөм-сьыс!

— Ме ог лысьт. Веськыл кузясьыл.

— Но, энлы, мыйкө шонгышта. Өд тшыг, буракө. Да водлы сэсса. Оз на югды асьясө?

— Оз на. Сулалө на рөмыдыс.

— А эз жө өд кодкө аддзыв?

— Эз кө-а. Эг өд пурьсьөдыс¹ лок. Вылі.

— А волісны өд нин.

— Кодкө?

— Кыкөн. Роч да коми.

— Мый нө шуисны?

— Комиыс тай шуис. Аддзылім пө өд Бияртө. Мед пө оз корсь татчө туйсө!

¹ Пурьсь — улича.

- Сэсся бөррдзин?
- Ме эг. Мися, менам ёрома нин сийос. Сідзи нин кула. Со од кызди лоо ылөдчыныгө. Омольыс дорө и тойыштас коркө Енмыс, лолыд петас да.
- Оз тойышт сьысь. Ас Енмыд төдө на ас йөзтө,— такөдс Бияр.— Аддылы тай айөөс вөтөн, да еджыд лэбачөн пуксьыліс лолыс Енмыслөн сойыс ыло. И тэнад пуксьылас.
- Мед эськө да. Оз кө мырдөн кыскыны...
- Кытчө?
- Эсийө сьод пежыс динө. Кодлы рочыс юрбитөны. Крис-тос али мый нимыс?
- Он сетчы дай.
- А овныгө од оз жө сетны сідзтө. Комиыс нин ветлө-ны-а, нимнысө вежлалөны. Маюрыд важөн нин абу Маюр, быдтысьө нин рочсяныс и.
- А ветлы жө дай, матө кө воштасны. Пиньтө курччы да. Сьөлөмад оз на пыравны, мый сэн вөчсьө. Ли мекөд му-нам!
- Чөв, муна ис йылас, эновта айыдысь гусө!— вомалис мамыс.— Абу од ныв сетан гортсьыд вөрзыныгө.
- Мый сэсся ме шуа?
- Нинөм оз и ков. Эн и вийсьы ме понда. Асьтө видз. Кытөн нө мый оланныд Унаыдкөд?
- Эжва кузяыс. Емдинсьыс на катыдын.
- А кутшөма?
- Воча чомйын. Мусяныс пырана. Керка керсө лөсьөдөма нин, тшупны колис.
- А кодкө бөрдысь тыдалө оз на?
- Тыдалө. Регыд шыасяс.
- А мый нө ветлөдлан, уджыд абу, гөтыр шогыд да?
- Видлыны кежалі, Совдорө кывтлі да,— висьталіс Бияр.— Совтөгыд он жө ов.
- Но, лок панясь. Рок пыдөс эськө да. Югдас да пуся. А кытчө нө вольсала? Лысьтан он керкаад?
- Ме ог төд... кодкө пыравлө оз.
- Лөкыд ыло од кодкө и локтас на. Көдзыд мамыд ли коді. Сэсся больгас дай.
- Кутшөм көдзыд мам?
- Унаыдлөн мамыс. Абу нө көдзыд мам өні тэныд сийө?
- А мый нө, скөралө ме ыло?
- Оз тай вермы пыгыкырасьтөгыс. Пышйөдс пө кытчөкө

югыд лунсö менсьым. Эськö пö татöн кодкö сайö петис-а. Гашкö пö, роч сайö на. Маюрлы тай вежалö.

— Мед вежалö. Тадзтö кö, ме верма жö мөдзасьнытö¹.

— Мыйысь?

— Унасö нуөдöмысь.

— Мун, тайöс сёрнитан! Ачыс тэ бöрся вöтчис, да мустöмтны öнi лысьтан? — котшкис мамыс шамырнас пызан дорышас.

— Ог и мустöмт. Енмыс тöдö, нöйтлi ли мый ли кö.

— А кытчö вольсала?

— Пöсьылö кö-а, — шуис Бияр.

Сөйыштiс да петис сэсся сэтчö ойбыртлынысö, и унмыс личкытöдз мөвпалiс на, кыдзи-мый эськö вöчнысö, мед ина-сис Югдинас волöмыс, эз сöмын мамыскöд аддзысьлөмөн коль. Лөсьөдчö кö öд Мөскуаыс водзö на ас улас куравны мусö, то и ытшкынысö лөсьөдчö, а пыжтöгыд гожöмнад öдйö на йөрман, некытчö он и во-лы. Тöдмавны колö, оз-ö көнкö вадорас вöчавны выль пыжъяссö, унаöс лыбöданъяссö. Гашкö, мамсö и ыстывны видзöдавлынысö? И Маюрыскöд эськö колö кызкö сёрниö пыравны, мыйкö öд роч верöсыслөн вомсьыс пыралö жö сылөн пельö, оз на куш вичкоөн овны гозъя. Важ тöдса кузяыс кö дiлькъялыштны сы водзын, мый эз на и вунöдлы сйöс да муткыртчылö на сы вöсна сьölöмыс, оз на, тöдöмысь, и ортсö петав сёрниныс. Абу жö öд нбöти ойгытöм Маюрыс, удтысьны сэтчö и котöрт рочьясылы? А кöдзыд мамыскöд, гашкö, оз и аддзысьлы. Оз жö эськö, гашкö, вузав, абу кö му вөрзян йöй, аслас нылыслысь олан кутöдсö, да вермас öд и чеччыштны кывйыс, ошйысьöмысла на, гашкö. Сов чöлан джынсö да куим вежтансö тшöктас мамыслы сетны сылы, мед öтмындаөн и лөö налы кыклы, но сöмын аслас мунöм бöрын.

— Узян на? — шыасис, кылö, мамыс да вөрöдыштiс Биярöс.

— Садьман выйын. А кадыс нö?

— Лун шöр джын. Эн кынмы?

— Эг. Шоныд шебрас улад.

— Сөй лок. Кукань яй шупöдлi, да сйöс пуи.

— Мый нö эн солав, шупöдан бур яйсö?

— Сольс нö лыа тэныд? Зырийөн и сюрö?

¹ Мөдзасьны — кайтчыны.

- Ме эськө вайышты да. Нопйын.
- А чеччы; куйлөмөн эн сёрнит.
- Сейнысө пуксыгтодзыс на Бияр перйис нопсыс сов чолансө да сувтодіс пызан вылас:
- Со, волөм сайысь.
- Мый нө татшөмыс? — чуймөмысла өтдортчыліс мамыс.
- Чуньыштлы.
- Сов тай и вөлөма. Кужоны тай сюсь йөзыд вөчныгө!
- А то на и, — пуктіс Бияр квайтөс вежтансө, аслыс бөрья кыксө и кольөдіс.
- Кыгысь нө нин... повзбөдчан сэтөн?!
- Эг өд гусяв.
- А коді нө сетіс, мый вылө?
- Бур морт өти. Эн сэсса юась.
- А Коммусалөн вежтаныс да? Абу рочыслөн кодь. Ад-дза өд. Пев гыжйысь на со паськыд.
- Мед. Оз нө ветлы эзысьыс, уси доныс?
- Некыгчө эз усь. Петкөдлы сөмын, — дольыштіс мамыс.
- Но и идрав. Сөмын шөрийөн ме шулі-а. Совсө и сьөмсө.
- Кодкөд шөрийөн? Көдзыд мамыдкөд?
- Ськөд. Кодкөдкө өд он.
- Нинөм эськө оз ков сылы сетны да. Мед этшаджык пытькырасяс.
- А оз-ө бурасьлы?!
- Чукөстла нө?
- Эн. Ме мунөм бөрын сетан.
- Өтитор, медся кокнисө, лои помө вайөдөма, а яя шыдсө нин панялігөн Бияр ружөктыштіс вөзйысян русө кутөмысла да юалис:
- А вадорад, мамө, он лэччывлы?
- Пожъясьны кө ог, мыйла сэсса?
- А сөйтө перйыны катыдпом увсьыд? Латка вылад?
- А мый нө тэныд, латка колө? Тасянь нуан?
- Ог, да ветлан кө, мися, видзөдлігмоз.
- Мый видзөдлігмоз?
- Оз-ө көнкө сэн, вадорланыс, гырысь пыжсө вөчавны.
- А аслад нө пыжыд?
- Ловья на. Сійөн и ветлөдла.
- А мыйла нө сэсса ковмис?
- Сідзи. Төдмавны, вөчөны оз.

— А мый сэсса, вөчөны кө? — дөнзис мамыс Биярлөн кытшлөдлөмысь.

— Сідзкө, мөдөдчөны кытчөкө. Гашкө и, Эжва катыдыс. Тайос он гөгөрво?

— Гөгөрвои өні.

— И юав, быттьө веськодь тэныд. Ниюусись кыйны али кытчө, шу, та гырся пыжнас.

— Кужа ме рочнад да?!

— Кодкө өд комиыс лоө жө. Югдинсаыс. Оз нө уджөдны?

— Уджөдөм оз на ков. Сідзи на няньид вылө локтасны. Синманыс тай и видзөдоны рочыслы.

— Но, мыйкө и кывлан, ветлан кө.

— Ветла эськө, да оз нө шежлысьөм ло? Ачыд сы вылө, буракө, петөмыд и. Мун, татшөм могнад!

— Зэв өд яналысь! — вомалис Бияр.

— А яналысь и эм! Сира ю саяс и кольөдас Енмыс, кулан да, пыж ни пос.

— Оз кольөд, комиыслы кө олан! Ме нө аслым, тадзтө кө, шежлыся?

— Ме ог төд, кодлы, — дөжныштис мамыс.

— Со, колөкө, тэныд! — петкөдліс Бияр рубөжсө. — Пама сетіс. Гашкө и, нэм кежлө. А сійө на миян Вежа айкаыс!

— Но, ветла, важ туис босьтла да. Нюдз сөйид, он и төдлы, кытчөкө ковмас на.

— А Маюрсө он аддзывлы?

— Öнтай на кага мөздөрөн муніс. Мамыс ордө.

— Меным эськө колө жө сійөс аддзөдлыны да.

— Эн йөйтав! Киссьөм ватө этша нин куралан. Гозья костас али мый көсьян сөйсьыны?

— Ог, сідзи өти сөрнийөн.

— Мун сэтысь! — чилөстис мамыс. — Мед водзсө югыд синмөн олін! Öні петө вежыд... куканя мөскыс вылө?!

— Оз и пет. Мөд мөгөн.

— Сэсса мед удтысяс? Менө тшөтш юрсийөд кыскасны гортысь?

— Оз удтысь. Гусьөн видзас.

— Кыкысь эн шу. Рочө нин пөрөма да. Сэтшөм комиыс медся лөк!

— Лөкыд вылө өд лөкыд тырмас жө, — кайтис Бияр.

— А мыйла нин и локтін сьолөмөс жугөднысө? — нюкыртчыліс мамыс.

— Муна, эн лөвт.

— Кор мунан?

— Войнас. Аддзөдла кө Маюрсө.

— Лун шөр гөгөрыс эськө воливлө мамыс ордө да. Кагасө нёнөдны. Кыйөдан кө посводзсянь... Ывлаас эн пет-а!

— Ог. А тэ ветлы катыдпомас. Огө на эндөдөй Арийө туйсө, дась ловьяось.

Көвъя вугъя важ туйсөн и муніс сэсся мамыс, тасалис посводз өдзөссө да, а Бияр кайис пөсйылас, бара ножөдчис волиясь вылас. Топыда сөйис кукань яйсө, да зэлыд кынөмыс и кыскис куйлыштнысө нинөм вөчөмсыйс пукалөм дорысь. Торкис өнтай мамыс бөръя унзильсө, да сетчыліс ойбырыслы некутшөм мөвп юрас сибөдлытөг. И босьтліс на чөскыд ойбырыс, да вөтө усьліс, быттьөкө көнкө ывлаын сулалө, а ывлаас еджыд гөн лэбалө. Бур водзын! Сідзи тай висьтавлөны лэбач гөнтө.

Но мед эськө и Маюрсө эз узь вөтыс вылө лэдзчысьөмөн, колөкө, локтө нин сійө кагасө нёнөдны, и Бияр чеччис да лэччис посводзас, суйліс юрсө югыдсө лэдзан мурьяс¹. Шөнді сертиыс кө, лун шөрыс пуксис нин, кос йыла пөрысь пожкөмыслөн вуджөрыс веськыда нин вомөналіс пурысьсө. Кык зонка, бубуляс кодьось, вальмасисны шоналыштөм туй выв бусас, и найө вермисны ставсө дзугны: он өд кут чукасаны на дырйи, тыдовтчас кө да весьтасөджык воас Маюрыс, и он пет да вөтлы найөс сэтысь. Сідз и тадз йөзасян.

— Сусанъясыд тай эмось, пырттөмъясыд да! Босьтла кө эськө эсийө бедьсө! Ок, ме тиянлы! — ылісянь на кыліс Маюрлөн шыалөмыс, ачыс эз на тыдав-а.

Зонкаяс тривкнитісны кок йыланыс да гизгизгырйи котөртісны юланьыс, сэтшөма на и мөрччис налы чиршөдлөмыд. А Бияр удитіс мөвпыштны, мый оз на, буракө, уськөдчыны Югдінсаыс пыртчынытө, вайөм енмыдлы копрасьнытө.

Гөрдөн мичөдөм, көрыштөм коска лабура да сьөд юр кышөда, чужөмыс сөмын и тыдалө, мыччысис сэсся Маюрыс, ыштөкө юрсянныс абу нин коми лоны кутөма. Виччысьыштіс Бияр, кор сійө весьтасасджык воас, да чукөстіс:

— Маюр!

¹ *Мур* — кывзысян, видзөдчан өшинь.

- Коді? Кытөн? — шййовошліс сійё.
- Ме. Посводзын. Эн төд?
- Ортыд кө нин-а?
- Ачым, ловъя юрөн, — тыдөдліс Бияр юрсө.
- А кытыськө?
- Ылысь. Кылі, да чукөстла, мися.
- Мыйла?
- Гаж бырөмысь.
- Эн ылөдчы!
- Ньоти ог. Эг нө тэнө көсьйив нуодны?
- А водзсө?
- Мый водзсө?
- Мелань вөлін? — пырквөчліс Маюр.
- Эг нө пондывлы?
- Мый сійё чорыд кинад! Ыкша синнад да!
- Йййыд өд новлөдлө. Пырав.
- Тасаинас?
- Тасаыд өд йөзаддза. Эн пов, нинөм ог шу.
- Шусьөма нин тэнад.
- Но, рочыдкөд и ов.
- А мый нө ділялөмыд?
- Ас ыло. Пырав но!
- Ог. Менам кагай бөрдө нин, көнкө. Нёнөдтөм.
- Ныв али пи нө?
- Пи. А тиян Унаыдкөд?
- Лоо жө кодкө. Рөгид.
- Но и олой, кытөн оланныд. Менө эн дөзмөд сэсса.
- Миян олөмыд! — мургыштіс Бияр.
- А мый нө, он лөсялөй гозья?
- Бара пышйыны ковмас. Гашкө, Му помас. Ли юрөс меным пуктыны. Медся на бур. Пета вот да сетча рочыслы. Мед нель пельө кералөны!
- Мыйла? Мыйла, мися? — мөдысь юалис Маюр.
- Оз нө Мөскуаыд водзө босьтав? Оз сйюсьы Эжва во- жас? Таво гожөм и уськөдчас!
- Ме ог төд.
- Он төд, ачыд роч сайын-а.
- Сійё вичкоын лыддьысьө. Оз шыпуртөн ветлөдлы.
- А сэтысь жө, кырныш чукөрсьыс.
- Ланьт! Увтчан сэтөн посводзсянныд!
- Быть өд увтчы. Оз нө мөдөдчыны?

- Кытчө?
- Эжва вожас! Нинөм эн и кывлы?
- Ветйөө... кывлі.
- Мыйла Ветйөөс? — лигышмунліс да шемөсө уськөдчыліс

Бияр.

- Няня му вылө.
- Гашкө, и сідзи. Мед татысь комиссө няньтөг кольны.
- Вайны кутасны.
- Кутасны! Ыжъясөс моз өсьтөдны!
- А кыз тэныд и бур?
- Некыз.
- А дыр на менө сулөдан?
- Ог. Он кө удтысь. Мый аддзылін менө.
- Ачыл эн лөкөн казътив, — чөв усьліс Маюр да нормө-мысла лапйөдлыштіс синъяснас. И бергөдчис да муніс.

И асылс Биярлы сэки рөмыдасьліс ывлаыс, ыштөкө югыдыс и ылысмис сыысь.

Коркө рыгъявылыс нин локтіс мамыс да висьталіс, мый катыдпом улас, сөйөда бужөд таланяс, збыль и вөчалөны гырысь пыжъяссө, кык пыж дась нин, сиралөма и быдөн, а куимөс эштөдөны на. Юалөма сэсся мамыс, сөйсө нин перйөм бөрын, кытчө нө пө та гырся пыжнас, нюусись кыйны али мый, да эстчө пө, индөмаось, Юг вом дорас, а сэті өд, Югөдыс, и воан Ветйөас. Оз кө нин синкымув корсьны рочьясыс, сідзкө, өтилаө и лөсялөны Маюрыслөн да мамыслөн висьталөмыс.

Пывсян пө, гашкө, ломтыла, улыс паськөмтө көтөдла и, долис мамыс, но Бияр эз кывзысь сылысь, вой улас и муніс.

Овкөджас Бияр рубөжнас нин воис, кодөс сетліс сылы Памаыс. Сувтліс Емдінас висьтасьнысө, бөр мыччыліс рубөжсө, да Памаыс эз и босьт, өлөдіс кинас:

- Мед тэнад лоас!
- А баяр нө лоа? — юалис на Бияр.
- Да! — воча синмөн шуис Памаыс.

А Унасө гортсьыс Бияр эз нин и су. Адаслөн мамыс, вөлөмкө, нуөдөма нин сійөс асланыс пывсянө. Морт оланінас пө оз вайсьывны, оланінсө и кага вайысьсө пө урсалөма лоө.

Аскинас, водз асьвнас, и чужтөма сэсся Унаыс пиөс. Локтіс Бияр юавны, кодкө чужис эз на, а гөгиньыс вашгялө нин. Вежысьсө пө Енмыс сетіс да гөгөр лючкиөс. Мыськи и ставсө

пö нин ме вöчи, мышкүдöдыс на кык чуньöн нуöдi, мед весь-
калас сюрса лыыс. И Унаыслöн пö, ен сыкöдöн, некыт эз
торксыы, сувтöдi нин кыз вирсö, мун да эн шогав.

Но сизим лун мысти на петiс Унаыс пывсянсыыс кага моз-
дорнас, сетiс нунысö Биярлы. А гöгиныыс, Адаслöн мамыс,
оз на и лэдз сiдзикöн, вордкыв лыддис да вöлись.

Да абу на, тыдалö, инöма сылöн вордкывыйыс, воча чом дорас
нин воигöн Кекур паныдасис. Эз эськö вомидза кывйöн шы-
асьлы сийö, да вуджöрыс сылöн усьлис гозъя вылö и кага вы-
ланыс. Бияр эз и гöгөрвопы инö пуктыны тайöс, а Унаыс
босьтiс зэв öдийö сы ордысь кагасö да тшöктiс вötöдлыны Ке-
курсö да тальыштны вуджөр вылас. И вötчылiс Бияр да та-
льыштлiс Кекурыслысь вуджöрсö, а мед оз чуймыв сийö, ыс-
тысис видзöдлöм вылö, олö оз черыыс. Куа ты дорас сэсса и
лэччис.

Керкатöмөсь и податöмөсь¹ на, сöмын на овнысö босьтчö-
ны гозъя, а чужис пивид, и тырвийö олысьясөн нин быттьö
лоисны. Тутö поныйыс тшöтш нимкодясис накöд.

¹ Пöда — скöт.

МӖД ЮКӖН

1

Бияр пукаліс керка водзас, посводз ӧдзӧс пос помас, мед-ся улыс сод вылас. Петіс гортсьыс лолальштны сӧстӧм ывла сынӧднас да водзвыив тӧдӧмӧн и пуксис сэтчӧ, мед ковмас кӧ, муас нин и сьӧлыштавны тьяссьыс век на петысь шыж сора гырдсӧ. Но кымыныськӧ и лои водзпӧрсӧ да ружӧктӧмӧн на сьӧлыштӧмыс, личалис сӧсся быгтьӧ морӧс пыдӧдыс, воссяліс коластаӧн, да пожӧм сир кӧра сынӧдыс ветліс сэтӧ емальштӧмӧн, косӧдіс сукмылӧм улемсӧ. Ымӧстлыгтӧг нин пондіс шедавны лолыс, синсӧ лапӧдлыгтӧг.

А шондӧыс тулыс помсӧ нин и висьталіс, ӧддзӧмӧн пӧжис му пасьтасӧ нӧйкалӧм да лыбӧм енӧжсянныс. Гашкӧ, кӧнкӧ и ӧшаліс эзысь кымӧр чирпӧгыс, да виж тутуясӧн мичмӧдчӧм пожӧмьясыс сайӧдісны Биярысь ылігӧгӧрсӧ. Оналысь шоныдысла сӧйӧ пӧрччис нӧй сукмансӧ да сідзи павкнитіс пельпом вылас, а юр вывсьыс гын кышӧдсӧ эз лысьт вӧрзӧднысӧ, мед оз кучкы сэтчӧ гожыс. Тадзи эськӧ, висьмылӧм вылас и ывлаыс вылӧ бурасьӧмӧн, и пукаліс сӧйӧ, да кыськӧ лӧз сӧтана гут воис, лӧбавны кутіс сы гӧгӧр, ыштӧкӧ кулан выйын нин сӧйӧ да позьӧ и лӧдзны сы пытшкӧ кольксӧ.

— Мун, пеж! — ӧвгыштчис Бияр, да ачыс гутыс зурасис сылӧн ки мышкӧ. И лӧбзис жуньгӧмӧн.

Но дӧзмылӧмвывсьыс и сутшиктӧдліс быгтьӧкӧ мортгӧ, мӧвпыштис сэтчӧ да, эз-ӧ нин морыс¹ тадзикӧн волы сы дӧнӧ,

¹ Мор — смерть, роч ногӧн кӧ. Елин (греческӧй) кывйысь.

лов петомсö и чуйдыны? Висьталöны тай, кулём водзвылад пö кокньöдлö биавлана висьöмыд, сурган-сурган пö да садьö на волан, а сэссия пö топодас выльысь, омöльтчöматö нин, и эштан. Чегсынысö таысь, сетчынысö полöмыслы и лөгöдис на сэссия Биярöс, ышловзис да мурчкыштіс юр пиньяснас. Ен бурөн, кок йылö на сувтіс и ывлаас кималастөг петіс, некодлы эз тшöкты отсавны, да мыйла быдторсö инö пуктыны? Бурднысö и вөрзис, тöдöмысь, олысьö на волана. А лöз ситана гутыд сэтшöми и эм, вир истö ли ортö мый ылнаысь кылö, а эз нö гырднас сьöлась? Аслас йöйталöмысь и дыгöдис сэссия.

Посводзас кыліс Унаыслөн кок шыыс, и Бияр корис ва вайыштны вомсö пожъявны. Öдйö пыддиыс гöтырыс нюжмачис на, ылавліс кытчökö керкаас, жуним ва бöрыннас петкöдис, кöдзыда-пöся сорасöс.

— Мый но дэбыдöс вайин? Эг öд юны кор.

— А ыркавлін нин таво вылö,— тоткыштіс Унаыс.

Мый дыра нин гозйөн олöны, нелямын арöсысь нин эняая петöмаöсь, лысермунём чужöмаöсь, а эз и вермыв Бияр велöдны гöтырсö асланьыс ньылыд сёрнитны. Пыр и вомалас Унаыс, оз кö мыйкö лöсяланаöс сылы шусьы, да сйö на и велькыдөн кольö. Кос турунтö тай видз вылад юрö куртан да личкыштан мыйёнкö тöлыслөн вөрöдöмысь, а каньысь на ас руа коми аньтö мыйён ланьтöдан? Петöма эськö тэ сайö да горт гөгöртö и олö, вöрын-ваын оз уяв, а он на улöджыкад пукты. Аслыд на и ковмас дультö ньылыштны, водзöстö кö шуны нинём.

Чöv улö и уськөдчис Бияр, пожъяліс вомсö да. Ачыс корсис висьöмсö тöлалём юрнас, матö нин шойöдз вайöдліс асьсö, да кызкö оз пыркъяв Унаыс водзын. Ыкшасö нö петкөдлас, муртса бөр ловзьяштіс да? Мед оз ло ошкöма, оз пö тай позь верöсыдлы ошкыны гöтыртö, а зэв на и югзян да чепöсьян сьöлöма вөлöма Унаыс, сідзсö быгттьö кöдзыдасьысь-а. Эз кö нö лун и войсö тöрав сйöс, ортсысяньыс быдсяма сулөдöмнас зырав да пыгшкөсас быдсяма пöжöмасö юктав, лэдзис нö эськö висьöмысь?

— Вайлы рөмпештантö,— нюмыртчыліс Бияр, очсалөмөн на сулаліс Унаыс да, шондісьыс гаж бырөмөн.— Видзöдла ас вылö.

— Повзьöдчысь кодь тай, ош гöна ныр-вомыд.

— Гөнтö öд шырин дай. Лэчыд пуртөн босьтін ли.

— Шыра ме тәныд!— чырыштіс Унаыс, ныр водзас и вайӧдліс шамыра кисӧ.

— А мый нӧ?

— Бурдан да сәки. Онджык вомдзассы.

— Но и сәки,— сетчис Бияр.— А вайлы рӧмпештантӧ.

— Ог.

— Мыйла он?

— Оз нӧ лӧгась висьӧмыд?

— Мыйысь?

— Пановтӧмсыд сійӧс. Быттьӧкӧ дзоньвидза нин сувтін. Мед ачыс петӧ, кор петӧ,— торшӧдліс Унаыс.

— Ачыл, инӧ, и видзӧдлы.

— Кытчӧ?

— Синӧ меным. Гырӧдӧсь абу син еджыдыс?

— Ӧмидз тай быттьӧ нырыштӧмыд да абу на и мыссы-лӧмыд. Син колькыйд гырысь и.

— Гашкӧ,— нурбыльтіс Бияр. Бара Унаыс и веськыдӧн коли. А усис тӧд вылас рӧмпештаныс, да сәтшӧма кӧсыйліс видзӧдлыны ас вылас-а.

Рӧмпештансӧ тайӧс, гӧтырыслы козинсӧ, Ветйӧысь сійӧ вайис, кор Сыктыв йывтыс няньысла сәтчӧ петалисны. Тотара, куимӧнӧсь, сӧмӧм рӧма чужӧмаӧсь да нюзджык ныраӧсь, йӧгра серти кӧ, вузӧсӧн жӧ локтӧмаӧсь кыськӧ асланьсыныс, да найӧ дэльӧдчисны рӧмпештаннас, син улад и лӧсьӧдласны, мед видзӧдлан да чуймылан. А чуймывтӧг он ов, кор лочки аддзылан асӧтӧ, он на васыд моз рудӧба, эськӧ кӧртысь и эм сідзсӧ да, табъя нянь кодъ кузьмӧса гӧгрӧс да пу вугъя, сӧмын ӧтар вылыссӧ кӧртыслысь эзысьӧн-ӧ-мыйӧн бусӧдӧма да югыдӧдз ниртӧма. Дерт, петіс Биярлӧн вежыс, да аслыс вылӧ босьтлӧм кыйдӧс куясысь и сетіс дас анча ку. Бӧрыннас нин, кор киас лои рӧмпештаныс, сибалис мӧдзасьӧмыс, да эз на и мунсы тотара дінсыс, дувмуніс шӧйӧвошӧмысла. А найӧ, он и лысьт лӧкӧдны, казялісны мӧдзасьӧмсӧ да, мед оз бӧрнясь, чусі¹ гоз на содтісны, чӧж кок вылӧ мунанӧс, ань пельӧ и ӧшӧданӧс. Та вӧсна и ковмис сәсся Биярлы гусьӧнасьнысӧ. Воис гортас да дзебасӧ и пуктыліс чусі гозсӧ Унаысыс, а регыдъя туйӧн ләччис Емдінӧ да козыналіс Ниралы.

— Мый нӧ нускан?— виччысьтӧг юалис Унаыс.

— Нӧти ӧг.

¹ Чусі — исерга.

— Он тай. Чеврасян на сэтөн и.
 — Быдтор эн аддзы дай.
 — А кыті бытшкө?
 — Некыт оз.
 — А оз кө и, ассъыд на мыйкө шогалан.
 — Оломос и шогала,— мынтөдчис Бияр.
 — Ме понда?
 — Сидзи. Оз тай и бурмыв сьолөмыд. Пуксин да мед вись-
 төгыд тадзи пукалін.
 — Пукөдас кодкө, Енмыс кө оз коркө.
 — Мый сийө кулом бөрад?
 — А кувны тай и уськөдчылөмыд. Йиа ваас!— вывланьё
 киясөн шеныштчыліс Унаыс да пырис керкаас.

Ойдлөм бөрас регыд и сулаліс тавося ыджыд ваыс, вой-
 мөд мысти и вөрзис ямнысө да весьт судтаён кутіс. Бияр
 петавліс пыжнас да сийөс нин и кыйөдіс, кор позяс тупкыны
 Куа ты сайсьыс вожа сөнсө, мед эськө и сөн вомыс векням-
 мыштіс и кульмынысө пыралөм сыныс эз на уськөдчы сә-
 тысь. Радзсө сылөн дасьтөма нин вөлі, лым сьвтөдзыс на
 вөла-доддьөн вайөма да коз улө сьвтөдалөма маті вөрвылас,
 а майөгъяссө арнас на выльысь сутшкалөма. Колана кадыс
 нин и виччысьөдіс сийөс. И воис сэссия буретша рытьявы-
 лыс. Арталөм сертиыс раддзыс судзис нин косысь косөдз, а
 сөн йывланияс, кыкнан вожас, гыалісны на сынъясыс, пожъя-
 сисны кульмөм бөрас.

Видзчысьөмөн, мед эськө шыыс гораджыка оз кывлы, сорөм
 бөрся сорөм сьвтөдаліс Бияр пыжсяныс радзсө. Этша нин и
 коли тупкытөмыс, пелыс кузяыс кымын, и петкөдчисны сынъ-
 ясыс дөмөд вылысладорас, сук лөзөн кьпөдчылісны ва веркө-
 сас да бөр вөйтчисны. Одийө абу казялөмаөсь, мый йөрмыны
 вермасны! А мед оз на суйсьыны восьсөн кольөмас, Бияр шва-
 чөдыштіс сәті пелыснас да петіс пыжсьыс, кайис вөрвылас
 бөръя радз сорөмысла. Но ләччөднысө нин сөмын и удитіс.
 Гузьоба нырөн, видзөдө да, чепөсийс сыныс пышйынысө,
 дырөкөөн некод оз коль, и ачыс сэссия пырис ваас, пидзөс вы-
 лысөдзыс на лои ваыс, да ызөдчыны кутіс кинас и кокнас.
 Но сьвтөдан өмөй йөрмылөм черитө, и став вывтырнас нин
 сэссия бузгысис да нюзөдчис восьсөн кольөмаас. И то на сю-
 сьыс да повтөмыс чеччалісны сы вывті, эз видзөдны сылөн
 ызакылөм вылө.

А чөсөдны нин кутіс мышсө и кокъяссө позьөдны вырыс

кӱдзалӱмысь, да он ӱд кувтысь сэтчӱ, и чеччӱдӱс асьсӱ да джынвуйӱ ойӱснас нин кызмырдӱн сувтӱдӱс бӱрвья радз сорӱмсӱ. Пӱрччысьлӱм да би перйылӱм дорысь, мед и эз на кӱ биваыс кӱтась, гортас кывтны нин и колӱс, ӱти сайын эськӱ и йирмӱгыслы эз на сетчы, а вешйыштӱс мыйтакӱ ва дӱнсьыс да виччысьны кутӱс, петкӱдчыласны оз нӱшта сынвьясыс, кольӱмаӱс абу унаӱнкӱ. Ен сыкӱдӱн, сӱӱн на, гашкӱ, лыбӱдчылысны сӱсся пышйыны вермытӱмыс. И вӱлись пуксис пыжас. А гортас зяткан пиньӱн да муртсапырысь нин и воис, ачыс эз нин и вермы пӱрччысьнысӱ.

Кымынысь нин, ӱкмӱ, шегвьясис Бияр олӱмнас! Йӱжгыль и босьтлӱ, пондан кӱ артавны ставсӱ да син водзад сувтӱдлыны. И тайӱ пӱрйӱсӱ воштгылыс юрсӱ да со на кыдзи шоймӱдӱс асьсӱ. Но эз ӱд и горшасьӱмыс понда, медтыкӱ став сынсӱ и йӱрмӱдны, а кыйны и петӱма, да мед ачыс бӱбӱ оз коль. Сийӱн на, буракӱ, и видзис Енмыс шойна ягас нуӱмысь. Дай таӱдзсӱ на кузяла видзис ловсӱ босьтӱмысь, эськӱ важӱн нин эз талыв мусӱ. Тӱдӱмысь, инӱ да матӱ на пуктӱ сийӱс асланыс коми Енмыс. Гашкӱ, мыйсюрӱссьыс и оз ошкы, дӱзмывлӱ на сы вылӱ, а бурсӱ вӱчӱмыс на и катовтӱ сылӱн. Со тай ловвья на да шондӱ водзас и пукалӱ. И Енмыс адззытӱг оз ов да бурдӱмсӱ, тӱдӱмысь, и виччысьӱ.

Ойбыртӱдӱс Биярӱс, да эз и кывлы Унаыслысь петӱмсӱ. А сийӱ, тыдалӱ, повзьюма, да пельпомсӱ летӱмӱн и садьюдӱс:

— Мый нӱ сэтчӱ лоин?— ырӱстӱс.

— Нинӱм эг,— палялыс Бияр.

— А лӱтмунӱма нин вӱлӱ юрыд!

— Вугыр босьтӱлыс.

— Сӱдзтӱ кӱ,— лӱньӱдчыс Унаыс да мышку саяс, тшупӱдӱн вылӱджык, и пуксис. Вӱлӱмкӱ, печканӱн на сийӱ петӱма да нӱшта и посни извья пытшкӱса чӱрснас, да зӱльӱдчыны и кутӱс дугдывтӱг. Ачыс эськӱ Бияр коркӱ на вӱчлыс сылы татшӱм чӱрссӱ, да он нӱ скӱрмы пель саяд и дӱзмӱдчӱмысь? Куткыр-видзныгӱ он вермы, ни юрад нинӱм оз лок.

— Абу нин сюрӱма изтӱмыс!— доровтчылыс Бияр гӱтырланьыс.

— А тайӱн озджык сибав унмыд.

— Сибалӱ кӱ ӱд, водыштлӱн дай. Тӱтӱг нин кыдзкӱ вермӱдча.

— Эшта ме коркӱ водлыны. Лун шӱра луно!

— Ог на ӱд турун пуктӱй.

— А мед!— вомалис Унаыс. Зёлякылыштис швырган чорснас да акостис виччысытөг: — А-а... эсийо нө коні?

— Коді?

— Съокыд висьомыс!

— Вадорын кө-а. Ачылд од лэдзин.

— Волас, ме сылы!

Съокыд висьомнас Унаыс видліс Давос, гөгапиныс¹ ас-сьыныс. Отнас сийо и коли орд² кутысьнас, да сы борся и вөтлысис синнас, мед нинөм оз ло, кисо-коксо оз чег ли вао оз вой. Код выло сэсса лов-вирто пуктан, ас чужтом пиыд кө абу нин? Эм эськө нывныс, Юваыс, верос сайо сетана нин, да сылысь од он виччысь кодоскө, йозыдлы сетанаыдысь. А Давыс, сө майбыр, айыссянь абу на мод виралон, асланыс пиныслон на пиыс.

И Бияр личодліс съолөмсө Давыс выло видзөдлөмысь, дінас сийос топөдлөмысь да сөстөм еджыд банас тошкалөмысь. Пөчиньыс³ моз эз на сэтшөма и видлы да өлөдлы быдторйысь, корьясөкө нин сөмын дугөдліс вывти ышмөмсьыс да шуасяліс тшөктытөмсө на босьтөмысь, чер ли пурт кө. Сы выло и эм зон-ичотыд, мед вильышөн лоны. Мижуйсыыд нө коді быдымылас?

А казтылөма лои Давсө, да тшукон ачыс и мыччысис, чивкъялөмон кайис вадорсьыс, шешгялө нимкодъысла. Но өдийо тай сэсса нюкырмунліс мыжаысла, барөвөв көкөн и пондіс тувчавны да чышкысьны ваон резсьөмысла.

— Воны, воны, ме тэныд!— чөрса кинас и ырыштчыліс Унаыс.

— Ог.

— А воны, шуоны!

— Мыйла?

— Нетшка шабді юрситө да шөртө печка.

— Он нетшкы.

— Ог, дерт! Ме нө вадорө тэно лэдзи?

— Эн. Ывлао сөмын,— веськыда и висьтасис мортыд.

— А мыйла нө сэтчө лэччин? Вөйнытө?

— Эг, видзөдлыны.

— Сэсса видзөдлөмсьыд и көтасин?

¹ Гөгапи — внук.

² Орд — рөд.

³ Пөчинь — баб.

— Эг.

— А мыйысь нө?

— Арпияныслы ньөрйөн кучкалі.

— Лок, аслыд ситанад кучкышта.

— А няньтө кө сетыштан.

Вомкөтшас Биярлөн и ызъяліс серамыс, тайкө ортсө петас, да кутчысис на вом доръяссө чукрөдлөмөн, а со кыздикөн корыштіс Давыс няньсө, и шупавліс быттыө йөрвуждінөдзыс лэччөм лов курыдсыыс. И Унаыс, кылө, пычыктыліс доймөмысь моз да шушкөмөн и вочавидзис:

— Абусө ог сет! Бөрти рыгнас кө ог ичөтикаөн.

— Но,— нурбыльтөмөн бурасис Дав, но эз на вөрзыы.

— Лок, нинөм ог вөч. Мойда на, колөкө.

— Мый?

— Мый тшөктан.

— Му пуксьөмтө.

Аслыс Биярлы мамыс сёысьтө кымын мойдліс жө му пуксьөм йывсьыс. Дөзмөдас вөлі айсө мыйкө вөчигас, дінас и бергалө да, и чукөстас сэсса мамыс, лок пө мойда, да сы вылө и ылаалө. Ичөт дырийыд тай быдөнөс на гажөдө, кор кывзан, кытысь мый лоөма, и ас синнад на быттыө аддзылан ставсө, мойдыс бөрся и вөтчан кө да он кө дзөрнясь. Аслас вот Биярлөн абу мойдан сямыс, төданасө оз вермы кузьджыка висьтавны, чеччалөмөн и эштөдас. А Унаыслөн эм, лывкйөдлыны пондас ньөжмыдика да некытчө оз и мытшасьлы, а чөв усылас кө нин кыткө вунөдлөмысла, аслас юрысь лөсьөдас дай. Чайтан да, мөд пөлөс и юрыс сылөн, быдторсө өшйөдө да содтасьө на сэтчө. А, гашкө, и став анысь сэтшөмөсь, эз кө найө кутны вежөраныс кывлөмасө да водзө на лөсьөдлыны, эз и волы эськө өніөдзыс мойд ни сылан.

Коркөсьыс на коркө, важөнсьыс на важөн,— лайкөдана паніс Унаыс мойдсө,— некөн на нинөм эз вөв. Пемыдлөз ру сөмын и сулаліс пасьтала. Сэсса төв кыськө петіс да муткылявны кутіс русө, и сукмис да сукмис таысь руыс да ваө пөрис, а ваыс — зэв паськыд саридзө, пом ни дор. Ёсь йыла джуджыд гыяс и ветлісны сәті вевсясьлөмөн, кытчөдз эз лөнө төлыс. А төлыс лөнис, и саридзыс вочасөн лөнис да шылясис-молясис, сьөдавны и кутіс ывла рөмыд улас. Югыдыс некытысь на эз усь. Югыдыс пыдди мыйкө рудалан тыдовтчис да чөж моз лэччис саридз ылас. Чөж и вөлөма, олөмсө чужтысьыс. Уяліс да уяліс сійө, ылі и маті видзөдаліс, оз-ө кы-

тыськө косін аддзы поздысьнысö да кольксö пöжны, да абусö öд он аддзы. А квайтöс кольксö новлөдліс сійö пытшкас, да воддза кыксö, чорыд кышасö, вайны нин и коліс. И вайис сэсса да эз и вевъяв кутнысö, тюльс вöйисны кыкнанныс. И мөд кыкыс вайисны, кутліс нин кокъяснас да уськөдіс. Бөръя кыксö и сюсьмөдчис курыштны васьыс да топөдны бордъяснас, сідзикөн и пöжны кутіс аслас шоныднас. Кывзан он?

— Кывза,— вочавидзис Дав.

— А кыйялан мыйкө да?

— Сизь тай эстчө пуксис.

— Сизьтöгыс овлан! Ог и мойд водзö.

— Мойд.

— А энлы, коскөс веськөда,— коставліс Унаыс да выльыс сетчис лайкөдан мойдөмас.— А бара кыськө пушкан төв петіс да бара и гызис саридзыс, воддзасьыс на лөкысь. Бузгысьмөн тыртліс чөжтө быгйөсь ванас да гыысь гыö ляскөбтыліс. Ёна и доймаліс коньөр, став лысьбөмыс вөрзяліс, да эз на тай чегсы таысь мам сьөлөмыд, эз и уськөд пöжан колькъястө. Нинөм вермытөг и лөньны бөр ковмис төлыслы да саридзыслы. Сэки и потласисны чөжыдлөн колькъясыс, да чужисны кык лов, Ён да Омөль, бур кутысь да лөк кутысь. А мед оз көтасыны да кынмыны пияныс, мышку вылас и пуксьөдіс найөс мамыс да сідзикөн и быдтіс, кытчөдз тырвийө эз бордъясьны. Сөмын тай аслыс кулан кадыс воис, юрсö нин гоғйөдлыны сьөкыд, и шуис пияныслы, ме пö абу нин олысь, а ті пö судзөдөй саридз пьдөссьыс нель вöйөм кольксö менсьым да жуғөдөй менам көяө, кор ме кула. И кыпөдчис сэсса вылө-вылө да уськөдчис из моз, жуғөдчис саридз веркөсас. Ён-пийыс таысь шөгө и усьліс, а Омөль-пийыс эз. Мамыслыс тшөктөмсö на вунөдліс лөк кутысьыд. Воддзык сэки и сунөдчис Ёнмыд саридз пьдөсас. И муртса на саяліс ва улас, пельтө косялана и шутөвтис Омөльыс да йи сувтан көдзыдөн йизьөдіс саридзсö, кызасьыс-кыза. Чайтіс, оз нин и петав сэтись ловйөн Ён-вокыс. Да эз на тай сы ног ло. Сыркакывны кутіс йи улас, муткыравны йисö, сэсса и вывсянныс гымавны да чардавны кутіс, и воссяліс саридзыс, сыліс йиыс. Со на мыйта вөлөма Ёнмыдлөн выныс, эськө чөж пи на и вөлі да! И судзөдөма да петкөдіс өти кольк, жуғөдіс сійөс мамыслөн көяө, и уль му ёкмыль сэтись тыдовтчис, ыдждыны да ыдждыны кутіс, кузяла и пасьтала, вывлань и увлань. Саридз шөрас тадзи и артмис Муыд, турунзис да раскө кайис, сөмын югы-

дыс да шоныдыс эз нин и тырмы чепөсйөм вежөдыслы. Ма-мыслөн мөд колькйысла и сунөдчис сәсся Енмыд, петкөдіс да жугөдіс, вывлань качөдіс. И пырысьтөм-пыр енвевтыс лөзавны кутіс, шонді петіс да югзьөдіс гөгөр дзирдалан югөрнас. Тадзи и сувтіс медводдза луныд.

Инас оз ошйы, сэтшөма парскис таысь Омөльыдлы, өдйөсьыс-өдйө на сунөдчис джуджыдас да дыр эз мыччысь бөрсө. Быйкмуніс сәсся, да нюйтөссьөм кольк и кутө. Эз и пожъялышт, жугөдіс ва дорөсас изйө. И көрласис быттьө сәки Муыс, юөсь да шорөсь лои, нюрөсь да вадйөсь, мусюрөсь да кырөмөсь. Но эз на бурась Омөльыд, дай өти кольк өд коли на судзөдтөмыс. И сунөдчыліс сыла да петкөдіс, изйө бара и жугөдіс, сөмын эз нин Му вылас шыбит, а юр весьтас качөдіс. И пемдіс ывлаыс да төлысь петіс шонді пыддиыс, кодзувъяс пондісны чусавны енвевт пасьталаыс. Вой пуксис. Дөзмытөг эз ов Енмыд помасьлытөм войсьыд, бөр лунөн сйөс и вежис. А Омөльыдлы пемыдыс и муса, да бара вой вөчис. Тасянь, кык воклөн венсянь, и лои Му вылад югыд да пемыд, лун да вой.

И асьныс кык вок петісны сәсся Му вылас да өти-мөдыслөн син водзаныс мортъясө и пөрисны. Колө эськө мөдарө шуны да, йөзыс на вылө кутісны мунны. А сәки некод на эз вөв, мортыс ни пемөсыс, лэбачыс ни черыис. Сыысь и босьтіс Ентө гахтөмыс, да лөсьбөдіс быдсяма ловъя ловсө, аслыс коланасө: пемөсыс котралө, черыис гыбалө, лэбачыс сьылө. Сө пөв гажаджык и лои Му вылас. А Омөльыд нө кольччас воксьыс, нинөм оз и вөч ачыс? Тшөтш быдсяма ловъя ловсө и лөсьбөдіс, да сэтшөмсө, коді мукөдсө сөйө. Да эз на инась та вылө, быдсяма гагсө да лөльөсө на лөсьбөдіс, көйсө¹ да дзодзувсө. Сэтчө и помасис эськө олөмыс, сөйисны коді кодөс вермис да тшыгылы кулісны, да бур кутөмыс Енмыдлөн вынаджык на вөлі Омөльыдлөн лөк кутөм дорысь. И өнөдз вына. Сйөн и локтө олөмыс Му пуксьөмсяньыс.

Код төдас, кымын во колис, кымынысь пөрысьмыліс да пөрласис вөрыс, выльысь-выль быдмыліс, а мортыд век на эз вөв. Кодкө эськө колө на да, ас кодьыс кодкө, воис Енмыдлы юрас. Матысмө нин кадыс енвевтө меным кайны, а он өд Мусө эновт өтнасла Омөльы. И босьтіс сөй да шамраліс нудзөдз, сәсся чунь маласнас мортөс и артмөдіс. Кысянь оз

¹ Көй — змей.

видзёдлы, ас вылас и муно, сөмын абу на ловъя-а. Пөльыштис сэсса сөй мортыд вылө, и ловзис сийө, шоныд вира-яя лои. Вежыс Омөльлөн татчө и петис, тшөтш вөчис сөй морттө, сөмын эз нин айөс, а энбөс. И пөльыштис вом тырнас. Да он на тай ловзбөд, кор ачыд абу лов сетысь. Енмыслы и ковмис пөльыштны да ловзбөдны. Тадзи морт гозъяид и лоины Му вылас да насянь и паськалісны быдсяма йөзыс. Кодос кодлань енджыка кыскөма, Енмыслань-ө-Омөльыслань, сэтшөмөсь и эмөсь, некыз нин он веж.

— А менө кодланьө кыскөма? — юалис Дав.

— Енмыслань! — такөдіс пөчиньыс. — Еджыд чужөма тай со. Абу на сэтшөм видана и. Эг нө висьтавлы нин?

— Мед. Бара.

— Бара тай и висьталі. Эны, помала нин. Пуксис, видзөдө, му выв олөмыс, некодос нин оз ков лөсьөднысө, и енвевтас сэсса и кыпөдчис Енмыд. Омөльтө сэтчө эз нин сибөд, пьдди эз пукты сылысь кевгөмсө. Муас джуджыд сьөд потас вөлі, аслас вөчөмыс, да сэтчө и пырис сэсса Омөльыд, сэтысь и кутис петавлыны войнас. А Енмыд, мед и вылө-вылө кыпөдчис, Мутө эз вунөдлы, синсө чөвтлытөг эз овлы. Гымавліс да чардавліс, скөрмыліс кө мыйыськө, но и бурсө эз сайөдлы. Та вөсна и топавліс сьөлөмыс, кор том зонмөс казяліс кыськө таланысь, сьөд вөр шөрсьыс. Вөралө да чери кыйө, керка лэптома сигөраөс, а пыр өтнас, некод оз виччысь сийөс гортас, сыысь и шөгө усьлө. И ышловзис Енмыд да мездыны и шуис сийөс татшөм шогсьыс. Аслыс долыд вылө да мича вылө нылөс таөдз Енмыд лөсьөдліс, шонді югөр вираөс да эзысь кымөр яяөс, да муса нывсө асьыс, Зараньсө, и лэдзис зонмыд динө. Зэрөм бөрын өшкамөшка нюжөдіс Муөдзыс, да сы кузя и лэччис Зараньыс. Сувтіс зонмыс водзө. И мыйөн видзөдлісны синмысь синмө, пыр и воисны өта-мөдыслы сьөлөм выла-ныс.

А зонмыс сийө Вөйпөльыд и вөлі, веж петана тэчаса да сьодасьлытөм морттуя, ловгөнтөм на чужөма и. Оні өд тай висьталөны, коды вөтөн усьлөма, пөрысь пө да тошка, а сәки өд вир-яйыс на и ворсіс томыдлөн. И Зараньыд коркө дыр мысти на лои Зарни Аньнад, ордыс кор налөн, гозьялөн, паськаліс да вужъяис татөн. Насянь ми, комиыд, и локтам, найөс и пуктам оні аслынымлы вежа ай-мамө. И таысь найө мянөс и видзөны сө пөлөс лөксьыс. И Енмыс видзө, нинөмөн оз дзескөд, вөрсьыс и васьыс сетө, видз-мутө кө уджалан и, сөмын

ов да эн дышодчы. Тодө өд, абу ми сылы ылысось, аслас
нылыслөн йылөмыс. Ас туйө и пуктө комитө.

— А няньтө оз сет,— зыньгыштіс Дав.

— Сетө эськө да... этшатө,— кывйис сибдыліс Уналөн.—
Омөлыс тшыкөдчө. Босьтас да пужьялас, кор оз ков. Йөзысь
он вермы вайны-а, ори Ветйө туйыд.

— Эз на эськө ор да,— шыясис Бияр.

— Эз тай,— ланьтөдіс сійөс гөтырыс.— А эн на сэтчө
тшыгъяв!— чушкысьліс сэсся гөгапиыс вылө.— Мыдсалө на,
видзөда, чери-яйыд!

— Куш чери-яйыд!— няргыштіс водзөссө Дав.

— Но лок, чегышта идняньсьыс.

Колис өтнас пукавнысө, да асьсө ылөдлігмоз Бияр пондыліс
кытшлавны ывласө синнас. Но некытчө эз и вермыв сувтов-
керлыны: эз өд төдтөминө веськав ли пөрөдны пет керка дор-
сьыс кутшөмкө пожөм, мед бөрйыны на. Чери варыш, коста-
лан тывбордъяса, шлывгис вылыті Куа ты весьтөдыс, да сы
бөрся сөмын и видзөдіс дырджык. И няньсьыс йөрмөмысь
курзөдан дойыс бара и кайис нөгыльөн да сутшиктөдіс.

Вөрад лөсьыд, суас кө войыд, кык ноддя костад узьнытө,
бөрыдлы и водзыдлы шоныд, мудзыд и унмыд веськалыштас.
А шедлы йөзыдлөн кык би костад, дыр-ө ас олыснад лоан?
Да сідзи, тыдалө, и лоис. Поздысис Мөсқуаыс Югдінас да
донтөм донысь и көповтө кыйдөс куясты, кысьыд на мырд-
дялө, мед сэсся Ордаө и нуны, лышкөдны асланыс кансө.
Чайтан, кымын вөла-доддьөн мунап, сы мындаөн и ваия няньтө,
а вирыд пузьөмыдла пиньтө йирөмөн и бергөдчан. Косяд во-
лынытө на он лысьт, мед асьтө оз керавны.

И йөграсьыс бурөн ни лөкөн он мын, чомъясьөмаөсь сэтчө,
Сыктыв вомас да. Керкаясөн кө олісны, вөлөн да мөскөн,
гашкө, эз и вөрзьявны сэтысь, тышө вольгөг на позис кызкө
сёрнитчыны накөд, а локнытө на он удит, разялөмаөсь нин
чомьяссө да пышйөмаөсь Эжва катыдыс көра дадювьяснас.
Сэсся налькйө моз и веськалан налы гортланыд бөр туяд.
Уськөдчасны кысянькө ыджыд чукөрөн, да няньсьыд на вывті
и сувтас Ветйөад ветлөмыд. Кымынөн нин шойөннас воисны
бөрсө, тшөтш и Вожайыс, пиыс аслас Биярлөн.

Важөн нин коліс сувтны изкарөн Сыктыв вомас, дзыкөдз
вөтлыны сэтысь йөграсө, коркөсө тай, висьталөны, комиыслөн
и вөлөма Сыктыв да Эжва кузялаыс, сэсся сойсьөмаөсь-а виж-

ляясыс. Өні эськө восьса вөлі няньла туйыд, Коммуад пись-
тылін и коланторйыдла. А тадзтө регыд и пусьынытө лоө
нинөмөн, соталан порт-рачтө да, ыргөныдлөн абу жө кузь нэ-
мыс.

Мөскуа улө веськалөмысь и полөмыс Памалөн. Оз и бер-
гөдчы кывйыд шуасьны таысь сы вылө. Но куш полөмнад өд
он ов. Дай оз на, тыдалө, и луд Мөскуаыдлөн кийс ставнас
босьтны Комисө. Босьтан да өд, он кө виав йөзсө, нянь сёян
вомсө налысь он тупкав. Кызадзык на и ковмас вештысь-
нытө кыйдөс куясыыд. Медся на бур Мөскуаыдлы килькув-
төдны комисө, мед асьныс сетчөны. Сэки ошкуйыслы татчө
туйсө позьө потшны. А уськөдчөмнад бара на и отувтан ко-
мисө да ошкуйсө. Лөгыс тай тшөтш и петө ошкуйыслөн мөску-
асаыс вылө, эськө өтигыс и мөдыс рочөсь да.

Коді сөмын висьталас-а, югдылас оз комиыслы водзөыс.
Гашкө, абу нин и ылын Мөскуаыслы шедөмыс. Тшыг понйөс
моз чуқөстөмыс, гашкө, оз нин и тырмы. Ассыыд тай понтө
өлөдан и велөдан, мед нинөм оз босьт йөзыдлөн кийсь, но өд
и вердан, мед оз гурьяв кынөмыс. А видлы тшыгйөднытө,
вөтчас оз кодкө бөрся. Сідзи жө өд и йөзыд, матө кө воасны.
Ачыс понда ловтө вузальсыыд вөлі и лоө, но и войтырыд на
вермас та вылө мунны помтөгыд виньгыралөм дорысь, и он
көсөд ни янөд.

Таысь өні и колө повны. Да абу кө нин сёр!

Водзвылас — Юва, бөрвылас — Өльөк, сьөкыд туйсаөсь
кианыс, ваджиктісны Эжва дорсьыс катөдысь туйөдыс. Видз
весавны найө ветлісны ытванас вайөм лөпсьыс да өти сайысь
и туйсьяссө босьтлісны лиасьөм могысь. Но мыйлакө подөн
кыскысьөны, лунсө сөйөны и асьнысө сьөктөдөны. Өльөкыслөн
чепөль-пу на шуйга кокас дай, керньөгысь вөчөм, көртөн йи-
төсалөм.

Эз лысьт да эз и матыстчыв Өльөкыс пос помланьыс, мы-
жапырысь чөвтліс Бияр вылө синсө да пунктіс туйссө кок улас,
сэсса пөрччис тасмасө чернас и пуртнас да мыгччис Ювалы, и
муніс керка войладорас сылы вылө вөчөм воча чомьяс. Кык-
нан туйссө да тасмасө пыртіс Юва посводзас да пыр и бөр
петіс.

— Сөй литө,— шуис айыслы.— Али татчө петкөда
тасьтйөн?

— Эны тэ линад,— назгыштіс Бияр.

- А мый нө?
 — Эн өмөй пыжөн ветлөй?
 — Пыжөн.
 — А мый нө подөн бөрсө?
 — Абу на өд номйось,— килькмуңліс Юва.— Луныс
 гажа и.
 — Гажмөмыд и эм. А пыжыд?
 — Колим.
 — Кытчө?
 — Куа ты вис талаас.
 — Мыйлакө?
 — Бара аски ветлам.
 — Эз на өмөй весавсы, вит додюв сэтөн и лоө да?
 — Тырыс тай суйөма лөпсө.
 — Висьтав кодлыкө!— вочааліс Бияр.— Асьтө на кыскө
 эсікөд. Мед сөмын вошлыны кытчөкө.
 — А, гашкө, и кыскө!— кывберитіс Юва.
 — Мун, кучкысся!
 — Кучкы.
 — А эн нөйччы кук моз!— тапкис Бияр кокнас, да кызө-
 мыс на босьтліс лолыс тырмытөмысь.
 — Нөйччас кодкө!— нерыштіс Юва.— Кывтө нин он
 бөйры.
 — Кыскө тай, шуан!
 — Абу нө зон? Урөс кытікө? Мед, роч кө!
 — Варыс¹ мед?!
 — Варсыыд өд мездін дай. Дыр-ө мынтөдны чепөль-пу-
 сьыд?
 — Сэссия?
 — Тәні сэссия и олас. Пышгъяс нө, чайтан?
 — Ылөдз и пышгъян пилича² пельнад!
 — А оз и көйы. Тәнө оз лөкөд и. Бурө пуктө.
 — Мыйысь бурас?
 — Эз пө ви сэки да.
 — Вины и колөма, тайөс кө төдөма.
 — Пес лөктө!
 — А юрөс нө янөда?
 — мурөстіс Бияр.
 — Мыйысь?

¹ Вар — раб.

² Пилич — вундөса пас.

— Быдті-быдті, да со код сайö? Корагысьыд абу?!

— Со кодыскöд, гашкö, и олан-а. Этшаджык синваён.

— Кыгысь тöдан?!

— Ачыс мелань!— родыштлыгтöг и висьтасис Юва.

— Мун!— гут вылö дöзмöм понлөн увтыштöмыс кодь и артмис Биярлөн, водзö эз и сюр кывйыс.

Вермыштöма лои айсö, да Юва сэссия эз нин и тшетшйысь ськöд, пырис керкаас.

А Бияр эз и эштыв бурджыка шердйыштны юрас нылысь асныралöмсö, моньыс сэтчö воис, Шонагыс. Кöдзасö, арсясö и тувсовсö, ветліс сйö видзöдлыны важ тыла вылас да сэтгысь на и локтіс, кузь воропа кокана. Сувтöдіс кокансö керка бердас да пуксис орчөн, личöдчöмөн ышловзис.

— Мудзин?— ойгана¹ юалис Бияр.

— Мудзыд öд шедö. Лым вагыс-ö, зэр вагыс-ö пукалö тай и вöлі на рудзöг му вылад. Виж и петасыс.

— Писькöдалін?

— Сідз öд он коль.

— А идйыс нö?

— Öталягья. Пужъявліс да еджыд льöмнас.

— Ме эг и тöдлы тайö висьöмнад.

— Мед, бурдан кö и,— нургыльтіс Шона да чышкыштіс ки мышнас Биярлысь пель гөгöрсö.— Со петö нин висьöмыд.

— Ме ог тöд.

— А нбылöмыд и висьталö. Пöсьыд абу татшöм.

— Кутшöм?

— Нильöг.

— А бурдны и колö. Гожöмсö он куйлы,— шуис Бияр.

— Ме кытчö вошгыся-а?— лөвтыштіс Шона.

— Вөтлö нö кодкö? Эн кут тöрны? Абу Вожайсянь пидь? Мөдысь эн сёрнит тадзтö!

— Быть öд сёрнит.

— Мыйла быть?

— Сьökыд, буракö.

Татчö Биярöс и песовтöдліс асьсö.

— Буракöыд буракö на,— дольыштіс сэссия.

— А шогöдліс нин талун.

— Копыра уджсьыд. Эн нö копрась коканнад?

— А номсöдлö нин. Сёй няклялі.

¹ Ойгыны — жалитны.

- Видзчысьны позис.
- Видзчысян кызкө пондігад.
- А ме нө водзпöрсө понді? Эн ачыл менө дзерөд?
- Абу өд нярмөма... кызь куим арöснад,— бөрддзис Шона.— Мыйкө дилькъялөма нин Вожайылд бöрын. Эг тай и кыськө мөдөс корсь. Садьбөс кө, шуан, воштi.
- Ачым ме воштi. Сыысь и косөдіс Енмыс.
- А менө ульөн сөяс!
- Коді?
- Энькаылд! Төдлас кө. Öльөк вылө нө шуа?!
- Ловтө он пежав,— вочавидзис Бияр.— Ме вылө и шуан, төдчыны кутас кынөмыд да.
- А сөсся?
- Ог и соссьы. Ас вылө и босьта.
- А сөсся?
- Водзө олам. Кыдзикө.
- Öти керкаас?
- Мөдөс лэпта. Со тай вöрыс.
- Ой!— лямунліс Шона.
- Энлы на ойзы.
- Абу өд таса вомылд. Из эськө лыбөдлі нин да. Ог-ө чөвтчы.
- Чөвтча ме тэныд! Мед чужө, коді чужө.
- А колө нө асылд?
- Гашкө и, колө. Тэсянь буретш.
- Мыйла мясянь?
- Некодись на сэтшөма эз югдывлы аслым. Медся на муса, гашкө,— восьтысис Бияр.
- Кыськө тай эм!— сой пöвнас кыскыштлис Шона сійөс асланыс.
- Омольыс-ө-кодi öшйылас тэ вылө, лунтыр эз лэччыв, кузьяла дзугльөдлас, ыштөкө тувйөн-тувйөн и поткөдө сьөлөмтө. Некутшөм шог нин эз виччысь Бияр, сідз нин ойөстөм вөлі вийсьөмысла, а петіс Унаыс сөйны чукөстны и висьталис гусьөн на видзөмсө.
- Ме ог төд, висьтала ог,— падъялөмөн шуис.
- Мый?
- Волісны тай Емдінсьылд. Кыкөн на.
- Кор?
- Висигад.
- Мыйлакө?

— Памаыд велөдөма. Мед пө накөд и кывтан. А кытчө нө, мися, вөрзяс, садьтөм со куйлө да?

— Мый нө лоөма?

— Локтө пө.

— Коді? Мөскуаыс?

— Сэпөыд, Маюрыдлөн пиыс! Гашкө, сө пыжөн!

— Сөтө эськө ачыл содтін.

— Мед. Локтө пө тай-а. Совдорө нин сувтөма.

— Мый нө тась корсьө? Роч Енмыслы увтысьыс?

— Сийөс и вайө!

— Кодөс?

— Роч Енсө!

— Көч вир!— йирыштіс Бияр пиньсө.

— А комиыслыс соталө! Енколасө!

— Сыысь өд асьсө суйин дай! Биас! Ыж чукөр нө коми-ыс?

— А нянь пө сеталө! Мед сылысь и кывзысьөны!

— Няньнад, дерт, ылөдлан. Ас гидад и вайөдан.

— Му вежөмыд и воис. Сыысь и полан вөлі-а.

— Ланьт, эн урсась!

— А мый нө вөчан?

— Вермыла кө эськө!

— Вермылан!— нерыштіс Унаыс.— Довйөдлө на асьтө-а. Лок, пыртөда.

Важөн нин, ичөтдырсяньыс, эз доршасьлы Биярлөн синваыс, тшын курыдысь да чизыр төлысь сөмын, и со тусьөн-тусьөн тюраліс ныр кыкнан пөлөныс. Эз и пыксьышт, сетчис Унаыслы пыртөднысө.

2

Асыввылө, Куа тыланьыс банөн, сулаліс керкаыс, а Бияр куйліс төвъян джынъяс, пыдіас, и рытъя шондіыс инмис на сэтчө рытив-войсяньыс, рөмалөмөн пырис мисаөн¹ тупқалөм өшинь тасөдыс. Рыныш вом пасьта кымын и вөлі эськө өшиньыс, да уна-ө нө колө югыд вой улад пуксьысь шондылды? Гөрдөн и, вижөн и, лөзөн и — быд ногыс вераліс пыдіас усян югыдыс. Видзөдан сы вылө да он и төд, олан-ө-вөтасян.

¹ Миса — слюда.

Узьом улө нин и водіс эськө Бияр, өлөдіс на Унасө, мед оз тапъяв ёнасө ыджыд вежөсас, да локтас өмөй унмыд татшөм луныд бөрын? Вывтырыс на водзджыксө гөгөр моякыліс, сәс-ся эськө и лэдзыштіс куйлөмсьыс, да морөс шөрыс кутіс доймыны, кодкө быттө личкөмөн жуғөдіс морөспаньсө. Өтчыд вөлі нин тадзсө, тулыснас таво, ваис воссытөдз на, кор пыжсө кыскыліс сиравны Куа ты кыр йывланьыс, биасьлан кушинөдзыс. Кок йывсьыс тай кызкө эз на усь, но кутчысьлыны и ковмис тшапөд майөгө да дыр апавны сынөдсө. Но өд мый вынсьыс сәки лои зэлөдчылөма, өтпырайсьөн мед и воис пыжыс, а талун нө кытчө лои зэлөдчылөма? Эз на дугдыв со сьөлөмсө песөмысь, да сыысь, тыдалө, и сукмылө да сибдавлө вирыс.

Дойсьыс ружтөмөн да вом тырнас апасьөмөн и куйліс, кытчөдз эз кокньөд. Мыйсө эз мөвпав, ставыс разаліс юрсьыс, да таысь, гашкө, и лөнис вочасөн сьөлөмыс, кокньөдіс дойсьыс. Жуйвидзөмөн веськөдчис синнас вывланьө, вералан югыдыс вылө, и дырөкө мысти ачыс быттөкө кыпаліс сэтчө, да ва визув моз, сөмын лыбөдөмөн, нуны и нуны пондіс кытчөкө югыдыс, йиркыс ни керка вевтыс эз и кутны.

Унмыс-ө босьтіс, да сы вөсна тадзсө лои, ли шобрөдлыны кутіс олан вывсьыс на, мыйөн төдан? Пасьтала лөз дорөсө сибөдіс сәсся пуысь югыдыс, и ру ләччис сы дінө да Енмысө и пөрис. Көсийс эськө пыр и сувтны, да некыт эз вермы вөрзбөдны, а Енмыс петкөдліс кинас, мед оз и сувт.

— Тэ и лоан Биярыс, Арийө пиыс? — шуис нисьө юалис.

— Ме. А дінад нө нин босьтін?

— Эг на. Пыгшкад на лолыд.

— А мыйла нө кыпөдін? Ловъянас?

— Сөрнийөн.

— Видана сөрнийөн?

— Видана.

— Төда өд, мыйысь. Лөгасьлі тэ вылө да.

— Дыгыдасин тай. Му выв олөмыс вылө и ме вылө. Сыысь и топөдлі сьөлөмтө.

— Эг өд ме ас понда сөмын, Мезөсөй.

— Сійөс и инө пункті. Эськө эг и мылышты.

— Мыйла эн?

— Янтөм¹ нө?

¹ Ян — грек, стыд.

— Яныд өд... өшиё тай.
 — Ачыл на корсян. Пöрысьö нин матын, а этша на öти гöтырыд.
 — Ыззылан да өд.
 — А садьыд?
 — Воштылан,— яндзимысла вöрззыліс Бияр.— А сэсся ог дай, лэдзан кö на му вылас.
 — Лэдза на. Колан на сэтöн.
 — Кола, дерт. Кокныыд нö öнi комиыслы?
 — Абу.
 — А он жö отсав да, ачыл медыджыл айöн лоан-а. Зара-ныыд кузя.
 — Эг нö видз öнöдз? Асьтö кымынысь и?
 — А водзöсö? Роч Ен вылö нö тэнö вежам? Вайöны нин со да!
 — Энö сибöдöй!
 — Ме эськö ог да. Памаыл оз и. А мукöдыс?
 — Мед оз ылавны!
 — Оз, дерт, няныыл вылö!
 — А, сідзкö и, усьöны мед комисыс да йöз кыись и сё-йöны.
 — А мыйла ачыл он дорйы? Полан роч Енсьыс?
 — Ме ог пов. Ме ставсьыс на вылын. Муыс менам и.
 — А мый нö эськö?
 — Меным оз ковны... лов сёйысьыд!— лöгалöмсьыс мы-тшасьлөмөн и вочавидзис Енмыс да руö бөр и пöрис, сибус моз тöлаліс пасьтала лöзас.
 И Бияр вольпасяс бөр паляліс, сöмын ульсалөм вывтыра, быгтьöкö пывсис да чышкасьтөг и водіс, а пöсьыс петіс и петіс на.

Коркö тай томнас на вöтасьліс Енсö, да лолыс айыслөн, Арыöислөн, еджыл гулюөн и пуксьыліс Енмыслөн сой вылö. Сылысь ловсö, кулö ли, виасны ли да, гашкö, оз и пуксьöдлы тадзтö, но и вивті ылö, тöдöмысь, оз жö вöтлы, кöнкö матын и видзас. Со тай мылыштіс на сійöс, овны на Му вылас и лэдзис, эз сэтшöма и кыскав янсö, комиыс понда сулалөмсö на вылөджык пуктіс. И водзöсьыс тöдö, мый лов сёйысьнад сійö оз ло, эськö шойөн нин и куйліс öнi.

Ачыл нö корсян янсö, вöйпыштіс сійöс. А корсьöм пö колö, оз сідзикөн овлы, кор мынлö кутöдыд, гыззылас вирыд да?

Тодан нө водзвыв, кытчө и яналан? Сы могысь нө и ветліс сәкисө, кор йограыслы шедліс да Сюлаыскөд ноксис, пи койдысө колис сылы? И эз нө вештысь сәсся сыысь дон-сыыс на донөн да, гашкө, эз на и помөдз?

Волыгөг эз ов юорыс, локтан төвнас, джуджыд лымйон да веж көдзыдөн, и воліс, пи кага пө чужөма Сюлаыслөн, и Сюдөыс пө чиктылө на таысь, выль да нөшта и коми вира сора-са питө чужтөмысь, асьсө вежысьөн пө нин и ыдждөдлө пуз-чужөм кагасө, нимсө сылы Сюг пуктөма и, ассыыс ордсө пет-көдланөс, «сю» шыаөс водзас.

Биярлы, өтнаслы, и ковмис мөдзасьнысө¹ таысь. Унаыскөд налөн, гозъялөн, быдмис нин пиыс, а ачыс Памаыс гозйөдіс найөс Енмыслөн нимсянь, да инө эз и пукты Сюлаыслысь вайөмсө. Вайис кө и мед, пөсь ни көдзыд, дөзмышлөмсө кө он артав. Оз-ө нөшта лөсявны ков та вөсна йограыскөд? Вывті лөө налы, вөтланаыдлы! Эз кө падмөд сәки Памаыс, огө на пө, гашкө, вөрзөдлөй найөс, эськө аснырнас и чукөртліс морт дасөс да кайліс Сыктыв вомөдзыс, мый лоан ло сәсся.

Вежласьны волісны йограыс Овкөджас да найө вайисны Биярлы ковтөм юөрсө. Но, тыдалө, абу на сөмын сылы висьта-лөмаөсь, туө-буө на петкөдөмаөсь, и Унаыслы сәсся кывсьө-ма. Вескыда оз сөрнит, а чушгялө и чушгялө мыйкө сы вылө, век пөлыня юра да вежыня вома, и кагасө, бөрдө нин-а, оз нөньөд.

— Мый нө бөрдөдан? — зыркнитіс Бияр гормөдчанөн джоджас, кыз өгырө вөлі уськөдө горсьыс пессө да. — Он нөньөд мам йөвнад?

— Абунас ог нөньөд, — эрыштчыліс Унаыс.

— Кытчө нө лои?

— Съөд тыла вылө.

— Кутшөм съөд тыла вылө?

— Кытчө көдзөмыд.

— Мый көдзи?

— Йогра питө. Быдмө пө тай нин.

— Но и мед быдмө! — горөдіс Бияр, некытчө лои вош-тысьнысө да.

— Энлы, мый вундан-а?! — киргыштіс Унаыс.

Кымынкө лун сюрнөнь вылын и оліс Вожайыс. Сәсся эськө и вочасөн бөр на лои мамыслөн йөлыс, да ыштөкө тайон и

¹ Мөдзасьны — кайтчыны.

помасис гозъя костын зыкыс, но желльён и пырис Биярлы юрас Унаыслөн бөръя шуо́мыс.

И ковмис сэсса вундынысö ассъыс кöдзлöмсö.

Вожайыс бöрын Унаыс нылöс да пиöс на вайлис, но найö эз лоны дыр олысьясөн. Биавлöмысь и кулисны. А, дерт, биавлас, кынмöдан кö кык весът кузя на кагатö. Ру петö, нильзöма зэлыда да шоныда тöблöмысла, а керкаыд кöдзалöма войбыднад, сöмын на суйöма горъяд битö, рузумсö вежигкоста и турдö сёмдалысь кагаыд, сынисады нин рытнас.

Медводза кагаыд да, ёнджыкөн-ö-мый чужöма Вожайыс, дай мамыслөн синмыс да кыис тырмылöма на, буракö, сылы, кок йылас сувттöдзыс эз сэтшöма и висьмыв, эштöмöдзыс. И бöрыннас, нальöыс¹ и лятыыс² на көвъясылис сылы да, олысьён коли. Шуйга пельыс тай лятысьыс пондылис виявны, да шабди выйён кыдзкö бурдöдис мамыс. Öдийпырысьён и быдмис, вит арöснас айыслөн тасма тшалакас нин инмис кымöсыс.

А сийö гожöмнас сизимöд арöс вылö петис Вожайыс, кытчö он мун, сэтчö и вöзйысьö тшöтш. А Унаыс Юванас вöли ыджыд кынöма, коксö чөвталöмөн нин и ветлöдлö, быдлаö конъясьö, усьöмысь и пов. Мыйла эськö быттö и нуодан сийöс видз вылад, да оз öд гожöмыд виччысь, дась мичанас и тшöктöдö пунктыны турунтö. Куртан да юрасян уджыс сы вылö на и усис.

Вожайысьыс отсöгыс, дерт, эз на вöв юр кыскалöмысь öтдор. И то на дöзмöдлис сöмын вöвсö сермöд помсö нетшкөмөн да кокъяснас шлопöдöмөн, да мамыслы и ковмылис тшöтш кутчысьлыны вöлыслы сермөдас, сідзикөн — öтигыс верзьöма, мöдыс пода — вайны сюртöм юрсö сабри динас. Но век нин син уланыс вöли пиныс öтнассö гортаныс кольöм дорысь.

Код төдас, волісны эз йöграыс кыйöдчынысö таöдз? Гашкö и, волісны да аддзылісны: асьныс со гозъя видз выланыс и пиныс накöд, сэсса морт абу матын. И выльысь локтісны сийö луннас, мед вира лёкнысö и вöчны, гашкö и, Вожайсö на пышйöдны да вины, ыштöкö вошис и вошис кытчöкö. Сюгыс эськö сэки и коли Биярлы пинас. Вöв вирсö юом понда нö сöмын волісны да нöшта и Сюгсö вайöдлісны?

Ыджыдöс на, тöдöмысь, пуктылісны могсö! Да тöрытнас Бияр серöдз уджöдис эня-пияс, эз кольöд аски кежлас кур-

¹ *Нальö* — краснуха.

² *Ляты* — корь.

тан-чөвтансө, и аскинас сэссия өтнас и муніс ытшкыны орчча сёнсө. И Вожайыс эз вөтчы сы бөрся, дөнзёма нин вөлі лөдз-номсыйс да.

Воис Бияр видз вылас да нинөм сэтшөмсө эз и казав. Гез помөн чотөдліс вөвсө, да ыло абу и вешйылөма, матіас и йир-сьёма, сіт чукөръяссө колялөма. Разис сэссия вөлыслысь чотөдсө да сіdzi и лэдзис йирсьынысө: ачыс татөн лоө, да оз мун кытчөкө.

Орчча сёнсө, весьтасөнсө, ляпкыдик вөрвыв сайөдіс, кыддза-пожөма, пырыс тыдалана кытисюрө. Вуджис сэтчө да шөрсяньыс и пондіс ытшкыны. Кыкөс ытшкысянсө, татөн нин, Овкөджас, вөчөмсө босьтіс сьөрсыйс, гортас на бура зудьялө-маөс, да лунөн и чайтіс уськөдны сэтысь видзсө.

Бура унакодь нин ытшкис, қор кывліс вөлыслысь гырыся корсьөдлөмсө, ыштөкө мыйыськө повзёмысла, да дженьыди-ка гөрөктылөмсө. Но пыдди эз и пукты. Ас гөгөрыс лыдтөм гартчис лун шөрланыйс петөм лөддзыс, да чайтіс, мый и вөвсө матө воштисны. Сылы өд ныр розьясас на пырөны, да корсьөдлытөг оз ов. И гөрөктылөмыс вөлі гөгөрвоана: морттө ёрччөдасны вир юысьясыд, а сылы өд мыйкө шу жө.

Эз кө горшыс кут косьмыны да синсө чөсөдны нбылөдөм-сыйс, Бияр, гашкө, эз на и дугөдчыв ытшкөмсыйс. А лои петіс тавны пуктөм нин видз вылас, ты гуран сэтөн вөлі да. И петіс да эз на и видзөдлы, кытөн-мый вөлыс, ты гуран дінас и весь-көдчис. Бөрыннас нин, юөма и мысьбөма, коссө веськөдігмоз нөдждьясьыштис өтарө и мөдарө да некысь эз аддзы вөвсө. И то на чуймыліс водзпөрсө: вөрас али мый пырис лөдз-номсө вердны? Овлө эськө, пыралөны пемөсыд медся мутшкөсінас на, но өд оз сулавны, а гирсьөдчыны. Та вөсна Бияр виччы-сьыштис на, оз-ө кыськө ратшкөдчөмөн пет зэв өдйө вөлыс.

Но шы ни гу. И вөліс кучкис юрас, мый абу на тайө бур водзын. Кодкө воліс да нуөдіс на вөвсө. А коді нө нуөдас йөграысь кындзи? Налы пө тай колө вөв вирсө юны, сідзикөн вежөдны асьнысө, өти гөрөдөн гөрөдасьны.

Черсө Бияр перйыліс тасма козьянсьыс да лун сөяныскөд өтлаын сабри улас пуктыліс, вуджөр сайө. Сэтөн на, ен ськөдөн, и вөлі черыс, да босьтөмөн тшөтш и котөртис Эжва-ланыйс, шондіыслы вочаөн. Волісны кө өд йөграыс, кыськө мөдарсянь эз воыны. Колөкө, көнкө сэтөнөсь на, Эжва кыр-көтшас, чурсьөдлөны гырөдсь вомнаныйс вөв вирсө.

Петіс веськыда вөрөдыс Эжва кыркөтшыс да медводз ю катыдыс и видзөдліс, оз-ө пыжаөсь тыдавны көнкө йөграыс,

но некысь некод эз усьлы син улас, каляяс сӧмын и шлывь-
лысны ӧткӧн-ӧткӧн. Кывзысьштіс сӧсся ланьтӧдчылӧмӧн, да
шы ни сёрни эз жӧ кывлы. Но ӧд кытчӧкӧ лои вӧлыс, тадзи
он эновтчы!

Эжва пӧлӧныс, катыдыс, видзчысьмӧн и мӧдӧдчис. Мурт-
саник тӧвруыс паныдӧн сылы ыркнитавліс, да исасьмӧн тшӧтш
пондіс лолыштавлыны. Вӧчисны кӧ ӧд йӧграыс мыйкӧ вӧвсӧ,
уль яй да вир кӧрыд татшӧм шоныднад ылыськодъ кылӧ, оз
на понйыдлӧн нырисыс ков.

И кыліс сӧсся Эжваыслӧн чукылас воигӧн. А кымынкӧ
воськов мысти и кок туйсӧ на казяліс: тшамӧсасьлӧма вӧлыс
да муӧдзыс таялӧма ув-ӧг сора нитшсӧ.

Эз, вир пузьӧмыслы Бияр эз на сетчы. Йирыштіс пиньсӧ
да копыра юрӧн, ошкысь на, гашкӧ, гусьӧн, пондіс сибӧдчы-
ны. Сәнӧсь кӧ на йӧграыс, кытчӧ виисны вӧвсӧ, асьнысӧ и
колӧ вылысаныс суны, вируляӧ жӧ вӧчны.

Сёрниныс, ас ногныс нума-намакылӧмыс, регыд и локны
кутіс горамыштӧмӧн, да Бияр быттӧ кокнялыштіс инасяна
нин кӧсйӧмысла, быттӧ эз нин и ачыс, а кодкӧ матыстӧдіс
сйӧс йӧграсӧ восьсаӧн аддзана выйӧдз. Витӧнӧсь вӧлісны найӧ,
нӧль верстьӧ да кодкӧ ичӧт на, няр кӧр куысь кукыля сӧви-
каось. Верстьӧыс кӧкӧдісны ичӧтсӧ, юктӧдісны чибльӧгысь, а
сйӧс, буракӧ, кезйӧдліс, юрнас и кинас пыксяліс.

Вийӧм вӧлыс быттӧ сулаліс на водз кокъяснас, сӧмын пе-
совтчӧм юра да жеркалӧм сылі ула. Дженъыд вылысь дома-
лӧмаӧсь пожӧмӧ да сідзикӧн и вундӧмаӧсь голясӧ. Домӧд сю-
мысыс и кутіс муас пӧрӧмсыс.

Бӧрыннас нин Бияр гӧгӧрвоис, мый абу на колӧма уськӧд-
чынысӧ, колӧма на кытшовтны да катыдладорсяныс вув-
зысьсны, сӧки эськӧ некод эз пышйы. А босьтіс да чепӧсйис.
Кык верстьӧсӧ сэтчӧ, вир юанінас, и кераліс, коймӧдсӧ вӧтӧдіс
да мышкас сапкис, а нӧльӧдыс удитіс водзӧджык котӧртны да
гири-люкиӧн лӧччыны Эжва кырийӧдыс, йӧткысьны пыжнас.
Бияр эськӧ кыкысьӧн и чеччыштіс кыр улас, но эз нин ышты
шыбитны чернас: инман ли он на, а чертӧ воштан. И скӧр-
вывсьыс ырыштчыліс сӧмын.

Пышйӧм йӧграыс Эжва шӧрас и гудрасис кык лопта пе-
лысӧн, эз кат ни мӧдарас, лыа дорӧсас, эз вудж, ичӧгыс ӧд
колис на, аслас пивыс на, гашкӧ, да эз на и мунсьы сылы, син
водзас петкӧдліс Биярлысь лӧгсӧ. Но он ӧд сулав да увтчы
пон моз.

Абу на и вөрзбылөма ичөтыс, сыркъяліс повзёмысла да бёрдөмысла. А кор матысь нин кыліс да аддзис Биярөс, лизгырмуніс-усис кок йывсьыс. Кукыльөдыс лыбөдөмөн и сувтөдіс бөр сійөс Бияр, но ковмис на кутны усьёмсьыс, кытчөдз эз сую черсө тасма козъянас да шу лөкавтөг:

— Ог ви. Лэдза.

Сэки сөмын дугдіс ичөтыс довкъявнысө да лэптыліс юрсө Бияр вылө. И аслас сълөн ыштөкө орлісны кок сөнгъясыс адзълөмсъыс: кузьмөс ныр-вома да еджоват чужөмбана и вөлі ичөтыс, Вожайыс вылө на муныштысь, гырдөсь вом дора сөмын кенясьөм вөв вирсьыс; син потасъясыс да сьөд юрсиныс ёнджыкасө и кыскисны йөграланьыс.

— Кодлөн нө?— аддзө нин, да комиыслы пырөм серөсөн юалис на Бияр.— Сюдө ордса? Сюла мамыд?

— Ы,— лөвтыштис ичөтыс.

— А нимыд? Сюг?

— Ы.

— А мый нө тэнө кыскалөны эсян?— видзөдліс Бияр дінас кык шойыс вылө.— Мый лэдзөны гортсьыд?

Но эз, буракө, гөгөрво Сюгыс коминас да ас вылас лөкалөмө и пуктис юасьөмсө, бара пондіс сыркъявны, тайкө усяс. Пельпомөдыс сэся и кутьштис сійөс Бияр да тапкөдыштис чуньяснас, мед оз пов. Ая-пия моз и сулалісны тадзи мыйкө дыра.

Ойгөмыс на босьтліс Биярөс, да мөвпыштис, мый, гашкө, гортас и нуөдны Сюгсө, мед пиён тшөтш и быдмө, но ачыс сэся и чезыртчыліс татшөм мөвпсьыс. Сибөдас нө Унаыс, оз пурөмөн и пурны кут кодкө улысь петөмтө да нөшта син вежанатө? Колө сылы аслыс йөгра сораса пиыс? Бур олысьыс понписө бөрийө-а быдтөм вылас!

Черас нин и кутчысьліс Бияр, мед тышкыштны Сюгыслы балябөж ёсяс да сідзикөн и мынны сыысь. Сэки эськө и Сюдөбыслөн бөръя лачаыс бырө ас ордса вежысь вылас. Но пыр и личалис бөр кыис юковтан мывсьыс, босьтас да помалас нө ньөти на мыжтөм мортсө, та ыдждасө? Лов йирансө аслыс вөчас? Мед олө, дыр-ө олө.

Пышйөм йөграыс, төдөмысь, ылө эз на кат дай оз и лысьт өні ловйөнтө өтнас бөр локны. Юаласны өд, кытчө-мый лоины мукөдыс. Куим верстьөыс понда, гашкө, ёна оз и мыждыны, оз тай сэтшөма и донгъясны быд юрөн, а Сюгыс понда, оз кө бөр вайөд, асьсө и кыскасны тотшкыны. Тайөс и ар-

тышгис Бияр да лэччөдiс Сюгсö ки пöлөдыс Эжва дiнас. Мöдa-
рас, лыа дорöсас, и сулалiс на пыжнас пышйöм йöграыс.

— Со, нуöд!— горöдiс сылы Бияр да бöр кайис Эжва
кыр йылас.

Вöвсö нин кулигөн сэсся кывлiс йöгра ногыс кыкыслысь
горзёмсö да Сюгыслысь кыр йылас кайёмсö, сэтi ю катыдыс
котöртöмсö. Велöдiс, буракö, пышйöмаыс, мый кыськö сэсянь
пуксьöдас пыжас.

Кульöм вöв дiнас и кыскалiс бöрыннас Бияр виöм йöгра-
яссö да ыджыда биасис. Сэсся пöрöдчыны да кусöдчыны на
ковмис, мед гөгöрыс вöрас оз кутчысь быыс. Вöлыс вöсна сöмын
и дiлкъялiс сьöлөмыс: чаньон на лöсьöдлiс да быдтiс куим
арöсöдз, эз нин ков быд пöрийö öтилысь да мöдлысь корлыны,
а бара со вöвтöг и коли пеж йöграыс понда. Энлы, волас налы
тöлыс!

Колис вöвтöгыд да чорыда и йөрмылiс Бияр. Быдөн на ас-
лыс пуктысис, кысь-мый шедö ытшкис, да кодöскö он чукöст-
лы отсöг вылад, кодлыськö он корлы вöвсö. Аслыс и ковмис
нöб гезйон ваявны чöвтан туунсö. Позис эськö и кык потшкөн,
да Унасö öд он сувтöд мöд мортыс пыдди. Чöвтчас нö мед?
И Вожайыс помысь нинöм на.

Но кызкö тай эштöдчис пуктысьöмнас, мича косөн на и
воис туруныс сабриöдзыс. И кывтлыны шуис Емдiнас, Пама
дiнас, мед висьтасьöма лои сылы тöv кejas мövпыштöм йив-
сьыс, а ковмас кö и, аснырсö на петкöдлыны, мед помала оз
падъяв сийö. Он эськö мырддыы сылысь вежöрсö, да вежöр
дiнад усьлытöм сьöлөм на колö.

Асъя шондiнас петiс Бияр гортсьыс да рытъянас, вылiөн
на, и воис Емдiнас. Эз кö паныдав рытыв тöлыс, шыблöдлы
пыж нырсö, гашкö и, öдийöджык на кывтiс. Но буретш на и
лои воöмыс, ывласьыс суис Памасö, ньывкöса нöрыссьыс. Кык
сывтыръя сяр, абу кö ыджыдджык на, сувтöдöмаöсь вöлi сэтчö,
нöрысас, да Памаяс вежöдiс сийöс, резiс ваö кötöдлöм куима
кыз пу вожөн.

Кыськö тай кодлыкö сюрöма сы ыджда йöга пожöмыс! Пу-
чер дiнладорыс, кузьджыка кольöмыс, сюръя пыддиыс и лö-
ма, а йöг вылысладорсö черпу кузяон и чинтöма. И нöшта на
нель кыз тув, увланыö-вывланыöон, сүйöма гөгрöсмöдöм йөгас.
Квайт сюра сяр и эм, видзöдан да, комыслөн ас олан пасыс.
Ичöt дырйиыс, зонпосниыскöд ворсигөн, Бияр вöчавлiс жö

татшөм сярсө ньөрйысь да сёйысь. Вөлі пудъясны, да кодкө тойлалысь кольө, а мукөдыс сувталасны коді кытчө, мед сөмын вылөджык, да горзёны: «Ас кар вылын ачым ыджыд!» И мед эськө тойыштныгө на он сетчы дай сярэд оз жугав.

Сідзкө и, Памаяслөн лыбавлө на сёлөмыс, чайтө на кутны Коми мусө, сійөн и тшөктіс сувтөдны ыджыдалан сярсө!

Эз эськө Бияр и суйсыы матөджыксө, йөзсыыс на дорын и сулаліс, кайис нөрысас да, но мыйлакө регыд и кыкис синсө Камарлысь, кыйявны кутіс сійө сы вылө, а сэсса и петіс сы дінө:

— Мый нө шывъялан?

— Колө.

— Мый колө?

— Бур кывйыс. Памалөн.

— Мый вылө? Ветйөад петавны?

— А мый нө? Öти туй нин и коли? Югдінөдз? Уна сэсы и вайлан няньтө?

— А Ветйөсыд и ваян? Волан кө сэтчөдз?

— Мыйла нө он?

— Бурөн тэнö и лэдзас Сюдөйд Сыктыв вожад?

— Оз кө, и лөкөн!

— Ээв тай көсян! Вөвтө, висьталөны, водзөсалөмыд нин-а йөграыслы,— чиктыліс Камар.

— Водзөстө өд бергөдлөны. Ачыд төдан.

— Мун да и бергөд! Эн тан довъяв!

— Татчө тай визулыс кылөдіс,— кывберитіс Бияр.

Вешийс Камарыс, да сэки нин, юрсө лэдзөмөн сулалігас, мөвпыштіс Бияр, мый сійө, тыдалө, и падмөдө Памасө Сыктыв йывтыыс Ветйөас петалөмысь. И оз на полөмыс понда, мый ковмас, гашкө, ожманөдз¹ воыны йөграыскөд. Аслыс на, төдөмысь, чуктө мыйкө сылы Югдінсыыс. А, дерт, чуктө, сы киө и веськалө өтувъяө чукөртөм кыйдөс куыс да. Сьөкыд нө гусьөнтө мыйтакө инавны аслыд вылө?

— Мый нө шогалан?

Унзіль вылысь моз Бияр пырквөчис юрнас. Вөлөмкө, разөдчөны нин йөзыс, да Нира сы дінө матыстчөма.

— Сідзи, мудзвылысь. Кутшөма нин овсьө?

— Лун да вой. Эня-пия и зыкссылам.

— Мыйлакө?

— Мед ог некод вылө видзөдлы.

¹ Ожман — война.

— А кодкө нө... туясьлө?

— Абу на өд кос косьмөм. А ті нө, гозья?

— Кор кызди.

— А оланнды, дерт!— вежалана шуис Нира да муніс, сідзисө весиг эз юав, локтан он пө узьнытө. Воддзасьыс мынтөдчөмла нин, буракө, и матыстчыліс. И Камарсө, буракө, бөр и сибөдлө, син бөжнас тай и лыйыштаваліс Камарыс, ачыс Памалы мыйкө висьталіс-а.

Парскытөг эз ов Биярлы Нираыслөн сыысь эновтчөмыс, но кутіс асьсө скөрмөмсьыс, повзис да, мый, колөкө, суклялө нин Камарыс сійөс Памаыслы, а сійө сувтөма да сулалө. И веськыда синмөн вөрзис Памаыс дорө, копыртчыліс сылы да кос вомөн и могмөдчис:

— Ыджыд өксы, ме тэ дінө!

— Аддза. Абу тай нин шедлөма унмыд. Шупалөма чужө-мыд.

— Яйялас. Пемдө нин войыс. Ун пөтыдлы.

— Вөвтөгыд пө тай кольөмыд?

— Колисны. Вижляыс. Куимөс эськө, асьнысө, чергөді жө да.

— Инө, и тырмылас, водзөс бергөдөм понда кө.

— Вөлыд донаджык на сувтө.

— А аслад юрыд?

— Мед, усбө кө. Оз нин ков песны ловтө.

— Эн ырьяв! Быттө дөзмөмыд нин овнытө!

— А он нө дөзмы?

— Мыйысь?

— Мөскуалы тай быттө и олам, огө нин аслыным-а.

— Эн курксы! Тэтөг уна кырнышыс!— пинь пырыс өлөдіс Пама да бергөдчыліс сьөкыда ышловзьинысө.

— А огө нө?— та вөсна эз и кывзысь Бияр.— Став кыйдөс куыд Югдіно и мунө. Джын донысь.

— Ветлы да ачыд доньясь! Уна-ө-мый ваян-а?— лөгысь ышмунліс Камар.

— Ковмас кө, и ветла!— ланьтөдіс сійөс Бияр да выльысь шыасис Памаыс дінө:— Эн нө ачыд шулы, Ыджыд өксы, Ветйөас петалөм йылысь? Вөтлөма кө вөлі Сюдөсө Сыктыв вомсьыс, өні эськө восьса вөлі туйыд.

— Код төдас. Рака чукөрыд на, аддзылан, вөйшөдлө варыштө.

— Варышыд өд... пөт, гашкө, да. Мед тай скөрмылас, өдийө пуркөдас, коді шедлө.

— А сэсся?²
 — Лэбас кытчөкө. Ылі вöрас.
 — А ми кытчө лэбам?²— кыйис Пама кывсö.— Ошкуй моз нö тэ чайтан, волін и мунін?² Көнi тэнад ылыд?²
 — А полöмнад... А полöмыд медся на мустöм, Ыджыд öксы! Асьтö на полöмыд виö!— ыззис Бияр.— Оз кө ло бур кывйыд, ме аснырөн ветла. Тöлыс пуксяс да.
 — Кытчöдз волан-а?²!— бара сыйсыбылс Камар.
 Но Пама быттö эз кывлы сылысь дэльöдöмсö, увсянь ылыöн видзöддiс Бияр ылыö да юалис:
 — Öтнад?²
 — Ог. Чукöрта морт кызвöс да. Кодi оз повззы.
 — Сэсся подöн?²
 — Вöлөн и подöн. Вöла дас кө и.
 — А аслад вöлыд?²!— пыр сэтчö и бертыштiс Камар.
 — Эн эськö жеръяв!²— тувчылыс сылань Бияр.— Босьта да ланьтöда дзикöдз.
 — Тэ менö ланьтöдан?²! Кыськö локтöмыс?²!
 — Ачыл тэ кыськöвыс! Лопыр¹ чомйысь! Чишкасьлöминыд и еджыд!
 — Пама, шу кывтö!— кутчысис Камар шыпурт воропас.— Дыр-ö тан зыргас ляк ордысьыс²?
 — Мун, мöдысь волан!²— удитiс Пама öлöдны Биярöс, эськö пöран пу моз нин и доровтчылыс сийö водзланьыс да.
 — Кор мöдысьсö?²
 — Тöлыс пуксяс да. Шуан тай вöли.
 — Сидзкö и,— кывйö сетчис Бияр да эз и кут сэн педзи-касьны, лэччис вадорас. Пыж дiнас нин воигөн юковтiс сылы, мый эз и юав Памабылысь, мыйла ылысьсö воыны. Бур кывйысла?² Но он öд косав лёкыд водзö, дай некод нин эз и тыдав нöрысас, сöмын сувтöдöм сярис зарниасис лэччан шондiсьыс шабдi вийöн мавтöмысла.
 Зэвтiс пыжас төвдöрасö, йöткысис джуджыд ва ылас да рытыв төв нылыдыс вöрзис Эжва катыдыс. Но нетшкысис на сёлöмыс Камарыслөн нимтысьбöмысь. Лоöма öксы пи, көвъялöмаöсь Памабылы, да сийö ыштöкö и мортыс, а эськö ачыс на нюр выв пу, биö сöмын, сэсся некытчö.

¹ Лопыр — таdzi шулöмаöсь саамъясöс.

² Ляк ордысь — улö пуктана рöдысь.

Джуджыд лымйодзыс, понийсылы подийгөдз, позис на вөравны, ур сётө уськөдны, да и низьыс да туланыс, вит-ө-квайтыс, колялісны на выльдзык кок туйсө. Шуны кө, нинөм на эз и вөтлы вөрсьыс. Весиг ньөвсө, дзенгана помасө, кыксёсыс унджыкөс вөчліс, да куимөс сөмын и воштис: пыр өд он видзөд, лыян да кытчө усьө, нөшта нин туланыд бөрся вөтлысигөн.

А пуксис нин төлыс, да ветлыны кө Ветйөас, коскөдзыд лымсө он виччысь, трачкакылан көдзыдсө да. И Бияр петис вөрсьыс. Кык вой и узис гортас: өтиөс — мудзөмысла, мөдсө — пывсян понда. Аскомысьнас и лэччис кыса лызьнас Емдінө. Көсийліс ямпанас да лызьыс вылө ыштис: ю вылад өд топыдджык лымйыс вөрад дорысь, да лызьыд, чайтис, өдйөджык и вайөдас. А тайкө эз мөдарө ло.

Емдінас вотөдзыс на, Эжваыслөн бөрья көджсьыс веськыда нин вомын вылас петтөдзыс, көиньяс сийөс вөтөдісны, витөнөсь, эня-аяыс, буракө, да тавося пияныс. Абу нин сюрөма көрыд ни йөраыд, колө морттө косявлыны. И косявлісны эськө, эз и кывлы Бияр налысь ньөти шыгөгыс матыстчөмсө, кымыныськө чеччыштан выйөдзыс, да рыгья төлысьыс видзис. Асыввывсянньыс на, мышку сайсянньыс, югзөдіс сийө, да вуджөрьяссө водзвывсьыс казяліс, аслак кок вуджөрьяс дінсьыс. И удитіс бергөдчыны, чургөдны койбедьсө көрта ёсь помнас, сэки сөмын ыркмуналіс повзьөмысла. Но и көиньясыс япмуналісны да посниа чеччышталісны бөрвыв, пондісны вөрласьны, эз лысьтны сулавны өтилаас, весиг айыс, медся ыджыдыс. Эньыс и эдзык сетчы полөмыслы, кольөдчис матөджыксө, сайөдліс да жергөдліс пиньсө. Мамыдлы, сылы, вердны коліс котырсө, да он өд эновт шедана нин яйтө.

Бияр шөйөвошліс да бөрөн и пондыліс ылыстчыны, ыштөкө эз төд, мый кыса лызьыд бөрвывтө оз исковтөд, паныдалө лымсө. Да верман на и гатшасьны бөрнад, зурасяс кытчөкө лызьыд да, кутшөмкө лым южө ли йи чегөмө. И он сувт да войсө тан коляв, турдөмсыйд ойөсты. А энь көиныс сы бөрся и чөвтышталіс кокъяссө, нюжйөдліс юрсө; эрыштчылас, и сувтлө гөныс сьылі вылас.

«Черыс и пуртыс на сьөрас, да мыйла и полө?» — скөрмис ас вылас Бияр. Сэсья черсө и перйис тасма козьянсьыс да ырыштчис, муртса эз шыбит скөрвывсьыс, бөрья здукас кутөдіс асьсө. И сувтис вөрзьяввтөг да синмас и пондіс видзөдны энь

көйныслы, сыланьё ножёдана копыртны юрсө. Водзджык на тай энъ көйныслөн лапмуңлысны синъясыс, бөжыс усыл и. Мортыдлы воча, оз кө ачыс повззы, некод на нель кокаыд оз вермы дырджыктө видзөдны. И мед петкөдлыны ассьыс вермөмсө, Бияр бөр суйис черсө тасма козъянас да көйн котырыс водзын и кудзасис. Найё өд абу ылі вираоёс понъяссыд, а понъясыдлысь аддзывлан пурсиганыс: коді вермас, сійё сэсся и кудзалө сэтчө, пурсянінас, зывөксө петкөдлө вермөмыслы.

Быттьө ньөти оз и пов, ньөжйөпырысь бергөдчис Бияр да йөткасьтөг и катовтис водзө; койбедьсө веськыд киняулас топөдис, мед чурвидзис бөрсяньыс көрта ёсь помнас да ветлөдліс на сэтчө-татчө воскөвсө вежөмысь. Мустөм эскө вөлі, руавліс син водзас ловсө кутөм бөрын ыджыда ышловзёмсьыс, но бөрвылас төдөмөн эз видзөдлы; код төдас налысь, көйн котырыдлысь, видзөдлан да, пышйөмөн, гашкө, и чайтасны, уськөдчасны вөтөднысө. А, буракө, падъялісны нин вывтисө матыстчыны, вуджөръясыс эз нин мыччысьлыны өнтая мозыс.

Петіс вомын вылас да муныштис на мыйтакө, и сэки сөмын сувтовкерліс веськөдны тырөм ловсө да видзөдліс бөрвылас. Кольчылөмаоёс и вөлөм көинъясыс да сөмын на тыдовтчисны вомын юрас, но водзөсө эз нин вурксьөдны, пуксялісны сэтчө; энъыс-ө-коді вурзалыштис на тшыгысьыс дільмуномысла. Эз на, гашкө, эськө дугдыны вөтчөмсьыс, да тшын сюръя летчысь быис водзынас, сьөдалан тымөда джуджыд мыльк йывлянаяс, падмөдіс, буракө, найөс дзикөдзсө.

Эжва вывтис на и локтис Бияр гоҗся өзым дорөдзис да кайис веськыда бипур дінас. Кыза гыөртөм эзысь сярис веськыд ки вылас и коли. Но бипур дінас морт эз вөв, и пөрччис лызь гозсө да гажөдыштис асьсө локтысь шоныднас. Сэки кодкө и петысь лои тымөдас вөчөм векни өдзөсөдыс.

— Коді сэн?!— эз и повззы, а чуймыліс сөмын петысьыс.

— Ме. Овкөджысь.

— Коді Овкөджсьыс?

— Бияр.

— Тэ тай и вөлөмыд. А менө эн төд?

— Чив кө-а?

— Да. Бара ме шөрө и веськалін.

— Сідзкө, бур водзын на,— шешмуңліс Бияр.

— Мед эськө да.

— А мый нө?

— Ветйөө пө тай ылө синмыд.

- Сэтчө.
- А мый өні тась нуан?!— шуис Чив.
- Оз и ков нинөм. Бур кывйыс кө Памалөн лоө и.
- Бур кыв вылад и вежасны тэныд няньтө! Мый воліс кыйдөс куыс, ставсө Югдінө шердйөдіс-а.
- Коді? — юавсис Биярлөн.
- Төдан өд, коді. Өти тан Камарыс. Оз удзөд асьсө!
- А мый нө, кузь киа?
- Ме ог төд, көні узян?!— эз быттө гөгөрвө Чив.
- Тані көнкө. А эн висьтав да, мый юалі?
- Пырав аски Нира ордад. Сылысь юав, кытысь югыд паньыс. Мыйкөыс да, сись дозйыс. Вось¹ сикөтшыс и.
- Юавтөгыс нин овсяс,— мургыштис Бияр. Пыр и усис сылы төд вылас, мый вөсь сикөтша и вөлі Нираыс сярсө сувтөданінас. Сөмын эз висьтав-а, коді сы дінө туясылө. Камарсө, вөлөмкө, бөр и сибөдлө гилялан бөжулаыд. А пивыс вылө өд элясь, быттө сысянь и зыкыс. Розя туис!
- Мый нө нюкрасян? — казяліс Чив дзуглясьөмсө.
- Кынөмөс гурийөдлө, лунтыр сөйлытөм,— вочавидзис Бияр.
- А лок пырам. Няньыд оз, а кос чериыд сюрө на. Пөсь ванад кылөднытө.
- Менам аслам сюрө. Йөжөм көр яй. Сөмын вөлав да тшукөдлы солад.
- Совсьыд өд... олам на тай. А мыйкө... ме кө ветла жө Ветйөад?
- Ветлам. Лэдзас кө Памаыд.
- Вөзйыся. Тані довъялөм дорысь. Лок.
- Төрытъя мудзөм да лешмөмвивсьыс асья югыдөдзыс узьсьөма Биярлөн. Нускис на, гашкө, да садьмис летөдөмысь. Войсө сулалөм бөрын, гортас мунтөдзыс, Чивыс, вөлөмкө, пыралөма нин Памаыс дінө да висьталөма сылөн воөм йылысь, и велөдөма Памаыс, мед пө өні и локтас. Чужөмсө пожъялыштны, унзільсө вөтлыны и удитіс та вөсна Бияр, петіс ывлаас пөдөма шоныдсьыс да лөтіктіс котөрөн сорөн Памаыслөн төвъян керка дорө.
- Муртса на пырис Бияр керкаас, юрсө на эз копыртлы, пановтіс сійөс Памаыс водзджык шыасьөмнас:
- Абу на, видзөда, өвсьылөмыд.

¹ Вось — жемчуг.

— Мыйысь?

— Ветйөөд ветлөмсьыд.

— Ме эг. Сийөн и локтi. Ачылд тай шулiн, мөдысь пö волы, тöлыс пукяс да.

— Ветлы, инö.

— А тайö и лоö бур кывийд? — дильмунлис Бияр.

— Этша нö тэныд?

— Меным эськö абу да.

— Кодлы нö?

— Аслыд.

Гöрд көвъя, лөзөн мичөдөм ыж шегъяса сикөтш ворсөдiс Памаыс киас, голякылөдiс ньöжйөнiкөн, а пыр и сяркнитiс сикөтшнас да пөлөнөн сувтiс Биярлы, сiдзикөн кодзыда син-бöжалiс сийöс:

— Тöдысь тэ менö кутшөмкö!

— А оз нö тэ вылö усь, Ыджыд öксы?

— Мый?

— Став дойыс комиыслөн? — кайтiс Бияр.

— А ог нö лэпты? Дзебсяся йөзсьыс? — родыштлiс Пама.— Чайтан, мича вылö сöмын и сувтöдiм коми сярсö? Этö тöдөм вылö, кодлөн тайö муыс?

— А сярылд öд... мед эськö сулалö да... оз жö мезды йөрмөмсьыд.

— Тöран. Вöрыс паськылд и.

— А еджылд чери на комиылд. Абу на нуйт чери.

— И мый сэсся?

— А еджылд чериылд оз на кольччы пöдан тыад.

— Ветлы, ог кут! Ветйөө кө нин и гажылд.

— А он жö тай и ысты. Полан мыйыськö,— дузмунлис Бияр.

— А тэныд эськö,— шыөн лолышптiс Пама,— мед лөгöдi Сюдöсö?

— Сы пондаылд!

— Эн ышнясь! Оз нин и волы, чайтан, вöтлан Сыктыв вомсьыс да? Мед тшыныйыв оз лэпты Овкөджтö и Емдiнсö! Öтарötö кокни артавныылд.

— А-а,— шйөвошлiс Бияр,— ог нö и ветлы, сiдзкö? Шуин, ог пö кут-а.

— Аснырад и ветлан. И пукта на мыйкö туяд,— каймөстiс Пама.

— Сiдзтö кө,— вашмунлис Бияр.

— Няньыд воліс аслад?¹
 — Выль воодзыс¹, гашкө, кыскам.
 — Вöлыд абу и, — дольыштгис Пама.
 — Абу.
 — Кыйдöс куыд на колö и. Öтувъяыс.
 — Сюрö кө.
 — Чив тай тшöтш вöзйысьö да.
 — Зэв и морт! — ошкыштгис Бияр.
 — А кор сэтчöсö?
 — Öнi коркө. Дась ляпкыд на лымйыс. Койбедь лоп суд-
 та. Тöлысьыс чужö на и.

— Сидзкө и, ен бурөн! А ыстыны ме тэнö эг ысты, — сяркөдыштгис Пама ыж шегъяса сикöтшнас, весиг эз шпынь-
 мунлы, эштöдiс сёрнисö.

Ас кежас нин, петiс ывлаас да, Бияр вежöртiс, мый оз на сöмын Сюдöсьыс видзчысь Памаыс, тшöтш и Камарсьыс, бу-
 ракö, сийөн и гусьöнасьö. А Камарыс эськө сылы мөд тасма на и эм да, быттö öтиыс, асласыс, этша.

Нöшта вой узис Бияр Емдiнас, сы вöсна мый лун югы-
 дыс керкаысь керкаö ветлöдлöмөн и рөмдiс: кодкө эз вöв гор-
 тас, вöрын на собалис, кодкө падъялис, кöдзыдысь моз йöжгы-
 лясис, вöвтö и юртö пö на, гашкө, воштан, кодкө лыдыс вылö
 сöмын и туйис, вывтыр ни ойöс, видзöднытö шеньöб. Сизим
 и чукөрмис вöла-мортаыс да витөн ас кокаыс. Чив эськө
 кöсийысис Эжва кывтыдыс и Емва катыдыс на ветлыны матi-
 джык сиктас, но Бияр öлöдiс сийöс кадсö кыскöмысь. Лун
 нель-вит мысти, шуис, мед ставөн нин вöлины Овкөджас, кодi
 мунысьыс.

Емдiнöдыс ветлöдлiгөн и Пилимкөд на аддзысьлис Бияр,
 Ниралөн пыискөд. Вöтöдiс Пилимыс, сувтöдiс водзвылас пе-
 тыштöмөн. Эз и тöд сийöс Бияр дзик пырсö: томулов на кодкө,
 вöралан паськөма, йизьöм синкымъяса, съодасьöм ныр-вома.

— Бияр айка!

— Мися, кодi жö?! — вöлись тöдiс, кылис шыасысьмсö да.

— Ме. Вöрысь на муртса. Войколөн ветлi.

— А кöнi нö узин?

— Айöлөн чомйын. Аскежъя нин менам.

¹ *Выль воодзыс* — пуксьылис рака (март) тöлысьын, кор луныс да
 войыс öткузасысьны.

- Аскежъяйд и эм. Көвтөмүд сасө.
 — Мед!— серөктіс Пилим.— Озджык төдтөмты!
 — Коди?
 — Чомйыс. Оз тай и повзөдчы.
 — А мыйкө нө вайлан нин вөрсьыс?
 — Лок, петкөдла. Он пырав миянө?
 — Ог,— пычкис Бияр.— Эн лөгась-а.
 — А мыйкө... ме ветла жө?
 — Кытчө?
 — Кытчө мунанныд! Быттьө ог төд! Висьталісны өд!
 — Водз на тэныд. Волас на кадыс.
 — Пола нө йөграсьыд? Оз сюр шыыд?
 — А шойөн кө воан?
 — Мед!— гогнитіс Пилим юрнас.
 — Эн дөзмөдчы!— лөкөдчыліс Бияр да вешйөдіс сійөс. И шы эз кывлы бөрсьыс, няргыштөм ни лимзалөм. Ар дас куим на и вөлі зон туйөлы, а мукөд верстьөсьыс на чорыда кутіс асьсө. Морт на коркө, төдөмысь, и быдмылас сыысь.
- А Памаыс, буракө, абу нин лэдзлөма Биярөс төд вывсьыс, инөдз вайөдөма на костын сёрнисө. Аскиа асывнас сөмын тайө тыдовтчис-а. Лызясис Бияр да искөвтис Эжва вылас, эз на во Емва вомыс весьтөдз, а сылы падвежөн вөла-доддя сэтсь петіс. Вөлөмкө, Чив виччысьөма нин сійөс көнкө кыркөтш сайөдас, вөлыс и ачыс гыөртөмаөсь.
- Мый нө сы дыра узян? Кынмөдін!— кидөс вылас тоткыштис Чив.
- Со на төлысьыс, мышку сайын.
 — Төлысьыд луннас өні мыччасьлө.
 — А ме төда, кытчө тэ та воддзасө?!
 — Со, пуксьы да вөтлы.
 — А тэ?
 — Гортө бөр.
 — А вөлыс?!
 — Тэнад и лоө!
 — Эн йөйтөдлы!— скөрмис Бияр.
 — А видзөдлы, мый турун улас!
- Эз на и пөрччы лызьсө, сувтис Бияр додь дінас да койбедь лопнас лыбөдавліс турунсө, личкыштавлөмөн төдмаліс, мый сэн, вомөнөн пуктөм нель сепысас. Куимас, небыдас, кыйдөс куяс, тыдалө, вөліны, а өтиын, топыдас, туся ид ли рудзөг.
- Тайө нө... Памасянь?

— А кодсянь нө, чайтан?

— Вöлыс и, додьнас?

— Пуксы да вöтлы, шуöма тэныд!— лөвгыштіс Чив.—
Муртса эг вунöд коланасö.

— Мый?

— Чирсöм ид сэтöн, сепысас. Мед сюра вöчас гöтырид.

— Тшöкта.

— А ми лун-мöд мысти.

Лызь вылас сулалан на и коли Бияр, шавксöдiс Чивыс
Емва вомас. И вöлыс, видзöдö, гортланьыс нырöн пондiс бер-
гöдчыны, ковмис веськöдны сiйöс да вöтлыны.

Воисны вомын юрас, да Бияр выльысь на лызясьліс, пе-
талiс вöв водзвылас видзöдавлыны нуöдiгмозыс, абу-ö кöнкö
регыдъя на кöйн кок туйыс, бусiйöм лымъяыс. Но некöн сэ-
тшöмыс эз тыдав, сöмын важыс, лямалöмыс да южмöмыс.

Кызь керкаыс на эз вöв Овкöджас, да уна мунысьыс вёлö
Бияр эз и артав, морт сизим вёлö сöмын, асьсö лыддьытöг.
А витөнöсь и лоисны, дай то на кыкыс эз пуксыныны сьölöм
вылас, нинöмла и босьтнысö, веськыд кузя кö.

Адасöс висьталiсны вөрсьыс петöмөн, да медводз сы ордö
и ветліс Бияр. Көкöдны сiйöс эз и ковмы, кыв-мöдысь и лыб-
зис, ыштöкö ошкöс гусьыс кыйны. Гöтырыс, Ниаыс, шабдi куж
зуалiс кöтшас пельбөсас, да сьлөн и лои паныд сувтöмыс.

— Кытчö нö?— юалiс векни вомөн, нюрöстгöмөн.

— Няньла Ветiйö! Быттьö эн кывлы!— чöвтiс водзöссö
Адас.

— Ветiйöйд кытöни?! Рака тövьянын! Ваян ли он на
няньтö да.

— Ог кö, и ог! Водзвыв эн китшсьы. Катша моз.

— А асьтö кö он вай? Вöвтö ни?

— Шайыдлы колян. Век на тай сутшиктöдлö сiйöс.

— Шайтö меным эн кыскав. Ме тэ сайö петi. Киөн на
вөрзбöдлытöм вöлі.

— А этшаджык увгы дай!

— Мун, зуала чужöмтö!

— Оз öд öтнас мун, унаöн,— шыясис Бияр.— А тадзтö...

— Мый тадзтö?— вирдыштліс сы вёлö Ниа.

— Оз и ло бур водзын.

— Но, ньöти нö мед он и пов?! Абу и сьölöма?

— Полан эськö да. Ёнджыка на гöтырид.

— А кызди нө сәсся?

— Чөв олан, мед он вомдзав Адастө.

Иныштис, буракө, Ниаыслы татшөм өлөдөмсыы, восьтыліс на вомсө да акөстис сөмын, воча кучкыштавлөмөн пондіс зуавны шуйга киас кутан шабді куж зудөссө. Мед нин гозъя асьныс кызкө бурасясны, Бияр сәсся өдйөджык и петіс.

Но мукөд ордас пыралөмыс сылөн, быттьө омөлик ныриса понлөн, унджыкысысө ройө увтөм кодь артмис. Эськө эз нин төдтөмыс дінө могмөдчыв, да коді мөмъялөмөн, а коді өтчыдысьөн вежөртанасө дасысь юалөмөн — сөмын дзугисны сёрнисө. Асьсө водзджык и вөкөдліс таысь Биярөс, да ывлаас нин и такөдчыліс дуалөмөн. Шогманаыслөн, кыклөн нөшта и лоис мунан кывйыс.

Та вөсна, овкөджсаыс вылө скөрмөмыс вөсна, и аслас вомыс сәсся кальөгасыліс. Гортас нин локтігөн Борган сійөс сувтөдіс, бадь ньөр вөлі нөбъялөмөн катөдө да Куа ты дорсыыс.

— Эналы!— горөдіс Борганыс.

— А мый?— воча сылы горөдіс. Он шыась да, лөгасыс-а.

— Сідзи! Кысыкө тай локтан да,— матыстчис и усыкөдіс Борганыс нөбсө. Сёрнит сәсся сыкөд.

— Көнкө өд ог узы.

— А эз вөв аслад восьласыд!

— Кодлөн нө?

— Быттьө тай нөйтны кодөскө мунан.

— Нөйтны и колө эсыкө да.

— Кодөс?

— Ставнытө.

— Мыйысы?

— Сыысы!— шуис Бияр.— Морт сизим и колө вөлі да.

Оз на и сюр тай!

— Кытчө колө?

— Ветйөө, гашкө, мися, ветлыны.

— А ме ветла!— чепөсийліс Борган.

— Дугды!

— Мыйла дугда?

— Йөгра пыр на туйыс!

— Ог и төд да?

— А он нин быдмы, водзсө кө эн.

— А йөграыд и гырысы? Öтилы и сетча вины? Куш черөс и босьта, пуртөс да?

— Но... ачылд төдан, — вочавидзис Бияр. — Мунысь кө, и мунысь!

А аскинас, карта саяс вөлі сійө, синньорсө додъсьыс вежө, Кекур сы динө ваджиктис, сувтөм ош кодъ и видзөднысө.

— Мый нө? — аслыс водзджык ковмис шысө сетны.

— Ветийөө пө тай мөдөдчан да.

— Мый сэсся?

— Эн тай и волы миянө. Век на ыло пуктан.

— Асьныд и матө менө ая-пия?

— А тшөтш ветла, босьтан кө? Вөла и.

— Ачылд?

— Коді сэсся?! — шевгөдліс Кекур кияссө.

— Шайыд!

— Кызпыдөн куйлө. Кок шегйыс бара пыкталө и.

— Мыйыськө?

— Коркөя дойдлөмсьыд.

— А мед эськө ті менө сэки помалінныд?

— Ог тай и кырлы пиньөс. Юалін да, висьталі-а. Босьтан кө, өтсорөн и ветла.

— Колөкө, — нурбыльтис Бияр.

Тадзикөн нөшта кык мортгыс и содісны, сьөлөм вылас пуксьыштөмыс. Но Борганыс кө жебиник вывтырнас сөмын и эз лөсяв сылы, то Кекурсө и сідзисө на эз лэпты сьөлөмыс. А лои шуөма, да бөр он катгыи шуөмтө.

Он өд колъысь кокни доддьөн да юж туй вывті. Турунтө на колө потшкалөмөн босьтны, кыскымөныс вөлылды. Пемыд-нас нин и воисны емдінасыс Овкөджас. Та серти нин тыдаліс, мый лун куимтө, оз кө нельөс, сөяс на Сыктыв вомөдзгыс туйыс.

Сэтчө и кучкис. Нельөд луннас сөмын, лун шөр гөгөрыс, воисны пожөма вөр ді бөжас, коді быгтьө тувийөн поткөдіс Сыктывса Эжвасьыс. Воськыдвылас, вочасөн кыпалөмөн, нюжаліс сора вөра керөсыс, кыгөн Сюдөыслөн сулаланіныс. Но мыйлакө ньөти тшын сюръя эз тыдав сэтысь, ыштөкө керкаөн да горийөн олісны йөграыс, ломтылісны нин асывнас пусьынысө да шоныд вылас. Көр вольсьыд чомийд өдйө на көдзалас битө куттөгьд.

Эжваыслөн джын пасьтагыс лө ли оз Сыктывыс, кык вөра коста воргаөн и видзөдсьө, ньөвийөн шөрөдзгыс бура судзанаөн, да пырны өні сэтчө вөла-доддя гузбөбнад юрөн на коліс. Эз и дзебсьасьөмөн локны, ыджыд бийөн на узылісны войяссө, да кывсьывтөг, дерт, эз ов Сюдөыслы локтөмныс, и вешйис кө

сійö водзвыв, сідзкö, Эжва катыдыс на кытчöкö. А Эжва вылас уна кöр дадювнас петöмсö и эз висьтав лымйыс. Он шу, мый абу ветлöдлöмаöсь, чальпаса на мукöд туй сёртасыс, да абу öтпыръяыс.

— Сувтламой!— бергöдчыліс бөрвылас да горöдіс Бияр.

— Кынмöдчынысö? Воим нин, буракö, да?— дöзмис сы вылö Адас, кодi бөрсянныс и восьлаліс. Кыкөн найö мунісны медся водзынас.

— Посявлан на, гашкö. Энлы на чепсась понйыд моз,— öлöдіс сійöс Бияр.— А кöні нö... эськö... понйыд?

— Ме ог тöд. Кольчис кö-а, мыйкö аддзис да.

— Мун чукав.

Понсö тшöтш нуöдіс Адасыс, да öтарсянныс кö, содгöд вом и вöлі понйыс, а мöдарсянныс кö, зэв на и вештöдіс асьсö. Сы вылö ёнджыка и кутісны лачасö войса узиганыс. И луннас, кор ылö водзö петалас понйыс, саявлас Эжваыслөн чу-кыяс да бөр мыччысьлас, ыштöкö висьтавнысö сöмын, мый некод сэн абу, оз и сибавлы сэсся видзчысьöмыд.

Но вот колö, и абу. Тапикасьыштiс Бияр да кöсйыліс нин öтнас и вөрзыны нёжйöникөн, ризöдіс-воис понйыс сы дінö, бускысьліс лымъяс джөм сувтöмысла, пыркöдчис да видзöдліс синмас, и водзö котöртiс сувтыштавлöмөн, вылын нырөн сынöдсö исьштавлöмөн.

Понйыс бөрся и мöдöдчис сэсся Бияр, но эз на öдйöджыкөн, мед вöтöдас сійöс Адасыс. И Сыктыв вылас нин, вөр ді бөжсьыс муртса вылынджык, вöтöдіс Адасыс.

— Мый нö понйыд, кытчö ылавлöма?— юаліс Бияр.

— Чими тай арся йиас на кынмöма. Кульмөм бöрас кулö-мыс.

— Казялöма абу?

— Абу öд пöдöм ныра!— кайтiс Адас.— Энлы, висьта-лас, сэнöсь абу йöграыс.

Ылын водзын нин котöртiс понйыс и некытчö эз сувтлы дырджыксö, эз кежавлы ни кодарöкö. Воис шор кырöм весьтöдзыс, кытi нёптавліс керöсыс, да сэки сöмын шыбитчыліс öтарö-мöдарö, сэсся тривксöдіс шор кырöмöдыс керöс йылас, воши син увсьыныс. Но регыд бөр и лэчис ю вылас, пуксис да кутіс йирыштавны кынöм увсьыс судзана йи сыръяссö.

Вöлөмкö, вешйöмаöсь нин йöграыс, вөр ді пырыс веськы-далöмөн петöмаöсь Эжва вылас. Туй сёртасас чорзём лым-йыс, чужйыштан да, оз нин и пазав.

Бияр тшөктіс Адаслы, мед чуксалас вөлаяссө, а ачыс эз на сетчы дышыслы да кайліс керөс йылас. Чомъяс увсьыныс кольөм гөгрөс кушинъясыс и сьөдалісны сәні. Но өти коз улын моздора чукөрөн сулалісны чомъясян зібъясыс. Бөр на локтөм вылө и идралөмаось.

Дерт, эз бур сьөлөмөн вешйыны йөграыс. Код төдас на, мый воис юрас Сюдөыслы. Шуис на, гашкө, шедлөны на пө сараныд, бергөдчыны кутасны да. Но он өд кос та вөсна. Мөдөдчөма, да мый лоан ло и ковмас ветлыны.

Волысяс вотөдз на казялісны Сыктыв пөлөнсьыс комиыслысь оланінъяссө: көні өтка керка на вөрсьыс кушмөдөм чурк йылас, а көні и кык-куим нин. Овмөдчалөны эськө кывтыдыс, да кор на вочаасыны эжвасаыскөд?

А Волысяыс, шуны кө, бура ыджыд позтырөн нин пукаліс. И вөрыс, видзөдан да, оз нин маті кытшав сиктсө, ёна нин уджалөмаось мусө. Тыдалө, воывлө, мый оз көдзыны, эськө эз на татшөматө паськөдчыны.

Рөмдігас нин матыстчисны сэтчө, да узьны и шуисны. И повзөдтөг эз овны ставнас сиктсө виччысьтөгыд кыськө локтөмнад. Эз кө шыасыны воча, сетны коми кывсө, да вывлань ки пыдөсөн, кевмысяна моз, лөньөдны йөзсө, гашкө, паныд и сувтісны найө. Кодлы мый сюрөма ки улас виан-дойданыс, сійөс и босьталөмаось нин вөлі. Понъяснысө лэдзалөмаось и дом йывсьыныс.

Юасиг-висьтасиг, кодьяс да кытысьсөсь, кытчө туйсө кутөны, пыр и тыдовтчис, мый абу дзык өткодь сөрніныс. Мукөд кывсө сыктывсаыслысь он и гөгөрвө. Да и асьнысө оз комиасөн шуны, а сыръянөн, комиыслөн йыв вожөн. И видзөднысө оз зэв мунны эжвасаыс вылө, латшкөсджыкөсь да весиг төвнас гут ситөсь чужөмаось. И синъясыс руд нисьсө гөрдөсь, дзирдыштлөны рыгтя рөмыдсьыс, ыштөкө лунын и войын аддзанаось.

Но и мед, кутшөмөсь эмөсь. Сідзсө тай абу джын вомаось-а, эз и ковмы торъя вөзйысявны, коді узьтөдас. Аслыныслы на, буракө, коліс төвйыв мортыд сөрніа гаж вылас. Кытысь сәс-ся төдмалан, кутшөм оломьыс мукөдлаас?

Месайыс, код ордө сувтісны Бияр да Чив, висьталіс налы, мый ас няньнас сикткодьясыс кызкө да мыйкө бергөдчөны на во гөгөрсө, яя да чериа вөлөгатөгыд оз на овны, сійөн и этшаджык мунө няньыд, а вот совсьыд и дзескыдасыөны, аслад кудзыд вылө пө вежыд петлө. Ыж лов пө сета водзөс-нытө, пань кык-куим кө вичмөданныд.

Кольом төвнас на Бияр шомос тыр вайліс сов суксө Сэрөгысь, ки вомлөсыс судта на и лои видзөма сэтгысь. Төдөма кө вөлі тайос, тус-мөдыд эз на сьөктөд вөв додгысь, да и еджыд косөдыс на позис пуны-пактөдны, дөра сепысө и пуктыны. Но эз и воы юрас, и некод эз чуйды. Муртса туяс выло и босьгыштис кос совсө сямөдысь кыом вевта дозйын.

— Менам эськө эм да, сов тупылыд,— каймөстис Чив.

— Сюсь на вөлөмыд!— долыдыс босьтис Биярөс.

— Ме абу. Мамө пуктис, мед пө ветлас.

— Кыськө нө төдөма?

— Вөтасьомөн тай висьталіс. Дубөн пө сөйи.

— А ен могьсьөн!— пойгыштис месайыс.— Нинөм донысь ог сувт, уна-ө-мый коранныд!

— Коми Енмыс өд өти,— такөдіс сийөс Бияр.— Бөр локтиганым кө туруннад мездыштан и. Гашкө, оз тырмы да.

— Додь-мөдтө верма.

— Сідзкө и, артмөдчим.

— А ыж ловтө содта на. Шуи нин да!— воссьыліс быдөн сьөлөмнас месайыс. Татшөм лышкыдтө асьыс ни мукодыслысь, Эжваса комиыслысь, Бияр эз на и казявлы, өна нин ээлыдөсь асланыс эжвасаыд, өна нин тшыкөмаөсь важся дорсыс. Да и оломыс, веськыд кузя кө, сэтчө найөс зурөдө.

Кыдзи-мый веськавны Сыктыв йывсьыс Ветйө ю вылас, кыті медся дженьыд да письтана мусюрыс, сөмын ылөсас и вермис висьтавын месайыс, йөзыслысь кывлөмсө. Томсянь пө айө уджөдіс да негытчө ылө эз и лэдзлы. Но мед пө оз ло пөрийөдлөма тьянөс, энлөй пө, ветлывлөм мортөс ме чукөстла, сылөн пө лучкиджык лоө кывйыс. И петаліс кодкө ордө да вайөдіс кенясьөм синма пөльөөс, пешасьыс бисө нин коді эз аддзы.

Кыкнанныс, Бияр и Чив, чеврасьыштисны быдөн, эз и эс-кыссьы налы, мый пемыдас нин олысьыд югзьөдас мыйкө, аслас нин сылөн, колөкө, унатор гудрасис да вунласис. Но синтөммөм мортыд, вөлөмкө, асьыс воддза оломсө и таялөджык да сьөрсьөн-бөрсьөн и кутө юрас коркөя адзылөмсө да төдлөмсө, джаджыысь моз и судзөдө, мый колө, ыштөкө ас кинас сэтчө пуктылөмсө. Пызан вылас петкөдлөмөн и туйөдіс пөльөыс, кор да кыті кежны Сыктыв вывсьыс, мед сэсья петны Кебра ю вылас, коді Ветйө юас нин усьө. Нель чомкост пө и сюрас тьянлы мусюрыс, лунөн вуджана. Дерт пө, керасьнытө шедлө-а. Вөрыд пө өд дөзмө жө, кор писькөдан вөла туйтө, да воысь-во и гылөдө сэтчө пөрысь пусө.

— А мый нө Кебраыс лоӧ?— юалис Бияр.
— Мусюр вуджаніныс и лоӧ. Сыладорсянныс.
— Абу тай быттьӧ коми нимыс да.
— Абу?— чушмуналис пӧльӧ.— А кебыс нӧ абу ляпкыдин?
— Гашкӧ, тиян ногӧн.
— А тэныд эськӧ мед эжваса ногыд быдлаын сёрнитісны? Эналы, волан Ветйӧад, кымын пӧлӧс сёрни кывлан!

Уна пӧлӧс сёрни и кывлісны Ветйӧссыс: комисӧ и коми-ланьныс зэв матыссӧ, тотара ногасӧ и роч ногасӧ. Мӧскуаыс нин ыджыдаліс сәні, да вылӧ мукӧдсьыс и пуксисны рочыс, кыралан понъяс моз шыа чукӧрӧн и ветлӧдлісны, медтыкӧ оз пурны, лӧсялан кӧ на шӧрӧ. Вузасян нӧрысас сӧмын, йӧзаинас, дзеблісны ыкшанысӧ, кӧйялӧмӧн довьялісны, коді мый вайӧма. Но полісны лужысьнысӧ, кысь нин эськӧ кодлыськӧ мыйкӧ мырддыны да, сы вӧсна мый некод на эз уськӧдчы на водзӧ коньӧрӧ. А тотараыс и пиньнысӧ на жергӧдлісны, петкӧдлісны налы таджикӧн, мый Ордаыслысь на Мӧскуаыс кывзысьӧ.

Волысясьыс пӧльӧыс на велӧдіс Биярӧс, мед оз карас сувтны, а мӧдлапӧлас, паныда сиктас, карас пӧ сорласьӧмаӧсь нин йӧзыс, а сәні пӧ ставныс на миян сёрниӧсь, ас туйӧ и пуктасны тиянӧс. И нӧшта велӧдіс пӧльӧыс, мед оз ӧтпырйӧ петкӧдны вузасян нӧрысас став кыйдӧс кусӧ, а мыйтакӧӧн, лунмӧд-коймӧдӧн, ӧтпырйӧнад пӧ тиян донтӧмджыкӧн и мунас, дай вежалан синмыд пӧ ӧд абу жӧ этша.

Мӧдлапӧвса сиктас и сувтісны, кыкӧн-куимӧн ӧти керкаас. Чивкӧд Бияр медся бӧрыннас нин вӧзйысисны тшӧтшгьяныс кымын месай ордӧ. Йӧрас и вӧлі сійӧ ноксьӧ, кос бадь зэв дженьыдикаӧн кералӧ, ыштӧкӧ дзоль вӧчӧ кодлыкӧ ворснысӧ. Вӧлӧмкӧ, сёйысь чачаяс вӧчалӧны гозъя вузӧс вылӧ, да ульсӧ на косьтынысӧ, вочасӧн донӧдлынысӧ, колӧ бадьсьыс ломзьӧдчаныс. А керкаас пыригӧн, мусянныс и посводзас, пемыдас, кодкӧ зургис Биярлы гырдызаас. Повзьӧмвывсьыс сійӧ нюжӧдліс кисӧ да кодлыкӧ гӧналы инмыліс.

— Коді нӧ сән?— юалис месайыслысь.

— Мӧс, эн пов.

Быдтор вылӧ позис шензыны. Видзӧдан ывласянныс, да керка и быттьӧ, а пыран да, джодж шӧраныс горйыс, сы гӧгӧр и олӧны, и оз дӧзмыны помала кытшлалӧмсьыс. Вӧр керкаад

сідзтö он вöч-а, тшупигад на и артыштан, кытöн мый лоö. Кыгчö пö тай велалан, шулöма кодкö. А сюсь морт, тöдöмысь, эз на тадзтö шулы.

И рыгтя сөйиганыс серам петкöдлiс месайыс. Пызан саяс нин пукалiс Бияр, судзис панясьнысö, а «тöрсый, тöрсый» на шуис сэтчö.

— Төрöдчи нин да,— шöйöвошлiс Бияр. А, вöлöмкö, сөйны корöдö, сөйöмыс на ногон и лоö тöрсöмыс.

Куим вöйöн да кык лунöн и бергöдчисны Ветйöас. Нель сепысöн на вöла-додь вылö чукöрмис няньыс, сöмын öтиö эз тырмы нельöд сепысыс. И то Борган понда. Кодлыськö масö чуньыштöма сийö да мывкыдсö вошгылöма, джын сьöдбöж кусö ассьыс йöжöм вый кодь ма тупыль вылас и сетöма, медтыкö сöмын гөтырсö, Намырсö, чöсмöдлыны да ас дiнас мелöдлыны. И эз весигтö мöдзась таысь, шешгьялiс на мукöдыслөн вöйпöм вылö, ыштöкö содтöд нянь сепысыс сылы нинöмла нин и вöлi. А Биярöс и водзöссö на эльгыштiс, эн пö и убöлит пиыдлы татшöм юмовсö ньöбыштны, да ачыс Бияр и тшöкмунлiс сэсса.

Лёкыс водзын-ö-мый-ö аскинас на, гортаныс нин вöрзисны да, варовыс письтылiс Борганыслөн, ышмöдiс сийöс. Эз вермы чöвсö восьлавны, дугдывтöг кодкö дiнö да шыасьлiс. И Биярöс на дзерöдiс, чуньыштöда пö Унаыдлы да Вожайыдлы масö, да мый сэки висьталан налы.

Дузьялiс нин Бияр сы вылö таысь да пельтöм улö и лэдзчысис, кылö и оз кыв сылысь больгöмсö. А муныштiсны мый-такö, и вötöдiс на сийöс Борганыс да сойбордйöдыс кыскыштлiс.

— Со!— долыдпырысь горöдiс.

— Мый со?

— Он аддзы рака чукöрсö? Эстысь, кызсьыс?

— Аддза.

— А горзöмсö? Он кыв?

— Кыла. А сэсса мый?— букыштчылiс Бияр.

— Тöдiсны миянöс! Тани тöвйöны, а миянладорын гортныс. Сийон и горзöны. Лымийыс пö сылыштас, и локтам.

— Мед локтöны. Восьса налы туйыс.

— А эсийö, кодi тай медся йылас, Овкöджысь, буракö, и эм. Ыджыд мамыс мукöдыслөн.

— Эн сөр.

— А збыль! Чери на менсьым шышкавлiс. Пыж нырысь.

— Мед эн узь дай.
 — Эг и узь. Асмогасьны петалі,— серöктіс Борган.
 — Но и ланьтлы сэсся!
 — А ог тöд, мый и дуалан. Зыртö быттьö кыткö. Лючки тай ветлім!
 — Лючкитö, гортад воан да, шу.
 — А ог нö войй? Со öд тай... рака чукöрыс... висьталö.
 — Мый висьталö?
 — Бурöс. Некод оз и кравзы юрсö гоньйöдлөмөн.
 — Оз тай! Аслад тöдсаыд со!
 — А кольöдö, гашкö?! Мыйөн тöдан?
 — Он кö и... тырмылас кывтö песны!— кигугыс öвтыштлис Бияр.

Лөгасьмөн и кольчыштіс сэсся Борганыс да дыр эз сетлы кывсö. Но ракаыслөн юрсö гоньйöдлөмыс на, тöдөмысь, мөрчис сылы ёнджыкасö.

Мый шедіс бөрсö кузь туйыс, сійö и шедіс Сыктив вомöдзыс. Кымын матысмисны сэтчö, сымын и виччысис Бияр, оз-ö кысянкö уськөдчыны йöграыс, но весиг эз казьявыны найöс. И ю вывтійыс некыт абу ветлөдлөмаöсь кöра дадювьяс-нас, мунан вöла туйныс и нюжаліс на кузяла лымнас тырталом кык лёдз костөн.

Воисны нин Сыктив вомсьыс маті катыдас, джудждаммöм керöс улас, да сэки сöмын тыдовтчис, мый волөмаöсь йöграыс да абу на и öти дадиулөн. И узьлөмаöсь керöсас, асланыс сулаланінын, чомьясьлөмөн и пусьылөмөн, вильöдөм көр лысö тырыс шыблалөмаöсь. Мед эськö, волісны кö сöмын, да ветлөмаöсь на кытчөкө вөрöдыс лунвылө нырөн. Гашкö и, кыйöдчыны, локтöны оз на комиыс.

Та вöсна Бияр и эз на öвсьы, дугды видзчысьöмсьыс, кор петісны Эжва вылас. И мукöдыслы тшöктіс, мед оз на веськодьясьны, сетчыны туй выв вугырыслы. Некод эськö Кекурысь öтдор эз пуксьывлы гургынысö, сідз нин вöвьясыс сьöкыдавылысь, нейкнитавлөмөн кыскисны додьяснысö да, но öд и лымийöдыд собигад босьтö вугырыд, оз кö и сюрлы войся чöскыд унмыд.

Медводза ыджыд көджсö Эжва кывтыдыс Бияр водзын на и муніс, тöдөмөн эз веськыдавлы, кежавлы ю шёрсьыс мутшкөс вöра кыркөтшланьыс. Гашкö, виччысьöны нин көнкö сэтөн йöграыс, да нвöвьяс уланьыс и веськалан налы. Понийыс Адаслөн лөтіктіс Биярысь на водзын, кивыль эз керльив не-

кытчө, сы вылө кө сөмын и эновтчыны, да өд и сійө на вер-
мас пөръяссыны, нинөм оз и кывлы лешмөмысла.

Эжваыслөн виямөн помасис көджыс, да мыйлако сэтчө, виям
вылас, звирк чепөсийс понйыс, саяліс баддөсь дорөс саяс.
Недыр мысти и эралөмөн увтөмыс кыліс. Жаялөма нин вөлі,
восьса вомөн да водзланьыс докъялөмөн и собис Бияр, а
кыскө тай ыльөбтис на ойөсыс, пөсьөдіс визъялан вирнас пель-
помъяссө и кокъяссө. Кышыд лымсө бусийөмөн, тувччө нисьө
чечыштө, уськөдчис виямыслөн вом дорө.

Кытчөдз тыдаліс виямыс, матіас ни ыліас некод эз вөрөдчы,
кык кока ни нель кока. Понйыс сөмын и лөкаліс кодкө вылө,
чепасис өтилагын, ыштгөкө дом йылын. Ветлыны да видзөд-
лыны и көсийліс Бияр, коді кыті мунөма, но сэсса ачыс асьсө
и падмөдіс: колөкө, эз и мортөс аддзыв понйыс, а санөс ли
вөрканьөс, да кутас мудзтысьны та вөсна? Эз өд вөравны пет.
И чукөстіс понсө. Но мыйта эз чукав, эз на кывзысь сы-
лысь понйыс. И Адасыслысь на эз дзык пыр кывзысь. Сэки
сөмын, кор скөрмөмвивысьыс нин ыджыда горөдіс сійө «ту-ту-
ту» да Эжва вылас бөр усьөдіс. Но бергөдчавлөмөн да вур-
залөмөн на и локтіс, бөжнас весиг лөг-лег эз вөчлы.

Понсө на чукалөгөн вөлаясыс воисны виям весьтас, да Бияр
өвтыштис кинас, мед оз сувтлыны, лэчасны водзө. Медся
бөрвылас сэсса и лоины найө Адасыскөд, кор косісны Эжва
вылас. Пановтны вөлаяссө да бара водзас и петны дышыс на
босьтис Биярөс, дай мөвпыс на сибавліс, мый, гашкө, мынісны
нин йөграссыс. Инө эз и пукты понйыслысь корскыштөмсө
да ырсмунөмсө, чайтис, мый лымсө апалөмысь пөдліс сылөн
нырыс, да сыысь и корскыштис, а ырсмуніс кө, дзык аслас
могөн на — ставсьыс водзвылө и петны.

— Кыліс кө мыйкө-а? — шуис Адаc.— Видзөдлы со,
видзөдлы!

Пөрласьөм пуяса да локөбьясөн кырдалөм вадорыс мегырөн
чукьлөтөдіс Эжвасө, и сыланьө виджадөн и пызйис понйыс.
Воис вадор улас да вуззысыявлөмөн и пондіс увтны, ош гу
быттө кыліс сэтгысь, вылісьыс.

— Энө матыстчөй! — мый тырмис лолыс, равөстіс Бияр
да уськөдчис пановтны вөлаяссө. И Адаc сы бөрся, а сэсса и
Чив.

Медводдза вөла-доддыс Кекурлөн вөлі, но бара нин гур-
гис сійө да вуграліс на, буракө, эз и лэптыв юрсө. А вөлыд-
лы нө мый, мөдөдчөма и мунө, веськодь сылы кодлөнкө горө-

дөмыд да понйыдлөн увтөмыд. И кежөм пыдди лёк вадор-
сьыс матыстчис на сэтчаньё да мукөд вөвсё на эськё нуөдїс
бөрсянныс, эз кё кызмырдөн кежөдавны найёс.

Аслыс да вёлыслы юр доныс и сувтїс Кекурыслөн вугра-
лөмыс. Но и Борган да емдінсаыс куимөн эз жё кужны видз-
ны асьнысё. Ылөсё йёграыслөн эз и лэбны ньөвъясыс, тыда-
ланаон и гылаїсны вадорсьыс ылджкас, а найё садьнысё
төдтөг воча уськөдчисны, ньөвъяс уланыс.

Дась эз на воны йёграыслы аддзана выйөдзыс, колїс ва-
дор йылас и кайны да вөрөдыс сибөдчыны на дїнө. Ньөвсьыд
вөрад сюрө на сайөдыд, а шыпуртсьыд оз. Тайёс и босьтїс
Бияр төд вылас да кежөдчис веськыда вадорланьыс.

— Кытчө? — өттшөтшөн юалїсны Чив да Адаc.

— Локтөй, аддзанныд!

Морт вит-ө-квайт, ки уланыс нин шедлытөмыс, пышйисны
йёграыс. Вөлөмкө, зэв кузь сён локтө вадорөдзыс матө, да
сэтї и пырөмаөсь көра дадювъяснас. И удитїсны пышйынысё
көръяссө лёкысь зібъялігтыр. Но дас өтїөс лои жө кералөма.

Гортад кыськө локтїгөн, нинөмысь кё янавнытө, долыд ру
и босьтлө. Мудзөмыд и узьтөмыд, сьөлөмтө песөмыд и —
ставыс бытгьөкө пыркалө вылысьсыд и пытшсьыд. А мед оз
лөчки ло ветлөмыд, мыйөн сэки такөдан асьтө?

Туяс Бияр кызкө кутчысис на, эз сетчы дзугылыслы, мый
няньсыс өддор вит шой на вайёны. А воисны Овкөдж дорас,
Куа ты вис вомас, и вежыньтөдліс сїйөс, бытгьөкө виньдыліс.

Лун шөр бөр югыд на вөлі ывлаыс, да емдінсаыс муртса и
сувтлісны, вой улас гажөн лэччисны водзө. Овкөджсаыс ке-
жисны гортаныс.

— Пет водзвылас, — шуис Бияр Адаcлы.

— А тэ нө? Полан?

— Ковмас өд мыйкө висътавны.

— И висъталан! Тэ нө мыжа?

— Ме вылө и усьө. Эн кё пө тэ нуөд... Оз нө шуны?

— А сїдзтө кө... асьныс вөйыисисны Кекурыд да Борга-
ныд.

— Мед. Эз өд морсө корсьны.

— А шойтө он нин ловзьөд! — дөжньштїс Адаc. — Ветлім
и воим, кодї воис. Мөдысь ме, гашкө, ог во. Ачыд ли. Лок,
эн урсась!

— Ме урсаcя?

— А он нө? Певъялан сэн асьтө!

Вывті нин чорыда, ньөти сьөлөмтөгыс быгттьо шуасис Ада-сыс, но эз и вежөртөгыс. Сьодас оломсьыд, юнад пудьясь-төгьд, лов югыдтө он жө төдлы. Тадзсө мөвпыштөмысь и кокньодыштіс Биярөс, да эз и кольчы сэсся бөрвылас.

А Кекурсө да Боргансө эз өти лунө дзевны. И бур, мый эз, эськө сотны тшөтш и ковмис Боргансө да лысьбөм коляссө и гуавны. Гөтырыслөн, Намырыслөн, йөйталөмыс отсаліс бур-джык ногөныс сійөс идравнысө. Сыркъялөмөн бөрдны күтіс Намырыс, ог пө сет шонъянойөс, көдзыдінө пө пукта да видзөдывлыны кута, тулысөдзыс видза. Кывзан да он кө төд, муса и чайган, вөлөма верөсыс, абу и ышнясьлөма сы вылын. Но эз и йөзаддзасө вөч Намырыс, шогысла на и чегсьыліс, төдөмысь. Мед и ышнясьліс Борганыс вылын, а сы вылө синмөн на и оліс. А өні он босьт татшөм оломтө.

— Аски, инө, Боргантө дзебам,— шуис Бияр Намырыс-лы.— Мед өти воё узьө на гортад. Аслым эськө меным ой-гымөн сійө да. Важөн нин синваёй эз петавлы.

Кекурсө дзевны и муніс сэсся Бияр, медтыкө оз кыскавны бөрыннас, эз пө и воы садь төдтөмыд. И кыккирудз сэн, шойна ягас, эз сулав, кос пусө тшөтш кераліс да кыскаліс би-пур вылас, гусө кодйис и.

Некоды на эз висьтав, а Кекурсө сотігас и воис сылы юрас мича ногөн, бурө пуктөмөн гуавны Боргансө. Зэв на и морт вөлі сійө, да оз и мылышты Енмыс, шой туйө кө сөмын и согасны сійөс.

Эз и виччысь аскинас югдөмсө, дзурс пемыднас на муніс ягас да ыджыда биасис гу улас бөрийөминас, мед сывдыны мусө. Сэсся кык пожөм пөрөдіс шөркодь кызтаөс да чинталіс кола-на кузьтаөн, тшупас вөчис нель кер судтаөс, мед гуас нин и тэчны тшупассө да пытшкас сэтчө и водтөдны Боргансө. Гусө нин кодйыны и колис югдөм бөрас.

Мича ногөн, бурө пуктөмөн и лои дзевбөма Боргансө. И аслас Биярлөн личальштіс таысь сьөлөмыс. Эз и чайт, мый сьодасяс кодкө сы вылө.

А паныдасисны кымынкө лун мысти Шайкөд, и векышт-чыліс сійө да вирдыштіс вомлөс синьяснас:

— Абу и морт вөлөма тэныд!

— Коді?— букөстіс водзөссө Бияр.

— Айбыс менам. Боргантө со кызди гуалөмыдөсь-а.

— Сэсся и вежалан? Ачыд эн вөв гортад?

- Эн тай шу, огö пö сотöй.
- А аслад эз вöв вомыд? Öнi паськöдлан?
- А ог öд вунöд!— вөрзис нин и бергöдчыліс Шайыс.
- Дырджык кö эськö зыртласян!— муртса эз вöтчыв Бияр.

4

Лöсьыд эськö керка водзад, асья шондi улад, пукавнытö да. Некыт нин абу сьöкыд юридлы, чорзьылö нин сойыд, шамырлан китö да, коркö регыдөн и зумыд кок йылö сугтан. Пукав да апав сöмын морöс пыдiодзыд йиджавлысь кос сынöдсö. И нинöмысь эн шогав, нинöм эн сибöд юрад.

Да он тай пукав сiдзтö! Висьмис да эз кö и волы садяс, биавлёмсьыс и эштiс, эськö мынöма нин и вöлі олёмсьыс-а, көнкö Енмыс дiнын нин и лэбалiс лолыс. А öнi, бөр на со ловзис да, абу нин сэтшöм и колан водзö олёмыс, курзьöдлö нин сыысь. Да ковмас öд овны. Вöчас нö мыйкö асьсö?

Ош гыжйөн и кырыштліс сьöлөмсö Шонаыслөн сысянь нöбасьöмыс. Юрсö кералан мыжсö и корсис аслыс Уна водзас. И он ыстысь кодкö да мыйкö вылö, он кö нин Шона вылас и вожöд ставсö, да сыысь öд аслад жö кывйыд косьмас. Висьтасьны и колбö Унаыслы, да оз на, гашкö, юрсö керав, песас-песас лөксö, лөвтас и зымкъялас, да вочасөн инö и пунктас лөйтгöрсö. Но висьтасьнысö и эз на тырмы Биярлөн лолыс, арöдзыс на эновтöдчис, Шонаыслөн кынöмыс тöдчытöдз.

Мöд шогыс на, сьöд бужöдөн вылысас и öшаланыс, дiлкйöдліс да сутшиктöдліс сийöс синваыс сорөн. Корны нин со волöмаöсь висигкостаыс, локтö пö нин Сэпöыс да. А асьныс нö оз вермыны сувтöднысö, некодлы Памаыслы тшöктынысö, бара сэтчö Бияр и ковмöма? Соталö пö Сэпöыс комиыслысь енколяяссö, рочыслысь сьöд Кростоссö Енмö и пунктö, а асьсö нö сийöс, Сэпöсö, он вермы биас суйны, ловъявывсьыс на, колöкö, пежсö? А оз и лыб кийд, дась вайöм няньыд вылö кö и ыштан да воштылан садьтö. Оз и волы юрад, мый Сэпö саяс пöтлыгтöм Мöскуаыс на сулалö да мунад и ванад и шедан сылы.

Югдiныс усьöм бöрын воштысис на Бияр Мöскуаыслөн син улысь, комиыслөн ас шодъя олөм вылö на петiс, нэмьс кежлö нин, чайтiс, и пуксьыліс татчö, Овкöджас. А кытчö мöдпöрйöссö воштыяс? Эжва катыдыс сетчас, йöграыс дiнö, айö туйö и

лоӧ Сюгыслы? Войӧ пышгяс Емва йывтӧыс лопырыс дорӧ? Ли, медся на мустӧмыс, некытчӧ нин оз вӧрзбы да ловсӧ и вежас Сэпӧыслӧн нянь мыччӧдыс ыллӧ?

Лэдзан кӧ Сэпӧтӧ Емдінад, инӧ и пуктан, мый сылӧн во-мысь петӧ, дыр сэки оз нин сулав Коми муыд. Да и Пама-ыдлӧн юрыс усьӧ, керавтӧгыс усьӧ, сідзи на сьӧлӧмыс потӧ кок ув муыс путкыльтчӧмысь. Оз нӧ пот, кор комиыслы и пуктан олӧмтӧ, да комиыс и вузалас, вылысад на ситалас?

Ачыс эськӧ абу жӧ нӧӧти мыжтӧм да, Памаыс. Сылы мед-тыкӧ быдӧнкӧд бурӧн да лӧсялӧмӧн олӧн, некодӧс эн вӧрзӧдлы ни дзескӧдлы, некод ыллӧ эн волы ни. Падгьялӧмыс сылӧн, шӧрӧвыясӧмыс, джын туй вылас сувтавлӧмыс и йӧрмӧдіс комисӧ, вайӧдіс няньсбыс татшӧм тшыгӧмӧдзыс. Майбыр и лои Сэпӧыслы роч Ен улад пыртавнытӧ, няньнад йӧзтӧ ӧсьтӧдав-нытӧ.

А сьӧдз ӧд нин воліс пырталысьыд, выя-гӧрда пӧвйӧн тай и ветлӧдлӧ вӧлі, нюз ныра Кростосыслӧн сэн чужӧмыс. Оз куж коми ногыс, да рочнас и карзӧ арся рака моз, а эсйӧ Матӧыс, оз тай шедлы ки улад, орччӧн ськӧд и китшгьялӧ коминас. Вӧглӧма лои найӧс, аслыс пырталысьыслы на мыш-кас пернасӧ пуктӧма, а комиыслысь кодсюрӧлысь и нэмсӧ на дженьдӧдӧма, да Биярӧс и мыжаліс сэсся Памаыс, вывтӧясӧ-мыд пӧ, муртса эз бӧр босьт воддза сетлӧм рубӧжсӧ. А выв-тӧясӧтгыд нӧ мыйкӧ вермылан, ылӧ и волан? Со кытчӧ и воан! Ок, пипу кок!

Воддзавысьсӧ на Ветйӧас ветлӧм бӧрас, эз эськӧ лӧквылысь, но кыскаліс на Памаыс Биярлы вит мортсӧ, виӧмасӧ, со на пӧ мый дон няньыд тэнад сувтӧс. И кӧдзӧдіс сйӧс коркӧ матӧ воӧ выльысь Ветйӧас ветлӧмысь. А вӧвсӧ, кодӧс сетліс, весиг эз гарыштлы. Та вӧсна Бияр ачыс и юалис сэсся:

— А вӧвтӧ нӧ? Кодӧн мездылін?

— Мед олӧ.

— Кытӧн олӧ?

— Тэ ордын.

Тадзикӧн Памаыс бара и медаліс быгтӧӧ сйӧс, ӧдйӧ мед и локтас, чукӧстас кӧ, да ветлас, кытчӧ ыстылас. Бур сьӧлӧмӧн и босьтӧс Бияр ас вылас тайӧ могсӧ, тшӧтш и вӧлыс понда.

Но во дай мӧд сэсся сйӧс эз чукӧстлыны, ылӧ ни матӧ эз ыстывны. Ачыс нин вӧзйысьліс Памаыслы ӧти сайын Кама-рыскӧд ветлыны Югдінас кыйдӧс куяссӧ инавны, и то эз лэдз.

— Нинөмла, — шуис.

— Мыйла нинөмла?

— Асьныгө онө вайй, косьө воанныд да.

— Гашкө, — ланьтөдчис Бияр.

И велаліс кесйөдлытөгьд овны, горт гөгөр уджсө и төдны, да дыгыдасьтөг эз ов, кор Чив локтіс тыртөм кузь пыжөн, жаялөма дібъясьөмысла. Пуктысьны колө петны, томөннас, кйдыс вотөдзыс на, уськөдны турунсө да сабриөдз вайөдны, а мун кытчөкө гортсьыд.

— Мый нө, коді вотөдіс? — дзерөдөмөн и юаліс Чивыслысь.

— Памаыд велөдіс, мед мекөд и кывтан, — шыөн ышловзис мөдыс.

— Мыйлакө?

— Пырталысь пө ветлөдлө. Роч Ен улас. Ыргөнысь перна өшлө.

— Сылы өд чужйин дай! Мед оз өктысь Комиас!

— Абу пө өтнас. Сизимөнөсь видзысь сорнас. Совдорөнин сувтөмаөсь.

— Ме сэсса и вөтла найөс?! — вешкыртчыліс Бияр.

— Он и өтнад, сы понда кө! — ызыөдіс Чив. — А мый нө, абу мунысь?

— Мунысь эськө да... Быдлаө ме, быд пурсянінас! — тоткыштіс Бияр. И Памаыс вылө и тоткыштіс бытгьө.

Кывтісны войсө Чивыскөд да аскинас, Памаыскөд сёрниас, эз и дзеб дөзмөмсө. Сытөг нө эз нин сюр кодкө ыджыд пыддиыс ветлысьыс? Чивыс и вермис нуөдлыны морт нель-өвиттө. А сійөс вөлі колө велөдлыны Овкөджсьыс да ыстывны кымынкө рочтө вөтлыны. Шу эн шу, а оз на өна вылө и пукты сійөс Памаыс, төдөмөн на улө лэдзө, Камарыс серти кө.

Пырөмөн тшөтш и казяліс, буракө, Памаыс сылысь дузь-ялөмсө да зумыша и юаліс:

— Мый нө, чөскыд унтө пальөді?

— Эн. Вугралі на кузяла. Пуксөн-а.

— А дзугсьөмыд бытгьө да. Абу и ме вылө синмыд.

— Тэ вылө. Со, колөкө! — веськөдчыліс Бияр.

— А мый нө, кыті дзескөдө?

— Некыт оз. Гашкө, мися... метөг на кодкө сюрис. Ыджыд пыдди ветлысьыд. Емдінсьыд татысь.

— Кодкөтө меным эн висьтав. Код вылө на лов-виртө ку-тан.

— А Камар вылад нө он кут?

— Эн скөрмөд!— өлөдіс Пама да быттьөкө путшкыны мыйкө пондыліс кыкнан кинас.— Нинөмла рочсө лөгөдны сы вылө. Дзикөдз он орөд няньла туйсө Югдінас.

— А ме эськө мед лөгөді ас вылө? Рочсө и комиссө?— кыйис Бияр кывсө.

Бергөдчыліс Памаыс яналөмсьыс да мыжапырысь и док-мунліс, а сэссия килькулөмөн, зывөкысь мурчкыштис пиньнас:

— А водзө нө лэдзан... Ен вежөмсө?! Асьтө мед сэссия окөдасны пежөдан пөвьяс?!

— Он и лэдз!— сюртчис Бияр.

— Кывійө, инө, и воим,— ышлолөн личөдчис Пама.

— Воим.

— Чайтан, ылыстылі нин ме тэнө? Вунөдлі, эм-ө көнкө?

— Ме ог төд.

— Ачыд на, видзөда, абу нин сэтшөма мелань.

— Тэлань!— эскөдіс Бияр.

— Месянь и ветлы, сідзкө!

— Ветла!

Шупөдөм яӑ да косьтөм посни чери и босьтис Бияр горт-сьыс, муртса аслыс кынөмпөтыс вылө, а няньсө и сьөд ид-нянь сөмын, кыдйөсь да шабді кйдыс сора на. И шонавліс быдөн кок улөдзыс, кор кык кучик сепыс, кыз тыраөсь ви-дзөднысө, лэчөдісны вадорас Чив да кодкө мунысь письыс.

— Мый нө тиян сэні?— нюмсерөн и юаліс Бияр.

— Нянь да вөлөга. Пама тай пуктөдіс туяным,— вись-таліс Чив.

Мортыс витөн да кык пыжөн лун шөрөдзыс на и вөрзис-ны Емдінсьыс. Унанас муномысь Бияр ачыс на пыккис. Чайтис, кокниа и бергөдчасны.

Аскомысь асывнас, мышканыс пөжан шондіөн нин, пе-тісны Совдор катыдас. Вадор пөлөнсьыс козъя вөрыс öзын дорөдзыс эз и оравлы да сайөдіс на кыркөтш вывсө, ве-сиг кумьясыс на сэтысь эз тыдавын. И морт эз тыдав некысь.

Öзынөдзыс и кывтісны да сувтісны, и комыслөн ёсь ныра-бөжа пыжъяс костысь пыр и аддзисны тшөтшыд бөжа кык ыджыд пыжсө.

— Танось!— гөрөктіс нимкодъысла Бияр да гырыся чечышталомён кыпөдчис буздальсь туйөдыс кыркөтшас. Видзөдлыны на и кыпөдчис, шыпуртсө эз и кыскы пуртөссьыс.

Кузьмөса нөрыс нюжаліс сикт горулас, рөчаммыштөма на шөрланыс, да сэтчө и сатшкысьөмаось рочыс, лөсалөм кер помъясысь вомөна таса сюръя сувтөдөмаось, перна и быттөб. И перна дінас сэтөн и пыртөдалөны нөш юра комисө асланыс сьөд Ен уланыс.

Абу кө өд нөш юра, он на сэтшөма вошлась да комиө на асьтө и пуктан, он жө лок да вөтлөд лов югыдтө, ас Енмыдлысь сетөмсө! Пөрөс висьөм нө сійө, лов югыдыд? А локтөмаось тай, морт дасөнөсь на аныс сорөн, да ваджикасьтөг и сулалөны, кывзөны, кыз тошнас тырөм пырталысьыс муракылө рочнас, а кодкө сы бөрся бызакылө коминас.

Видзөдан да, нинөмысь ыштөкө и скөрмынытө. А медся полөгаыс и сувтис өні Биярлы син водзас, сибдалан нөгылөн тупкыліс лов ветлөмсө. Тадзтө өд коркө и став комиыс вермас ылавны, нинөм донысь и шедөдчыны Мөскураыслы дом йылө!

Нөйтөдны и пондіс Биярөс вирыс, тойлаліс ыркөбөн и уськөдчыны нөрыс йылас да чирсны комисө и рочсө, коді веськалас, мед оз шегъясьны, мыйөн оз ков. И эз эськө падъяв, лөкыс и видзөдлісны кө да воча сылы и вөрзисны перна саяс сулалысь рочыс, абу тай куш киаось. А найө синнас сөмын и сөйисны сійөс да полөмпырысь на. И айуловыс кодкө коми чукөрсьыс бөрынтьчыліс ортсө да пырквөчліс серамсө кутөмысь. Сійөс нө тшөтш кералан? И тырмис на сэки Биярлы мывкыдыс дугөдлыны вир пуан лөгсө. Посни воськолөн, пөсялөмысла ульсалөм синмөн, и лашиктіс нөрыс йылас. Вом гөгөрыс весигтө чепөсйис пөсьыс, да чышкыштны ковмис зөлітөмсьыс.

Пырталысьыс бөрся коминас бызакылысьыс эсіө Матөыс и вөлөма, кык кока понйыс. Ачыс рочыслөн нин мыльбөсөн олө, да мед эськө и мукөдыс тшөтш кутісны. Сьөд кышана нин и йөзыдлысь синтө вежны, асланыс кыскөдны.

Воськов-мөдөн бөрөджык йөзсьыс и сувтис Бияр, но эз өд копыра юрөн, да синмас сэтчө и усис Матөыслы. Ыкөстіс сійө повзөбмысла да кыскыштіс сойөдыс пырталысьсө, шөпкөдіс мыйкө сылы, но мөдыс векуштчыліс водзөссө да муртса и чөв усьліс, водзө висьталіс асьыс. Мырдысьөн, мыкталөмөн и ковмис сэсся Матөыслы өткавны коми кывсө.

Ловсö веськöдны ли мыйкö зэв қоланаос шуом водзын лань-тыліс пырталысьыс, морос лыбавлөмыс и тыдавліс сөмын қыз ыргөн перна сертиыс. И сәки айкаыс шыасис, кодлөн таодз петаліс нин гуся серамыс:

— А мыйла қуимөнөсь Енмыс? Ая-пия да Вежа лов на сэтчө! Он гөгөрво!

— Он и гөгөрволы, он кө көсйи!— увгөмөн вомаліс Матө.

— А ловзян нө виом бөрад?

— Сы вылө и Енмыс! Мун, эн дөзмөдчы.

— Муна. Эг на йөрмы татчө.

— Пырттөгыс олан! Пернатөгыс да!

— Ола. Би ни ва на пернаыд.

— Эны, веськалан он сәсся Югдінад, ваян сов суктө да.

— Мыйла ог?

— Мыйла пернатөм!

Эз сөмын мунысьыс, но и мукөдыс падмылісны Матөыслөн таdzi пырштөмысь, виччысьны и кутісны, мед эськө пыртасны. И эз и нюжөд та бөрын пырталысьыс, перйис сьылісьыс ыргөн пернасө да ләптис юр весьтас, пондіс лавгыны дженьы-даөн, сьылө нисьө мойдалө.

— Шуалөй ме бөрся!— горөдіс сәк Матөыс.

— Мый?— юаліс кодкө.

— Мый ме шу! Қызвөй да! Айлөн, пилөн, Вежа ловлөн нимөн, аминь! Водзө. Нималөм Айлы, пилы, Вежа ловлы өні, быд пөрийө, нэм чөжыс, аминь! И медся чорыдыс... Ме и тәнад Мезөс Енмыд! Меысь өтдор мед оз ло тәнад некод! Аминь! А өні матыстчалөй да энө тойласьөй. Ставныдлы тырмас Крестосыдлөн бурыс!

Медся водзө пырталысьыс дінө лөсьөдчис кодкө айуловсьыс, сьылідзиртөм и видзөднысө бөрсяныыс, тупъяура, лямөдлөмаөсь быттьө. Төдсаөн кутшөмакө уськөдчис сійө Биярлы да чуйдөдіс мөвпыштнысө, абу-ө нин Дзарөыс татысь, кодкөд қыкысь нин зурасьліс. Көсөдліс эськө водзөссө сылысь, да он өд и мынлы тай мустөмысь. Матөсьыс, эсыысь, он мынлы ни, он кө ловсө бөсьт.

А Дзарөыс и вөлөма, ыкшасө петкөдлөмөн видзөдліс сійө бөрвыв да. Пырталысьыс көтөдліс кисө ва дозйө да резыштис сылы чужөмас, сәсся гөгрөдлөмөн ләдзліс сылы юр весьтас қыз ыргөн пернасө да Крестоса пөвсө и бөсьтис, мед окөдны сэтчө. А Матөыслөн киас ичөтик перна нин бовъяліс. Он кө дугөд, мукөд комисө тшөтш урсаласны.

— Дугданныд онө?!— равөстис Бияр да кыкис шыпуртсө. И лывкмуңліс на кок йылас, быттьө чеччыштны и көсйө. Тадзикөн сійө содтөд на лөкөдіс асьсө.

Шай-паймуңлісны йөзис да рази-пели и уськөдчалісны сыысь, матын водзвылас Дзарөыс и коли, муртса вевъяліс бергөдчынысө сылань чужөмөн да ляскысис ойөстөмысла гатшөн. И эз кө вөрзъыв сэсса, вомөныс эськө и воськовтіс Бияр, а пескыльтчыны пондыліс Дзарөыс, да морөсас и дживкнитіс сылы чуткөма кок бөрнас.

Пырталысьыс нин воча син и лөсяліс өні Биярлы, но эз кеж ни бөрыньтчы сыысь, а өвтчыны кутіс кыз ыргөн перна-нас да горзыны мыйкө рочнас, сэсса и Крестоса пөвсө лэптіс морөс весьтөдзис. Сэтчө, пөвъяс, и сөтыштис Бияр шыпурт йывладорнас. Дзенгөмсьыс нин довкмуңіс пырталысьыс бөрввы да тітшкысис юрнас сюръя пернаас, паськалөм вомөн и кы-лалөм синмөн и лизгырмуңіс муас.

— Мый вөчин?! Морт выисьөс тэнө!— ывла тырнас арөстіс сәки Матөыс, сүйсис роч видзысьяс костас да сэсянь нин ыр-шасис вылі киөн.

— Лок, перья шеватө, дыр-ө чуксаяс?!— сыркъялөмөн лэдзис Бияр лөксө да бокшаөн и воськовтіс водзөсө, мед кимльөскивыв и ытшкыштны шыпуртнас, уськөдчасны кө сы вылө.— Некод эз кор тіянөс татчө!

Асьсө эськө и нетшкөдіс вузъысьнысө рочыс вылө, да садьсө эз на вошты: витөнөсь найө, да өтпырийө ставнысө он керав, кодкө и аслыд сөтыштас да вируляө и вөчас. Та вөсна дорйысьны и зэвтысис юрас жуньгытөдзис.

Но эз и ковмы дорйысьнысө. Шөйөвошліс мыйыськө Ма-төыс да йөрмөмысь моз и авөстіс, уськөдчис пышйыны вадорланьыс, өти кок йылысь да мөд кок йылас и чеччаліс горувтө. Сы бөрся и рочыс уськөдчисны нөрыс йывсьыс. Вөлөмкө, Чив да нөшта куимөныс кайөмаөсь нин вадор кыр-көтшас да нөрысас и кыпөдчөны.

— Паныдалөй!— горөдіс налы Бияр.— Эн лэдзөй некодөс вадорас!

Чайтіс, сытөг нин өкталасны пышйысьяссө, да лов тырөм-сьыс и сулыштис кымынкө здук, долыдыслы на сетчыліс. И сэтшөма пөръяліс асьсө муртса и энөвтчылөмнас. Матөыслысь медводз и коліс босьтны ловсө, а сійө кытшолөн да кытшолөн вевйөдчис панөвтөмсьыс да воөдчис кыркөтш дорөдзис, чеч-чыштис улас.

Эз нин сәсся и су сійӧс Бияр вадорсыыс, эськӧ ӧдйӧ жӧ и сэтӧн лои да. Босьтӧма Матӧыс кодлыськӧ совдорсаыслысь ветки пыжсӧ да Эжва ньылыдыс и курасьӧ кык лопта пелыс-нас. Вӧтчыв, колӧкӧ, нӧйтана йӧйӧй!

Вӧтчывнысӧ на и ыззьыліс Бияр, да гыпкысьӧм кыліс мышку сайсыыс. Шыпуртнас ырыштчӧмӧн и бергӧдчис, а рочыс кодкӧ, ловйӧн на кольӧмыс, чеччыштӧма, вӧлӧмкӧ, кыркӧтш вывсянныыс. Восьӧпӧрӧмысла сійӧ уськӧдіс кисыыс шыпуртсӧ да эз нин и лысьт сувтнысӧ, пидзӧсчанысис. И шы эз вермы сетны, нярган чужӧмсӧ сӧмын и пелаліс, быттьӧкӧ абу и верстыӧ, а ньӧръявлан ичӧт на.

Таысь и босьтіс Биярӧс зывӧкыс, синнас нин эз кут аддзыны вежнясян чужӧмсӧ рочыслысь да сылі тшуптас и сӧтыштис сылы шыпуртнас. Сьӧлӧмыс бурмӧмӧн сәсся копыртчыліс рочыслӧн шыпуртысла да веськӧдчис кыркӧтшас катӧдан сунтола туйыслань. И Чив сәки тыдовтчис кыркӧтш йылас, а сы бӧрын и емдінсаыс ӧти.

— Абуӧсь ставныд да? — шуис Бияр.

— Абу, — мыжмӧдчис Чивыс.

— Кытчӧ нӧ лоины? Кыкыс?

— Шойӧ.

— А рочсӧ? Ләдзинныд?

— Эгӧ. Эштӧдім. Ӑти и мыніс, да со тай, буракӧ.

— Буракӧ, — веськӧдыпырысь дольыштис Бияр да кайис кыркӧтшас, но эз и сувтлы.

— Кытчӧ нӧ? — юалис Чив.

— Пальӧдла эсийӧс!

— Кодӧс?

— Пырталысьсӧ!

— А ловъя нӧ?

— Нинӧмысь на сылы кувнысӧ.

Кымынӧнкӧ совдорсаыс бӧр нин чукӧртчӧмаӧсь вӧлі нӧрыс йылас, тапикасьӧны да копрасьӧны сэтӧн, а кодкӧ и, чышгяна, лимзалӧ на. Кувтӧдзыс, буракӧ, лоӧма Дзарӧыслы, вежӧртис Бияр. Но воськов-мӧд и ньӧжмӧдліс, эз сетчы мӧдзасьӧмыслы¹. Синсӧ сәсся и чӧвтліс сӧмын Дзарӧыслӧн шойыс вылӧ, кыпӧдчис нӧрыс йылас да.

— Сейин ӧд мортсӧ, гундырӧй! — нюркӧйдӧмӧн чирӧстіс лимзальсь аныыс. Гашкӧ и, гӧтырыс Дзарӧыслӧн.

¹ Мӧдзасьны — кантчыны.

— Абу на морт сёйысь да,— дөжньштис Бияр.

— Абу тай! Асьтө кө эськө..! А энө полөй да асьсө и талялөй татчө!— усьодис аныс совдорсасө.

— Мед... пондылөны... кодлөн кыгтэ лудө!— коставлөмөн сөдзөдис Бияр, а кывзысьтөм кыис кыскыштлис на шыпуртсө.

Пырталысьыс динө и воськовтис сэсса пальөднысө, а сийө воыштөма нин садяс да лапйөдлис синсө, төдис Биярөс да зяткыштис пиньнас, кымынбөдчис. Дырөкө мысти бауасис да судзөдис кысьыс уськөдлөм пернасө, өшөдис бөр сьылиас. Жынян моз и кутис бовъявны пернаыс. Шошаөдыс сэки и лыбөдис сийөс Бияр да пуксьөдис ситан вылас.

— Но, кытчө мөдөда?— юалис дзерөдөмөн.— Гортад али Кростосыд динө? Висьталан тай, бөр пө ловзёма, вилөмаөсь да. Гашкө, бөр жө ловзян да? Видлаам!

— Изыди, изыди!— тшынысь моз шенасьөмөн кутис чувъявны пырталысьыс.

— Изйыд өд сюрө, он кө ланьт! Йёзө локтан да куркса-сян кырныш моз, а аслыд мед кыв он шу? Босьта да... сьөдөс!— пузис Бияр да эз нин и шошаөдыс, а сьылиөдыс шамыртис пырталысьсө да лэччөдис вадорас.

— Ваас сюян?— юалис Чив.

— Васө он пежав!

— А кытчө нө?

— Гортас мөдөда, пасья да! Мөдысь оз лок!

Кытөн сулалисны тшөтшыд бөжа кык пыжыс, сэтчө и кыс-кис Бияр пырталысьсө да уськөдис лыа вылас. Сьылиөдыс шамыртлөмсьыс, гашкө, бара на воштылис сийө садьсө да эз и вөр. Но пыр и ымөстис да видлис пескыльтчыны, ковмис на Биярлы тальыштлыны вылысас, кор шыпурт йывнас пуктис пернасө сылы мышкас. Матыс пыжас сэсса и кыскис дойысла ойзалысь да нюгласьысь пырталысьсө, йөткис пыжсө ва вылас да кевлөмөн на тойыштис мый вынсьыс визув бөрыс.

Ылө нин кылалис пыжыс, дугдис синсө вежны, и жөвъя-лөмөн, узвө нисьө олө, личөдис Бияр асьсө. Ыштөкө тыртөм-мис та бөрын гырк пытшкөсыс, кынөм сюмалөмсө кывлис дойөс моз.

— Огө мыйкө сёйыштөй?— шуис Чивлы.

— Öнi... пырас кө?— чезыртчылис сийө.

— Эгө өд вурд кульбй!— вомалис Бияр.

— Мед, этша нө шойыс?

— А ачылд нө мед шойөн колин?

— Эг.

— Эн кө и... мед оз на вукөд! Со Енмыс да шондіыс, зывөктөны оз?¹

— Гашкө, и оз.

— А нинөмысь на!— шонді дзирдсө быттьө и апыштис Бияр.

Но сёяныс сылы эз на и пыр. Шупөдөм яй шельк вайліс Чивыс, да кымыныськө и йирыштис, сола көрсьыс и бурмыштис сьёлөмыс. Вундіс пуртнас йирыштөминсө да сійөс, вөсниторсө, и някяліс, а яй шельксө бөр сетіс Чивыслы, мед пуктылас. Кыном сьомалөмыс пыдди горш косьмөмсө кыліс, курзьөдланаөс. И юис Эжвасьыс содзнас, да өти содзтырсьыс горшыс эз на и веськав, курыдыс эз пуксьы ни, мөд содзтырсьыс сөмын. Гашкө и, сөптыс письтыліс лөксө песөмысь.

— Би тай вөлі колө перйивны да,— вөрзөдіс асьсө Бияр, быттьөкө мудзвывсьыс на.

— Мый бисьыс?²— юалис Чив.

— Перна сюръясө он коль сэтчө.

— А сюръяас и биасям.

— Отө. Видзөднытө он вермы сідзтө.

— Мыйла он вермы?³

— Синтө и ёрны кутас.

— А кызди нө көсьян?⁴

— Би пестам да пуктам. Мед сотчө.

— А Крестоса пөвсө?⁵

— Тшөтш!

Кыркөтша нөрыса костас, нөптовас, чаг-өг чукөр вөлі, да сэтчө и биасис Бияр, кыскаліс ыджыдасө ломзьөдны быдсяма лөпсө улыс кумьяс дорсьыс. А Чивлы да мөд емдінсаыслы тшөктис перйивны да лөччөдны перна сюръясө да Крестоса пөвсө.

Пөвйыс вөсна сөсся и босьтліс Биярөс падъялөмыс. Кык весьтысь на паськыд да мургыль¹ кыза, өти ён пуысь и вөлі сійө, кыддзысь на топыдысь. Он и убөлит эськө шыбитнысө биад, да колө.

Падъялөмсө Биярлысь и дышөдіс Чивлы видзөднысө да юалис:

— Мый нө?²

— Сьөрысь кө, мяся, босьтны.

¹ *Мургыль* — водз чуньыдлөн водз да шөр йөзви костыс.

— Мыйлакө?

— Гортө ылы. Чери керны да мый да.

— Мун! Со кутшом синмыс, он аддзы?

— Бергодан од. Вуштан ли... мисьтом чужомсө.

— Сэсса и мынан, чайтан?

— Сысыс и полан!— сюртчис Бияр.— Лөктө и вайны кутас!— ышловзис пушкыштөмөн да дорышнас и сюйис биас Кростоса пөвсө, мед өдийджык сотчас.

Би дорас на и сулалисны найо, куимоныс, шойччөдисны асьнысө ойбырасиг, кор кылисны сиктсыс лэччыс йөз чукөрсө. Удтысьомаось, буракө, пыртчынысө волысьыс асланыс өксыныслы, да инө и пуктөма сийө удтысьомсө, медся водзын и тотшсөдөс өнө горувсө, сутшкөдөс водзвылас йөг йыла бедьнас. Видзөдан да, шеньөб вивтырыс сьлөн некытчө оз и лөсяв йөз чукөрыслы, кодкө томуловыс быгтьө и вайөдө гырысьсө. А өксы дай видзысьыс на сизимөнөс бөрвылас, кодө шыпурта, кодө кипеля.

Асьсө на сийөс лыддис Бияр ойкөдана мыжаөн, волины и көсийлис сы ордө бөрьяыс шуан кывийөн, да нөти эз и сетчы өнө полөмыслы. И Чивсө да мөд емдінсасө өлөдөс, мед оз дзөрнясьны, лочки сулаласны. Такөдөс на, мый оз лысьтны вөрзвөднысө найөс, эз кө нин петны Пама увсьыс.

Матө би дорас и сувтис йөз чукөрыс, сөмын мөдарсяньыс. Отчыд дай мөдыс зутшкис өксыс йөг йыла бедьнас, быгтьө майөг и сувтөдөс кутчысьнысө. И пановтис сийөс Бияр шыасьомнас, дзерөдөмөн на юалис:

— Мый нө, ыджыд айкаыс, висьталан?

— Тэ мый висьталан-а?!— шөйөвошлис сийө.

— Волі тай со видлыны.

— Волөмыд и эм! Кымын шой со!

— Лыддьы! Эстөн на өти дай, кыркөтш улас,— докнитис юрнас Бияр.

— Морт виысьөс тэнө!— жергөдчылис өксыс.— Нуан он юртө-а!

— Ог кө өд!..— ыкшасө на петкөдлис Бияр да гөрөктыштис, сэсса нин скөрмөдчис воча: — Ме нө аснырөн ветла, ог Памасянь?!— перйылис шабур увсьыс рубөжсө.

— Паматө меным эн кыскав! Вылысө эн өшлы!— пырквөчис өксыс.

— А мый нө тэ, петін нин Пама увсьыс? Коми мусьыс и?

- Кытчö петі?
- Рочас! Рочыслы нин и олан да!
- Ме ола?!
- А он нö?— би вомöныс и воськовтис Бияр.— Син вадзад, вадорö туй вылад, сувтöдöны перна сюръясö, да он аддзы? Ен югйдсö комиыслысь вежöны, да он тöд? Тшöтшöда вот юртö дась скөрвылысь!
- Он лысьт!— чирöстис öксыыс.
- Ог лысьт, ыж паса нин и, буракö, да?!
- Кутшöм ыж паса?
- Сьыліад! Пыртчин кө?
- Ме эг.
- А йöзыс? Сьысь абу шог?
- А налы нö оз ков овнысö? Емдінсьыд мыйкö налы чуктылö?
- А садьсö нö оз ков тöднысö? Комиыслысь?— сырмыліс Бияр.— Сёйин и сігалін?
- Виртöг, тшетшійсьöмөн сöмын, воча сулалöмыс тайö эськö эз на помась, эз кө öксыыс чöv усьлы да вежөрт сэки, мый сэсса шунысö.
- Мун ловъя юрöн,— шуис сійö да ньöти эз и лöгысь.
- И Бияр чуймыліс виччысьтöмсьыс да кывзысис сылысь, көйявтöг и лэччис вадорас, кинас сöмын шеныштис Чивыслы да мöд емдінсаыслы, мед вöтчасны.
- Кык пыжөн петалісны Емдінсьыс, кык пыжөн и катісны бöрсö. А рочыслөн кольöм тшöтшыд бöжа пыжыс, мöдыс, сідзикөн и коли Совдорас.
- Нинöм эз соссьы ни сайöд Бияр, кор висьтасис Памаыслы. Воас на сылы юöрыд, совдорса öксыыс на, колөкö, и удтысяс, да мед оз и корлы нин Биярöс мöдысь кывсö кыйны, абу пö тай сідзи вöлöма.
- Веськыда ошкөм ни ыдждöдлөм Памаыслысь Бияр эз и виччысь, чайтис, инö и пуктас сійö ветлöмнысö да мыйыськö нин и видыштас синаддза, бур сьöлөмөн и лэдзас сэсса гортас. А чеврасьны и кутис Памаыс да эз и дугдыв помöдзыс, пиньсö йирыштöмыс на кывліс сылөн кильжувлöмысла.
- Абу и колöма, сідзкö, кывтлынысö меным?— дільк-мунліс Бияр.
- А мый бурыс?!
- Мöдысь оз локны!

— Оз, дерт... косодасны кө водзөстө,— дойысь моз зэ-
лөдчыліс да ышловзис Пама.

— Виомаыс?!¹

— Ловъяыс өд коли на. Рочыс!

— А он и лэдз!

— Сё миян мындасө?

— Мед! Он и пов да!

— Эн ышнясь!

— А бурнад и кутан? Көкөдөмнад?

— Лёкөн нө сөмын? Комиыскөд и? Асьтө мед сэссия?!

— А ме ог төд сэссия!— дожныштіс Бияр.— Меным оз
лөсяв-а!

— Мый оз лөсяв?

— Татшөм оломыд!

— Кутшөм?

— Шөрөвьяыд! Шөрөдыд кылөдчыны сөмын, а катнытө...

— Ланьт! Кутшөмкө тэ велөдысь менө!

— А ворсан бытгьөкө да! Менө тшөтш йөйтөдлан!

— Кучка вомад!— ырыштчыліс Пама.— Чайтан, сибөді
кө, и пурны лысьтан?

— А пурасны өд, Вежа Айка! Öтвылысь на, гашкө, ко-
миыс да рочыс!..

— Эн вөтась!

— Ог и вөтась. Сідзи на юрө локтө.

— Юрад эськө мый оз воы да.

— А сьолөмад на кучкө татшөм мывыд¹.

— И меным тайөс висьталан?

— А кодлы нө, Вежа Айка? Туө-буө нө петкөда? Лөгөн
тэ вылө?— синмас и видзөдліс Бияр Памаыслы.

А сийө бергөдчыштіс да чөв олыштіс, сэссия воча видзөд-
лытөг и шуис ньөжмыда:

— Мича, тыдалө, пуксьө гожөмыс. Турунтө пуктыны.

Гортас катгөн шөгөдліс на Биярөс, би кинь моз и усис
юрас да: төдөмысь, и Памаыслысь сотыштлө мыйкө вежөрсө
да сьолөм потмөныс овлө, а висьтасьнысө и некодлы, абу ма-
тыс мортыс.

¹ *Мыв* — вежөртөм, сознание.

Кыскö вадорад, оз пукавсьы горт дорад. Шондиä ывлаыс на быттьö дзескыд пос помсьыд водзö и ветлыгöгыд. И Бияр чеччис да кутов-катов тапсьöдис Куа ты горулыс, лэччис тша-пöдъяс динöдзыс. Водзöсö эз нин лысьт, видзчысис джёмсьыс, ас кокön на мед и кайны. Пуксис мыр вылö да кутис видзöд-ны черыислысь гыбалöмсö. И нюжмасьыштис эббссö кылöмысь да очсыштис долдыпырысь.

Долыдыс вылö и лöсялис сылы Öльöкыс. Рузумön тöбöм кык ытшкысяна, тасма козъянас чера, видз вылö и мөдöдчöма сийö да чотликтö пыжыс динö, кыскышталö чепöль пуа шуйга коксö. Абу и асья чужöма, нярмөмакодъ, юрлөстөг быттьö и узьöма. Сувтис Бияр динö вотöдз да лольштитс ыджыда, усьли-ны быдөн пельпомтьясыс.

— Лок, эн пов!— горöдис Бияр.

— Локта.

— А öтнад нö видз вылас?

— Ог. Юваыдкөд да Шонаыдкөд.

— А көнөсь нö найö?

— Сейöны на.

— А тэ нö, сөйтöм?

— Сейöма.

— А вайлы чертö!

— М-мыйла?!— чегсьылис Öльök.

— Керала коксьыд... чепöль-пусö!

— А сэсся?!

— Морт лоан сэсся!

— Ме ог тöд...

— Он тöд!— нерыштитс Бияр.— Сувт, лок, мыр бердас.

Шуйга кокнад! Мед оз дзенгы, керышта да.

Тусьөн-тусьөн петис Öльökыслөн синваыс, кор мынис ко-кыс чепöль-пусьыс. А вомыс вежыня на и колис, да няргыштис мыйтакö ылыстчöмön:

— А кытчö ме öни?

— Кытön гортыд!

— А туруныд?

— Коркö öд эштас. Сы понда кö.

— А ме ог...

— Мый он?

— Мун татысь.

— Эн!— вочавидзис Бияр.— Ов!
— Ола.
— А сідзтö өд и аслад олөм вылө ковмас петны.
— Мед.
— Керка лэптыны и.
— Мед.
— Гөтрасьны ковмас и. Татчö!
— Мед,— номыс петалис Öльöклөн.
— Ставыс тэныд «мед»! А кодöс нö эськö ваян?—
шпыньмунліс Бияр.
— Юватö. Он кö скөрмы,— намыштіс Öльöк.
— Ог. Мортö нин пукті да. А мыйла сійöс?!— ышöдіс
Биярöс шмонитнысö.
— Пола сыысь да.
— Полан?! Лёк нö сэтшöм?!
— Абу. Зэв бур!
— А полан, шуан, да?!
— Бурьыс и пола. Инмөдчыны ог лысьт.
— Сэсья... эн на и инмөдчыв?
— Этадзи... ки пөлөн,— петкөдліс Öльöк.
— Но и... олам нин арöдзыс... тыр пызанөдз да сэки и
гозйöдам тиянöс.
— Кор шуан.
— Шуи тай со!— дузмунліс Бияр.— Дугды сэсья мөд
пöвста сёрнисьыд.
— Дуг...— мыктыліс Öльöк да эз нин и лысьт помавны
кывсö, вөрзис да öдйöа дитшьсöдіс джөм туйöдыс пыж динас.
А Бияр бөр пуксис мыр вылас. Асьясö сёйышттөм на сійö
вөлі, да абу өд удж вылө мунысь, оз на орийöдлы кынөмсö ни.
Öльöкыскөд сёрнисö и вотйыліс выльысь юрас да чуймис сылөн
висьталөмысь, Ювасьыс бурьысь полөмысь. Сідзи, гашкө, и колө
да, мед бурьысь и полан зонмыд нывсьыд. Сэки и гозйөн олі-
гад он чорзьы мортыд, югыд туйö и лөö гөтырыд. А Бияр эз
и повлы Унасьыс, весиг эз визмунлаыв вирыс син улас сійöс
уськөдлөмысь, да кытыськө оз босьт вөлі сы динö мелисö,
сэтшöма нин мусаав сійöс. Сыкөд и оліс тай, нүөдіс гөтыр
вылө да, мый сэсья?! Водзöсьыс на юрсиыд сувтö-а...
Юваыслөн да Öльöкыслөн и пуксяс, гашкө, öта-мөднысö
шонтан олөмыс. Быдтасныс, коді чужас, мичаөсь лөöны и,
еджыд чужөмаөсь да ва визув синмаөсь. Ошкуйысь Öльöкыс,
да мөскуаса рочыс серти мөд пөлөс и видзөднысö, кызджык

ныра да гӱгрӱсджык чужӱма, юрсиыс веж и, сьӱдас абу и кыс-
кӱма. Сораса на, тыдалӱ, вирыс, гашкӱ и, комиыслы матӱ сӱр-
ниалӱн тшӱтш.

Ас ордса и лоӱ Ӗльӱкыс, ӱти пызан сайын сӱйысь, а
муртса кӱ и сӱтыштӱс сӱки Бияр сылысь юрсӱ.

Ва туйӱн на, йи сувттӱдзыс, ветлис Бияр Сӱрӱгӱ сов су-
кысла, вежас вылас азылас нуис, ас вӱчӱмсӱ.

Бӱрсӱ кывтӱгӱн, Емва вывсьыс Ӗжва вылас нин петӱгӱн,
кодкӱ быттӱ чуйдӱс сылы сувтлыны Емдӱнас, пыравны Пама
ордас.

— Мый нӱ, кутшӱм могӱн?— дӱзмӱмӱн и юалис Памаыс,
эз вӱв бур руа да.

— Сӱрӱгӱ тай ветли да, сов сукуысла.

— Сӱсся мый?

— Волюсыӱ кӱ, мися, ветлыны. Тӱвсья туйӱн.

— Мыйла?

— Нянь вылӱ вежны сов суксӱ.

— Няняӱсь нӱ сӱтӱн?

— Миян серти?!— ызмунлис Бияр.— Бурджык олысьыс
ас няньӱн и бергӱдчӱ.

— Волюсыӱд тӱнад... кытӱн?!— быттӱ эз тӱд, дузгӱд-
чылис Памаыс.

— Сыктыв вожын.

— А йӱграыс?! Кымын шой вайин воддзавысьтӱ?

— А шыр олӱмыд и бур?! Лӱсялӱ аслыд?!

— Ӗн печлась кывнад!

— А мый нӱ... Югдӱнӱ мед он ветлы ни!— эз на ӱвсьы
Бияр.

— А Югдӱнад тӱ... он и лысьт ӱни! Матӱ он лысьт волю-
ны!

— Мыйла ог?

— Велӱдӱма нин! Камаркӱд!

— Кодӱ? Мый?

— Важ тӱдсаыд. Мед пӱ сӱмын волас!

— Кутшӱм важ тӱдса? Ӗсӱйӱ... Матӱыс?

— Маюрыд! Ӗн на кӱ вунӱд. Синсӱ пӱ и перья!

— А-а... мый ме сылы вӱчи? Лӱксӱ?

— Мыйкӱ вӱчӱмыд нин,— дӱльӱдӱс Пама.

— Мый?

— Верӱсыс вӱлӱма, кодлы мышкас пернасӱ пуктӱмыд.

— Ме мыйон төдї!— мыжмөдчыліс Бияр.— А мөдарө кө, мед оз тшыкөдчы дай Коми муас! Шог абу на вөсна, роч гозьяйд вөсна. Менсьым тай сөйисны жө олөмөс!

— Узь, аски гортад катан,— такөдіс Пама.

— Ог, меным ва вылас гажаджык. Төлыс рытыв и,— во-чавидзис Бияр да ас вылас бурасьомөн и петіс.

Но пыжыс дінө лэччигөн на сувтөдлөмөн лолыштөдіс сійөс ызийөдан мөвпыс, мый ветлыны и колө эськө Югдінас да, пет-көдчывны Маюрыслы воча синмөн.

Да кытчө нө вөрзян ар помнад, йөрмынытө кө он? Асыв-вой төв кучкас да өти войон и йиалас Эжватө. И төвнас на он лысыт, подөн ни вөлөн. Сэтчө, Югдінас, шуам кокниа и воан, да бөрсө кызди асытө атөдөм бөрын? Абу өд сө туй төвнад, пышйынытө. Мөдөдчас эськө Камарыс кыйдөс ку-яссө инавны, да сы дінө өд он көвъясь. Тулысөдзыс, ты-далө, ковмас нин виччысьлыны. Вөрыс и ваыс сәки Бияр дор лооны.

Югдінас ветлан мөвпыс сәсся эз нин и энөвтлы сійөс, ном моз дөзмөдліс мукөддырйиыс: ылысмылас да матысмылас. Вөравны кайис, да вөр керкаас на, кор кок йывсыд нин уськөдө мудзыд, водан да дыш и вөрзьянытө, сәки на оз сет унмовсьнытө. И вемөснас, быттьө вөтөн, веськалө Югдінас да сөрнитө Маюрыскөд.

— Мунін кө мекөд... А рочыд вылө нин и вөлөма син-мыд!— шуасьө Бияр.

— Вөлі!— ышнясьө Маюрыс.— Со на быдмө дай! Пи-ным.

— Мый нө, быдмө кө?

— Аслыд мышкад пуктас пернатө!

— Зэв тай көсьян!— йирьштө Бияр пиньсө.

— Энлы!— чиктылө Маюрыс.

Тшетшйыссны тадзи да некутшөм помө оз и воны. И ачыс оз төд Бияр, кызди сәсся унмовсьө. Усурмунөмысла нин, бу-ракө, письтө юрас унмыс. Асывнас тай, садьмас да, ывла ыр-кыд вылас на довьөдлө, ойөстөм вывтыра.

Тулыссө нин и матыстіс Бияр, мед өдйөджык пукяс. Да тулысыс на и кутіс сійөс гортас, гөра-көдзасө тшөктіс эштөдны да кульман черисө кыйыштны. Еді кульмөм бөрас, мича дзоридза нин вөлі лежнөгыс Куа ты полөнас, и петіс туяс. Сөйнысө аслыс вежон-мөд кежлө да кыйдөс куяс

водзасьомыс¹ вылө и босьтис гортсьыс. И мамыс, и көдзыд мамыс² кутшөма нин, колөкө, дзескыдасьоны, да мед и мынлөны, чайтис, дзескыдсьыс, вежлалөны кыйдөс куяссө коланаторныс вылө.

Пиыс, Вожайыс, вөйыисис тшөтш ветлыны, бөрья помөдзыс вөтлысис бөрсяныыс, да муртса эз босьт. И бур, эз босьт да. Эськө, гашкө, сэки нин эз ловийөн коль.

Лөнъштлан да лыбзылан сьөлөмөн, ыштөкө асьыс чөс туйсө и видлалө да шедөмсө и виччысьө, кывтис Бияр төдса нин Эжва кузяыс. Полөм эз төд, мый кодкө шөрө, ошкуйыс шөрө на, вермас веськавны, да бурөн оз и мын. А сідзи и лоис Уртөма дорын.

Баддя нырда чукыль сайсьыс лайкъялысь тшынсө ылісянь на и аддзис да син увсьыс эз и воштыв, тшыныс вылө на весьтасөн и кылөдчис. И нырдыс полөн маті, вынысьөн кучкан визув вывтис, твовдчис чукыль саяс, паськыда вощьом вылас да видзөдліс, коді сэтөн тшынасьө, вөр дорас.

Куим пайгөс пыж, тшөтшыв бөжаөсь да вылі дорөсаөсь, сулалісны кыркөтш улас. И йөзыс нельөнөсь, куим верствө да томулов, вылыс паськөм выланыс на тубрасян кышанаөсь. Он и шу, мый мөскуаса рочыс.

Ыджыд пөрт, гашкө, даслы пусян, өшаліс бипур весьтас. Сиктас, буракө, кайөмаөсь мукөд ошкуйыс, сійөн и этшаөнөсь өні вадорас. А бурөн-ө-лөкөн ветлөны, мыйөн налысь төдан водзвывтө. Зэв на и вежласьоны, колөкө, сьөрсьыныс вайөмнас. Мырддясьомнад өд аслыд корсян жө водзөстө.

Горзыны кутісны Биярлы, чуксавны кинаныс өвтчөмөн, мед сувтлас. И сійө бергөдіс пыжсө вадорланьыс нырөн да пондіс сыныштавны, матыстчыны нбөжйөнникөн. Кок увсьыс кималаснас корсьліс көрт пома кузь зібсө, уськөдчасны кө нин сы вылө, кор ляпкыдөдзыс воас. А косөдзыс сійө и ачыс оз сувт, ва вылас ставнас и лоө мед пыжыс.

Но мыйлакө өд чуксалөны? Шьпуртаөсь ставныс, весиг томуловыс, да оз тай и сөйны синнаныс, нюмрасьоны на. И чуртчөс вывтыраыс коді, ош быттө и сувтөма, петкөдлө мыйкө нель пельөсаөс, өшиньтас кодьөс. Лэптылас сійөс, өшиньтас кодьсө, чужөм весьтас, да чужөмыс лючки-бура и тыдалө, йи

¹ *Водзасьом* — гөснеч.

² *Көдзыд мам* — тьоща.

колип пыр быттьö. Он эскы, а ичöтик öшинь и эм, абу нин öш гадьсьыд ни мисасьыд, пукты керкаад, да лэдзас, майбыр, бывла югыдтö.

Тайö öшиньыс вылö и ылалис Бияр. Мукöдторсö на сылы мыччöдлисны, кузь сыртя чышъянсö и югъялысь мыссян дозсö, но вештылис да бара чуртчöс ошкуйыс вылö и чöвтлис синсö. А мöдыс казавтöг эз ов сылысь веж петöмсö да ваас на пырыштіс, тотшкöдіс чунь помъяснас öшинь шöрас, со пö кутшöм чорыд югыдсö лэдзаныс.

Гашкö, абу и ас вöчöм öшиньыс, немечысь ли кытысь на вайöм, а колö ошкуйыслы кыйдöс куыд, да со на кытчöдз вайöма, ыджыд донысь мед и инавны. И тöдö асланыс сюсьыд, мый туйö петöм комиыдлөн кыйдöс куыд, мыйтакöйд, век сьöрас, мед вежны мыйкö вылö ли мынтысьны мыйыськö; эзысь вежтан пыдди тай и ветлö донаджык куыд.

Пыж шöрсьыс, сямöдысь вевтöд увсьыс, Бияр перйис кыйдöс куяса тыр сепыссö да разис шыркөссö, кыскис некымын ку.

— Татшöмыс колö?

— А-а-а,— нимкодъысла летöдіс юрнас чуртчöс ошкуйыс да нöшта на пырыштіс ваас.

— Уна-ö? — мöд китыр кыскис Бияр куяссö.— Тырмас? — И петкöдіс ошкуйыслы кинас, мед пуктас öшиньсö пыж нырас, а сы пыдди мыччас сылы куяссö.

Но эз на ышты ошкуйыс вежсьынысö, пöлынтьлис öтарöмöдарö юрсö. Да эз öд и синтöм вöв, аддзис, мый унджыксö ур ку сылы вöзйöны. Ковмис на Биярлы бөрйöмөн кыскыны кымынөскö анча кусö да низь кусö, содтыны вöзйылöмыс динö.

Видзöдö, бурасис ошкуйыс, дась нин и пуктыны öшиньсö пыж нырас, да сылань и сыныштіс Бияр. Юрас весиг эз волы, мый ачыс тадзикөн и шедöдчö.

Пуктіс эськö ошкуйыс пыж нырас öшиньсö, да водзöсö эз жуйяв, кутчысис нöтысас да ош вынөн кыскис пыжсö лыа вылас, ачыс весиг гатшасьлис сэтчö. И уськөдчисны сэк мукöд ошкуйыс, тшöтш и томуловыс, да ляскисны Биярöс пыж дінас, пондісны варкөдны кытчö веськалö. А сэссия и кучкисны мыйöнкö юр бöрас. Пöсьмунлөмсö Бияр сöмын нин и кывліс, воштіс садьсö.

Паляліс несйöдлөмысь да тшөкйöдлөмысь. Нырас и вомас веськалөма лыаыс да лолыштнысö нин оз сет ыджыдджыка. Лыбөдіс юрсö да гыравыласьліс, казяліс син бöжнас васö

бөрвывсьыс да ваыслань юрөн и бергөдчис вочасөн, кыссис судзана выйөдз да ки пөвнас курыштис васө, пожъялис тадзикөн курасьөмнас нырсө и вомсө.

Пуксис сэссия лыа вылас да видлис веськыда и кутны юрсө, но дзик пырсө эз на вермы. Ковмис на шойчөдны асьсө да вежны тырөм ловсө, сэки сөмын дугдис пөрөднысө юрыс бергөдчөмысь. И сөдзөдчыны кутис вежөрас, мый өтнас и пукало вадорас, некөн морт оз тыдав, и пыжъясыс абуось, тшөтш и аслас пыжыс.

Вөлөмкө, абу на сэтшөм матын сиктыс, колө на вөр ди вуджны да ты йыв кытшовтны, сэссия нин ваөн босьтлытөм нөрысас кайны. Югыд войыс и туйдөдалис Биярлы векныди-каөн таялөм ордымсө, а пуясыс отсалисны кутчысьлывны кок йывсьыс усьөмысь. Гөгөр эськө доякылис, да юр бөрыс, шуй-галадорыс, быгтьө эз и аслас вөв, сибдөдөма мыйкө сэтчө додөдөмөс, да тырыс на кодзувкот сэтөн жуө.

Нөрыссө кайны и эз вермы Бияр. Воис джуджыд тшупө-даинөдз, джаджийөн таялөмөдз, а пу ни потшөс эз лөсявны матө кутчысьлынысө, да сэтчө и усис эбөссьыс, жуймунис ку-лөма нисьө ловъя. И мича югыдөдзгыс сэссия сургис, эз паляв-лы. Садьмис синмас шондисьыс нин и то на мыйкө дыра полис чеччынысө.

— Кодкө и!..— кылис бөрвывсьыс аньлысь повзьөмөн шүөмсө.— Коді сэн? Кулөмыд али ловъя?

— Ловъя,— нюрөстис Бияр.

— А коми тай нө?!— лэччис да водзвылас нин сувтис ань-ыс. Пөчань нин, видзөднысө.

— Коми. Эн пов.

— А мый нө... коді, кытысь?

— Овкөджысь. Югдинө вөлі кывта, да со тай...

— Мый со тай?

— Веськавлі. Ошкуйыслы. Виисны, да абу на кувсьөма. Юрөс жугөдө.

— Налы өд... сы вылө и петөмаөсь да. Мед нин эськө медбөръятө мырддясны, да нывъястө на вөрөдасны. Пеж чукөрөс, найөс!

— А мый нө... айкаясыд тиян?! Мыйла лэдзөны?!— ыр-нянөдчис Бияр, да пыр и гудыртчылис син водзас.

— На помысь!

— Мыйлакө?

— Мыгыс босьтөма!— зывөка векыштчыліс пөчань.

— Ме эськө... Эг повзы да... Ачым йөйталі!— синваыс петтөдз дількунліс Бияр.

— А лок, видзөдла юртө и асьтө.

Сойбордийөдыс кутөмөн вайөдіс пөчань Биярөс гортас, пуксьөдіс вылыс джодж помас, вольпась вылас, да төдмаліс шөртөн, кодарө-кыті вөрзьөма юрыс.

— Пөла-пөла тай,— шуис.— Петөма шуйга джынйыс.

— Кытчө?

— Водзө. Гашкө, чунь вомлөс.

Пөчань топөдіс Биярлысь юрсө морөс бердас да кыкнан кинас зэлөдөмөн бертовтіс бөрвыв. Гуө моз сэсса и усис Бияр садьыс бырөмысь.

А папаліс да, вольпась вылас куйлө, и юрыслы быттьө ыр-кыдджык.

Ачыс Бияр да Енмыс сөмын и төдөны, кызди сійө локтіс бөр гортас. Пыжнад катнытө мустөм, сөысь жаявлан, кор абу төлыс, а видлы подөнтө да нөшта вермытөгыд, муртса асьтө новлөдлігад. Лыа дорөдыд тапсьөдан на ньөжйөникөнтө, а воан вөра кыркөтшас и йөрман мутшкөсысла да пөрласьөмысла, бөрдмөныд овлө. Видзөдлынысө, гашкө, эз шогмы, сэтшөма вөлі омөлтчөма да кормөма, кор Емдінөдыс воөдчис. Кодкө тай воча лоис вадорас лэччысь, чөвтліс сы вылө синсө да ылө и кежөдчис.

Корсис Бияр юр яндзимсө аслыс, да эз и лэпты сьөлөмыс пыравны Пама дорас. Рубөжсө, Памаыслысь сетөмсө, эськө абу босьтөмаөсь ошкуйыс, абу и гөгөрволөмаөсь, буракө, видзөдлынысө, мыйкө ошалө оз сьыліас, да куш сійөн өд, рубөжнас, он ошйысь, со пө эг на вошты, кор ветлін да эн и волы, кытчө колө, да асьтө на со кутшөмөс ваян. Но Чивөс ли кодөскө төдсаөс коліс аддзөдлыны, оз-ө пыжөн сэсса катөдны Овкөджас, да сы могысь и кыпөдчис Пама ордас.

И бур төдса шөрө и веськаліс, пырис тымөд пытшкас вөсьса векни өдзөсөдыс да. Пиыс Ниралөн, Пилимыс, вөлөмкө, видзысьөн нин ветлөдлө сэтөн, а гажтөм том мортыдлы нинөмтө вөчтөгыд да ышмө: качөдас шыпурт йывнас мусьыс ньөр бөдь тор да сөгыштас шөри.

Эз и казьяв сійө Биярөс, да аслыс Биярлы ковмис горөдны:

— Дугдыв!

— А кодї, кыгысь? Ме тэнö!— шйöвошліс да уськөдчис Пилимыс, видзчысь, мед юртö оз сöтышт.

— Ог висьтась,— шмонитіс на Бияр нимкодъысла.

— А Бияр айка али... кодї?

— Ме. Сёйысь кодъ, буракö, да он и тöд.

— Тöдї!— серöктіс Пилим.— А-а?!— усис шемöсö.

Кывйысь кывйö чеччалöмөн и висьталіс Бияр, кыгысь да мыйла татшöмыс локтö, сэссия каймöстіс Пилимыслы, оз-ö катöд сійöс аслас пыжөн Овкөджас.

— Мыйла ог?!— эз и падмыв том мортыд.

— Кор эштан.

— Энлы, юала да!

— Кодлысь?

— Камарлысь.

— А сыкөд нö лöсялан?

— Ог.

— А кызди нö?— чуймис Бияр.

— Ачыс Памаыс шуис... аддзис да... Эстысь, енкола дор-сыс. Меным пö эськö морт колö да.

— Кутшöм морт?

— Ме эг юав. Зэв тай маті сьölöмөн шуис-а.

— Матö и пуктö, сідзкö. Вира тэ дінö.

— А лөк нö?!

— Абу! Ен сыкөдөн.

— Овлы, ме регыд,— котöртіс Пилим, но мыйлакö Памаыслөн гожъян керка дорö.

Нимкодъыд босьтö Пилим вылас видзөдлöмысь. Тыр зонмö нин воöма сійö да том коз пу кодъ гөгөр лөсьыд да буретш, мамыслань и муныштö гөнтөм на чужөмнас, сөмын топыд-джыкөсь банъясыс-а, абу сэтшөма гожъялөмаөсь и еджыдысла. Но эз на, төдөмысь, мичаыс вöсна босьт сійöс ас дїнас Памаыс, эз на сідзи шу, меным пö эськö морт колö да. Мыйкö, тыдалö, сёйö на Памасö.

Тадзикөн и мөвпыштїс Бияр да пуксис виччысьлыны Пилимсö, сетчис кок йывсьыс уськөдан мудзыслы. Но лолыс и веськальштїс, сэссия некыт, чорзис на быгтьö вир-ййыс, котөрөн локтіс бөр Пилимыс да юөртїс:

— Ачыс корис! Мед пö волас!

— Кодї?— юалис Бияр, Камарсö и чайтіс да.

— Пама но! Эстөн, гожъян керка водзас. Вуждоз кыö.

— А сылы нö висьталін? Ме йылысь?

— Эг, Камарлы. Чукөстлі да. Пама дінас вөлі сулалө. А сійө пыр и Памаыслы. Тешкодя на.

— Мед тешкодясьө.

— А он ветлы?

— Ветла, тадзтө кө.

— Но, сэсса и катам!— ызыөдіс Пилим.

Бияр чеччөдіс асьсө да довгис Памаыслөн гождьян керка водзас. Камарыс сэтөн на вөлі лывкъялө, швичйөдлө-ворсө нодз пожом вужйөн. Серамсө пычкөмөн и коньөртис сійө Биярөс да ножмасис на мунтөдзыс. Аддзыліс эськө тайөс Памаыс, но нинөм эз шу, эз и дугөдчыв вуждозсө кыөмысь.

Таысь и дузmunис Бияр да сувтис.

— Мый нө сувтін, он матө лок?— ачыс шыасис Пама.

— Мыйкө ог висьтав.

— Мыйла он? Ветлөмыд да. Ылі туйө.

— Ветлі. Йөйөс корсьны.

— Йөйтө эськө мед да. Помтө на-а.

— А ме өд,— шамыртис Бияр кисө да матөджык и локтис Пама дінас,— косөда жө налысь водзөстө, ошкуйыдысь! Во-ласны на өд!

— Менө эн нөйт-а! Сыркъялан нин ставнас.

— Ог, ог на вошлась да.

— А артмө оз?— лыбөдліс Пама кыан вуждозсө.

— Артмө. Зэв на и топыда. Кужан да!

— Этшаника.

— А кодлы нө?

— Аслым.

— Мый вылө?

— Сідзи. Гажөй бырө да. Кипом уджсьыс.

— А джуджыдөс кыан да?

— Унджык төрас.

— Мый?

— Мый пуктан.

— А быгтө туйө босьтан да?— дольыштис Бияр.

— Кыгчө ковмас.

— Мед, инө. Катны тай меным колө да.

— Сэсса и катан. Пилимкөд. А мый шуан, босьті сійөс динө да?

— Сійө и бур! Матө кө пуктан, матө и олас тэныд. Пи пыдди.

— А колө жө өд кодкө... лов-виртө кутысьыд.

— Колө.

— Көд төдас, кутшөм на олөм помыд лоө,— ышловзис Пама.

— Мыйла кутшөм?

— Сыла. Шондывд тай йидж улө пуксьө, да лөкөс и виччысян аскисө. А олөмыд нө оз пуксьыв йидж улад?

— Пуксьылө.

— Эн и юась сэссия.

— Ог.

— А рубөжыд? Кодөс сетли?

— Со,— перйылис Бияр рубөжсө.— А мый нө, бөр босьтан?

— Мун, аддза на ме тэнө синмөн!— тоткыштіс Пама. Дерт, эз и лөгась таысь Бияр.

Черсө ни пуртсө, шыпуртсө ни пыжсө — нинөм эз кольны ошкуйыс, ставсө горшалісны, да ставсө выльысь и ковмис лөсьодны Биярлы, воис гортас да. Көрт изйыс и жугласыс на вөлі дорччан колаас, пыж пуыс ён пипуысь и, да сыысь нин бур. Но кык вевся уджөн и колис гожөмыс: он өд эндөд турунтө ни няньтө.

Мыйөн төдан ошкуйыслысь, дыр-ө бара оз волыны шышкавнысө. Но локтан гожөмөдзыс, төдана, оз нин волыны, да локтан гожөмөдзыс и эновтчис Бияр водзөссө налысь косөдөмысь. Син водзас сөмын и сувтөдывліс, бытгыө вөтөн, кызди катөны ошкуйыс Эжваөдыс, а найө, комиыс, дзэбсьөмаөсь кутшөмкө шор вомө да виччысьөны, сэссия уськөдчөны да весьөпөртөны ошкуйсө и кокниа и виалөны.

А вот Югдінас ветлөмысь Бияр эз нин вермыв асьсө көдзөдлыны. Ылавлас дырөкө кежлө, эштөдан уджөн и олас, и бара ёвкмунас сьөлөмыс, нөшта нин сы вөсна, мый мөдөдчыліс да эз и волы. Кулөма-ө-ловъя мамыс, сідз нин, колөкө, тшыгсө пыкө, да сөйөмөн на сөйөны коньөрөс, а сылы, пиыслы, и шог абу?

Мырдөн, а шуис вөзйысьлыны Памаыслысь, мед Кама-рыскөд тиөтш и лэдзас ветлынысө, а оз кө лэдз, и аснырөн мунны. Лызьөн да нортөн на, гашкө. Кыйдөс куыс тай, донаджыкыс, ньөти эз и коль гортас, да оз кө выльысь кый, нинөм и лоө босьтнысө водзасьөмыс вылө. Куш асьсө өд оз петкөдлы Югдінас. Да и уртөмаса пөчаныслы на колө пыртны мыйкө бурдөдөмсьыс да видзөмсьыс.

Пужъя кын вылас и кайис Бияр вөравнысö, да водзпöрсö, ляпкыд лымнас, понйыс на и öкталіс сылы анчасö и сьöдбöжсö, низьсö и тулансö. Туялас да увтас, а увтанатö, пусьыд ли вужля увсьыд, кыдзкö-мыйкö кыян нин, ньöвнад уськöдан ли казяд вöтлан. Лымйыс тай сэсса сапкыны и сапкыны кутіс да вöтлыны вöрсъыс, и то на Бияр сьöдбöжыс вылö уськöдчыліс, налькъяс вöчавліс. Абу эськö ён сьöдбöжыдлөн кучикыс, да лым еджыд гöныс вöсна донөн мунö.

Веж кöдзыда төв шöрыс эз на и сувт, энъ уркайыс позйын на пукаліс, петіс Бияр вöрсъыс. Вöвсö эз и доддявлы, мед этшаджык турун видзны, лызьөн и лэччыліс Емдінас, кöкөдöмөн и дузъялөмөн вöзйысис Памаыслыс Камарыскöд тшöтш ветлыны Югдінас, кöсйысис гусьөн и кутны сэн асьсö.

Код төдас, кутшöм сёрни вöліс та бöрын Памаыс да Камарыс костын, Биярлы тай лөгыс и шуис Камарыс-а Югдінас вөрзян асывнас:

— Кыскалö кодкö тэнö... понйöс!

— Вöралан пон на эськö да, абу горт олан... тэ моз!— вомгорөн и вочавидзис Бияр, эз лыбöд зыксö.

Туяс сійö Овкөджсьыс петіс лызьөн да бöрсяньыс нортөн. И нортсö на колис Емдінас, сюртчис Чив дінö, вöла-доддьөн и муніс Чивыс да. Аслас вöлөн Бияр эз лысьт муннысö, поліс сыыс, мый вöвсö воштас и ачыс на вермас шедны сэн, Югдінас.

Вежон босьтіс туйыс ньöжйöниктö рувгöмнад.

Лун югыдөн петісны Югдін кывтыдас, Сукөн юыслөн вомын бöжас. Сэсянь и кежис Бияр лызьнас да мышку саяс ыджыд нопнас. Сьöрт вомöныс, бадь пырыс, кайис козъя вөрвылас да вөрöдыс нин пьськөдчис сикт мышкас. Сэтөн сэсса и виччысис рөмдөмсö, кынмөдчис йöжгылясьтöдзыс.

Мамыс гортас вöлі, локтіс керка дорас да. Сартаса би югöрыс вералöман усис ывлаас гыбра öшиньöдыс. Но шы эз кыв керкасьыс, ни мамыс эз вуджрась. Пукаліс да кывзысис, буракö. Пыр тай и шыасис, мыйөн сöмын тотшвöчис Бияр öшиньтасас.

— Коді нö?

— Ме.

— А мун, дась ловъя, мун!

— Мыйла?

— Волісны нин тэла. Быдлаысь петкөдлі. Карта улысь и пывсянысь. Мун, сё ен бурён, мун!— ырөстіс мамыс.

— Муна эськө да... Кытчö на и мунан?!

— Көдзыд мамыдö эн-а! Сэтчö на воласны.

— А кытчö нö?

— Ме ог тöд! Катша ордö кө он!

— Коді меным Катша ордсаыд?

— Көсйыси ме налы.

— Мый?

— Керканымөс?

— Мый бурысь?

— Кула да, мед дзебасны и кодраласны. Ме ог тöд, видан он-а.

— Ог,— шуис Бияр.— Тані олысь кө вöлі-а.

— А мун нин, эн бөрдöд менö!

— Муна, да... шышкысь нин бытгыö полан меысь.

— Пола тэысь, йöйысь!— вуджöрыс мамыслөн сайöдліс би югöрсö.— Мед нö кутісны да юртö кералісны? Ог видз тэно сьолөмөн? Этша нин косöді синваөс да?!

— Мыйысь?

— Мед пондыласны пурны тöдтөм понтö моз.

— Коді?

— Роч бөжаыд! Ывлаад он лысьт петнытö.

— Маюрөс шуан?

— Кодөскö öд ог.

— Эналы, аддзыла на ме сійөс!

— Кыгысь?

— Ывласысь.

— Сэсся мед ачыд шедан?

— А кыв шуа и... водзö! Ог киён во!— вочааліс Бияр.

— Ланьт! Мун дась бурён. Мед некод оз аддзыв.

— Муна, да коля тэныд. Ректа нопйөс. Кыйдөс куяс.

Посводзад пукта.

— Он! Сюрö, да сэсся...

— Бөр öд ог ну.

— Катша ордас колян. Сэтысь коркө босьта.

— А асьтö нö ог и аддзыв синмөн? Ог кутлы ни?

— Пельыд öд эм. Кылан тай. Абу на, шу, кулöма.

— Сідз эськө да. Муна нö сэсся?

— Мун да сэсся некор эн волы. Эн пудьясь ме вöсна еджыд юрнад... Сійö и лоö меным тэянь бурыс!

— Чорыд жö тэнад, мамö, сьöлөм! Менам ногö на!

— А Енмыд абу жö век небыд!— кайтис мамыс.— Мун, да кокныыда и бөрда.

Пурыс¹ вылас эз и петав Бияр, кок туйсö эз и вöч сэтчö, картаяс сайöдыс и мунис лызынас да вöзйысис Катша ордас. Налөн пывсянын сэсса и узис, быттыö вөр керкаын, ломты-лисны лöдсалөмөн öти гор да. Шоныдысла тайкö эз кушöдз пöрччысьлы.

Югдинас воигөн на, торйöдчытöдзыс, сетис Бияр Чивлы сьöдбöж куяссö, кызя² тубыр, мед тшöтш вежас няньыс вылö, уна-ö-мый сетасны. И ланьтöдчис та вылö, ньöти эз и ыдьясь да, мый Чивыс чиркас сийс кызкö. А волис мамыс динö, ловья юрөн на сёрнитис ськөд, да Маюрсö аддзöдлан могыс и коли.

Дилькйöдлис эськö лёкыс Камарыс вылö, сыркнитöдлис пывсянас куйигөн, да эз на öд бөрьяысь аддзыв сийс, Емдинас бöрсö локтигөн и шедлö. Эз кö нö удты сийö воёмөн тшöтш, кутöй пö, колөкö, кодi тянлы колö, волисны нö эськö мамыс динö корсьны Биярöс? А öдийö тай и волөмаось. И воласны на дай! Кöдзыд мамыс динö и.

Югдандорыс на Катша гöтырыс корис Биярöс асьясö сейны, и сэки сийö шуис:

— Менам эськö сёрни вöли да... тэкöд.

— Кутшöм?— повззылис быдөн аныд.— Керка йывсьыд? Вежан мамыдысь кывсö?

— Ог. Мöд сёрни.

— А-а.

— Маюрс тай вöли колö аддзöдлыны да. Воча синмөн.

— Вичко дорсьыс кö он... Быд асыв тай сэтчö и тапсьöдö. Öнi кö мунан, дась пемыд на... Вөркодяс сэтөн сулыштгн дай.

— Ветла.

— Миянös эн висьтав-а, кыгөн узин.

— Ог. Да ог и воы, гашкö, сэсса. Туйö бөр.

— Но мед и пуксьö туйыд.

Мышкас нопья да пельпом вылас лызь гозья, пурысь вылас и петис Бияр да муныштис мыйтакö. Водзынас виж югьдөн ырнялысь бипурийис падмöдис сэсса сийс. Мыйён тöдан, кодi сэтөн, ас кокнад и верман вайны юртö, кытчö оз ков. Та вöсна вадорас и лэччис да сэтi, турун кыскалан туйöдыс, шавксьöдис

¹ Пурысь — улича.

² Кызя — кызь ку тубырас.

Енкола шорөдзис, исласян юж вывтис кайис вичко дорө-
дзис. Кытөн вөлі комыслөн енколаыс, сэтчө, сотисны да, и
лэптисны рочыс вичкосө.

Сайөдчис вөркодяс да кутис виччысьны. Сиктсьыс локтан
туй вывсьыс и кыйөдис, оз-ө кодкө тыдовтчы, дыгыдасис сы-
ысь, мый лөз югыдыс нин кутис сэзьмыны. И модарладор-
сьыс лым дзуртөмсө кыліс. Вөлөмкө, муноны нин вичкосыс
Маюрыс да пиыс, кыкнанныс муөдзис сьөд кышанаөсь.

Вомөнон налы и петис Бияр вөркодсьыс, но эз туй вылө-
дзис, мед оз повззыны да котөртны бөр вичкоас. Сөрниас
кыскөм могысь и чөвтис-шуис Маюрыслы:

— Төдін эн?

— Төдтөг ола... морт сөйысьтө!

— Колөма и сөйны да. Верөсыд пө тай вөлөма. Босьті да
лэдзи. А тэ вот ульөн сөян морттө.

— Ме кодөскө?

— А мый нө мамөыс вылө пиньтө кырлан?

— А-а... өти вираөсь ті ськөд!— вомалис Маюр.— Муыс
мед нбылыштас кыкнаннытө! Ог өд пов!

— Эн. Эг и вины лок тэнө. Питө ли. Öти вираыд понда
кө.

— А быдмылас на өд! Эз нин дыр коль!

— Мый сэсья?

— Аслыд мышкад пуктас пернатө.

— Зэв тай көсьян!— чикгыліс Бияр.

— А зэв и көсья!— өвгыштіс Маюр кинас да бергөдліс
юрсө пиыслань.— Видзөдлы, дона пи, видзөдлы, эн вунөд сөта-
на чужөмсө!

— Кутшөм... чужөм?!— эз гөгөрво Бияр.

— Сөтанаыс и эм тэ, Енмыслы лөк вөчысьыс!

— А матө оз ков... роч Енмыд! Пөвйө мавтасны, да сөс-
ся и Ен налы!

— А вичкоыс нө? Юрыд бергөдчө пытшкас мичаысла!

— Мөскуа на сулалө... паськыд вома... вичкоыд сайын!

— А мый и босьтін бурсө, водзсасин Мөскуаыдлы да?!

— Сйөс и босьті. Босьта на и.

— Мый?!

— Абу на дом йылын. Некод на оз чужйы. Шодла на,
кор пөт.

— Көиннад и ов!— нерыштіс Маюр.

— Поннад дорысь?!— кывберитіс Бияр.

— А мый нө вуркъялан?

— Шуөмыд тай, волас кө пө эськө...

— Мун сэтэысь!— чушмунліс Маюр да восьлаліс водзё.
Пиыс, ас кузяыс нин, вөтчис бөрсяныыс. Зэв на и сөстөм чу-
жөма вөлі пиыс, руд синма да.

Бияр лызясис да исковтис шорөдыс вадорас.

Уртөмаө, пөчань ордас, сувтис Бияр виччысьлыны нянла
ветлысьяссө да кык луна-вой на оліс сэтөн. Коймөд луннас
сөмын тыдовтчисны Эжва вылас вөла-доддясыс. Воча налы
и пегіс сэсса куръя вомөдыс да лөсьөдчис Чивлөн доддыс
бөрө. Лызьсө эз на и пөрччы, кокныыда на вешталіс да та-
лялөм небыд лым вывтис.

Сьөдбөж куяссө Биярлысь, кызя тубырсө, бура на и ина-
лөма Чивыс, матө сепыс ид вылө вежөма. Пыр и висьталіс
сийө та йылысь, сепыссө на додсьыс индіс и, со пө турун
улас. Но ачыс мыйлакө шуштөм чужөма вөлі, кынмысь кодь
куткыра пукаліс доддяс, ымөстывліс вөрзьялөмсьыс.

— Мый нө, висьмин?¹— юаліс Бияр.

— Эг.

— А ымзалан да?

— Нөйтисны.

— Коді? Кытөн?

— Югдінас. Ме ог төд, коді.

— Эн өмөй аддзыв?

— Эг. Бөрсянь уськөдчисны. Пемыднас нин. Ляскисны да
варкөдісны. Гашкө и, рочыс.

— Мыйла быгь рочыс?

— Совдорад виалөмысь. Төдмалісны да. Водзөс!

— Эн йөйтав! Ловйөн эськө и колисны тэнө. Сыысь кө
водзөстө!

— А мыйысь нө?

— Велөдөмаөсь на тэнө. Дорын узьлыны.

— Коді?

— Кодлы мый шуин... виньданасө.

— А, гашкө и... збыльысь!— лыбзьыліс Чив.

— Кодлы нө мый шуин?

— Камарлы. Джын кусө, гашкө, гусьөн кытчөкө иналіс
да. Аслыс вылө и чукөртө быгтьө мынсө¹. А Памаыдлы

¹ Мын — налог, пошлина.

висьталас, этша пö и сюрис няньыд. Тайöс и шуи синмас.
А сийö — ланьт пö, колöкö!

— И ланьтöдiс сэсся. Тайöс кö он вежöрт!

— Ас мортыд тадзи вöчан?!¹

— Аддзöмыд асöс!— вомалис Бияр.

— А, сiдзтöкö, эз и öтнас вöв. Морт куимöн.

— Со тай куимöнöсь. Ачыс доддьын, а кыкыс бөрвылас.

— А лысьтан нö шуны, нöйтiнныд пö? Чайтан, оз и сос-
сьыны?²— лавгыштiс Чив.

— Кыян кывсö!

— Кыдзикö?

— Кыдзкö!— помалис Бияр сёрнисö.

Бiршöдлiс эськö сьölöмыс öнi и йöрмöдлыны Камарсö да, рективны сылысь додъсö да видзöдлыны, мый сийö аслыс вайö, но кöсийысис Памаыслы зыктöг и ветлыны, да кутöдiс на Бияр асьсö косяс суйсьöмысь. И польштöмыс на сибавлiс, мый и аслыс тшöтш инмалас косясьöмнад. Эськö виалöмөн кö-а, код вылö лöгыд!

Сы вылö на и ланьтöдчис, мед кывсö кыйны Камарыслысь ли кодлыськö сы дiнсаыслысь да сэки нин и бергöдны водзöссö Чивсö нöйтöмысь. Некод нин оз шу, Енмыс ни, нинöмысь пö мортыс вылö воан, садьтö он тöд.

Но абу на тай кокни вөлöм кывтö кыйöмыд, шедтöмöс кыйöм кодъ, асьтö сöмын дэльöдан. Он öд кут да веськыда юав, а ылöса сёрнинад матöджык он и волы: кодi нö, абу кö йöй, висьталас гусьөн вöчöмтö, пыр тай и лэдзчысяс сэтшöм улö, бытгьö нинöм оз тöд, синмыс мыжтöмлөн и.

Луна туй нин коли Емдiнöдзыс, бөръяысь сувтiсны узы-
нысö, сэки вöлись сюрис Биярлы комыс¹ кыйны кывсö Кама-
рыс дiнсалысь, сан куысь пелячаыслысь². Дай, веськыд кузя
кö, эз на и кыйöма ло, а пычкöма сылысь кывсö.

Вöвьяссö юктавны да аслыныслы васö пузьбöдлыны юкмöс пер-
йисны Эжва вылас. Эз эськö öтнас, но медсясö Бияр и кералис
ёна нин кызöма йисö да сулалан на и кольччис юкмöс дiнас весь-
кöдны ловсö. А вöвьястö оз позь дзик пыртö юктавны пöсъявлöм
бöрад, мед лопдой оз босьт, да эз на и вайöд некод. Сан куысь
пелячаыс локтiс пöртгя да копыртчис гумовтны васö.

¹ Ком — стрöка.

² Пеляч — пеля шапка.

— Асьтө кө сюя? Йи улас?!— шошаодыс и кутіс сійөс
Бияр да личкыліс ваодзыс чужөмөн.

— М-мы-мыйысь?

— Ачыд төдан.

— Ог.

— Аддзылі өд.

— Мый?

— Кыдзи таялін Чивсө!

— Ме?!

— А кодлөн нө сан кусьыс пелячыс? Лёзь гөнаыс? Чай-
тан, синтөм вөлі? Медся на ёна жугөдлін мортсө! Чеч-
чыштлөмөн! Лопар гагйөс ме тәнө!

— Эн лөсьөдлы! Ме кыкысь и чужйи.

— А шедіс өд кывйыд, соссян вөлі-а!

— Мед,— ичөт моз шыён бөрддзис верстьөйд.

— На, инө, водзөстө!— чужйис Бияр сылы кынөм улас
да юкмөс дінас и колис куснясьнысө.

Кымынкө воськов и вөчис вадорланьыс, муртса удитіс
видзөдлыны вылі юрөн, а кыкөн сылы воча нин локтөны —
Камар да мөдыс, сы дінсаыс. Лымсө и вундалө Камарыс шы-
пурт йывнас, а мөдыс додь потшкөн кучкыны и лөсьөдчөма.
Отнад кыкыдлы паныд да туяд кыскалан чернад ёна он водз-
сась. Та вөсна Бияр и лөсьөдчис пышйыны, уськөдчасны кө.

— Мый нө мортсө вөчин?— назгыштіс Камар.

— Мый ті Чивсө.

— Тэ төдан?!

— Төда.

— Сідзкө и вунөдан!

Шедіс мед Бияр, эськө виисны и йи улас на, гашкө, сю-
йисны, да вевйөдчис пышйынысө и кокньыда на сэсся и пышь-
яліс наысь Эжва вылас, сибөдліс матөджык дзерөдөм могысь
да котөрөн сорөн бусйыліс джуджыд лымсө. Вөралысь мор-
тыдлөн, сылөн кык мында на вөлі кок эбөсыс налөн дорысь,
регыд и атшвайөдіс асьнысө.

Видзөдө да, кольччалө нин Камарыс, вөв моз довкйөдлө
юрнас пошкөмысла; мөдыс нин и собалө бөрсяньыс да кыс-
калө додь потшсө, лэдзан кө матөджык да вуззысыан ас вы-
лас, сэтчө и шедө дживкөднытө. Мудзөмыс улө и сетчис Бияр
да лэдзис матөджык, а сэсся бергөдчис да уськөдчис чернас
ырьштчөмөн, и мөдыс лымъяс и гатшасис повзбөмысла. Тайкө
эз керышт сійөс Бияр, но өтчыд дай мөдысь варкнитіс морө-

сас да босьтіс додь потшсö. Аддзвйтöг эз ов тайöс Камарыс, пышйыны и кутіс люті-леті да горзыны:

— Виас! Мездöй!

Но дыр эз нин горзы, вötöдіс сійöс Бияр да косьыштіс додь потшнас. А юрас-ö-мышкас сылы ёнджыка инмис, код төдас. Сунгысис тай лымгъяс да ланьтіс-а.

Чивлön доддыс дінö и локтіс сэсса Бияр. Вевтгысьöма нин туруннас, куйліс Чивыс.

— Узян нин?

— Ог на. Кывлі и.

— Чеччöдла ме тэнö.

— Мыйлакö?

— Босьта. Лызьöс да нопйöс. Шыпуртöс да.

— А мунап нö?

— Муна.

— Войнас?

— Войнас и гажабыс.

— А няньыд?

— Вола коркö.

Некытчö эз и сувтлы, весиг Емдінас эз кежавлы, муніс и муніс Бияр да мöдöд войнас воис Овкöджас. Игöдчис посводз öдзöсас и усис эбöссьыс. Сойбордйöдыс нин Унабыс пыртöдіс гортас. И ва юис да кöтшасас и водіс. Унзільвывсьыс нин кывліс, кызди Унабыс шебраліс да юрувт пуктіс.

Чайтіс, коркö регыд и ыстылас кодöскö Памабыс, велöдас воыны сы дінö да бурөн оз и лэдз, гашкö, а тöлысьыс нин вежсис, выль бара чужис, а шы ни гу на Емдінсьыс. Ачыс и шуис лэччывны няньысла моз, доддявлыны вöвсö да. И вöла-доддйөн сэки воис Чив, ид тыра сепыссö и нортсö вайис. Ыв-лаас на сэсса и лоис сыкөд сёрниыс.

— Бурдін нин?— юаліс Бияр.

— Кылö на. Мед чеглö ордлыыд,— доровтчыліс Чив.

— А мый нö. Пама ыстіс?

— Эз. Ачым дöзми. Гортын пукалёмсьыс.

— А төдö Памаыд татчö локтöмтö?

— Төдö. Гусьөн нö ветла?

— А мый нö шуис?

— Нинöм эз. Катöд пö сылы няньсö, мед сёйö.

— Аслад серамыд петіс да?

— А оз нö пет та вылö?

— А Камарсö и кыксö на мыйкөкери да... Сыысь нö оз скöрав?— чуймис Бияр.

— Оз. Абу кö долыд на. Ас кежас.

— А ловъяöсь... куимыс?

— Пон сяс... найöс!— вочавидзис Чив.— Чотö эськö Камарыс да. Шуйга кокнас!

— Кокас нö ме кучки сылы?

— Ме ог тöд, кытчö. Чотö тай-а.

— Сюрса лысяньыс, гашкö,— шуис Бияр.

— А сийöс и корсис!— шуис Чив.

Керкаас, пызан сайын нин пукалгас, Бияр дольыштгис, мый гожöмсö нин и виччысьö öнi.

— А мый нö гожöмнас?— юалис Чив.

— Аддзöдлыны ошкуйсö, воласны кö! Водзöстөг нö колян?

— Он! Ме ветла и.

— Но!— ошкис Бияр.— Да эськö юөр кö сетасны...

— Кодi?

— Эжва кывтыдсаыс. Локтисны пö. Волöй.

— Позьö öд тшöктыны. Мед Пама и тшöктö. Шуа сылы?

— Шу! Сийö кö миян вылö арталö, мед и ми сы вылö.

— Абу нö сiдзи? Эз нö шу, катöд пö няньсö, мед сейö?— серöктiс Чив.

И Биярлөн тшöтш петiс серамыс.

Но сувтысь гожöмнас эз волены ошкуйыс. Дзуглясьнысö и эштылис Бияр та вöсна. Вöчö мыйкö, ытшкö ли чöвтö видз вылас, а юрас найöс и кутö: талун-аски, гашкö, юөртасны, петкөдчисны пö. И арöдзыс сясся, корйыс вижөдтöдз, эз вермы öвсьынысö.

Мöд гожöмнас сöмын усис долыдыс выльысь аддзöдлыны ошкуйсö, юрнаныс бергöдны налысь водзöссö.

Пилим вайис Овкөджас юөрсö, да сыкөд öтлаын и кывтiс Бияр аслас пыжөн. А Емдiнсьыс вит пыжөн нин петiсны да мортыс сизимөн. Бияр да Чив öтнанысөн пыжаныс, а мукöдыс — кыкөнöсь.

Чивöс полöмыс на босьтлiс, мый этшаөнöсь. Озынас на шуис Биярлы гусьөн:

— А найö кö дасөнöсь?

— Мед.

— Унджыкөнöсь ли?

— Мед.

- А кыдзи нө тэ көсьян?
- Сідзи. Найо тай кужоны.
- Мый?
- Сюсявнысө. А ми нө өгө?!

Та выло и бурасис Чивыс да сэсса эз нин дөзмөдлы Би-
ярөс падъялөмнас, ас кежас, гашкө, и шогалис-а ошкуйыскөд
паныдасьөмсө.

А Уртөмасьыс на кывтыдын паныдасисны накөд. Мукөд-
сьыс водзын нин и кылөдчис Бияр, мед өтнассө и чайтасны,
йөзасяс кө ошкуйыслы, да синмас и усисны куим ыджыд пы-
жыс Эжваыслөн лыаадорсьыс, мыйөн петіс вомын юрас.
Ыштөкө повзис садьтөгыс, зэв өдийө и сибөдчис вадорас да
чечыштіс пыжсьыс, котөрөн кайис вөрас. Вөрөдыс нин сэсса
весьтасалис чукыльсө да удитіс сувтөдны мукөд пыжасө, эськө
и найө йөзасисны ошкуйыслы.

- Мый нө, Бияр айка? — медводз юалис Пилим.
- Танөсь. Абу и ылынөсь. Чукыль саяс.
- А мый нө... татчө сувтім?!
- Сійөн. Юрнад энлы на шыблась.
- А абу кө найө? — юалис Чив.
- Коді абу найө? — скөрмис Бияр.
- Ошкуйыс, кодьяслы тэ веськавлін? Мөдьяс кө?
- А некод найөс оз кыскав! Со эстөн буждөм козыйыс.
Лөсьөдчөй сы сайө. А ме вайөда!
- Кыдзи вайөдан? — эз эскы Чив.
- Вөтчөны мед, скөрмөда да!

Аслас пыжыс діно бөр и муніс Бияр. Петіс на вөрсьыс да
видзөдліс вомын кывтыдыс, а кыкөн ошкуйыс локтөны нин
вадорөдыс. Аддзисны сійөс да котөртны и кутісны, ыршась-
ны шыпуртнаныс да горзыны, ыштөкө налысь пыжсө и көсийө
сийө пышійөдны. Он өд сэн жуйяв, уськөдчис Бияр да сувтіс
пыжас, йөткыштчис пельыснас куимысь, и ньөвийөн сөмын су-
дзан, сы ылнаын лои вадорсьыс. Веськыда синмөн сэсса и пук-
сис кык ошкуйыслы да пондіс кылөдчыны. Чужөм сертиныс
некоднаннысө эз төд. Сэки, Уртөма дорас, чуртчөс ошкуйыс
да томуловыс и йиджисны өнджыка синмас.

А найө и вөлөмаөсь, кодьяс шөрө веськавліс сэки. Кы-
лөдчис Бияр сы весьтөдз, кытөн сулалісны куим пыжыс, да
сибөдчис матөдджык, пыксис пельыснас. И пыр и синмаліс чуса-
лысь бикур дорсьыс чуртчөс ошкуйсө да томуловсө. И том-
ловыс өдийө төдіс сійөс, чашкөдліс вомсө да тувкис чуртчө-

сыслы, шуис мыйкө сылы. Сэки чуртчөсыс да нөшта куимөн пырисны өти пыжө да петисны Биярлы паныд: кыкөн сынөны, коймөд бөжалө, а ачыс чуртчөсыс пыж нырланяс и сув-тома да морөс весьтас кутө шыпуртсө.

Ылөджык лыаадорсьыс, ва шөрас, муткыра визув вылас, коліс нудны ас бөрсяыс ошкуйсө, да наьис пышйом улө и куралис Бияр пельиснас, нөйкөдчыліс быдөн вывтырнас, а эськө эз тырөн босьтав пельис лопъяснас. Аддзөны, вөтөдөны нин сйёс, да эз и дзевны ошкуйыс нимкодънысө, шыалисны серам сорөн.

Воча нырөн бергөдіс Бияр пыжсө, уськөдіс кок улас пельиссө да босьтис лэчтөм көрт пома зібсө. Ылөдліс чуртчөс ошкуйсө, быгтьө сылы и көсйө сутшкыны, да сатшкис налөн пыжө ва веркөссьыс улөджык. Сэсья песовтөмөн на и шедөдіс зібсө.

Бөр лыаадорланьыс и веськөдчисны ошкуйыс, медтыкө сөмын удитны ляпкыдінодзыс. Но ваьис, тыдалө, ыльөбөн нин пырис, да пыжыс вөйны и вөйны кутіс, и нельнаньыс чеччыштисны ваас, кутісны ызакаывны да горзыны. Мед оз мездыны найөс вадорас қолөмаьис, Бияр быгтшкаліс нельнансө көрт пома зібнас.

Өти морт да нөшта и син водзаньыс бырөдіс на пыьис сы мындаөс, да косявлан лөкыс и босьтис кольөм ошкуйсө, кыкнан пыжнас и петисны вөтөдны Биярөс, куим мортөн пыжас. Но өти, томуловыс, коли на вадорас, көлуй дзу дінас.

Вермө нисьдө оз пышйынысө, муртса кө, и вөтөдасны, өдйөпырысь да тельскөмөн сынис Бияр, ылөдліс тадзикөн вөтөдысьяссө да катөдіс ас бөрсяыс чукыль сайөдзыс, буждөм коз весьтөдзыс. Сытөг нин сэсья помалисны квайтнан ошкуйсө: кодөс ньөвйөн да кодөс шыпуртөн.

Но томуловыс коліс на, да мед эськө оз пышйы кытчөкө, вөч корсян уджсө, Бияр тшөктіс Пилимлы вөрөдыс и лэччыны да матыстчыны сы діно, а сэсья босьтны ловсө дай. И муніс Пилимыс, да мыйкө дыра виччысисны на, а кор вөрзисны да петисны чукыль уліас, вомын юрас, кыкнаннысө нин аддзисны лыаадорсьыс, Пилимсө и томулов ошкуйсө. Сөмын пидзөсчаньсөмөн томуловыс сулаліс-а.

— Мый нө эн ви? — воөмөн тшөтш и юаліс Бияр Пилимыслысь.

— А эз водзсась да! — сьөлөмсяньыс и вочавидзис том мортыд.

Та бөрын аслас Биярлөн кыис эз жө и лыб томуловыс ылө. Видзөдліс көлуй чукөр вылас да мөвпыштис, абу-ө сэтөн кор-

көя кодь өшиньтасыс. Но мыйда он лукйы, абуто он аддзы. Ляпкыдик ыргөн рач и босьтис аслыс выло. Мукөдторсө — мукөдыс.

— А тайос нө кытчө? — юалис Чив, довкнитис юрнас то-мулов ошкуйыс выло да.

— А, гашкө, ме аслым босьта, — шуис Бияр.

— Мый выло?

— Вар выло. Мед оло.

— Тэнад гаж! — гөрөктис Чив.

Кисө ни коксө, некыт эз и көртав Бияр томулов ошкуйыс-лысь, а пиличсө пышйомсьыс пуктис — пурт йывнас вождөдс яжлысь моз шуйга пельсө да ваймом биपुरсьыс шоньд на да кос поймнас сувтөдс вирсө, видзис өдомсьыс да пежасьом-сьыс. И төбис на юргөгөрыс косявлөм рузумөн.

Пыкис дойсө да бөрддзывнысө эз и лысьт ошкуйыс, сөмын ымзалис киргөмөн.

Тадзи Биярлы и веськалис Öльөкыс. Велальштис коминас да висьталис, мый ыджыд мыгөра, чуртчөс ошкуйыс сылы чож вөлі, мамыслөн вок. И нимсө асьыс висьталис, Öльөксан пө, водзыс эссся и колис.

6

Коркө понйыс низьос вөлі туялөма да козийө лэптөдөма. И ачыс сы бөрся чечыштөма вылөкодь да йөрмөма, оз сяммы лэччынысө, ошалө вож вылас. Сөмын на вөлі зильгө-увтө и авзыны кутис, асьсө ыштгөкө вионы. Мездыны и уськөдчис Бияр, а вөлөмакө со мый. Ковмис кавшасьлыны да моздорас кутөмөн и лэччөдны понсө. И низьыслөн исыс нин эз вөв, пуалөма кодарөкө. Но видан нө таысь понтө, он пыдди пукты сийөс? Эз кө нө биа сьөлөма вөв, чечыштис нө эськө низьыс бөрся пуас?

И ачыс Бияр, шуны кө, юрсө воштывлө, сьөлөмыслысь сөмын и кывзисьлө. Мед и дзескыда няньсьыс, лолыслы дзес-кыда и, а гортсьыс вөрзъывтөг кө нин и олис, корсис нө эськө аслыс быравлытөм, нинөмөн бергөдтөм шогсө? Дерт, эз. Да өд, мөдарө кө шуны, потө жө сьөлөмыд лун-войтө сөйөмысь.

Писө нин, Вожайсө, гөтралис, Адаслысь нывсө, Шонасө, и вайисны, и кага нин налөн, гозъялөн, чужис, а кыкис и

кыскис на Бияр коркөя көсйылөмсө — Сыктыв вожас, Во-
лысыас, ветлөмсө. Мыйон тодан, кутшөма ветлан, а верстьо-
ланьыд полысыджык, буракө, и лоан. Ичөт дырийыд тай не-
кысянь он пов лызнад исковтнытө, а верстьонад быд кыр
йылын падъялан, усян он.

Но содіс сөйысысыс, Өльөксө на тшөтш коліс вердны, роктө
и няньтортө сылы петкөдны, дай уджаліс сійө вердан доныс,
а уна-ө нө воліс ас няньыс? Кольөдан көйдыс вылад да төв
джынсө и вуджан, он кө нюжөд зэв этшаникаөн да чериа-яя
вөлөганад и бергөдчы.

Медтыкө Болысыас и ветлыны, пуксяс төлыс да, нинөм вылө
нин сәсся эз воссьыв гажыс Биярлөн, и пув вотан арнас на
муніс пыжнас Сэрөгө сов сукуысла: эз на өд вунөд, мый
совсыс и дзескыда олөны Волысыас да майбыр на вежасны
няньыд вылө.

А сэтчө, Сэрөгас, сов сукуысла могөн жө Емва катыдсыс
айка вөлі локтөма, Сер нима. И өти керкаө и лөсылісны сыкөд
узынысө, да сола чимийон сійө чөсмөдліс Биярөс. Эз и уна вунды
тшыгтшсыс, табья нянь кыза, а пөтмөныс лои Биярлы сыла-
ысла. И сэтшөм ыджыд вөлі тшыгтшыс, шөрөкөдбөм туисө
муртса төран, мый сыв кузяөн и чайтсис дзоньнас чимиыс.

— Сыв кузя кө вөлөма-а чериыд?! — шуис Бияр.

— Вөлі, — нбөти ошйысытөг и дольыштис Сер. — Быттьө
кер пом и ләпти тай.

— Кыбөмөн?

— Кыбөмөн. Из вывсыань.

— Ляпкыдінсыс?

— Эг. Ва шөрсыс. Джуджыдінсыс.

— А из вывсыань шуан да?

— Но! Ва шөрас и изйыс. Гид ыджда мукодыс. Сувтан
сэтшөм из вылас и кыйөдан, кор кутас катны.

— Луннас?

— Он, войнас.

— Биасьөмөн?

— Он. Синмыд өд эм, төлысь югыдыс да. Аддзан кузьмөс
сьөд вуджөрсө. Тэлань и локтө кө. Коркө дасөс бытшки!

— Лөсьөдлы, — серөктис Бияр.

— Катлам! — дөзмис Сер.

— Кытчө?

— Ыджыд кось вылас. Дась катө на чимиыс. Сэтчө и
ланьтін?!

— Эг.

— А мый нө?

— Катлам!— ыштіс Бияр. Ош кыйны кө нуөдіс сійөс Се-
рыс, эз эськө ышты. Оштө сылөн кыйлөма нин, абу нин өтиөс
дай, и он нин сійөс чуймөд. А чимиыд сылы эз на шедлы,
чеччалөмсө чимиыслысь и аддзыліс коркө Эжвасыс, Ембаас
пыранінсыс.

А ёна вылө на, вөлөм, колө катны Ыджыд косьөдыс, тшу-
пөдысь тшупөдө моз кыпөдчыны кытчөкө мусюрас. Пайгөс
пыжөн кө, некытчө он и волы, а векни пыжнад лөсьөдчан ви-
зув нырас да зібнад пыксьөмөн и йөткысян вывланыс.

Сеська сиктө, Серыс ордө, пывсыны да шойччыны сөмын
и сувтлісны, лун воштінсны, а сідзсө на кымын лун босьтіс ту-
йыс, вөрыс удитіс вежсьыны, вижөн да гөрдөн сорласис пе-
мыдвежыс. Ыштөкө ачыс ывлаыс и висьталіс, мый корйыс
усьтөдз сэсся мича на сулалас, төлыся воя.

Эз на воны Ыджыд косьыс дінөдз, некөн на эз тыдав ва-
ыслөн борганөн усьөмыс, а кывны нин күтіс сыркакылан буз-
гөмыс. Но эз на быгылясь визулыс, шылыыда на муткыртіс
изъя ворга кодь вөринөдыс, да вылөдз на и катісны, косьыс
горулөдз. Рыгтя шондйыс косьыс вомөн и кучкөма вөлі ва бус-
сыс дзырыдөн ворсысь өшкамөшкасө. Сэтшөм мича видзөд-
нытө, мойд оз ков. Да чери кыйны өд локтөма.

Кось горулас и ректысисны да пусисны, водлісны куйлы-
ны. И рөмдан веркыднас нин кайисны вөрөдыс кось юрас.
Гырысьбөсь и вөліны сэтөн изьясыс, зымвидзисны ва шөрас,
быттө Енмыс-ө-коді помны көсьылөма Емвасө да дугдөма.
И эз нин сэтшөм быгльбөс вылысабөсь вөвны изьясыс, мукө-
дыс зэв на и тшөтшамбөсь, сулавнытө кө.

Ён пур, вит кыз керйысь, таво на вөчөмыс, сулаліс вадор-
рас өтуритөмөн, дженьыд гез йылысь. Дзоньнас гезсө, кузясө,
пур вылас и гартлөма вөлі. Водз на пө кыйөдчынысө петны,
шунис Серыс да сідзи на петкөдліс Биярлы, кызди, вөлөмкө,
сюсялө. Мынтөдіс сійө пурсө дженьыд гез йывсыс да йөткысис
зібйөн ва шөрланьыс, кылөдчис изьяс дінөдыс да күтіс гез-
нас водзө нуөмсыс, а сэсся бөр кыскысис дай.

Биасисны вой кежлас гажа вылө да пестысисны, виччы-
сисны пемдылөм енэжыслысь бөр лөзөдөмсө да төлысьыслысь
мыччысьөмсө, и петісны кыйсьынысө. Кык орчча из вылө и
сувтінсны. Водзпөрсө Бияр нинөм на эз аддзы васьыс, куйөд

ва кодъ виж гудыр и муніс син увтіыс. Велаліс вочасөн синмыс, да сэки нин тыдовтчис рудён вералан ва пыдөсыс.

И дырөкө мысти казяліс, кыдзи сылань и локны кутіс кузьмөс сьөд вуджөр, сувтліс из улиас да бөр сетчис восьса ва нырыс, кыпөдчис азьласнас судзана выйөдз и лыйыштіс вывланьыс. Бытшкис эськө Бияр, да ва пыдөсас и гольсмуналіс азьласыс да муртса на эз мын кисьыс, сэтшөма нетшыштіс сійөс визувыс.

Мөд чимийөс на лэдзис тадзи Бияр. А коймөдыс, медся на ыджыдыс, быттё ачыс и шедөдчис. Эз и сувтлы сійө из улиас мудсө веськөдны, нбөжмөдлытөг и катіс из дортіыс, да бөжладорнас, но веськаліс азьлас улас. И зэвкнитіс на Бияр азьлассө да инмыліс ва пыдөсөдзыс, а кутіс лэптыны чимисө, да пескыльтчис сійө визув бөрыс ыджыд вынысь и асьсө Биярөс доровтөдіс из вывсьыс.

Шердийс да изйысь изйө и ляскөдіс сійөс визулыс, нөбөдіс кось горулыс. Шойөн нин эськө и воис сэтчө, юрнас кө кытчөкө сетөбтөдіс. Но видзис на, тыдалө, Енмыс, да ачыс на бауөн и петіс вадорас, пыжъяс дінас. И пуксьыны на вермис. Некыт на эз доймы сэтшөма, мед горзыны. Йирмөгыс сөмын и босьтны кутіс. И турдіс эськө ва паськөмнад да битөгыд, эз кө өдйө и лок Серыс да биась, а сэсся пөрчөд сійөс да тубрав гын эшкынөн.

Аскинас Бияр ачыс нин, сувтөмөн, бөр пасьтасис, Серыс сөмын мыгчаліс сылы косьтөм паськөмсө. И юаліс шмонитөмөн:

— Кодарө сэсся?!

— Гортө.

— А вой-мөд кө олам на? Кыя ме!

— Ов. Ог нин тэнө дөзмөд.

— А топөдас кө, битө он вермы перйыны?

— Оз. Некыт абу чегөма. Кывта.

— А сувтлы Сеськаас миянө. Вая на ме тэныд чимитө.

Гортад вылө.

— Ог. Оз ков.

— Мыйла оз?

— Сідз нин азьластө вошті.

— Сюрө на.

— Кыгысь?

— Васьыс. Со тай, буракө.

Тыдаваліс и эм вөрйк кывтыдсьыс азьласыслөн вороп йылыс, лыбавліс да вөйліс визув бөрыс, сибдөмсө и петкөдіс.

Гашкө, и чимиыс на сэтөн, видзөдан да чайтан, тасасис кутшөмкө изйө да кутө азьлассө, а сідзи и вөлөма. Ветліс Серыс пыжнас да чиминас и лэптис азьлассө, а сэссия, локтис да, Биярлы пыжас и пуктис чимисө, кер пө да солав, эн тшыкөд бур черисө.

— Аслым нө босьта? — родіс Бияр.

— Ачылд кыйин да.

— Татшөм кыйөмыд! Кодкө төдлас кө...

— Он и больгы.

— А тэ?

— Ме ог быгзы, — такөдіс Сер.

Пуксылісны на бипур дорас нурьясыштны, и кывтис Бияр. Шуньгис пыжыс визув ньылыаыс, чукыль бөрся чукыль ордйөдіс Емваыслыс, да эз и мөдзась сйө, мыйла и катліс. Эз на тай пасьмун, бытшкис на өти чимиос и, нинөмысь на и певьявны асьсө.

Суис войыс, да узыны и сувтліс Сеськаас. А аскинас, Визө нин воигөн, паныдасис Вожайыскөд. Воштөмаөсь нин сйөс гор-тас, да корсьны и петөма Вожайыс.

Йи сувтөм бөрас регыд и лымьяліс кыза, да пуксис туйыс Вольсыас ветлынысө.

Асьныс ая-пия да Адас коймөдыс, куимөн эськө и ветлісны бура, эз кө йограсыс ков видзчысьны. А найө на Сык-тыв вомсө кутисны, да на вөсна и ковмис Биярлы нуөдны тшөтш Чивөс да нөшта куимөс емдінсасө. Вит вөла-доддя да мортыс сизимөнөсь и петисны Овкөджсьыс.

Сідзи и лоис, кызди Ветйөас ветлігөн. Пырисны Сыктив вомас, кайлісны нөрыс йылас, а некодөс ловьяөс эз нин суны: коркө луннас на, водзвыв төдөмөн, и усйысьөмаөсь йөграыс. Но, буракө, абу тырмөма көра дадювыс ли сэтшөма нин тэр-масьөмаөсь, өти чом, усялөм гөна нин кор куяссьыс, разьтөг и кольөмаөсь, пытшкас бипурсьыс пөимыс киняліс на вөрзөдлөмсьыс.

Ывлаыс пемдыны нин доровтис, да узыны и шуисны чомьяс, аскинас водзөсө вөрзьыны. И биасисны да пестысисны войбыд кежлө да шоныда на и коллялісны войсө. Шкоргыны на эштылісны, кодлы эз ков петавлыны вөвьяс дінас, видзөдлыны, гөгөр-ө лючки. Понйыс эськө Адаслөн ывлаас көнкө и вөлі, да сөмын сы вылө Бияр эз на артав, чорыда шуис:

— Морт синмыс колө жө! Пельыс да!

Лючки-бура и коли войыс, да таысь, буракö, и босьтис Ададсö ызöбыс, а Бияр кывзысис сылысь кынмалöм юрнас.

— Гашкö, кольччылам да... кыкөн ли куимөн?!— лыбзьёмөн чуйдис Ададсыс.

— Мыйла?

— Видзны йöграсьыс. Мед миян быгтьö и лоö таті.

— Быгтьöйд мыйкö и сетас.

— А сэсся и олёмөн локтан. Керка лэптан. Му вöчан.

— Öдйö тай кöсьян.

— А он и кыскы. Сё во! Гажтём нö со?

— Абу,— кывйö сетчис Бияр.

— Тöвнас вежыд петö, а гожёмнас?! Черийд и туруныд матын. Няньыдлы бур и, вылын да.

— Сідз эськö да. Видзöдасны, чайтан, йöграйд, сетасны овнытö?

— А он и öтнад овмөдчы, унаөн. Вожайыд на, гашкö. Сэсся матö он и лэдзлы йöграсö!

— Ставсö нин вöталöмыд!

— А оз нö юрад лок?— вочааліс Адад.— Талун и ветла, лызся да!

— Кытчö?

— Вöрас. Кытшовта вöрсö.

— Мыйла?

— Видзöдла, кытысь керка керйыс сюрö.

— Видзöдлы,— нурбыльтис Бияр дöзмöмысла.

— А Вольсыад öнi сідзи нин воан. Некодусь повтöг. Нинöмла и мунны унанас.

— Сідзтö кö... дерт, нинöмла.

— Но!— кыйис кывсö Адад.— Тані и виччысьлам, кодi кольччылас. Öтнадлы гажтём-а.

Вожайсö и кольöдис сэсся Бияр гажыыс вылö Ададсыслы. Кодöскö емдінсасö на тшöтш кöсьыліс, да оз пö ков, шуисны кыкнанныс. Оз кö, и оз. Но курзьöдліс на Биярöс сьёлöмыс пуксьыгöмысь, да чежмөдлөмөн öлөдiс найöс, мед оз ыкшасыны, мед сюся олöны, бурджык луннас узьöны, а оз войнас.

Тыр лунсö квайтöс да сизимöдыслысь на джынсö босьтис Вольсыяс ветлöмыс. Но, ен ськөдөн, бура на и ветлісны, кык сепысөн кымын мортыс вылö, Ададсö да Вожайсö тшöтш арталөмөн, öкмис сов сук вылас вежлалөм няньыс. Дöлыдöсь и петісны Сыктыв вомсьыс катыдас, нöрысөн кыпалан вадор улас, матысмисны шорөн ордөминас, кысянь катөдiс вывланьö туйыс.

Бияр чайтис, мый понийс Адасыслөн, кылас да иснас-өпельнас, увтны и кутас нөрыс йывсянныс, паныд на, гашкө, усъкөдчас, чеччавны и кутас нимкодъысла, а шы ни гу. И тшыныс эз рувгы сэтгыс, кытөн коліс лоны чомйыслаы, весигтө эз руав шоныдыс пуус весьтас, ньөти битөг и олісны бытгьө кык кольччылысьыс. Йөграыс абу волөмаось ни, видзөдан да, некыт абу вөрзъылөма вөла туйыс, лымнас сөмын и тырыштөма.

Лигышмунліс эськө Бияр, лолыс на тырліс шөйөвошөмысла, но вывті лёксө эз на виччыс да асьсө тэрмөдлытөг и довгыс нөрысас.

— Ме кайла жө?— горөдіс бөрвывсянныс Чив.

— Абу кө дыш,— эз и бергөдчыв, горөдіс сылы.

Кытөн вөлі, сэтөн и сулаліс йөгра чомйыс, да сылань и веськөдчис Бияр. Локтіс матөджык да пыр и казяліс лун кык нин таявлытөм вөльдсө да кыза гьөртөм доръяса лапөдсө чомйыслысь.

Иизьөма на вөлі лапөдыс, оз шед ни шыгыртчы, да ковмис чер тышнас кучкыштавны Биярлы, сідзикөн восьтыны лапөдсө да сюйсьыны чомьяс. А сэтөн кын шөйөн нин Вожайыс куйліс, морөсас, и сьыліас, и синмас на сутшкалөмаось пуртнас.

Кольмис бытгьө сэтчө, пөрөдны и кутіс кок йывсьыс, да петіс Бияр чомсьыс, пуксис лым вылас.

— Мый нө?— юаліс Чив, сувтіс дінас да.

— Эн юась,— нюрөстіс сылы.

Ачыс Чивыс и пыраліс сэсся чомьяс, кыскөмөн петкөдіс Вожайыслысь шөйсө.

— Татчө өд он коль,— шуис.

— Он,— намыштіс Бияр.

— А тадзтө и Адасыд на кытөнкө... Понийс и.

— Эстөн кө-а, вөр дорас.

— Мыйла сэтөн?

— Кыгшовтөмаось, буракө, йөграыс. Вөрсянныс петалөмаось. Видзөдлы, ветлы да. Ме вермөдча да чечча жө.

Муртса и ветліс Чивыс. Аддзөма нин, локтіс:

— Сэнөсь, вөр дорас. Понийс и ачыс. Лыйлөмаось ньөвъяснас. Матісянь.

— Ме тай шуи. Увтис, көнкө, понийс, да видзөдлыны и локтіс, кодос увтө. А сійө и коліс йөграыслаы. Кык йөйыд тай эмось!— бөрддзис Бияр.

— А ми өд вермам жө... котырнас и бырөдны. Ылөдз эз на тась вешйыны.

— Эз. Эжва катыдыс кытчөкө и сувтисны.

— А мөдысь өд он воы!— ыззьөдис Чив.

— Он.

— А дыр-ө вөвнад, ректысьлам да?!

— Но,— чеччис Бияр.

Сыктив вылас и ректысисны зэв өдйө да моздор турунөн сөмын и босьтисны, ковмас кө вөвъяссө сёдавлыны. Витнан вөла-додьнас, морт өтиөн быдын, вөрзисны веськыдвылас, лажмыд вадора пожөма вөрас. Йөграыслөн көра дадювъяснас ветлан туйыс воглөм воргаөн и нуөдис сэтi Эжваланыс.

Ки вомлөс кыза выль лымыыс ньөти эз пурмөд додьсө, да вөлыс зэлөдчывтөг и рөдтис топыда нин таялөм туйөдыс, эз шкоркйөдлы мудзөмсьыс. Доддяс сувтөмөн и нөджъялис Бияр водзисө, да өдйөыс сылы и коліс, но кутис на асьсө ырсьялөмсьыс, вөвсө кык кокйив вөтлөмсьыс: атшвайөдан сійөс водзвывтө, нинөмысла на, да колана дырйийид и сувтас.

Чомкостыс эз на и коль, векняліс да помасис пожөма вөрыс, козья визьөбө туйыс кежөдис да регыд мысти и вайөдис Эжва дорас, лэччөдис ловпуа да пөрысь баддя сьөрт вылас. Ортсыас, восьсаинас, петтөдз на Бияр сувтөдис вөвсө да чеччыштис додьсыс, мед гусьөн на и видзөдлыны, оз-ө көнкө кодкө тыдав.

— Мый нө?— вөтөдис сійөс Чив.

— Сідзи. Гашкө, кыйөдчөны да.

— Татөн?

— А кытөн нө?!— дузгысьліс Бияр.— Сыктив вомыс тыдалө и туйыс син уланыс. Эжва вомөныс.

— Сідзтөкө,— эз и дөзмы Чив. Восьлаліс водзөджык да ляпмуналіс, кежис сайөдө. А соось, буракө!— горөдис джын вомөн.

— Локта,— лөньөдис сійөс Бияр.

Эжва мөдарас туйыс катөдис ляпкыдик кыркөтша видз вылө да кежис веськыдвылыс, сука петөм тусяпуяс сайө. Сэтөн, тусяпуяс саяс и сулаліс, тыдалө, көра дадювыс: быттьө косьмөм пожөм йывъяс, мыччысьлісны чукыльөсь вожа сюръясыс көръясыслөн.

Эз на лэдзлы Бияр синсө мөдлапөвсьыс, виччысис на ас кежас, мед эськө петкөдчыліс кодкө йөграыс, а Чив синма-лөма нин Эжва катыдсө да индис долыда:

— Со! Кытөн ягыс кышалө!
— Мый?
— Нель тшын сюръя! Морт өтиён на оз во!
— Аддза.
— А нинөм и жөйявны! Вөтлы вөвтө!
— Энлы.
— Мыйла энлы?
— Мед эз пышйы, коді сэн дадювнас, да шызьөд мукөдсө.
— Мый нө, шызьөдас кө? Полам наысь?
— Розьөдласны ньөвнас! Асьтө ни вөвтө он вайлы гор-
тад!

— А кызди нө сэсса?
— Гусьөн кызкө.
— Кызди?
— Ме ог на төд!— пузьыліс Бияр.
— А позьө өд кодлыкө... өтилы... эсті... выліті вуджны
Эжвасө. Сэсса туй вылас и петны да паныдавны йөграסө пыш-
йөмсьыс.

— Позьө.
— А тасянь уськөдчынысө юөр сетны. Тышкин чернад
кутшөмкө пуө дай.

— Кос пуө, мед гораджыка кылө.

— Но! Сідзи и вөча!

— Он, ме ачым.

— Ме чуйді да?!— лөгасис Чив.

— А менсьым пиөс виисны! Адасьыс меным ас и!

Дузьялан и коли сэсса Чивыс, а Бияр собис бадьяс костө-
дыс бура ылөкодь да сувтліс веськөдыштны ловсө, и петіс Эжва
вылас. Синсө сійө кыркөтшас и кутіс, кытчө катөдіс туйыс,
тусяпуяс вылас. И удитіс бусйысьны лымъяс, кор тыдовтчис
йөграыс сылы мышкөн да кывтыдас на водзпөрсө и видзөдліс.

Юрсө лымсьыс муртса лэптыштөмөн, син пөвнас и кыйөдіс
Бияр йөграыс бөрся. И мыйөн сійө вешйис кыркөтш дорсьыс,
саяліс бөр тусяпуяс саяс, чеччис да мый өдйө вермис уськөд-
чис Эжва мөдарас. Джуджыд кыркөтша нин сэті вөлі, некытчө
и кутчысьлынытө, да ковмис лэччыштны увланьыс сы весьтөдз,
кытөн ошалісны кырдалөм пожөм понөлыс. На отсөгөн и кы-
пөдчис кыркөтшас да петіс туй вылас. Эз нин ков өні гусьө-
насьнысө, да лудны и кутіс кыыс тышкыны кутшөмкө пуө, пер-
йис черсө тасма козьянсьыс. И воис сэсса йөвтөм нин, сизь
розьяса, лөзөдз косьмөм да төлалөм пипу дінө. Чер тышнас

тотшыкштöмысь и кувакыліс гыркöса пипуыс, а вынөн куч-кöмсьыс увкмуңліс да чездаліс, быттö чардөн лыйöмысь, муртса асьсö Биярöс эз дойд. Öти кузь да кыз дзав туй вомöныс и усис, потшис туйсö.

Водзö Бияр эз нин и мун сэсса, виччысьны сувтіс киас шыпуртнас. И регыд кыліс горзöмсö йöграыслысь, кыклысь на öта-мöднысö вежмөн, да көръясыслысь туй вывтыис öдйö чапасьöмсö. А кык көр и вöлöма дадювас да асьныс йöграыс кыкөнöсь, и руксісны нин быттö көръясыс лешмöмысла, лолалан руныс водзвыланыс и пуркйис. Зурасьтöг, лючки и сувтісны сэсса вомöна дзавйыс водзö. Биярлы сöмын и колис воськовтны сайöдсьыс, да дадьсьыс на и кераліс кыкнан йöграсö. А мед оз вежны сэн синсö, шыблаліс шойяссö пуяс костас. Сэки и воисны вöла-доддясыс, да йöймылісны көръясыс вöвъясьсыс полöмысла, тайкö ородчасны, кутнытö он вермы.

— Пуртыд эм!— горöдіс Чив.— Яй вöчин дай!

— Лок, вöч!— горöдіс Бияр. Аслыс сылы, сöмын на виис кык морттö да, эз нин ков начкысьöмыс. Да и көръясыс, бöрдана синмаöсь, ойгана вöліны. Морттö вины, гашкö, кокньыд-джык на пемöстö дорысь.

Чив сэсса и вундаліс көръясыслысь голясö. Вештіс туй вывсьыс дадьсö да дадь вылас и лэпталіс мыгаяссö¹. Шыбитіс вöрас пипу дзавсö. И вöліс юаліс чуймöмөн:

— А көнөсь нö йöграыс?! Кыкөнөсь вöліны да?!

— Ме ог тöд,— сетчыліс шмоньыслы Бияр.

— Он тöд?! Гашкö, чомъяс дорасöсь нин-а?!

— Соось. Пуяс костас.

— А-а!— лөнис Чив.— А, сідзкö, и водзö! Пемдам!— ыззис бөр зэв öдйö.

Ёна мудзыс вöвъясыслы эз на и сюр, ньөръявтöг на рöдталісны, ылöдз тыдалан, пашкыр пожöма ягö петкөдіс туйыс, веськыдаөн и нуөдіс пуяс костöдыс рудалысь нель чомйыслань. Матö чомъяс дорас и сувтöдіс Бияр вöвсö, но эз на котöрт, а виччысьліс Чивсö да куим емдінсасö. И шуис налы:

— Айуловсö, колökö. Гырысьсö. А мукöдсö энö лысьтöй вөрöдны. Мед олöны.

Торъя шытöг и локтісны, да йöграыс, буракö, эз и кывлыны ли инö эз и пуктыны, чайтісны, асланыс сэн кодъяскö ветлöдчöны. Некод тай некутшöм чомйысь эз и мыччысьлы-а.

¹ Мыга — туша.

Өти чом ыджыдджык вөлі мукөдсьыс, паськыдджыка да джуджыдджыка и зэвтөма, да сійөс аслыс вылө и бөрийс Бияр. И эз сорассьы, пырис сэтчө да: трундितысь бипур мөдарас пукаліс нюз ныра Сюг да вөлаліс пөвтор вылө кын көр яйсө; сыкөд орччөн пукаліс кага мездора ичмонь да буретш нёньөдіс кагасө; а кодкө, ань мыгөра, сулаліс мышкөн чом пыдіас, мыйкө сэн ноксис, да Сюлаыс и вөлөма, бергөдчис да. Медводз сійө и вежөртіс, кутшөм могөн воис Бияр, сайөдіс аснас Сюгсө да бипур вомөныс и воськовтіс, лэдзчысис Биярлы кок улас да пондіс ырзыны:

— Ой, эн сійөс ви, менө ви! Менө ви, менө! Эн сійөс ви! Аслад өд пыид! Видзөдлы чужөм вылас! Он аддзы, векни чужөма, нырыс кузь и? Мылышты, верман кө, мылышты! Мед оло!

— Мылыштлі нин ме сійөс өтчыд! Сэки, ичөт на вөлі да, вөлөйылысь вирсө юис, а өні пиөйлысь, ас быдтөмылысь, ловсө босьтіс. Мед и вештысьө!

— А сійө нө абу пи тэныд? Сыысь и пөтлан?

— Мед виө,— сувтіс Сюгыс.— Локтөма нин, да сідз оз мун.

— А тэ нө сідзи ветлан?

— Ме йөз муад эг на сітасьлы!

Кок улас на вөлі Сюлаыс, да сійө и видзис Биярөс Сюгыслөн пуртысь, эз судз Сюгыс сутшкынысө, сьыліас и көсйыліс да, лаз юрийывсө сөмын и кырыштіс. А мөдысь сутшкөмсө Бияр эз нин виччысь, вештіс кок пөвнас Сюласө да суйліс шпыурт йывсө Сюгыслы кынөмас. Ойзигтыр и ласкысис сійө.

— Кодөс нө нёньөдан? Нылөс али пиөс?— быттьө нинөм эз и вөч лөксө, юаліс Бияр ичмоньыслысь.

— Пиөс,— ырөстіс сійө.

— Но... нёньөд. Мед быдмө,— бур вылө моз и шуис Бияр да петіс чомсьыс.

А Чив да куим емдінсаыс ывлаас нин сулалісны, эштөма нин налөн уджныс. Нельнан чомсьыс сыркъялөмөн бөрдөмыс и кыліс. Сьөлөмтө косялө, он вермы кывзынытө.

— Мунамой!— кевмана чезыртчыліс Чив.

— Мунам,— вочавидзис Бияр.

Кык көр мыгысла сөмын нин и сувтісны, да пемдандорыс на воисны бөр Сыктыв вылас, кытчө ректысьлісны. Аслас вөладодьнас и кайліс Бияр Вожайыслөн да Адасыслөн шойясыс-

ла. И сөвтчисны да вөрзисны. Эжва вылас нин, ичөт ю вом дорын, биасисны да колялисны войсö.

Колис верөстөгьд, да во дай мөд Шонаыс чорыда кутіс асьсö, серамсö он кывлы. Пиыскöд, Давкöд, вöлі сөмын и гаж-мылас, вольпась вылас быгльöдлөмөн кутлас да окалас сійöс. Сэссия, буракö, и öдіс да письтіс колөмыс, мед эськö и асьсö кодкö быгльöдлас, абу на öд рушмөмыд ни косьмөмыд кызь арөс бöрад, ворсö на вир-яйыд. А овкöджсаыскöд кодкöдкö кырсапны ли Öльöкыскöд гусьöнасьны эз и лысьт дай зывöкыс на босьтіс, гашкö. Бияр вылө, аслас айкаыс вылө, и бурасис сэссия, тыдалö, вирнас. Водзпöрсö шогысла на быгтьö топöдчывліс, медтыкö сөмын ышлолалыштны, а бöрыннас и ниртчавны пондіс, дэльöдны сійöс. Коркö ывлаас сувтöдіс да пель нёнсьö курччөмөн нёнъыштіс.

— Эн ышмы!— тойыштіс Бияр, эз эськö лёкысь да.— Садьтö тöд!

— А кулөмыд сэтчö да!— синваыс и скöрыс öттшöтш пөталіс Шонаыслөн. И муныштіс сэссия да эжа вылас кымыньөн и усыкöдчис, сыркъявны кутіс бöрдігтырйиыс, ыштöкö висьöм босьтіс да оз лэдз.

Асьсö Биярөс и нюкыртіс сэк ойгөмыс. Локтіс да кыпöдіс Шонасö, такöдіс кутлөмөн, инö и пуктіс сылысь ань шогсö. Став ловьяыс тай, коді энъыс, нойччылö, а сійö нö абу ловья лов, оз гыавлы сьлөн вирыс?

Мамыслань, Ниаыслань, и кыскöма вöлі Шонасö, да лөсьы-да кызіник и вöлі сійö, кыті колö каръя да кыті колö нюдз, лөгъявтөм шыльыд чужöма и. Вежыс и пөтіс Биярлөн сы вылө, да эз кö монь вөв сійö... Юр яндзимыс нин и кутіс Биярөс Шонасö вөрөдөмысь.

А сійö луннас и юр яндзимсö вунөдіс. Куртны да чөвтны мунісны ас чукөрнас, гортаныс Öльöкөс и кольöдісны пывсян ломтыны. Лун шөр бöрас пöжны и кутіс шондіыс, зэрсö пычкыны, да пөрччысис, видзөдö, Шонаыс улыс дөрөм мыгөдзыс, сідзикөн дырөкö куртіс, а сэссия буз-баз пыраліс ты гуранö да пөрөдчыліс на сэтчö. Яй бердас ляскысьбөм дженьыдик дөрөм мыгнас и пондіс уджавны, петкөдлыны, кыті сьлөн кутшөм.

— Кыськö тай эм!— тоткыштіс, кылö, Унаыс, бöрсяныыс и вöлі куртö да, но сійö быгтьö эз и кывлы.

Зэрмытöдзыс йылавны коліс Биярлы панөм сабрисö, век-

нбодчыны да нбөръявны, а синмыс Шонаыс вылө и ылаліс, дай матысмыны на кутіс сійө, сабриланьыс и вайөдіс турун лөдзсө да.

— Мый нө вольөдчан? — шуис Бияр.

— Эн видзөд дай.

— Абу өд синтөм. Виртөм ни.

— А мед и сукмылас вирыд! Со, колөкө! — бергөдліс Шона туплөс бекъяса бөрсө.

Войтасигас нин эштөдіс Бияр сабрисө, көтасьөм туруннас и йылаліс бөръя пинь костсө, сы вөсна мый эз и вермыв лочкисө уджавны, изъявліс ки-коксө Шонаыслөн дзерөдөм бөрын. Öтигор и кутіс вежөрас, кызди эськө шедөдлыны сійөс ки улас да мед некод оз төдлы. Гортаныс воигкежлө дась нин лөө Öльөкыслөн пывсяныс, да сэтчө кө эськө кыздкө лөсьөдчывны вежмөн...

Коз улө дзебсисны шливган зэрсьыс, и Бияр котөрөн локтіс да сувтіс, а Шонаыс дөрөм мыга на и сулаліс да петіс коз увсьыс, чатрасьны кутіс кияссө шевгөдлөмөн, ыштөкө лэббө.

— Юртө кө нин пөжөма-а, абу на ыркалөмыд! — дөзмөмөн шыясис Уна. — Кынмөдчыны колө!

— Кынман! — вочааліс Шона. — Кунва кодь зэрыс да!

— А вежсьы, этштө төд! Со кос паськөмыд!

— Энлы!

Эз на дзык пыр и дугды Шонаыс аслас ышмөмысь, кобөмсө на зэрыслысь быттбө виччысис, да гегдөма нин и пуксис пыжас гортаныс мунігөн. Сьніс эськө, да эз нин, буракө, шонавлы, тіркмулніс йирмөгсьыс.

Куа ты дінас, вадорас, виччысис нин Öльөкыс, да воөмөн тшөтш и юаліс сылысь Бияр:

— А пывсяныд нө?

— Дась. Öдъя и.

— А ме талун медводз! — шуис Шона. — Мед ог висьмы! Айка, тэ ме бөрын!

— Мун сэтгысь! — вомаліс сійөс Уна.

— Мед! — нюркнитіс Бияр.

Петіс сэсья Шонаыс пывсянас да гажмис быттбө сэтчө, дыр эз кут локны.

— Рытсө сөйө! Ассьыс и миянлысь! — чушгьяліс нин Унаыс.

— Кольмис кө-а, — дольыштіс Бияр.

— Куйлө! Вөтлы, мун да!

Руж и лоис Биярлы Унаыслөн ыстөмыс, петіс пывсянас. Чайтіс, пасьтасьö нин, гашкө, Шонаыс, да көджас пыртөдз на юалис:

— Кулөмыд али ловъя?

— Ловъя!— пывсян пытшсьыс на шыасис Шонаыс.

— А шедін өд!— пырис көджас да шуис Бияр.— Дзерөдчан вөлі өнтай-а! Со пө, колөкө!

— Со, колөкө!

— Он нө пов?

— Полас кодкө тэысь!

— А пыра өд, пөрччыся да!

— Пыр!

Та бөрын Бияр овны тшөтш и кутіс Шонаыскөд. Дерт, гусьөн-а. И во нин лоө гожөмнас.

Ачыс төдіс, кор коліс видзчысьны сьөктөмсьыс, да нинөм вылө сэк эз и сибөдлы Шонаыс. Но, буракө, вунөдлөма ли сорассьөма лун-мөдөн, и кынөма со! И нинөмөн он мездысь!

7

Сьөкыд уджсө, ытшкан-чөвтансө, Öльөкыс нин бергөдіс видз вылас, да Биярөс эз и нуөдлыны, горт овны кольөдлісны. Кутөмөн кутіс сійөс Унаыс видз вылас мунөмысь. Кодкө лунө на тойыштіс ичөтөс моз, мед оз зыныгы.

— Мун сэгысь!— шуис.— Эштылан на асьтө жугөдлыны, коркө бурдлан кө.

— Эг нө бурд нин?

— Пөдөма на лолыд. Ыпкан сэтөн!

Торъя удж, лунтыртяөс, эз и сетлы Унаыс, да жөвьялөмөн да очсалөмөн и кольліс сэсся Биярлөн луныс, ыштөкө вошөма нин олөмсьыс, нинөм оз ков. И тойыштөмыс Унаыслөн бур вылө на сылы и лои: аддзис аслыс уджсө — пыж кодйыны. Төвнас на вайліс пипу чинтассө да кырсьылыс лым сылігас, сэсся висьмис да эз на и матыстчыв сы дінө, и со пырис синмас. Кокан кодь черөн пондіс босьтыштавны пипу чинтас пытшкөссө. Вой кежлас, мед оз шыгырт да топөд восьтөминсө, ва кисьтыліс кодйөм тырыс.

И талун Бияр кодйис пыжсө. Мудзтөдзыс нин тотшкөдчис да вожалаөн и пуксис пыж пу вылас. И лэбач вуджөр сәки шлывмуніс мышку сайсянныс, кысянь шондіыс усис.

Чатөртліс юрсө видзөдлыны да тивти варышөн и чайтіс лэ-
бачсө вомөна съод визьторъяса морөсысла. А ай көк вөлөма.
Пуксис пожөмө керка водзас да пондіс урсасьны, лёкөс ту-
навны. Идлөн йикиөн пө виньдылө, шулөмаөсь, а виньдөма и
быттьөкө, оз нин вермы гожөм шөрнад мичаа көкнысө, да кур-
залө ракаысь на мустөма.

Ньөввужысла и пыраліс Бияр гортас, мед сибөдчыны ма-
төджык да лыйны пежас, мынтөдчыны юр вылас туналөм-
сьыс, а петіс да эз нин аддзы пожөмсьыс: лэбзьөма нин
кытчөкө, некөн матын оз шыасьлы ни. Лёксө, артмө, и вайис,
воліс да. Кисьыс та бөрын и усис Биярлөн уджыс. Босьт-
чыліс на пыжсө кодыныны, да синмыс и кыис пөрийөдлыны ку-
тісны, сапйөдлыны кутіс чернас коканөн моз.

Эз-ө мыйкө видз вылас ло, сы йылысь медводз и мөвпыш-
тіс. И чайтіс повзьөмвывсьыс, мый Давыс, гашкө, чорыда
дойдіс асьсө, коксө чегис ли синсө перйис. А сэсья и чег-
сьыліс на Бияр, ёвкмунліс сьөлөмыс, медся нин лёксө инө пук-
тыліс да: а йөграыс кө волісны да водзөс виалісны, коді ки
уланьы шедіс?

Видз вылас ветлыны и ызийөдіс сійөс, видзөдлыны аслас
синмөн, лоис эз мыйкө сәні. А он на и во сэтчө поднад, он
кө варччы Куа ты виссө, да лэччис Куа ты дінас, кытөн куйліс
кымынён важ пыжыс, чери кыяныс. Тулыссяньыс нин шонді
водзас косьмөмысла потласьөма вөлі сирьыс, да выльысь дзи-
жавтөг эз нин и шогмы пыжыс ва вылас лэдзнысө. И ковмис
кайлыны сир туисысла да чукля пома көрт беддысла, песты-
ны би да дзижавны гөгөрыс пыжсө.

Лун сьөмөсыс сьлөн та вылө и муніс. Юрсө лэптывны эз
эштыв ноксьөмысла, а видзөдліс сэсья, кытөн нин шондыс,
да, вөлөмкө, рыгыя вылө нин катовтө, Куа ты мөдарас югөрсө
кучкө. Та вөсна и босьтіс падъялөмыс, да эновтчис видз вы-
лас ветлөмсьыс. Гашкө, нинөм эз и ло сэтөн, а мунас
повзьөдчынысө? Дай регыд нин локтасны сэтысь, сюри нин,
төдөмысь, мудзыс.

Куа ты кывтыдас синмөн и пуксис Бияр виччысьлыны, кор
тыдовтчас вис вывсьыс петысь пыжыс. Тшынасьөмысла да
паськөмнас сир көрсө кыскөмысла лөддзыс да номйыс эз и
дөзмөдны сійөс, да лөсьыд и вөлі пукавнысө. Сөмын тай пеж
көкыс эз и вошлы төд вывсьыс, ыштөкө юр весьтас и лэ-
баліс. Мыйлакө өд воліс, пуксьыліс керка водзас да курзаліс
на сэтчө!

Висигас на, садьтөгыс куйлігас, волёмаось корны Биярөс отсөг вылө, локтө пө нин Сэпөыс да. А Емдінас кө нин воис, лэдзисны да? Ывсөдліс комисө няньнас да пыртөдаліс? И сьөлөмыс сэтчө и потіс Памаыслөн? Сідзи кө өд лон, и татчө, Овкөджас, воасны, тшөктасны жө Биярлы пыртчынысө, сьөд Кростоссө окавны. Кыгчө сэки? Йөграө пышъяс, виис Сюгсө да? Асьсө мыйкө вөчас?

А эз на бур водзын воы көкыс!

Ен сыкөдөн, ставныс на дзоньвидзаөсь да дольдөсь, Шонаысь өтдор, воисны видз вывсьыс, сы вөсна мый войдөрлунъя ытшкылөм турунсө куртөмаось и чөвтөмаось, сабриө вайөдөмаось. Өтнас Шона и жугыласис, мудзвывсьыс моз ышловзылыс гуся шогысла. И вермис кө эськө Бияр, пыр и мездіс сійөс шогсьыс, да абу өд жель татшөм шогыд, он перйы кызкө.

Тыдалө, Емдінас на мыйкө и лоис!

Ставныслы Бияр эз висьтав көкыслысь волөмсө, вомсө эз калькөдлы, а Унаыслы висьталіс и шуис на, мый кывтлас Емдінас бөра-водза, дась дзижаліс нин важ пыжсө.

— Сэссия тэ и вөтлан Сэпөсө? Ланьт!— вомаліс Унаыс.

— Мыйла ланьта?

— Сёөнось, колөкө, рочыс.

— Мед!

— Мед тэныд! Эн на кув, да мед эштан сэтчө?

— Ме ог төд.

— Он кө, и вод.

— А роч улас нө мед веськалам?— бертовтіс асланыс Бияр.

— А кыгчө нө лэбзян? Көні бордйыд?

— А сыысь и песовтө сьөлөмтө.

— А энлы на инө пуктив дай,— такөдіс Унаыс.— Эз на Енмыс көктө ыстыв. Ачыс на сідзи курзаліс пөдөм голянас.

— Код төдас сылысь.

— А вод лок! Сибөдла, көсьян кө. Верман он?!

— Видлам.

Рыгтив керкаас на, пыдіас, узыліс Бияр өтнас, да сэтчө и пырисны, и ырийөдіс сэссия Бияр асьсө Унасө малалөмөн да лочки на и дівкөдіс сійөс, весиг лолыс эз пөдлы.

— Морт нин да,— шуис Унаыс, чеччис да.— Узь, эн дзугльөдлы асьтө. Гашкө, видз вылө тшөтш аски.

Гажмылөмсьыс бурасьөм да лөньөм сьөлөмөн и шевгөдчис Бияр кымыньөн да сетчыліс унмыслы, но унмыс эз на лок, и

тіньсидзё чөвсьыс кыліс, кызди пучой гужгө-йирё керка керсө. Кымын во нин керкаыслы, некыт на абу рөшкыд, пучой розьсө ни сьылі вундан гагсө на некысь эз казявлы, и со тэныд, ыштөкө коркө регыд на и лэптис керкасө кырссьытөгыс куйлөдөм уль керийсь. Дөзмөмвывсьыс кучкалыштис шамыр-нас сэтчө, кытөн гужгис пучойыс, да лантылыс сийө и бара пондис дзуртны кер пытшкас. Сэки и аслас Биярлөн юрас дзуртыштис мөвпыс, мый эз на сідзи волы көкыс и пучойыс тайө оз сідзи гужгы, зэв на и ыджыд лөк водзын, төдөмысь. Мый лоан ло, а колө кывтлыны Емдінас!

И асывсө Бияр эз и виччысь. Лөсьөдчис гусьоникөн да гөрд асыка югыд вой улас и вөрзис гортсьыс.

Лун шөрыс на эз вөв, мышку сайсяньыс на кучкис асьяшондйыс, воис Бияр Емдінас. Эжва дорас, өзынсьыс вылынджык, и нөрыс лажмыдас, сяр улиас, кык воча чукөрөн сулалісны йөзыс, да улыс чукөрыс ыджыдджык и вөлі видзөднысө, айуловысь на дай. Сэпөыскөд локтөм рочыс, буракө. И ачыс Сэпөыс-ө-коді сулаліс улыс чукөр водзас зібйив пөвъя, шондй водзас бергөдлөмысь югунаваліс пөвйыс выя виж рөмөн.

Сувтны өзынас Бияр эз и лысьт да пырис Емва вомас, зібьясьөмөн катіс Пама орд весьтөдзыс. Сэтөн, изья да сөйөда ляпкыдик кыркөтш улас, сулалісны нин куим кузь пыж да кыкөн кодьяскө буретш вевттылісны джодждөраясөн пыжъясас мыйкө сөвтөмсө. Вуджөрыс Биярлөн усьліс на вылө, да сы серти и казялісны сийөс, пыркмунлісны да жергөдчылісны, а сэсья пыр и лигышмунлісны, төдісны да. Пилим вөлөма өтиыс, а мөдыс Сер, кодкөд Бияр чимисө кыбны катліс Емваса ыджыд кось вылас.

— А Бияр айка да!— нюрөстис Пилим.— Бурдөмыд.

— Бурді.

— Лок, кутла пыж ныртө,— чукөстис Сер.— Эн на кө вунөд менө?

— Эг. Нэмөс бурө пукта. А мый нө, кутшөм мөгөн нин татчөсө?

— Колө пө тай. Со Пилим и воліс. Видз вылысь нуөдіс.

— А сэсья кытчө?— Пилим вылө и чөвтыліс Бияр синсө.

— Ылө,— вочавидзис сийө.

— Пама и?

— Ачыд вежөрт.

— Синмыд өд вөлі. Аддзылін воча сулалөмсө,— нурбыльтіс Сер, быгтьөкө эштөмасө нин и висьталіс.

— А мый нө, сетчинныд нин?

— Кодкө оз водзась!— нюкыртчыліс Пилим.

— Мыйла оз? Эз нин кольны тыр сьөлөма комиыс?

— Усины. Туглимын да кытөн. Чивыд и.

— Ой-ок! А мед, инө, Енмыс гөгөрын и лэбалө югыд лолыс!

— Кодөс майөг йылө сатшкисны да.

— Мыйысь?

— Енсө вежтөмысь.

— Камар да коді и колины. Коді ачыс рочыс дор.

— Сэтшөмсө өд тшөтшөдалін дай!— кутчысьліс Бияр шыпуртас.

— Ставсө он тшөтшөд!— вочааліс Сер.— Йөзыслөн нянь былө нин синмыс.

— А оз нө пышйөм ло тадзтө Памаылдөн?

— А гуө нө мед пырас?— векыштчыліс Пилим.

— Кутшөм гуө?

— Сэтшөмө. Кодйин да сюръя сувтөдін чужъянаөс, сэсся вевтин лыскөн да тыртін перйөм мунас, розь сөмын колин пырнытө. А сэсся пырин да чужйин сюръясө, и пөдін сэтчө, оз нин ков вежны Ентө. Эжва кузялаыс нин сэтшөм гуыс.

— Сідзкө и, вөлөма на веськыд комиыс!

— Ставыс абу и чукля.

— А бурджык и гуө пырны пышйөм дорсыд!— килькувліс Бияр.

— Сідзтө дзикөдз комисө гуалан. Ис ни ру. А мед Енмыс төдө кытөн, а лоө Памаыс!— кайтіс Пилим.

— А Емдіныд мед рочыслы кольө? Сэпөлы да?

— Эн ызгы!— курыда өлөдіс Сер.— Ветлы сэтчө, нөрысас, да ассьыд тадзтө юав.

— А ог нө, чайтан, ветлы?

— Сійөс тай и шуа.

Кайис Бияр кыркөтшас да нөрысас на джынйөдзыс кымын да сэтысянь и муніс тусяпуяс костөдыс нөрыс лунладорас, петіс муртса улөджык квайт сюра ыджыд сярсыс, комиыслөн му выв пассьыс. Сувтліс да ышловзис сярис былө синмөн и лэчис коми чукөрыс дінө.

Улынджык сулалысь рочыс унджыкөнөсь и вөліны, ставныс айулов да нөшта шыпуртаөсь, и уськөдчисны кө, пыр и

кералісны эськө, коді паныд сувтіс, но асланьыс көкөдөмөн на, буракө, көсйис венны Сэпөыс, кыв шуас и лэптылас вы-лөджык зіб йыв пөвсө, кытөн виж чужөма съод Кростосыс тыдаліс. И эз пычкысь, а лючки сёрнитіс коминас, олома нин айка моз лайкыда, ыштөкө эз и төв йыв морт вөв комиыслы.

Но и Пама сылы эз сетчы пановтны кывнас, мед и дількунліс курыдысла да лөгысла. Мыктавтөг да сорасьлытөг на чөвталіс-шуаліс Сэпөыслы воча, дойданаджыка и, да асьсө на сійөс йөрмөдліс тшөкъявтөдзыс. И эз жө тыртөм киа сулав Памаыс, кутіс дзавъяс вылө зэвтөм еджыд дөраа бөдь. Сера вөнъясөн на вөлі мичмөдөма бөдь йывсө, а еджыд дөраа вылас гөрд вапөн¹ меж сюр сер² гырыся мавтөма. Му пуксьөмсяньыс нин тайө серыс комиыслы ас да муса, да сьөлөм сетны, төдөмысь, и лэптіс Пама татшөм сера дөрасө.

Вермаяна сёрни шөрас и веськаліс Бияр. Сөмын водзпөрсө кытшлаліс на синнас, коді кытөн, да пель пырыс и лэдзаліс Сэпөыслысь да Памаыслысь кывнас бертласьөмсө, а сэсья кывзыны и сувтіс.

— Миян асланым Енным! — пузьөмысла вешкырөсь вом дөрөн кайтіс Пама. — Абу яя ни вира, а востым кодь! Лолыс сылөн и востымасьбө, да ловнас и муно миян вылө! И сылөн нывсяньыс, Зарни Аньсяньыс, и локтам ми, комиыс, му пуксьөмсяньыс нин. Енмыс ордса и лоам ми, рочыд серти кө!

— Сөр! — чезыртчыліс Сэпө.

— Ме сөра?! Садьөс вошти да?!

— А некод нин... вежөра войтырыс... оз ов өні ас Еннад, коркөянад! Со нин кодлы юрбитөны!

— Мун, юда питө эн көвъяв миянлы! Синмөс нин вежө!

— А сійө оломсө пуктіс, став му выв лөксъыс вештысис.

— Пуктіс кө нө, мыйла бөр ловзис? Лы ни ку некөн?!

— Енмыс Айыс и босьтіс дінас.

— Ай кутшөмкө! — нюмыртчыліс Пама. — Мамсө руөн и тырсьөдліс да!

— А Зарни Аньтө нө кыгысь Енмыд босьтіс? — водзөссө шешмунліс Сэпө.

— Аслас лолысь и босьтіс да лэдзис муас. И мортө сэсья и пөри сійө, кага вайысьбө. Сійөн и, кулан да, шойыд муө и колбө, а лолыд Енмыс дінө лэбө. Абу кө из сьөд пежалөмыдла.

¹ Вап — краска.

² Меж сюр сер — свастика.

— А сё Ен нө, тэ ногөн кө, сэтөн?

— Ме ог төд, кымын.

— Сийо и эм. Быд енколаын тай тырыс пу ен-а!

— Найо му выв еньяс. Асьныс миян кодбось. А му югыдсө кутысбыс, асланымыс, өти миян. Абу куим рочыдлөн моз: ая-пиа дай вежа лов на. Мун, эн мыччодлы тани съод Крестостө, веж оз пет! Пöлалан, сувтöмыд да!

— Ме пöлала?

— А он нө? Ен вежны сöмын и локтин? Он Мöскуаыдлы шежлав?

— Мый?

— Коми мусö!

— Мöскуаыдлөн сідз тырмö муыд.

— Этша на тай, сы мында нин көповтис да, кодлысь вер-мис. Нимсö аслыс йöзлысь босьтис и. Коркө эськө горзбодас жö да! Вирөн!— киргыштіс Пама.

— Эн урсась!— вомаліс Сэпö.— Да асьтö сöмын и төд! Со кымынөнось бөрвылад. Долойд налы нэмсö виньгыртны?

— А коді нө йöрмөдіс няньсбыс? Эз Мöскуаыд?

— А сэсса и оз! Кыв сета. И ошкуйсьыд на дорьяс!

— Ошкуйтö эн висьтав! Ошкуйыд волас и мунас. А Мöс-куаыд кыгчö ситасяс, сэтчö и сувтас. Мун, няньтö коль да! Вештысям, уна-ö шуан!

— Ме эг вузасьны лок!

— Эн, дерт! Синкымув и корсян да Крестосыд помысь.

— Қутшöм синкымув?

— Öтлаавны Комисö Мöскуаыд дінö.

— Колö ёна съод вөр шöрыд!

— А ёна и колö! Мыйöн нө Мöскуаыд Литваад да Неме-чад вузасьö? Мый Мамайыдлы Ордаад нуалö? Оз кыйдöс куяс, миянлысь чиркалöмсö? А öнi мед эськө сы улö и веськалім! Эн нө сылөн мөгөн лок? Соськы!— дзерөдіс Пама.

— Ог,— вочавидзис Сэпö.— Но локнытö и бурөн позбö.

— Бурөн?! Со мыйта бөрвылад рочыс, да бурөн?! А кы-мынöс енколасö пасыйин да сотін? Кымынöс комисö виин, майöг йылас на пысалін?

— Ми некодöс водзвыв эгö вөрзбөдлöй. Сöмын водзöс босьталім.

— Сюсь тай кылан! Йöз ордö локтан да став олöмсö пут-кыльтан, да мед эськө кыв оз лысьтны шулыны, кийөн оз лысьт-ны волыны тэ вылö? Энлы, тиньгылас на пеляд ёрöмыс налөн,

кодi ловьявывсыйд гуад пырис! Чайтан, Кростосыд ставсьыс и мылыштас?

— Кростосыд некодос оз тойышт, кодi висьтасяс. А эг на ме быродны лок комито. И тэ мындато шогала жо комиыс восна.

— Ланьт!— нерыштiс Пама.— Няйт гуран синнад!

— Кутшом эм!

— А рочо кыскома. Айыдо. Вирнад и ставнас! Мамыд коми-а.

— Мый но ко?

— А сора вира ачид, да мед эсько и ми тшотш сорласим, сэсса рочо и порим. Сы выло и петомыд!

— А петкодла со!

— Мый?

— Видзодлы!— шуис Сэпо да паськодiс шуйга кисьыс еджыд тубыр, кузьчышпян кодыос. Кольквиж рома вапон сэтчо воли мыйко пасьялома, и пасьясыс мунiсны на выло, кутшомьясос Бияр аддзылис Памаыслон серакуысь.— Абу коми ногон гижома?

— Мый сэсса?

— Лыдды!

— Айо по тай миян... ен югыдас эмой...

— Водзо!

— Тырмас, пежалi нин синмос.

— А эн и шу, мый сорала рочо да комисо. Ме, ковмас ко, лолос на пукта комиыд восна. И зонпоснисо комион быдта, гижны и лыддысьны велода.

— Дугды!— кезыйлис Пама.

— А он аддзы, кытчо Эжваыд визувтo? Оз саридзо, паськыдинo?

— Но?

— А тэныд эсько мед подлан вадйон моз и олисны комиыд!— кывберитiс Сэпо.

— А Москуа кок улын но сомын миянлы олoмыс?— сыркмунлис Пама.— Асьным ого вермой?

— Сэтшoма и верманныд! Сьолoмыд бoрдo!— дольыштiс Сэпо.

— Мун, эн кырнышась!

— А нинoм и тшетшыйсьны! Помo он воы!

— А мун татысь, дай помo воам!— мурoстiс Пама.

И мунны ыштoкo и вoрзис Сэпо, мышкoн бергoдчылис да

зіб йыв Қригоссө тшөтш бергөдліс, но вешійыны, вөлөмкө, сөмын и кәсйө. Шуис рочөн мыйкө налы, кодъяс матын бөрвылас су-
лалісны, да өтпырйөөн и вешійсны, тыдөдісны тыра сепысь-
яссө. Мед петкөдлыны, мый туся нянь сэтөн, Сэпө гумовтис
өти сепысысь ид китыр да гылөдіс бөр чуньяс костөдыс.

Садьсө таысь и воштылісны комиыс, кодъяс Пама саяс су-
лалісны, шызылісны да педзикасьны и күтісны, водзөджык
на Памаысь петалісны, поньяс моз чукөстөм и виччысисны
сувтөдөм сингьясөн. И эз сөмын аныс, айуловыс тшөтш.

Пама вылө и видзөдліс сәсся Бияр вирыс дзулькйөмысла
да казяліс, кызди сьлөн вазисны сингьясыс, югьялан бусөн че-
пөсйис бандзибьясас пөсьыс, а лолыс сьөмдалөмөн нин и шедіс.
Юрыс усян яндзимыс нин и сөйис сйөс. А оз нө сөй, кор
аслад войтырыд аслад син водзад тәнө вузалө?!

Шуны нин, тыдалө, и кәсйыліс Сэпө, мед сувталасны пырт-
чынысө няньыс вылө вежгөмөн, зіб йыв Қригоссө мөдлы сетіс
кутнысө, ачыс куим Енма пөв босьтис да ышловзис морөс тыр-
нас, и падмис мыйлакө нөрыс йывланьыс синмөн. Вөлөмкө,
сэтысь котөрөн ләччөны — Камар да Матө, а на бөрся
вөтчөны Пилим да Сер.

Югдінсянныс на, рочыс дорө пышйөмсянныс, петкөдліс Ма-
төыс вир лөгсө Биярлысь. И важөн нин эськө босьтис сылысь
ловсө, шедліс кә ки улас. Но син улас на сөмын и шедліс. И
Камарыс тшыкөдіс Биярлысь вирсө, ывла югыдсө син водз-
сыс сайөдіс мустөмысла. А налы, кок улын таялан кык лә-
льөыслы, и восьсө, буракө, олан гажыс. И важөн нин төдсаөсь,
буракө, вөлөмаөсь.

Керка джоджысь паськыдджык костөн на сулалісны рочыс
да комиыс, да шөракостас кымын и сувтисны Матөыс да Ка-
марыс, ньөти нин повтөг Пилимсьыс да Серсьыс. Каля серөн
мичөдөм еджыд дөра бовйөдліс киас Матөыс. Енколасьыс
кутшөмкө ен вылысь юр кышөдсө нетшыштөма да мыйкө пөжөс
и мөвпыштөма, кальөг вомөн чикъялө нимкодьясла.

— Со, енколасьыд босьтис! Саридз Айка вывсьыд! —
павкөдліс Матө кысыс дөрасө. — А со, косявла нямөд вылө
да лоа ог мыйкө?! — эз вермы ки помсьыс, да пуртнас вун-
далөмөн дзайөдліс ен кышөдсө. — А со, колөкө, выль өксы-
ныд! — индіс Камар вылө.

— А ме важөн нин абу паныд Мөскуаыдлы! Пыртча став-
ныд водзын да Вежа Айкаө и пукта сйөс! — копыртчыліс Ка-
мар Сэпөлы.

— Ловныд мед косьмас кыкнанныдлөн!— тшөкъялөмөн шуис Пама да тильштис синсө.

— Ланьт эськө тэ!— вувзъысьліс сы вылө Матө.

Дорйыны Памасө и чепөсийс Бияр да тасалис ыштөкө шыпуртнас Матөсө водза воськовсьыс, а сэсся сөтыштис сылы восьса сьыліас, гольган улас, да сьөлөмыс бурмөмысь и лигышмунліс некодысь видзчысьтөг. Сэки буретш и ырыштчис Камар Бияр вылө да муртса кө и эштөдіс сійөс, эз кө Пилим вевъяв суйсыны Камарыс водзө да кучкыны аслас шыпуртнас сылөн шыпуртө, а сэсся пельпомнас зэркнитөмөн уськөдны Камарсө кок йывсьыс гатшөн. Ичөтдырсянбыс чөжөм лөгсө нин и лэдзис та бөрүн Пилим, юр вемыс петтөдз куимысь керыштис Камарыслы юрас.

Пыртчыны да няньысла нин и локтөма, ыджыд кудйөн киас сулалис емдінсаыскөд Нира, водзынджык на мукөдсьыс. А син водзас и виис Пилимыс кок шонтысьсө, да чегсьыліс сэтчө, летмунліс да уськөдіс кисьыс кудсө. Ойөстис сэсся ывла тырнас да дув-дов восьлалис пиыс дінө, пондіс лөвтны:

— Ой, кодөскө тай быдт! Ой, морт виысьыд тай вөлөма! Ой, му пырыс мед мунан! Ой, перьяла синтө!

— Мун, чужья!— тойыштис Пилим мамсө.

Уськөдчыны и дасьбөсь, вөрзялісны рочыс да паськөдчалісны кытшыльбөн, тшөктөмсө нин и виччысисны Сэпөыслысь. Но сійө эз на ышты вынөннад вермынытө, горөдіс мыйкө да өвтыштис кинас бөрвыв, и рочыс бөр косалисны дөзмөпырысь. Кыис нин налөн и лудіс вөчлыны аслыныс гажсө.

Емдінсаыс повзъылісны да бөрыньтчалісны, но эз на дугдыны дзөрнясьөмсьыс, ковмас кө пышйынысө.

— Энө полөй! Енмыс ая-пиалы ни вежа лолыслы оз ков вир водзөсыд!— юрнас гогиөдлөмөн горөдаліс Сэпө.— И меным оз ков! А коді көсийө пыртчыны, выль Енмөн овны, ме дорө и локталөй.

— А няньтө... сеталан?— юалис кодкө аньяс писъыс.

— Бөр ог ну!— вочавидзис Сэпө.

Локтавны сы дорө и кутісны емдінсаыс, пыр этшаджыкөн кольны воддзаинас, и гежөдыс нин чөвтліс Пама вылө синсө да йөжгыльмунліс яндзимысла. Ёсь пытшкөс дойысь моз и нюкырмунліс сэсся Пама да бөрддзис шытөг, бергөдчис да тувччаліс нөрыс йывланьыс, аслас вөвлөм оланінланьыс. Пилим да Сер да нөшта витөн кайисны ськөд тшөтш.

Өтнас Бияр и коли некодарө инасьтөмөн.

- Лок, пырта!— чукөстис сійөс Сэпө.— Медся водзөн!
- Мый бурьысь?
- Сідз, югдінса да. Мамöлы тöдса и.
- Ог,— кайтис Бияр.— Коми Еннас нин кула.
- А он и бурьысь, сідзтö кө!
- Тшөкты, мед кералöны. Со тай кымын кеслачыд!
- Шедан!— нюмсерөн вальскыліс Сэпө.

Аддзö нисбö оз ывласö и кок увсьыс мусö, дувзбöдіс Бияр нöрыс пöлöныс асывладорас, пыжыс весьтö. Зурасявліс тусяпуыс вылö да гырысьсö нин и кытшовтіс, а поснисö варкөдіс. Сідзи и воис нөптовөн таялөм ордымөдзыс, коді лэччөдіс Пама ордсянныс Емва дінас. Видзөдіс ывланьыс, а сылы вежөнөн буретш и лэччисны Пама да ськөд мунысьясыс. Вуж доз, джуджыдöс да кыз вугъяös, ассьыс коркөя кыёмсö, буракö, и кутис Пама веськыд киас. Рузумьысь вевтöдыс вешйшгöма вöлі доз дорышсьыс, да мыйкö зарни рөма и тыдаліс коластöдыс. Зарни Аньыс, тöдöмысь, и вöлі сэтөн.

- Эн лөгав!— сувтіс Бияр дінö да шуис Пама.
- Ог, Вежа Айка!
- А ен югыдсö миянлысь некод на оз мырдды!
- Оз!
- И востымасьны и кутам Коми му весьтас!
- Кутам!

Мойдын кодь мича да эскана артмис Памаыскөд сөрниыс, да мед оз ло дөзмөдчана мунысьясыслы, накөд тшөтш Бияр эз на и лэччы Емва дінас. А найö лэччисны да саявлісны кыркөтш улас и регьд мысти мыччисисны ю вылас нин: куим пыжөн, зібьясигтырйи, мөдөдчисны Емва катыдыс. Шөркост пыжас, вуж дозсö мездорас босьтөмөн, пукаліс Пама.

Кымын ылыстчисны пыжъясыс, сымын гырдөдіс Биярлөн син водзас, ыштөкө вирөн и бөрдіс. Куньтыра синмөн и тапсьөдіс сөсся сійö аслас пыжыс дінö да сулыштис на сэтөн читкырасигтырйи, вөлись кывтіс Емва вомас. Сэки синбөжнас и казяліс вылö енэжас пуркйысь сьöd тшынсö. Видзөдіс Емдін нöрыс вылас, а кыклаын нин сэтөн ыпъяліс ынбиыс: сярсö озтөмаось да енколасö, буракö.

Мича и сулаліс луныс, да тшын сюръясыс дыр эз разавны, ёна нин вылын өтлаасисны өти визьбөбö, войывланьö бөжнас.

Тадзикөн тшын йыв и кайис комиыслөн ас шодъя олөмыс.

Воддза эбөстөгүд да нөшта усьөм сьөлөмнад мырдөн сьөкы-
да и катис Бияр. Аскинас лун шөр гөгөрыс сөмын воис Овкө-
джас. Унаыс гортас вөлі, абу мунөма видз вылас, пеласис пос
помас лёк иса ошуркиөн.

Кезйөдіс Биярөс иссьыс, да нинөм эз и шу, пырис керка-
ас, рытывладорас. Уськөдан мудзысла нюжөдчис дісек вылас.
А Унаыс муртса мысти и пырис да пуксис юр водзас, но чөв
оліс. И кор нин Бияр дугдіс ыпкынысө, юаліс няргөмөн:

— Мый нө, кытчө вошлін?

— Емдінө. Төдан, да юасян.

— А мый сэсса сэтөн?

— Путкыль. Абу нин Памайд.

— Кытчө нө лои?

— Нуис юрсө.

— Кытчө?

— Емва катыдыс. Гашкө, и мусюр саяс.

— А сэсса... Маюр пилы и шедім?!

— Сылы. Мөскуаыслы да. Енмыд мөд лоө и.

— А пыртчам нө?

— Ме ог,— шуис Бияр.

— А нинөм нө оз и вөчны?

— Майөг йылө пысаласны.

— А пышьям нө бара кытчөкө?

— Ме ог.

— А кытчө нө воштысям?

— Гуө пырөмөн тай кувтысьөмаөсь бур йөзыс.

— Кутшөм бур йөз?

— Коді абу сетчөма. Коді Енсө абу вежөма.

— А гуө нө пыран, локтасны кө?

— Ог өд пежөд ачымөс.

— А тэ кө пыран, и ме пыра!— кайтіс Уна.

— Гашкө, и медбур,— дольыштіс Бияр.

Вөрзвывнысө нин дышөдіс сылы атшалөмысла, да дісек вы-
лас и ланьтөдчис, рытөдзыс сэн ымзаліс. Эз на, гашкө, и садь-
мы, да рыгтясө сөйны Унаыс чуксаліс. И унзіль синмөн на и
панясис. А чеччис пызан сайсьыс да ывлаө и петіс, ыштөкө
сідзикөн, лолалыштны. И керкаводзвывса вөрас, пожөм дзиб
колясас, и пырис. Гөгөр ляпкыд виж нитшка вөлі, сөйөдөс и
висьталіс мусө, а лыаин эськө коліс, еджыд ялааин. И сюрис
сэсса сывтырґья пожөмьяс кытшысь. Мам пожөмыслөн вужля
рөчыс нин и тыдыштіс шөрсьыс, гырысьджык корґья да дзур-

тан кос ялаа. Сьёлём вылас Биярлы и пуксис сюрёминыс: абу сэтшөм ылын керка дорсяньыс, но абу и сэтшөм матын, ньöти овтөмөн оз на коль керкаыс, да мед оз и кут каститчыны гуыс.

Аски асывнас, кыкөн Унаыскөд и колисны гортаныс да, гусö кодйыны и мунис Бияр. И лунтыр сэсса кодйысис, лунъясö сёйыштны сөмын и волис гортас. А Унаыс бара песласис, мый аддзёма песлалансö, сийös и чукөртöма, весиг посводзсьыс важ дждж вольössö вöли көтөдöма. Кösйис, буракö, мед нинöм эз коль ас бöрас нйтыс да сьодасьöмыс.

Эштан вийö нин воис рыгнас гуыс, вевтсö нин Бияр тыртис перйөм лыанас, сьökыд вылас ялась эжасö на гөгöрсьыс шыблалис, понйыс аслас сы динö ризöдис, а сэсса и Дав мыччысис, тырöма лолыс.

— Мый нö, воинныд нин видз вывсьыд? — юалис Бияр.

— Воим. Ми мамökөд.

— А Юваыс да Öльökыс нö?

— Колины на.

— Мыйла колины?

— Кутчысьлыны, — гызьылис Дав.

— Кутчысьла ме налы! — кидös вöчлис Бияр. — А понсö нö мыйла лэдзин дом йывсьыс?

— Никсö да. Мед котралö.

— Арыс сылы воас котравнысö. Мун, ме локта.

— А мый нö тайö тэнад?

— Гу.

— А кутшөм гу? Мыйла?

— Гуавны мыйкö арнас.

— Мый?

— Сёркни да мый да. Сола тшактö позьö и. Шомöснас.

Лэгтін тулыснас, и сёй.

— А-а, — эскис Дав.

Но висьталöма на мамыслы аддзылөмсö, и рытсёрнас нин, водöма нин вöли Бияр рыгтыв керкаас, пыдиас, виччысьтөг Шона пырис сы динö да атөдөмөн и юалис:

— Мый нö, кутшөм гу сэтчö кодйин, вöрас?

— Гуасьны.

— Мый? Кодös?

— Ачымös, — висьтасис Бияр.

— И öгнад сэсса...?

— Öг, гозйөн.

— А ме?

— Тэнад пи быдмө. Кынөмад на дай... кодикө.
 — Мый нө кө?!
 — Олан, пыртчан да! Гашкө, аски локтасны.
 — Сьольшта!— ырөстис Шона.
 — А некод на оз вөтлы тэнө му вывсьыс!
 — Пытшпиыд и вөтлө!
 — Ланьт!
 — Ог, тэкөд тшөтш и кувтыся! Эг нө муса вөв?
 — Вөлін,— шуис Бияр.— Öнi и!— шамыртис Шоналысь
 кисө да пуктылис аслыс морөс вылас, а сийө окыштіс водзөссө
 пель дінас.

Унмыс Биярлы сәсса эз нин и волы, да сідзикөн, вальма-
 сиг, и куйліс, ыркмунавліс полөм русьыс, ыштөкө пезин октіс
 ас вылас да лыйөмсө нин и виччысис. И коркө вой шөр бөрас
 нин Унаыс пырис сы дінө.

— Узян али олан?— увгыштіс.
 — Ола.
 — А тшөтш нө миянкөд... Шона ййыс? Ачыс шуө!
 — Тшөтш.
 — А некод на оз суй сийөс гуас!
 — Ог пө тай пыртчы.
 — А пиыс нө оз мамтөг коль?
 — Быдмас. Абу нин неньпом. Юваыд кольө и.
 — Ой-ок-ок! Ас гажсьыд на он вермы кувнытө!
 — Кольчы дай, он кө вермы!
 — Ог! Сэки тэ бөрся вөтчи и öнi вөтча!
 — Эн и лөвт, инө!
 — А кор нө эськө?
 — Аски.
 — Аскиыд со нин, мича югыд!
 — Мунасны видз вылас да.
 — А пывсян на өд ковмас ломтывны? Пывсянтөг нө? Веж-
 сьытөг да?

— Он,— шуис Бияр.— Сөмын мед лун шөрөдзис-а.
 Куимөн асывнас и мөдөдчисны видз вылас — Öльөк, Юва
 да Дав. А пыжас пуксьытөдз на, тшапөдъяс дорас, Бияр
 сувтөдліс Давсө.

— Волы, мыйкө висьтала,— чукөстіс.
 — Мый?
 — Пукта мыйкө посводз джаджйө, а локтан бөрти видз
 вывсьыд и босьтан. Мед тэнад и лөө!

— Но.

— И эн вошты! И эн сет некодлы!

— Ог.

— И эн вунёд, кодлөн лоан!

— Ог.

Медбөръяысь сійӧ луннас перйис Бияр бисӧ аслас биванас, ломзьӧдӧс пывсянсӧ. Бӧрыннас, пывсьынысӧ нин колӧс петны да, пӧрчис тасмасӧ пуртнас и биванас да пунктӧс поводз джаджъяс.

Эз на и вӧв лун шӧрыс, нуӧдӧс сійӧ Унасӧ да Шонасӧ вӧрас, гу дӧнас. И суйсисны сэтчӧ кольӧм розбӧдыс да шы некод эз и сетлыны. Чужйис Бияр пыкӧд сюръясӧ, да вевтыслӧн варкалӧмыс и кывліс.

А Куа тыыс да Овкӧджыс и ӧні на эм. И Чудов Мишӧ Васька сэтӧн олӧ да зэв нин важ бива видзӧ, вушгъялӧм гӧна кучикысь. Но тыдалыштӧ на уна сӧ вося серыс — вывланьӧ виджадӧн куим пиня азьласыс.